



सफु चवहः- पं. श्री बद्रीरत्न बज्राचार्य  
प्रकासक-सानुमाया तुलाधर खिचापुखू ये





# श्री स्वयम्भू महापुराण

चवमि

श्री वद्रीरत्न वज्राचार्य

मन्त्रसिद्धि महाविहार

(महाबोड येँ)

बिष्वाःयाःक्ष

राजा वज्राचार्य

मन्त्रसिद्धि महाविहार

(सवल गल्ली येँ)

पिकाक :

सानुमाया तुलाधर

स्विचापुस्तु येँ

(पानोरामा होटेल)

पिकाक :

सानुमाया तुलाधर

बिचापुखु येँ

(पानोरामा होटेल)

ह्वापांगु- १००० दोलि धा:

ने. सं. ११०३ बछला थव स्वांयापुन्ही

देव:

मणिक मान चित्रकार

थाकुथि :

नेपाल प्रिन्टिङ्ग प्रेस

त्योड त्वा: येँ



शुगु श्रो ग्वयम्ह महापुगण निगुल्कं प्रदान यानादीह-



शतजीव श्रीमती सानुमाया तुलाधर





## भूमिका

स्वयम्भू उत्पत्ति निदान कथाया प्रथम अध्यायस जव श्री याके जिन श्री राज बोधिसत्त्व स्वयम्भूयागु उत्पत्तिया खँ न्यँसेलि उपगुप्त भिक्षु अशोक महाराजायात कना बिज्याःगु खँ थुगु अध्यायलम् वर्णन याना तःगु दु ।

पर्वस्थाने श्री शाक्यमुनी बिज्यानाः मैत्री बोधिसत्त्वयात विपश्चि तथागतं पिना बिज्याःगु दोछि हः दुगु पलेस्वांया दथुइ स्वयम्भू लिपा दया वह घयागु खँ थुकिइ वर्णन याना तःगु दु । विपश्चि तथागतया पालय् श्री शाक्यमुनी सत्यघमं बोधिसत्त्व नाम प्रसिद्ध जूगु खँनं थन वर्णन दु । अले बगु इलय् थव नेपाःदे नागवास देह खः धँगुनं थुगु अध्यायं क्यं ।

द्वितीय अध्यायस विपश्चि तथागतं पिना बिज्याःगु पलेस्वांया छःने श्री स्वयम्भू गबलय् दयावल ? घकाः मैत्री बोधिसत्त्वं विन्ति यासेलि श्री शिबि तथागतया पालय् स्वयम्भू दयावल, गुगु इलय् जि क्षमंकर घयाह्य बोधिसत्त्व जुया च्वना घकाः श्री शाक्यमुनी भगवानं आज्ञा जुया बिज्यात । अले श्री स्वयम्भूयागु पूजा यानागु फलया वर्णन याना तःगु दु ।

तृतीय अध्यायस मैत्री बोधिसत्त्वं नागवास देहनय् च्वंगु लः सुकाः गबलय् थन नगर बसय् जुल ? घकाः श्री बुद्धयाके न्यना बिज्यासेलि श्री शाक्यमुनी भगवान- जि पर्वताक्ष घयाह्य बोधिसत्त्व जुयाच्वना बलय् श्री विश्वभू तथागतया पालय् मञ्जुदेवाचार्यं कुरूवाः, च्ववाहाः, सूर्यघाट व गोकर्णयागु गुँ तछघानाः लः सुकाः घर्माकरयात राज्याभिषेक बिया मञ्जुपट्टन घयागु नामं नगर प्रसिद्ध याना थकूगु खः घका आज्ञा जुया बिज्यात । थव खँ थुके उल्लेख याना तःगु दु ।

चतुर्थ अध्यायस श्री शाक्यमुनी भगवानयाके नेपालय् नगर निर्माण जुसेलि गुगु इलय् तीर्थ स्थानत उत्पत्ति जुल ? घका मैत्री बोधिसत्त्वं न्यना बिज्यात । उगु इलय् श्री शाक्यमुनी भगवानं आज्ञा जुया बिज्यात- हे मैत्री ! मनुष्य तभ्गु आयू ४०,००० पौदोल दे दुगु इलय् क्षमावति नगरे क्रकुछन्द तथागतयाथाय् जि ज्योतिपाल घयाह्य बोधिसत्त्व जुयाः जन्म कया च्वनागु जुल । उगु इलय् श्री क्रकुछन्द भगवान नेपालय् स्वयम्भू दर्शन यायेत बिज्यात । अनंलि बसपोलया सबंसंघ, सकल लोकपिन्त बाग्मति तीर्थ व केशावति तीर्थ उत्पत्ति जुगु खँ कना बिज्यात घयागु थुगु अध्यायस बियातःगु जुल ।

पञ्चमोध्यायस मणिचूड पर्वतय् मैत्री बोधिसत्त्वया प्रतिक मणिलिङ्गेश्वर, मणिचूडया बाखें ॥१॥

गगन मञ्जया प्रतीक गोकर्णय् गोकर्णेश्वर । गोकर्ण राजकुमार उद्धार जुयावंगु बाखें ॥२॥

समन्तभद्रया प्रतिक चांगुइ किलेश्वर वैतराग । थन कुलिक नागराजायात दमन याःगु खँ ॥३॥

## ( ख )

वज्रपाणिया प्रतिक कबन्तिइ कुम्भेश्वर वैतराग्य सर्वपाल बंद उद्धार जूगु खं ॥४॥

मञ्जुश्रीया प्रतिक फपिइ (बुँइ) गतेश्वर । आखः सिवें साख साःह्य मञ्जुगतया बाखं ॥५॥

सर्वनीवरण विस्कर्म्मिया प्रतिक फपिइ (पुखुलिइ) फनिकेश्वर वैतराग यन ओदियान आचार्यया बाखं ॥६॥

क्षितिगर्भं बोधिसत्वया प्रतिक च्चबाहा गन्धेश्वर वैतराग । यन ओदियानयात गणेद्योनं विघ्नयाःवःगु ॥७॥

खगर्भं बोधिसत्वया प्रतिक आदेश्वर्य विक्रमयश्वर वैतराग । यननं ओदियानं अष्ट सिद्धिया प्रभाव  
स्वःगु बाखं ॥८॥

पुक्तयं अष्टवैतरागया खं वःपुण्यतीर्थं (शोकर्णय्) तक्षक नाग उद्धार जूगु बाखं ॥९॥

शान्त तीर्थं (गुह्येश्वरी) महाद्यो पार्वती उद्धार जूगु खं ॥१०॥

शंकर तीर्थं (शंखमो) साजवाः गोपाल उद्धार जूगु खं ॥११॥

राजतीर्थं (राजतीर्थय्) कर्णशायंबाह्या काये अलक्षणाह्य उद्धार जूगु बाखं ॥१२॥

मनोरथ तीर्थं (त्वष्टा दुवाः) मनमय्य उद्धार जूगु खं ॥१३॥

निर्मल तीर्थं (भवाखुनि) यन वज्रपाद आचार्य उद्धार जूगु बाख ॥१४॥

निधान तीर्थं (लख तीर्थं) जुबाद्यो दीनचूड उद्धार जूगु बाखं ॥१५॥

ज्ञान तीर्थं (करः छुसि) अज्ञान सिन्धु जुजु उद्धार जूगु बाखं ॥१६॥

चिन्तकर्मणि स्त्रीर्थं (टेखु दुत्तान) सांघात द्रोहयाःह्य कोटिकर्ण सायंबाह्य उद्धार जूगु बाखं ॥१७॥

प्रमोद तीर्थं (दानगा) दानासुर दैत्य उद्धार जूगु खं ॥१८॥

सुलक्षण तीर्थं (आजं आ) अन शौड देया जुजु, मन्त्री व महाजनया कार्येपि अलक्षणत उद्धार जूगु खं ॥१९॥

जय तीर्थं (नेखु ह्य) क्षान्तपुर्या कक्षा दैत्यती उद्धार जूगु बाखं ॥२०॥

युलि खंत पञ्चमोध्यायस दुय्याका तःगु दु ।

षष्ठोध्यायस धर्म श्री मित्र नामसंगितिइ च्चंगु द्वादशाक्षरया अर्थ न्यनेत नेपाःलप् वःगु तथा वं अक्षिषेक  
कार्सेलि श्री स्वयम्भूयात धर्मंजातु वागीश्वर घका नामं प्रख्यान्त जूगु बाख दुय्याःगु दु ।

सप्तमोध्यायस शान्तिकराचार्यं धर्मंजातु वागीश्वरयात त्वपुयाः वयाद्योने पात्राकार चैत्य दयेकेगु इच्छा यासैलि  
इन्द्रादि देवतापिसं चैत्य दयेका व्यूगु खं तथा वसपूर आदि देवता आराधना याना स्थापना याःगु बाखं उल्लेख  
याना तःगु दु ।

अष्टमोध्यायस अक्षिष्य नेपः शान्तय् न्ह्युदं तक्क वा मगाइ तिनगु शान्तिकराचार्यंभा आज्ञानुसारं गुण-  
कामदेवं कर्कोटक नागराजा ह्याः वा गाय्कोतिनि घकाः भगवान् भविष्यवाणि याना विज्याःगु बाखं उल्लेख  
याना तःगु दु ।

नवमोध्यायस शान्तिकराचार्यंभा अक्षिष्य बन्धुदत्त जुजु नरेन्द्र देव, सेवक सलित ज्यापु बनाः कामरु कामाक्षं  
लोकनाथ ह्याः १२ बें तक्क वा मगाःगु दुभिन्न मदय्की तिति घका भविष्यवाणि याना विज्याःगु व मेगु २१ नीछगु  
उप-तीर्थया नांत उल्लेख याना तःगु दु ।



## ( ग )

दशमोऽध्यायस ब्रह्मभिक्षुनीयागु खँ, स्वयम्भू पुराण कनेगु नियम, न्यनेगु नियम व कनागु, न्यनागु, न्यंकागु, न्यंके बियागु, च्चयागु, च्चके बियागुया महिमा कनातःगु जुल ।

नेपालय् बौद्ध धर्मया अनुयायीतसें श्री स्वयम्भूयागु श्रद्धाभाव यानाः वयाच्चंगु सकसियाँ स्यूगु विषय खः । उलि जक मखु बखत-बखतय् जीर्ण उद्धार जू पत्तिक श्री ५ पृथ्वी नारायण शाह आदि जुजुपिसं व बिदेशया लामा गुरुपिसं श्रद्धाभावं ग्वहालि व्यूगु खँनं सकसियाँ स्यूगु खँ खः । वहे श्री स्वयम्भूयागु विषययात कयाः च्चयाततःगु पुराणहे स्वयम्भू पुराण खः ।

थ्व स्वयम्भू पुराणय् श्रद्धालु भक्तजनपि तथा प्रजागणपित राष्ट्रियता भावना व धार्मिक भावना जागृत यायेत नाना तीर्थ-उपतीर्थयागु महिमा कना तःगुलिहे स्पष्ट जू । जव देशया विद्वानतय् चित्तय् धार्मिक भावना व राष्ट्रिय भावना जागृतयायेगु इच्छा जुइ, तव थजाःगु ग्रन्थ रचना जुइ । तथा लोकय् प्रचार जुइ । वहे खँ संस्कृतिरूप पुस्तां-पुस्ता ल्यना च्वनी ।

अतः भगवान् बुद्धं भविष्ये नेपाल मण्डलय् गुणकामदेवया पालय् जुइगु दुर्विषया खँ तथा नरेन्द्रदेवया पालय् दुर्विषय जुइगु खँयात कयाः ऐतिहासिक परंपरा मिलय् मजू, थ्व ग्रन्थ न्हूगु रचना खः धकाः लाञ्छना लगय्पायेगु इतिहासकारतय् स्वभाविक जूसां धार्मिक तथा राष्ट्रियता व संस्कृतयातनं कुठाराघात यायेगु समान जुइला घेगु धार्मिक बिचारं स्वयेबलय् बांलाक सीदु ।

धर्म व राष्ट्रियताया न्होने इतिहास घयागु छुं तःघगु विषय मखु । गनतक समाजया हृदय धर्म दु राष्ट्रियता दु, तबतक धः चाय् मोल्हयानं बिदेशय् च्वगु जगनाथ काशी तीर्थय् मोल्ह वनेगु सिवेनं उत्तम भाषा च्वनी । सुं छह्य इतिहासकारं वःनं लाय्-लाय् बुझ्ये हालाच्चवसां समाजया मनय् द्वाहां वनी मखु । छाय्घाःसा स्वयम्भू पुराणयात धार्मिकतय्स इतिहास धकाः सुनानं घयाच्चंगु मदु ।

अले हानं स्वयम्भू शब्दया दार्शनिक गम्भिर अर्थयायेबलय् निर्वाण तथा आदि अन्त मदुगु स्वयम् थः थहांतुं उत्पत्ति जूगु कालातीत ज्ञानयात व्यक्त याना च्वंगु दु । थ्व बिचारं स्वयेबलय् थन कल्प कल्प न्हापा विपश्चि तथागतं पलेस्वां प्यूगु, अथेहे भेमेपि, तथागतपिसं पूजायाः व.गु तथा शाक्यमुनीनं थन नेपाल मण्डलय् विज्याना धर्मदेशना याना बिज्याःगु खँ समय तथा इतिहास नाप छुं सरोकार मदु । गुगु निर्वाण बुद्धपिनिन्हापानं दु, आःनं दु, लिपानं दैतिनि व निर्वाण साक्षात्कार याःह्य व्यक्ति न्हावले स्वयम्भूयाहे न्होने च्वना धर्मदेशना याना बिज्याःगु खः घंगु बौद्ध दार्शनिकतय् अर्थ खः । थ्व हे अर्थयात कयाः भगवान् गौतम थन बिज्याःगु छुं ऐतिहासिक प्रमाण मदुसां धार्मिकता व राष्ट्रियताया जागृत हय्त सुं विद्वानं च्वय् कनावंगु कथं दार्शनिक भावं थन बिज्याःगु दु धकाः घाल घाःसा वयात सुंनं राष्ट्रियता दुइ इतिहासकारं निन्दायायेवहः मजू ।

समयया परिवर्तनं यानाः यच्चूसे च्वंगु लः न्हाना च्वंगु, नाइसे च्वंगु फिदुगु बाग्मती, विष्णुमतीनं धौकन्हय् घः बिगु रुप काये छुं कल घंगु खँ दोहरे याना च्वने माःगु मदु । उलिजक मखु फिकाकां खुसि क्वाही वंगुलि यानाः खुसियागु बांलाक दयेका तःगु घाटनं भत्ताभुङ्ग जुयावंगु सकसियाँ स्यूगु बिषय खः । घाट मस्यकेगु सहरय् दुने च्वंगु तीर्थ क्षेत्रय् गणये जूगु थासय् फि कायेके मवीगु आदि खँ धर्म तथा संस्कृति रक्षायायेत च्वपिं व्यक्तितय्त व राष्ट्रियता जागरण हयेगु बिचार हुनि तीर्थ क्षेत्रयात सुझार बायेमाः धका अनुरोध प्रार्थना यायेमागु खँ मखु ।

( घ )

कीगु देशय् राष्ट्रियता व धर्म तथा संस्कृति दुह व लःये मिलये जुयाः छगूहे जुया चबंगु खनेदु । हानं शैवमत बौद्धमत आदियानं छुं भेद मनसे समान रुपं पशुपतिनाथ तथा स्वयम्भू दर्शन याना वया चबंगु खैन सकसियां स्पूगु बिषय खः । अज्यागु परिस्थितिइ खलबल जुलकि देशय्हे खलबल मजुइ धका धाय् फेमखु । अतः देश प्रेमि व्यक्ति तयेसं राष्ट्रियता, धर्म, संस्कृतियात रक्षायायेमा धैगु जिगु बिचाः खः ।

स्वयम्भू पुराणं धर्म, संस्कृति, राष्ट्रियतायात मतोतूगुलि जन समाजया यःगु खे सुनां मस्यु ?

अन्तय् बुजोगु धर्म ग्रन्थ प्रकाश याना दीह्य सानुमाया तुनाधर तथा आवालं परिश्रम बानाः भाषान्तर माना बिज्याःह्य पं. श्री बद्रिरत्न घज्याचार्ययात जी यक्व यक्व धन्यवाद लः ल्हाना च्वता ।

पं. श्री दिव्य वजू वजूचार्य  
पियूष वर्षी औषधालय  
मासंगल्ली, ये





# **Preface**

Jina Shree Raj Bodhisatwa had asked Jaya Shree about the origin of the Swayambhu; the description of the origin as told by Upagupta Bhikshu to king Ashoka has been narrated in the first chapter of the story of the origin of the Swayambhu.

It also gives an account of the prophecy made by Shree Shakyamuni to Maitri Bodhisatwa about the origin of the Swayambhu in the middle of the lotus with one thousand petals planted by Bipaswi Tathagata. At the time of Bipaswi, Shree Shakyamuni was famous by the name of Satyadharma Bodhisatwa. This chapter also shows that the then Kathmandu valley was a big lake habited by Nagas (Snakes).

In the second chapter, as a reply to the question of Maitri Bodhisatwa, "When did the Swayambhu come into being over the lotus planted by Bipaswi Tathagata?" Shakyamuni Bhagwan replied that the Swayambhu originated at the time of Shikhi Tathagata when he was known as Kshemankar Bodhisatwa. That chapter also gives a description of the (fruits) blessings due to worship of the Swayambhu.

In the third chapter Maitri Bodhisatwa asks the Buddha, "When was the city made by clearing up the water of the lake resided by Nagas? There upon Shakyamuni Bhagwan replied, "when I was known as Parbataksha at the time of Biswabhu Tathagata, a person by the name of Manju Devacharya cleared up the water by destroying the forest of Kuruwa, Chobaha, Suryaghat and Gokarna and established a city, made Dharmakar its king and made the city famous as Manjupattan.

Maitri Bodhisatwa asks Shakyamuni Bhagwan about the creation of the places of pilgrimage after the founding of the city of Nepal in the fourth chapter. Then after Shakyamuni Bhagwan explained, "Oh Maitri! At the time when human beings had a life of forty thousand years, I was living as Jyotipal Bodhisatwa in the city called Kshamavati at Krakuchhanda Tathagata's place. At that time Shree Krakuchhanda Bhagwan went to Nepal to visit Shree Swayambhu. Then he narrated to his community and to the people in general about the origin of the holy pilgrimages Bagmati and Keshawati.

## ( च )

The fifth chapter provides: —

- i) The story of manilingeswor Manichud, the image of maitri Bodhisatwa on the hill of Manichud
- ii) The story of the salvation of the prince Gokarna, Gokarneswor, the image of Gagangunj at Gokarna.
- iii) The story of the suppression of Kulik, the king of Nagas. Kileswor Vaitarag, the image of Samant Bhadra at Changu.
- iv) The story of the salvation of Sarbapal Vaidya, Kumbheswor Vaitarag, The image of Vajrapani at Kwonti.
- v) The story of Manjugarta, who preferred sweets to learning, Garteswor, the image of Manjushree at the field of Phampi.
- vi) The story of Omdiyen Acharya, Phanikeswor Vaitarag, the image of Sarbanibaran Viskambhi in the lake of Phampi.
- vii) The story of the troubles faced by Omdiyen due to the testing of god Ganesh.
- viii) The story of Omdiyen visualising the effects of Astasiddhi (mastery of eight skills). Vikramayaswor Vaitaraga, the image of Khagarbha Bodhisatwa at Adeswor.

Thus the fifth chapter accommodates things about eight Vaitarag & the story of the salvation of Takshaka Naga at Punya Tirtha, a pilgrimage at Gokarna; the story of the salvation of Lord Shiva and his consort Parvati at Shanta Tirtha, a pilgrimage at Guheswori, the story of the salvation of the shepherd Gopal by name at Shankar Tirtha, a pilgrimage at Shankhamo; the story of the salvation of the wicked son of Karna Sharthabaha at Raj Tirtha, a pilgrimage at Raj Tirtha; the story of the salvation of Man Mayaju at Manorath Tirtha, a pilgrimage at Twakha Duwaa; the story of the salvation of Vajrapad Acharya at Nirmal Tirtha, a pilgrimage at Bhacha Khusi; the story of the salvation of the gambler Din Chud at Nidhan Tirtha, a pilgrimage at Lakha Tirtha; the story of the salvation of the ignorant king called Sindhu at Gyan Tirtha, a pilgrimage at Karha river; the story of the salvation of Koti Karna Sharthabaha, who showed impudence and disobeyed his own mother, at Chintamani Tirtha, a pilgrimage at Teku Dobhan; the story of the salvation of the demon Danasur at Danaga; the

story of the salvation of the wicked king, minister, the sons of merchant of the country of Gaud at Sulakshana Tirtha, a pilgrimage at Bhajanga, and the story of the salvation of the demon the wife of Danasur, at Jaya Tirtha, a pilgrimage at Nekhu.

The sixth chapter incorporates accounts of the coming of Dharma Shree Mitra to Nepal to comprehend the meaning of the twelve alphabets mentioned in Namasangiti and the accounts of his being king of Nepal & making of Shree Swayambhu famous by the name of Dharma Dhatu Vagiswor.

The seventh chapter gives an account of how the gods including Indra erected the stupa as a fulfillment of the wish of Shanti Karacharya to cover up Dharma Dhatu Vagiswor and to make a bowl shaped stupa over it, & also provides accounts of the establishment of image of gods including Basapur, after invoking them.

The eighth chapter describes about the prophecy of lord Bhagwan as to how the Nepal valley will face drought for seven years and how Guna-kama Dev, as instructed by Shanti Karacharya, made the rain fall by bringing Karkotak, the king of Nagas.

The ninth chapter comprises of the prophecy of Lord Bhagwan as to how the twelve years long drought would be put to an end by Bandhu Datta, the pupil of Shanti Karacharya. king Narendra Dev and Lalit, a farmer serving the king, by bringing Lok Natha (the Lord of the world) from Kamaru Kamaksha; it also provides the name of twenty one upa-Tirthas.

In the tenth chapter are the story about the Chuda Bhikshuni and the highlights about the rules of telling and listening Swayambhu Puran and also the blessings one gets for telling, listening, making others listen, writing or making others write it.

It is known to all that the devotees of Buddhism in Nepal have been having great veneration for the Swayambhu. Apart from this kings including His majesty Prithvi Narayan Shah and Buddhists lamas from foreign countries have been donating for the renovation of the temple. Swayambhu Puran is the account of that very Swayambhu.

The description of various places of pilgrimages make it clear that the Swayambhu Puran intends to create religious and national feelings arise



( ज )

people in general and devotees in particular. When religious and national feelings arise in the mind of the learned people, such sacred books will come into being; then it will be made public and that very thing lives for generations in the form of culture.

Even though it may be natural for the historian to argue that the prophecies of Lord Buddha regarding the famine in Nepal during the time of Gunakama Dev and Narendra Dev are not borne out by historical facts and so argue that the present writing is a new product of imagination; it is conspicuous, if we look at it from a religious outlook, that such an attitude is detrimental to the religion, culture and nationality of our country.

History does not count much as do religion and nationality. So long as society has sense of religion and nationality, they can regard even trivial streams as great places of pilgrimage. The historians fail to have any impact on the society unless they incorporate religious and cultural values of a society. Religious people do not regard Swayambhu Puran as history.

The word Swayambhu has a philosophical connotation. It implies "Nirvana" (no rebirth) and also spontaneous and timeless knowledge. Looked at from this angle, the plantation of the lotus by Bipaswi Tathagat in times immemorial, similarly the coming of Tathagats to worship Swayambhu and Shakyamuni's coming to Nepal to preach religion have surpassed time and history. According to Buddhist philosophers Nirvana, which is there before the time of Buddhas, which exists to-day and which will be there for all time to come, has been realised by the person by preaching religion placing himself in front of the Swayambhu. In this sense, if a wise and learned person, ( with a view to what religious and national feelings ) based on the philosophic outlook given above strongly states that Bhagwan Gautam has been to Nepal, no historian with national feelings will be justified in arguing against that.

The Holy rivers like the Bagmati and Bishnumati with clean water & beautiful pebbles and sand have been virtually turred into small dirty streams. Apart from this, everybody knows that the nice ghats at the bank of the rivers have been destroyed due to the extraction of sands haphazardly. To safeguard the ghats and to prohibit extraction of sands at least from the

( ॐ )

holy places should be a matter of concern to those who want to protect religion and culture, and to renovate the holy places so as to augment religious and national feelings.

In our country nationality, religion and culture are inseparable. There is no religious strife, because Buddhism and Saivism are intermingled both Swayambhu and Pashupatinath are equally venerated. If this sort of balance is shaken, the whole country might have to face a grave situation. Therefore, I feel that we should do our best to safeguard our nationality, religion and culture.

Every body knows that Swayambhu Puran is very popular among the people as it is in tune with the religion, culture and nationality.

Finally my sincere thanks are due to Pandit Shree Badri Ratna Bajracharya who took up the strenuous task of translating the language; I would also like to thank Mrs. Shree Sanu Maya Tuladhar for publishing such a precious sacred book.

Translated by:  
Gambhir Man Bajracharya  
Sawal Galli Bhonsiko,  
Kathmandu.



## स्वयम्भू पुराण

स्वयम्भू पुराण हिमालयगयागु ग्रन्थ मखु, आपाल आपा न्हापायागु सफू खः । एव नेपाल मण्डल गथे जुया श्रृजना जुल घका वर्णन याना तःगु एव महात्म्य बौद्ध धर्मावलम्बीत्य् छे छे घासं न्हापा अति प्रख्यात खः । आः हेन नेपालया पौराणिक इतिहास चर्चितयस् स्वयम्भू पुराणया खंत त्वत्ते फैं मखु । वय्कपिसं एव नेपाल (आः काठमाडौं उपत्यका धया च्वंगु) भराय् घंगु पुखू ख । मञ्जुश्रीनं व पुखूया लः पित वृद्ध्याः दयेका तःगु देश घका च्वया हे वया च्वंगु दु ।

एव काठमाडौं उपत्यका छ्वाखेरं बाःहुला च्वंगु पर्वत माला अद्यापि दया च्वंगुलिनं एव घास न्हापा लखं जाया च्वंगु खें मखु घका गथेधाय् ? एव पुखू नागवास देह जक खने सिकें न्हापा एव नागवास देह नाप त्वत्वीक उत्तर पाखे ल्हासाया बछि भूमि दक्षिण पाखे भारतया उत्तर प्रदेश बिहार प्रदेशनं मल्माक उखे तक लख जाया च्वंगु जगु भराय् घंगु सागरहे खः घकान प्रमाणित जुया च्वंगु दु । लीपा लीपा प्रकृति रुप उखे घुखे जुयाः व सागरया लः उखे घुखे बाः वनाः सुना वनः, एव संसारे दकले तजागु सगरमाथा पर्वत दया वल, व सागर मध्ये नं दक्खी च्वना च्वंगु छ्वाखेरं पर्वत दुगु जूगुलि व लः मसुसे नागवास देह घका जुलला घका धाये मफुगु मखु ।

शाक्यमुनी गौतम बुद्धया सिकें छुहा न्हापायाहा विपश्चि बुद्धं व नागवास देहस पिना थकूगु पलेस्वांस ज्योतिरुप दयाः अति बालाना च्वंगु खनाः देश दयेकेया निनि मञ्जुश्रीनं लः सुका व्यूगु एव पुराणे वर्णन याना तःगु दु । विपश्चि बुद्धया लिपायापि शाक्यमुनी गौतम बुद्धयासिकें न्हापायापि बुद्धपि शिखि नाम तथागत बुद्ध व विश्वभू नाम तथागत व ककुच्छन्द तथागतनं एव स्वयम्भू ज्योतिरुप दर्शन याना वंगु खें च्वया तःगु दु । एव वर्णन व अद्यापी संसारे प्रख्यात जुया च्वंगु स्वयम्भू चैत्य, (गुगु चैत्ययात साक्षात शाक्यमुनीनं दर्शन यावःगु दु) या प्रमाणं एव सिद्ध याना च्वंगु दु कि बौद्ध धर्म नेपाले शाक्यमुनी गौतम बुद्धया सिकें न्हापायिसें दया च्वंगु दु । शाक्यमुनी गौतम जक हे बुद्ध धर्मया सास्ता मखु ।

स्वयम्भू पुराणया मेगु विशेष खें एव खः कि थुकी स्वयम्भू चैत्यया जक वर्णन याना तःगु दु । आः कीसं खना च्वंवि मूर्तित- वैशोचन, असोम्य रत्न खंभव, अभिताम्भव, अमोघ सिद्धि न्याहा ध्यानी बुद्धपि, अथेहेतुं मानकी, सोचनी पचनी, तारा आदि एव स्वयम्भू पुराणस गननं उल्लेख याना तःगु मदु । एव कारणं याना न्याहा ध्यानी बुद्ध व तारावि कल्पना याना तःगु सफूया सिवेनं गुलिखय् न्हापा स्वयम्भू पुराणया रचनाकाल जूगु ज्वीमा । न्याहा ध्यानी बुद्ध व तारा त उल्लेख जूगु दकले न्हापायागु सफू विद्वान आसांगया रचना याना थकूगु श्री तथागत गुह्यका खः अले आसांग किन्हेस दं न्हापायाहा खः घका आपालं विद्वान पिनिगु घाणु दु ।

एव तथागत गुह्यका सिकें न्हापायागु सफू मञ्जुश्री मुल कल्पसनं न्याहा ध्यानी बुद्धपिनिगु छुं छुं नसां मिसैजूगु मन्त्र त उल्लेख याना तःगु स्वयंबले व एव स्वयम्भू पुराणस न्याहा बुद्धपिनिगु धारे छुं भ्याहे मदुगु स्वयंबले एव स्वयम्भू पुराणया रचनाकाल वयान्ह्य खःला धेंथे च्वनाव । अथे खःसा बौद्ध धर्म ग्रन्थावलिस एव स्वयम्भू पुराण दकले च्वय् ज्वीमा । एवहे कारणं ज्वीमा स्वयम्भू पुराण सुनां च्वःगु, गवले च्वःगु गन च्वःगु कीसं न्हायने मफुनी ।

स्वयम्भू पुराणस अष्ट बैतराग, द्वादस तीर्थ महात्म्य, व उपतीर्थ व्याख्यान खण्डस च्वंगु थुपि खंत मूल स्वयम्भू पुराणस लिपा निपातिनि जुया वःगु जुद्धमाः । एव बाखं त आःयागु युगे, चौकन्हे ज्याखेले भवः घकानं यको

## ( ८ )

घावु द हे दई एव बाखत थीं कन्हें वनीबले न्ह्याऽपुन्य खं जक खः धकानं भापी जु हे ज्वी ! अथेनं छत्वाचा खं-  
 कीगु देशया आपालं तापा तापाःगु देशयागु बाखन सिमाय् चतामाघि सय्केगु गुई' (जंगले) पुख् मदुयाय् न्या  
 लायेगु बाखं (रूस देशया) अरेबियन नाइटस बाखत कीगु नेपाल देशय् आपाल न्ह्यापा दुहां वया च्वन । छकीहे  
 मध्ये गुलिसे बाखंत मचातसें व्वनेमागु घलःपतिस दुय्याकाः मचातय्त व्वंका वना च्वन । थुजाःगु अबस्थास कीगुहे  
 देशं मौलिक रूपं दया वया च्वंगु एव बाखंत पुनरावृत्ति याना प्रकाशन हयेगु मत्व मजूहे घायेमा । अरुला पिने  
 पिनेयागु देशया अजागु बाखंत व्वनमा .गु सफुतिइ दुय्याके स्वयेवले एव स्वयंभू पुराणस च्वंगु बाखं त नं व्वने माःगु  
 सफुतिइ दुय्याके छाया मज्यू ?

छगु निगु बाखत जा तच्चत हे बिचायाये बहू जू । थी कन्हैया युग खः शासक भोट बिचाः तय्येगु । थये  
 चुनाव प्रयासनं खःम्हेसितं भोट बिइगु मखुम्हेसितनं भोट बिगाः योग्य, अयोग्य, जू, मजूहानं शासक जुपा च्वनी ।  
 निस्पक्ष चुनाव मजू धका हालानं च्वनी । एव सन्दर्भे यक्वहे साहुमहाजनत किसिया न्ह्याः त्यू जूसां किसि इमित  
 मल्यसे मेम्हेहे छम्ह पुरुषयात जुजु तयइगु बाख थी कन्हैयापि राजनीतिज्ञतयेत आनं ध्वाचु नःगु बाखं  
 धका छायामाः ।

मन्त्र सिद्धि महाविहारया वज्राचार्य पं. बट्टी रत्न गुरुजुं प्रकाशन याये बहू ज्वीक थःगुहे भाषास च्वया  
 बिज्यागु एव सफू बद्योपान्त स्वया । वसपोसयागु एव क्षत्रस मे-मेगु सफूतन पिदने धुंकूगु दु । वसपोलया कुतः  
 मानय् याये बहूजु ।

थुजागु एव सफू पिकायेत मानव खचं ब्वबिया छूम्ह साहुनी श्री सानुमायाया धर्म चित्त खः धका न्यने दत ।  
 एव पास बक्कःयागु व धर्म चित्तयात मुनानं छिने फंमखु धवागु जिगु आशा ।

यज्ञमान पति बज्राचार्य

मरु, लाय्कू वही, ये



## च्वमि व सफुतिइ

### जिगु मनं खनागु छुं खँ

श्री धर्मघातु मण्डल स्तोत्रं शुरु जुया अनेगु ज्ञान गुणयागु कीसं सीकातय् माःगु खं परिपूर्णगु थ्व स्वयम्भू पुराण वसपोलं च्वया बिज्याय् घुंका साफे यानाः ल्हया ब्यूपि व ध्वाना आखःया बले प्रुफ स्वया ब्यूपिसं भचा भचा न्हूगु पहलं लंपुलि छाया द्युसां थ्व सफुती च्वंगु भाषा शैली पुलांगु पहयागु खने दु । आखः ध्वाना द्यूपिसं थ्व सफू ध्वाना द्युबले तच्चतं होस याना मन तथा आखः ध्वाना विया द्युगु खने दु । छायाघाःमा थ्व सफुतिइ आखगवः यक्वथाय् द्वंगु खने मदु । हानं थ्व सफूयागु ध्वाना आखः तःतः ग्वःगुलि मचातयेसं निसें कया ज्याथजिपि पिसं तकनं च्वने फंगु खने दु । अयेहे तुं आखःपात त्वयेक थ्व सफूयागु भाषा सरल जूगुलि आखगवः जक ह्यस्यूपि न्ह्याह्यसिनंनं थ्व सफुतिइ च्वंगु खँ ध्वीके फंथे च्वं । थ्व खँय् छुं शङ्का मदु ।

आः च्वमि पत्तिइ जिगु मनं खगु छुं खँ, वसपोल पं. वज्ररत्न ( बद्रीरत्न ) वज्राचार्यजु भौतिकवाद व व्यक्तिवाद “कुक्कुच्वंम्ह माछां खे तप्बीथे” तप्बी घुंकूगु इत्यनं थःगु धर्मयागु विषययागु ज्याखँय् दुना बिज्याःगु छु जुयाः घंगु खँ सीकेत छुं ग्वहालि देला घका वसपोलयागु छद्मवाचा परिचययागु खँ थःम्हं स्युगु कथं न्हयना च्वना । तच्चतं भुखाय् व्वयाः छे दुना द्वलद्वः मनू ल्हानाः कीगु नेपा गालय् छगूकथंयागु प्रलयहे वया च्वंगु इलय् अर्थात् ने. सं. १०५३ (बि. सं. १९९०) सालयागु ला (महिना) नं बुक्क मचातय्सं चितासू मसीगु ला घका घापू दुगु कार्तिक नांयागु लाया शुक्लपक्षया अष्टमी तिथि खुन्हु ये देया तेबहाःयागु कलःगाः छथे श्री देवरत्न वज्राचार्यया काय् मचाया रूपय् श्री बेटीमायाया कोखं जन्म जुया बिज्याःह्य वसपोलं मचानिसें ब्रम्हु व वज्राचार्य पण्डितजुपिनि पाखें संस्कृत शिक्षा व धार्मिक शिक्षा दिक्षा कया बिज्याज्यां फिर्देया जक वसनिसेहे थःगु कुलाचार कथंयागु धार्मिक कर्म काण्डय् दुना बिज्याःगु जुया च्वन । अनलि फ़िखुर्दे दुह्य त्याय्हाचा जुसां निसेंला ये देया त्वाःत्वालय् बाखें कनेगु ज्या याना बिज्याइह्य जुल । अयेहेतुं थः पाजु मचाभाइया पाखें मण्डः च्वयेगु ज्या सयके घुनेव थःगुहे कुतलं वज्राचार्यजुपिसं सयके माःगु अनेगु ज्या व सीके माःगु अनेगु ज्ञानया खँ सयके सीकेगु याना बिज्यात । थुगु कुत.यात वसपोलं थौ कन्हेतकं त्वःता मबिज्यानिगु जुया च्वन । छायाघा सा वसपोलयात उजोगु कुतलय् घुनेगु “नय्गु, घनेगु, ज्वीगु आदि बानि” ये हे ज्वी घुंकल थ्वहे बानि याना वसपोलयात त्याय्हाचा तिनिगु वैशय् हे मेमेगु छुं लहडवहडयागु ज्यां व ई सिति वनीगु कु बानि हय्काय् मफ्यकाः थःगु मनं तुनागु फुकसितं भिनीगु ज्याय् दुने फुगु जुया च्वन । बरू कार्तिकं बूह्य जूगुलि कार्तिकं बूपिसं चितासू मस्यू घंगु घापूयात पाय्छि जुइक वसपोलं चितासू स्युगु खने मदु । छाय् स्वकः वैपि, मस्त कयें वैपि, पूजा घाः वैपि, पूजा पलेसा घाः वैपि, बाखें कंकेत सःतः वैपि, पूया याय्गु कंथ न्यं वैपि, ततःघंगु पूजा यायेत ग्वहालि काः वैपि व थःगु स्वार्थ सिद्ध यायेत अनेगु खँ न्यें वैपि वसपोलयाचाय् यक्वं दु । अय्सां उसि घाय्गु व


( ६ )

थाकु चाय्गु बानि वसपोलयाके खने म्दु थ्व तच्चतं हे घन्य घाय् बहःगु खं खः । उकिं न्ह्यागुहे थजुइव्यु  
वसपोल न्ह्यागु ज्या त्वःता बिज्याःसां स्वयम्भू पुराण च्वया बिज्याःगु थुजोगु ता तक कीति च्वनीगु यक्व  
मनूतयेत नेपाःयागु घमं व संस्कृतियागु खं सीकेउ ग्वहालि दंगु अनेक बिषययागु खं दुध्याःगु अनेक सफू च्वया  
पिदंका बिज्यायेगु ज्या त्वःकीका बिज्याये म्वालेमा घका सुभाय् दोहलप्यु दोहलप्यु थःगु मनं खंगु  
खं क्वचाय्के ।

पुण्य रत्न बज्राचार्य

सको छे बसन्तपुर

ये, नेपाः



# लय्ताः खँ

अध्ययन मण्डलया

कीगु नेपाः पुण्य भूमि बुद्धक्षेत्र खः । बुद्ध जन्म जुया विज्याःगु ध्व पुण्य भूमिइ की जन्म जुया च्वना । वसपोल छह्य महान् तपस्वि, त्यागि, जानि गुणिह्य, गुम्हेसियां कीत भिगु, खःगु लें वयना थकल ! व कीस बुलुका छ्वये मज्यू । वसपोल बुद्धया उपदेशयात न्हावलें कीसं मत्तिइ दंकाः ज्या यायेमाः । तर थन “आजुया मुसि छयेया छुसि” घयार्थे नेपाःया महायान बौद्ध संस्कृति धवबहे तनावने धुंकल । थो कह्लय् उकिया छुं किचः जक त्यना च्वंगु दनि घायेमाल । गुकियातनं आः सः स्वरूपि दनिबल्य गुलि फत उलि माकनं सी दयेके (प्रश्न याये) मफत घायेव त्यं दनिगु छुं भचा ज्ञानतनं मदया वनी । अये जूगुलि कीसं न्हात्ये यानाःनं पिन्वये माला च्वंगु दु । सकसियां खःगु लें ज्वने माःगु दु ।

गुम्हेसियां थःत जति मखयेकुसे कनःयात जः ह्वला च्वनी, अले जक की मनू धायेका जन्म जुयागुया पू वनी (सफल जुइ) । थुकथं थःगु स्वायिपन त्वःता सकल सत्व प्राणिया हितया निम्ति ज्या याये माःगु दु । थःथवे मत्ति भिकाः छुफु कथं तिवः बीगुहे सकलें छपं जुयाया चि खः । सकलें ध्व भव सागरं मुक्त जुइगु खः । थुकें कीत घात्थेंगु पुण्य लाइ, धर्म लाइ । यदि भगवान बुद्ध थेंतुं, थःगु बुद्धि थःगु लेंपुइ वैपि पंग (मार) तयेत थुकथं जी उकथं यानाः त्याकाः न्हाज्याये फःसा ।

धर्म संस्कृतियात न्वलंका यंकेत, धर्मया मू (वास्तविक) खँ छु खः धयागु सीकेबीत व थजाःगु ज्याये नूकथं (संशोधन)यानाः च्वन्हाकेगु ज्याय् गुरू पं. बद्रीरत्नजुं वज्राचार्य अध्ययन मण्डल छगू स्वना विज्यात, गुगु थासय् जिमित स्यनानं विज्याना च्वंगु दु । जिपि च्वनेगु थःगुहे धाय् मदुनि । ह्लापाला गुः बद्रीरत्नजुयागुहे छें च्वं च्वनागु खः । लिपा मनूत (गुरूजुपि) अप्वः दयावःलिसें अन मन्हना वल अनं महाँकाल रकुल्य् ध्यबा पुले म्बायेक बालं च्वं वना । अनपिसें जिमि ब्वनेत धाय् (स्कूल छुत्ति जुइव) बियादीगुलि जिपि कृतज्ञ । न्हागुहे थजु धाय्गु खँत याय्गु ज्यात गुबलें फुइ मखु । उकि थुकथं कीगु संस्कृति गुगु कीसं मसिया च्वन उकियात गुरू पं. बद्रीरत्नजुं सकसितं बुद्धका बीगु कुतः याना विज्यात, ध्वहे जिमिगु निम्ति तःपंगु लय्ताःया खँ खः ।

थुगु थपाजिगु सफुतिइनं गुरू जितःहे प्रुफ स्वय्गु लःह्लाना विज्यात जितः सय्के बीत । जि वसपोल प्रति सदां प्रणाम । जि सःसाँ मसःसाँ ग्या-ग्याहे प्रुफ स्वया जि कुतःयानाःहे स्वया अथेसाँनें जिगु मिखाहे भुलं यंकल । छापय् याये न्ह्यः मखं छापय् याये घुंकाः खना च्वन । नकतिनि-नकतिनि जुयाः निम्ति “परदेश मवंनिह्य मिजं, मचा बुद्धके मनंनिह्य मिसा” धैयें जुया च्वन । द्रंगु तःगुहुनि दन खः, लिपांनिसें बांलाक प्रुफ स्वय्गु कुतःयाये । थुके गुलिनं जुइ धुंकल जुहे जुल, अथेनं द्रंगु छुं-छुंया जकसां भिका-पो घकाः (बुद्धि पत्र) तयाबिया । भेगु छुं लें (उपाय) नंला मन्त ! ध्व छुं नें कथं द्रंगु जिगु दोषयात क्षमाया नापं ब्वमिपिन्त ब्वनेत अतःमतः क्यनीगुलिइ क्षमा बिया दी धयागु दुनुगलंनिसें आसा याना । सुभाय् ।

जय मां भाय् ॥ जय बुद्ध धर्म ॥

राजा वज्राचार्य  
मन्त्रसिद्धि महाबिहार  
(सबस गल्ली, ये)

## जिगु छत्वा खँ

असं घालमिनवया नां दंष्ट्र स्व. कुनरत्न सानु साहु बय्कःया कलाः स्व. देवमाया साहुनीया तःधिकःए इहाये मचा शतबीर सानुमाया, काये स्व. तेजरत्न साहु शतजीवपि कुलबीरसि, सूर्यरत्न, बीर्यरत्न, वनरत्न सकल जहान परिवारया धर्म चित्तोत्पति जुया श्री स्वयम्भू पुराण सफू पिकायेगु इच्छा याःगु जुल । बये सकल जहानपिनि इच्छानुसारं एव सफू जितः च्वके बियाः सानुमाया साहुनीनं माको खचं हुनाः घुगु सफू छापये याके भूगु जुल । अज्ज बय्कलं सितिकहे सफू प्रदान याना दिल । बय्कःयात बोधिसम्भारं पूर्ण जुयेमा घमागु जिगु दुनुगलं निसें सुभाय् ।

एव सफूया भूमिका च्वया बिज्याःए श्री पं. दिव्य बज्र वज्राचार्ययात आपालं धन्यवाद । हानं बसपोनया भूमिका मेपाल भाषायात इङ्गलिस भाषाय् पुइका व्यूहा श्री गम्भीरमान वज्राचार्ययातनं धन्यवाद नापं छत्वाः खँ बिद्याः हुना बिज्याःपि पुण्यरत्न व यज्ञमान पति वज्राचार्यपित्तन जिगु धन्यवाद दु ।

एव सफू च्वयेत जियाय् छकःपति काया च्वय्कः काःए भाजु राघाकृष्णयातनं सुभाय् । गुम्हेसिगु कुतलं सफू याकनं च्वय् सिधल ।

एव सफूया देवः नागवास देहया किया घैयें च्वक च्वया दिउइ मणिकमान चित्रकारजुयातनं आपालं सुभाय् ।

एव सफू बांलाक छापय् यायेत कम्पोज याना दिउइ व छापय् याना दिउइचित्तनं सुभाय् रेमछासं मना । अले प्रेसया नायः भाजु पुष्परत्न सागरजुयातनं आपालं सुभाय् ।

एव सफू च्वयेत जि च्वया तर च्वमिया भार कुक्क बबबियाः च्वनिसें बवय्यं माको बिचाः याना पाकःचाहे प्रुफ स्वयाः सेवा याःए जिह्य शिष्य राजा वज्राचार्ययात आपालं सुभाय् लिसें कोबित जुयेमा घमागु जिगु आशिर्वाद ।

नेपाःदेया उत्पतिया बिषये जियेजाःएसें छु च्वयेक ? छु स्वयेक ? स्वयम्भू पुराणया जि छु बयान यायेक ? छु च्वयेक ? अयेसानं प्रकाशकया इच्छानुसारं तःताजिगु स्वयम्भू पुराण स्वयाः सनब-सिषव एव वःचाघाःगु स्वयम्भू पुराण च्वया । दंगु, स्यंगु, असुदगु व आपाल मनाःगु दयेफु थुके ज्ञानि विद्वान, व्वमिपित्तं ज्ञामापासें थुकि मित्तये मज्जुगु व मनाःगु प्रमाण सहित सुचं बिल घाःसा सहर्षं पूर्वकें स्थिकार यासे हान मेगु पिकानाय् बांलाक तयाह्ये ।

की नेपाःमितय् कार्तिक लछिबकें ह्यौ-ह्यौ स्वयम्भू पुराण बाख कनीगु चसन दु । एव कति पुह्लि खुन्हु कनाः अकिमिला पुह्लि खुन्हु बाखं घुंकाः बहनिइ हलिमघि व्वयाः, तुतः व्वनाः सिधयेकी तर स्वयम्भू पुराण मदया बंगुलि कउला (कार्तिक) लछि यकें स्वयम्भू पुराण कनेगुनं मदया बगु खः । भाः छलपोल, छिकपित्तं कउसा लछि यकें एव सफू स्वया स्वयम्भू पुराण कना बिज्याइ बी घयागु पूर्ण बिश्वास दु । धन्यवाद ।



# भिका-पौ

(शुद्धि पत्र)

पेज	वृत्तः	जुपा च्वंगु (द्वला च्वंगु)	जुहमाःगु (भिकागु)	
६	२७	furty	forty	
७	१७	eaight	eight	१.
८	२१	consost	consort	
९	२७	a	at	२.
१०	२०	and	end	
११	२३	if	it	३.
१२	१४	arise	among	४.
१३	५	Eevn	Even	
१४	२६	what	whet	५.
१५	५	Saivison	Saivism	
१६	१२	sincers	sincere	६.
१७	१३	strenuony	strenuous	७.
१८	१	अरूणापति	अरूणावती	
१९	२१	धिचर्या बोपालन	बोधिचर्या पालन	८.
२०	२०	छापा	छायाः	९.
२१	११	गुयेवं	जुयेवं	
२२	८	ज्वंगु	ज्वंगु	१०.
२३	१८	तंचाम	तं चाया	११.
२४	११	छुं	सुं	१२.
२५	१९	पणिघान	प्रणिघान	
२६	९	बद्य	बैद्य	१३.
२७	११	बाणि	पाणि	१४.
२८	१५	खङ्ग	खड्ग	१५.
२९	१५	मञ्जुषोय	मञ्जुषोष	
३०	७	पक्षे	पक्षे	१६.
३१	१	खुला	खुदे	१७.
३२	५	गुह्येश्वी	गुह्येश्वरी	
३३	२२	जुरू	गुरु	१८.
३४	११	तक्कि	तक्ककि	१९.
३५	१९	जुहजु	जुहगु	२०.
३६	२६	दश्य	दैत्य	
३७	३	बन्त्रीया	मन्त्रीया	२१.
३८	१३	वज्रचार्याभिवेक	वज्राचार्याभिवेक	२२.
३९	१९	बिज्याःगुहलि	बिज्याःगुलिह	
४०	२	स्नान	स्नान	२३.
४१	९	तीथ	तीर्थ	२४.

## धलः-पौ

श्री धमंघातु ढण्डल स्तोत्रः	...	...	क-४
श्री स्वयम्भू उत्पति निदान	...	...	१
श्री स्वयम्भू उत्पति पूजा वर्णन	...	...	११
महाहृद संशोषण देश निर्माण	...	...	२७
ऋकुच्छन्दाभि ढागमन भिक्षुधर्या	...	...	३५
मणिचूड वैतराग	...	...	४१
गोकर्णं वैतराग	...	...	५९
किलेश्वर वैतराग	...	...	७१
कुम्भेश्वर वैतराग	...	...	७७
गर्तेश्वर वैतराग	...	...	८३
कणिकेश्वर वैतराग	...	...	९५
गन्धेश्वर वैतराग	...	...	१०१
बिक्रमेश्वर वैतराग	...	...	१०७
अष्ट वैतरागया पुण्य वर्णन	...	...	१११
द्वादश तीर्थे स्नात ब्रिधि	...	...	११५
पुण्य तीर्थं	...	...	१२३
शान्त तीर्थं	...	...	१२९
शंकर तीर्थं	...	...	१३७
राज तीर्थं	...	...	१४७
मनोरथ तीर्थं	...	...	१५१
निर्मल तीर्थं	...	...	१६७
निथान तीर्थं	...	...	१७३
ज्ञान तीर्थं	...	...	१७९
चिन्तामणि तीर्थं	...	...	१८५

૨૫.	પ્રમોદ તીર્થ	...	૧૧૫
૨૬.	સુલક્ષણ તીર્થ	...	૨૦૩
૨૭.	જય તીર્થ		૨૦૯
૨૮.	ચતુર યુગાદિ તીર્થ સેવા	...	૨૧૧
૨૯.	ધમંધાતુ બાગીશ્વર	... ..	૨૧૫
૩૦.	જ્યોતિરૂપ ગુપ્તિકૃત પ્રવર્તન	...	૨૨૯
૩૧.	શ્રી નાગ સાધન જલવૃષ્ટિ,		૨૩૯
૩૨.	સંક્ષિપ્ત અપતીર્થ વર્ણન	... ..	૨૫૧
૩૩.	પુરાણ પ્રસંસા	...	૨૫૯

श्री धर्मधातु मण्डन स्तोत्रः

ॐ नमः श्री धर्मधातुवागोश्वराय

मञ्जुघोषं महावीरं सर्वमार विनाशकम् ।  
सर्वाकार प्रदातारं धर्मधातुं नमाम्यहम् ॥१॥  
महोष्णीषं सितद्वयं तेजोरासिं जयोसिकम् ।  
बिकिरणोद्गतंचेव महोद्गतं तेजंनमे ॥२॥  
अक्षोभ्यं चमहावोधिं वज्रसत्त्वं नमाम्यहम् ।  
वज्रराजं वज्ररागं वज्रसाधुं नमाम्यहम् ॥३॥  
श्रीरत्नसंभवनाथं वज्ररत्नं नमाम्यहम् ।  
वज्रसूर्यं वज्रकेतुं वज्रहासनमेसदा ॥४॥  
अमिताभं महाराजं वज्रधर्मं नमाम्यहम् ।  
वज्रतीक्ष्णं वज्रकेतुं वज्रभाषन्नमे भजे ॥५॥  
अमोघसिद्धिं सिद्धेसं वज्रकर्म नमाम्यहम् ।  
वज्ररत्नं वज्रयत्नं वज्रसन्धिं नमे सदा ॥६॥  
लोचनोख्यां महादेवीं मामम्बयाख्यां नमेनमे ।  
पोण्डलांचैवदेवीं तारादेवीं नमाम्यहम् ॥७॥  
वज्राकुशं महावीरं वज्रपाशं महत्प्रभं ।  
वज्रस्फोटं महानाथं वज्रावेशं नमेभजे ॥८॥  
अधिमुन्नी श्वरीभूमीं प्रमुदिता नमाम्यहम् ।  
विमलाख्यां महाभूमीं प्रभाकरी नमाम्यहम् ॥९॥



अर्चिष्मतीं सूदूर्जयां अभिमूर्खां नमाम्यहम् ।  
 दूरंगमा मचालारूपां साधूमतीश्वरीं नमः ॥१०॥  
 धर्ममेघां तहामेघां समतारूपां प्रभां नमः ।  
 रत्नपारमितादेवीं दानपारमितां नमः ॥११॥  
 शीलपारमितादेवीं क्षान्तिपारमितां नमः ।  
 वीर्यपारमितादेवीं ध्यानपारमितां श्रय ॥१२॥  
 प्रज्ञापारमितादेवीं मुपायारूपां नमाम्यहम् ।  
 प्रणिधानं बलंचैव ज्ञानपारमितां सदा ॥१३॥  
 कर्मपारमितादेवीं नमामि सततं तथा ।  
 आयुश्चित्तपरिकारा कर्मोपत्ति कान्तमे ॥१४॥  
 च्छयाख्यामधिमुक्तिप्रणिधानां नमाम्यहम् ।  
 ज्ञानारूपवशितादेवीं धर्मारूपवशितानमः ॥१५॥  
 तथताच महादेवीं बुद्धबोधिं नमाम्यहम् ।  
 वसुमती महालक्ष्मीं रत्नोज्ज्वलां नमाम्यहम् ॥१६॥  
 उष्णीषविजयावन्दे मारीचीं पर्णसावरीं ।  
 जागुलीं धारणीवन्दे अनन्तमुखधारणीम् ॥१७॥  
 चुण्डांप्रज्ञां प्रवर्द्धन्या सर्वावरणशोधनीम् ।  
 अक्षयज्ञानकारणं धर्मकोशवतीं नमः ॥१८॥  
 धर्मप्रतिबिम्बं देवं अर्थश्चप्रति संविदं ।  
 निरुक्तिं संविदं देवं प्रतिभानारूपं संविदम् ॥१९॥  
 वज्रलाश्यां वज्रमालां वज्रगीतां नमः सदा ।  
 वज्रनृत्यां महादेवीं नमामि सततं नमः ॥२०॥

(ग)

समन्तभद्रं बोधिंश्च अक्षयतां मतिन्नमे ।  
चित्तिगर्भं स्वगर्भंश्च बोधिसत्त्वं नमाम्यहम् ॥२१॥  
गगणगंजं नाथेशं रत्नपाणिं नमो नमो ।  
सागरमतिं बोधीशं वज्रगर्भं नमाम्यहम् ॥२२॥  
लोकेश्वरं महासत्त्वं स्थामप्राप्तं नमाम्यहम् ।  
चन्द्रप्रभं महातेजं वन्देहंजासिनीं प्रभम् ॥२३॥  
अमितप्रभं बोधीशं श्रीप्रतिभानकूटकम् ।  
सर्वं शोकतमोघातं विष्कंभिनन्नमाम्यहम् ॥२४॥  
यमान्तकं महावीरं प्रज्ञान्तकं नमो नमो ।  
पद्मांतकं महावीरं विघ्नांतकं नमाम्यहम् ॥२५॥  
त्रैलोक्यं विजयवीरं वज्रज्ज्वालां नमाम्यहम् ।  
हेरुकं वज्रवीरेशं परमार्थं नमाम्यहम् ॥२६॥  
चक्रवर्तीश्वरं वन्दे सुभरराजं नमाम्यहम् ।  
पुष्पां धूपां महादीपां गन्धादेवीं नमाम्यहम् ॥२७॥  
वज्ररूपां वज्रशब्दां रसवजां नमाम्यहम् ।  
वज्रस्पर्शां महादेवीं विश्ववर्णां नमाम्यहम् ॥२८॥  
इन्द्रं यमजलेशं च कुबेरं मीश्वरं नमो ।  
अग्निं नैऋत्यनाथं च वायुराजं नमाम्यहम् ॥२९॥  
ब्रह्माणं विष्णुदेवं च महेश्वरं कुमारकम् ।  
ब्रह्मायुक्तीं महादेवीं रुद्राणीं वैष्णवीं नमो ॥३०॥

कौमारीरक्त वर्णाश्च इन्द्रायणी नमाम्यहम् ।  
 बाराहीं कालीकां चण्डी भृंगिनं गणनाथकम् ॥३१॥  
 महाकालं महाभीमं नन्दिकेशं रविं नमे ।  
 चन्द्रं भौमं बुधं वन्दे गुरुं शुक्लं शनैश्चरम् ॥३२॥  
 राहुं केतुं बलभद्रं जयकरं नमे सदा ।  
 मधुकरं वसन्तच अनन्तं वासुकिन्नमे ॥३३॥  
 तक्षकं कर्कोटं पद्मं महापद्मं नमाम्यहम् ।  
 शंखपालं कूलिकं च वेमचित्रं बलिन्नमे ॥३४॥  
 प्रल्हादश्च महादैत्यं बरोचनं नमाम्यहम् ।  
 गरुडेन्द्रं सुम्भराजं पञ्चशिखं नमाम्यहम् ॥३५॥  
 सर्वार्थसिद्धि विघ्नेशं पूर्णभद्रं नमाम्यहम् ।  
 माणिभद्रं महायक्षं धनदं च नमाम्यहम् ॥३६॥  
 वैश्रवणं महावीरं चिविकुण्डलिनं नमे ।  
 केलिमालीं सुखेन्द्रं च चलेन्द्रश्च नमाम्यहम् ॥३७॥  
 हारतीं यक्षणीदेवीं बहुपुत्र वतीन्नमे ।  
 आश्विनीं भरणी तारां कृतिका रोहिणी नमे ॥३८॥  
 मृगशीर्षा तथा आद्रा पुनर्वसू नमाम्यहम् ।  
 पूष्य मश्लेष काता रां मघाश्च पूर्व फाल्गुणीम् ॥३९॥  
 उत्तर फाल्गुणी हस्ता चित्रा स्वातीं विशाखिकां ।  
 अनुराधां मताजेष्टां मूलतारां नमाम्यहम् ॥४०॥  
 पूर्वषाढो ताराषाढां श्रवणां च नमाम्यहम् ।  
 धनेष्टा शतभिषां श्रैव पूर्वभाद्रोत्तरभाद्रम् ॥४१॥

(३)

रेवतीं च महातारां अभिजितं नमाम्यहं ।  
वज्रांकुशं महावीरं वज्रपाशं नमाम्यहम् ॥४२॥  
वज्रस्फोटं महाभीमं वज्रादेश नमेभजे ।  
बागीश्वरं महाबोधिं सवविघ्न विनाशकम् ॥४३॥  
सर्वज्ञज्ञान दातारं धर्मधातुं नमाम्यहं ।  
मञ्जुश्रियं महाज्ञानं सर्वविद्या प्रमेश्वरम् ॥४४॥  
सर्वाकार स्वरूपं च वादिराजं नमाम्यहम् ॥४५॥

॥ इति श्री धर्मधातु बागीश्वर मण्डल स्तोत्रं समाप्तम् ॥



## महायान सुत्रम्

विहरति कनकाद्रौ शाक्यसिंहो मुनीन्द्रः ।  
 अपरिमित सुरसंघैः सेव्यमान जनौघैः ॥  
 कुवलय - दलनेत्रो लक्षणैर्युक्तगात्रः ।  
 समभव-हिततस्थः सर्वलोके हितस्थः ॥

ओं नमो बुद्धाय गुरवे नमो धर्माय तारिणे नमः संधाय महत्तमाय

ये देवाः सन्तिमेरौ वरकनकमये मण्डले येचयक्षाः ।  
 पातालेयेभुजंगा स्फणिमणिकिरणै ध्वस्तसर्वान्धकाराः  
 कैलाशेस्त्रीविलासे प्रमदित हृदया येचविद्याध रेन्द्राः ।  
 स्तेमोक्षं द्वारभूतं मुनिवरवचनं श्रोतुमायान्तिसर्वे ॥१॥  
 आयान्ता श्रोतुकामा असुर सुरनराः सिद्धिगन्धर्वनागाः  
 यक्षा कुमाण्डाकिन्नरेन्द्रा गरुड हरिहराः शक्रब्रह्मादिदेवाः ॥  
 पूजोपञ्चोपचारै स्त्रिभुवन नमितं मेदिनी दुल्लभोऽयं ।  
 भक्त्याहं वाचयामि प्रनमित शिरसा तं महायान सूत्रं ॥२॥

गुरुबुद्धो गुरुधर्मो गुरुसङ्घस्तथैवच ।  
 गुरुवज्रधरः श्रीमान् तस्मै श्री गुरवे नमः ॥  
 मञ्जुश्रीजगतनाथं खड्गपुस्तकधारणं ।  
 सर्वविद्याफलंदाता मञ्जुश्रीनमाम्यहं ॥

॥ नमो बुद्धाय ॥ नमो भर्माय ॥ नमो संघाय ॥

॥ नमः श्री स्वयम्भू ज्योतिरूपाय ॥

स्वयम्भू पुराण

प्रथमोऽध्याय प्रारम्भ

नमो बुद्धाय भर्माय संघरूपाय सर्वदा ।

स्वयम्भवे वियच्छान्तं मानवे धर्म धातवे ॥

आकाश निर्मलो भूतो निष्प्रपञ्च गुणाश्रयः ।

पञ्चस्कन्धात्मकः शान्तस्तस्मै स्तूपात्मनेनमः ॥

भवार्णवसमुत्तार कारूण्या गारमूत्तये ।

जगदाल्हाद रूपाय नमोस्तु स्वयम्भवेसदा ॥

अस्तिनास्ति स्वरूपाय ज्ञानरूप स्वरूपिणे ।

शून्यरूप स्वरूपाय ज्ञानरूपायते नमः ॥

युगादि देव देवेशं दातानां नाशचित्तजं ।

जगदाल्हाद रूपाय नमोस्तु स्वयम्भवेसदा ॥

ह्वापाःह्वापा बोधिमण्डप धयागु ऋगु महाविहारे आपालं श्रोतादिगणपि  
मुंका जय श्री धयाह्य भिक्षु विज्याना च्वन । थुगु इलय् सभा मण्डपं दना  
वना जय श्री भिक्षुया न्होने जिन श्री राज बोधिसत्वं विन्तियात हे गुरु  
जय श्री ! नेपाल धर्मभूमिस विज्याना ध्वंहा धर्मधातु जिनालय स्वयम्भू  
चैत्यया विषये जिमित आज्ञा दय्का विज्याहुँ । थथे जिन श्री राज  
बोधिसत्त्वया विन्ति न्यना जय श्री भिक्षु सकलसियां तायेदय्क आज्ञा-  
दय्का विज्याःगु जुल ।

हिमालय पर्वतं चाःहुलाच्चंगु नेपाल देशे गोपुच्छ नां जुया च्वंगु पर्वत छगू दैच्वन । श्व पर्वतया नां युग युग पत्ति हिलाः पानाः वनाच्वन । ह्यापा सत्ययुगे पद्मगिरी धका धयातल, त्रेतायुगे गोशृङ्ग धका धयातल, द्वापर युगे वज्रकूट धका धाःसा थौं कन्हे कलियुगे गोपुच्छ धका । हानं श्व पर्वतयात नेपाल भाषां, सायाह्वथें बांलुया च्वंगुलिं साम्ब्याँगु पर्वत धकाःनं धाः । थुगु पर्वते अने-तनेगु सिसाफल स्वांमा व कल्पवृक्षादि दयाच्वन । अनेगु धातु, रत्नया खानि नं दयाच्वंगु जुल । भंग पंक्षि, जन्तु जनावर-तय्सं नं बास यानाः अक्क हिंसक प्राणित जूसां नं थःथवे प्रेमभाव याना मिलय्-चलय् जुया च्वंगु खत ।

थर्थेजाःगु पर्वत शिखरस ज्योतिरुप श्री स्वयम्भू धर्मधातु जिनालय बिराजमान जुया बिज्याना च्वंगु जुल । वसपोल ज्योतिरुपयारस्मि सूर्यया जः थें तेज प्रकास जुया भिगू दिशासं खः वना च्वन । उगु तेजया जलं खय् व फुक्क लोय्हे लना वनीगु जुयाच्वन । थर्थिजाःह्य निरंजन निराकार सर्वात्मा तेजमय सकल तथागतपिनि आश्रय स्थान जुयाः सकल लोकपिन्त उद्धार यायेया निमित्त थः थमंतुं उत्पत्ति जुया बिज्याना च्वंह्य हानं वसपोल उत्पत्ति जुया बिज्यासांनिसें ब्रह्मा, वीष्णु महेश्वर, इन्द्र सकल देवगण धृतराष्ट्र, विरुधक, विरुपाक्ष, कुवेर, चतुरमहाराजा आदि लोकपाल गण, सकल नाग, सिद्ध, गरूड, विद्याधर, साध्यगण, यक्ष गन्धर्व, किन्नर, राक्षस, ऋषिमुनि, तपस्वी आदि सकलसियाँ वसपोल ज्योतिरुप श्री स्वयम्भूयात पूजा याना स्तोत्र व्वना वंदना याना च्वँच्वंगु जुल ।

हे जिन श्री राज बोधिसत्व ! थुगु ज्योतिरुप कलिकाले नष्ट भूष्ट ज्वी धका भराये ग्वःगु तःफाःगु त्वहँतं त्वपुया, उगु त्वहँया द्योने चैत्य दयूकाः छत्र ध्वज पताकार व्वयूका दशकर्मादि प्रतिष्ठा याना तःगु खः ।

अथेनं देव मनुष्यपिसं ह्मिथं वयाः पूजा दर्शन वन्दना याना पूजा याना मानय् याना तःगु खत । थथे गुह्य मनुष्यं थुगु स्वयम्भू चैत्ययात श्रद्धा-तया पूजा याई उह्य दुर्गती जन्म जुई मालि मखु । सदां सुगती जन्म जुया, गूणं परीपूर्णह्य जुया, शुद्धात्मा जुया, लोकपिन्त हीत याइह्य जुया, बोधिचर्या धारणा याइह्य जुया, पुण्य सम्भारं पूर्ण जुया, बोधिसम्भारं पूर्णह्य जुया लिपा बोधिज्ञान लानाः बुद्ध पद लाइगु तक फल प्राप्त जुइ ।

थुलि स्वयम्भूया विषय खँ न्यनाः हानं जिन श्री राजं जय श्री भिक्षुयात विन्तियात हे गुरु ! श्री स्वयम्भू उत्पतिया वारे जिमित कृपा-तया आज्ञा दय्का विज्याहुँ । जिन श्री राजं थुलि विन्ति यायेव जयश्री भिक्षुं आज्ञा दय्का विज्यात साधु साधु जिन श्री राज एकचित्त याना न्यँ । गुरुपिसं जितः गथे आज्ञा जुया थकल अथेहे स्वयम्भू उत्पतिया वारे जिं कने त्यना ।

पातलिपुत्र नगरे कुट्कुटाराम महाविहारे विज्याना च्वँह्य उपगुप्त भिक्षुं सम्राट अशोक महाराजायात आज्ञा दय्का विज्यात । हे महाराजा अशोक ! पुण्य चत्रमध्ये उत्तम जुया च्वंगु उत्तर दिशास हिमालय पर्वतं चाःहुला च्वंगु उपछन्दोह पीठ सुदुर्जया भूमी पूण्यभूमी जुया च्वंगु नेपाल देशे गोश्वृङ्ग नामगु पर्वते श्री धर्मधातु स्वयम्भू ज्योतिरुप विराजमान जुया च्वंगु दु । वसपोल ज्योतिरुप स्वयम्भू धर्मधातुयात पूजाभाव याना, बोधिचर्या धारण याना, पूजाभाव याना च्वन धालसा बुद्ध पद तक लाई धका उपगुप्त भिक्षुं अशोक महाराजायात आज्ञा दय्का विज्याःगु जुल । थथे उपगुप्त भिक्षुया खँ न्यना हानं अशोक महाराजां विन्ति याःगु जुल । हे गुरु ! ब्रह्मपोलया आज्ञा न्यना जि मन बोध जुल हे गुरु ! आः श्री स्वयम्भू उत्पति जूगु खँ न्यनेगु इच्छा जुल कृपातया थुलि आज्ञा दय्का

विज्याहुँ । अशोकया विन्ति न्यना उपगुप्त भिक्षु आज्ञा दय्का विज्यात हे साधु जुया च्वंहा महाराजा जिं गुरुपिंके न्यना तयार्थे कने एकचित्त याना न्यँ । थ्व खँ गथे धाःसा-

न्हापा न्हापा श्री शाक्यसिंह भगवान बुद्ध सर्वज्ञजुया विज्याह्य; देव, मनुष्यया शास्ता गुरु जुया विज्याःह्य वसपोल छन्हुया दिने श्री ज्योतिरुप दर्शन याये धका भिक्षुसंघपिं सहित याना श्रावस्ती नगरया जेतवन महाविहारं श्रीशाक्यमुनि भगवान बुद्ध नेपाल मण्डले विज्याये धका प्रस्थान याना विज्याःगु जुल । हे महाराजा अशोक ! वसपोल बुद्ध गथे विज्यात धाःसा ग्रहगनं चाहुयेका विज्याःह्य सूर्योर्थे, नक्षत्रगनं चाहुयेका विज्याःह्य तिमिलायेआजुर्थे अनेगु मङ्गलं पूर्ण जुयेका स्वयम्भू गोपूच्छ पर्वतया पश्चिम दिशाया भागे थों कन्हे पर्वतस्थान धयागु थासे भिक्षुपिंसहित व्वना वसपोल भगवान बुद्ध विज्याःगु जुल ।

वसपोलं धर्मोपदेश विया विज्यायेत उगुथासे भिक्षु बोधिसत्वपिसं चाहुयेका रत्नमयसिंहासने विज्याना च्वंगु इलय् चूण्डा धयाह्य मिसा छह्य वया बुद्धयात स्तोत्र याःगु जुल । थुबले वसपोलं उह्य चूण्डाया ल्हातिं लः त्वना विज्याना पूर्वानुस्मृति लुमंके विया उह्य मिसायात चूडाकर्म यानाः भिक्षु छुना प्रवर्ज्या सम्बर विया विज्याःगु जुल । हानं सभामण्डल स्वया श्री शाक्य मुनीन्द्र भगवान बुद्ध आज्ञा जुया विज्यात हे साधु जुया च्वंपिं छिमिसं एकाग्र यानाः न्यँ ।

आदि मध्यान्त कल्याण जुइगु खँ थथे; दक्क धर्मया खानि जुयाः सकल तथागतपिनि छें जुया त्रिरत्न त्रिगुण जुया विज्याःह्य ज्योतिरुप



स्वयम्भू धर्मधातु यात गुह्य बुद्धिमानपिसं श्रद्धा तथा निहथं शरण वना  
जगत सत्त्वप्राणिया कारणे संवोधि व्रत चलेयाना भजन याइ, उह्य सर्वपापं  
मुक्तजुया मन वचन शरिर शुद्ध जुया क्लेशावर्ण मुक्त जुया, बोधि सम्भारं  
पूर्ण जुया सत्त्वप्राणिपिनिगु लागिं हितकर जुया, सद्धर्म साधना याइह्य जुया  
बुद्ध जुइगु तकं फल प्राप्त जुइ । उकिं छिमिसंनं स्वयम्भूयात सेवाया  
पूजाया धका श्री भगवानं आज्ञा दय्का विज्याःगु जुल । थथे श्री शाक्य  
मुनीन्द्रया आज्ञा न्यना श्री स्वयम्भू उत्पति जूगु खँ न्यनेगु इच्छा याना  
चवंगु जुल । थथे सभामण्डलं मने इच्छा याना चवंगु खँ मैत्री धयाह्य  
बोधिसत्त्वं सीका थः चवँचवनागु थासं दनावना श्री भगवानया न्ह्याने चवना  
जवपुलिं पृथ्वीस चुया खव पुलि थतकया ल्हाःजोजलपा थथे विन्ति यात हे  
भगवान बुद्ध । श्री ज्योतिरुप स्वयम्भू धर्मधातु गवले निसं उत्पति जुया  
विज्याःगु खः उगु खँ सर्वसत्त्वपिं उद्धार यायेया कारणे आज्ञा जुया विज्याये  
माल धका मैत्री बोधिसत्त्वं विन्तियात । थुकथं मैत्री बोधिसत्त्वं विन्ति  
यासेलि श्री भगवान शाकमुनिं आज्ञा दय्का विज्यात हे मैत्री बोधिसत्त्व  
साधुसाधु छं श्री स्वयम्भू नेपाःले उत्पति जूगु खँ न्यनेगु इच्छा यात जिं  
कने छं एकाग्र चित्त याना न्यँ-

परापूर्वकाले थ्वहे भद्रकल्पया सत्ययुगे मनुष्यपिनि चय्दोल  
८०,००० दँ आयु दुबले बंधुमति नगरे विपश्चि तथागत संसारया गुरु जुया  
चवन । विपश्चि बुद्ध गथिंह्य धाःसां दशवल जुयाः सम्पूर्ण धर्मया खानि  
जुया, देव मनुष्यया शास्ता जुया विज्याना चवंगु इलय् वसपोल विपश्चि  
तथागतया पर्ज्यास जि सत्यधर्म नां जुया चवँह्य बोधिसत्त्व धायेका जन्म  
जुयाचवनाबले वसपोलया शासने चवनाः प्रवर्ज्या कया बोधि सम्बर ब्रते

चवनाः बोधिचर्या चले याना चवना । हे मैत्री बोधिसत्त्व उगु इलय् नेपाः दे  
 गथे च्वं धाःसां तःधंगु दहँ जुया चवन व पुखूया लः च्याताजिगु गुणं संयुक्त  
 जुयाचवन गथेकि- (१) शुद्धगु (२) नस्यागु (३) ख्वाउँगु (४) तच्वतं सवा  
 साःगु (५) याउँसेच्वंगु (६) नइगु पचे जुइगु (७) निर्मलगु (८) यचुगु थ्वथे च्याता  
 गुणं संयुक्तगु लखँ जाया च्वंगु ह्येकोये व्या ह्येकोये हाकः जुया आपालं  
 नागतसें बास याना च्वंगुः लखय् च्वनीपिं किइत, न्या, व्याँ, ताहा, काउले,  
 स्वँज, ग्वँजादितसें बासयाना च्वंगु जुल । थुगु पुखुली नागतसें बास याना च्वंगुलिं  
 थ्वइत नाग वास दहँ धका प्रखान्त जुया चवन । हानं कर्कोतक नागं बास  
 याना च्वंगुलिं कालिन्हद नं धा हानं थ्व दहँले तुयूगु; ह्याउँगु, ह्यासुगु व वचुगु  
 तःताजिगु पलेस्वांमात बुया वया स्वां होयाच्वंगु दु । राजहंस, सलांत्या भंग,  
 न्याक्वा भंगः, बोहँय् लहँय, कोलःखा थुजापिं लःया भंगः तसें बास याना च्वंगु  
 थ्व पुखुली रत्न, शंख, मोति अनेक मणि रत्न धातुं पूर्ण जुया च्वंगु । अले  
 थ्व दहँया छचाःख्यलं हिमालय पर्वतं चाःहुला च्वंगु अथेहे अनेगु गुँ पर्वतस  
 थी थी तःताजिगु सिसा फल स्वांमा गुँखि लहरा दयाः तःच्वतं शोभायमान  
 जुया चवन । थाये थासेय् गुफा पर्णशाला दयाः आपालं ऋषि मुनि सिद्धा  
 तपस्त्रिपिसं बास याना च्वंगु, हानं नाग वास दहँले ब्रह्मा मेमेपिं द्यो अपसरात  
 वया स्नान याना धर्मकर्म याःवयाच्वंगु छगू तःधंगु तीर्थ स्थल जुयाच्वंगु  
 जुल । थ्व दहँले स्नाम याना त्रिरत्नया शरण वना उपोषधादि ब्रते चवना  
 ध्यान योग याना तपव्रत याना शरिर शुद्ध याना आपालंहे जीवनं मुक्त  
 जूपिनं दैच्वंगु खत ।

हे मैत्री बोधिसत्त्व ! उगु नाग वास हृदस स्नान यानाया फलं सुख  
 वृद्धि जुई धका स्वंगु कालया बुद्धपिसं आज्ञा दय्का विज्याना वंगु दु । उकिं

गुह्य मनुष्यं थ्व दहँले स्नान याना त्रिरत्नया शरण वना संसारे च्वंपि सत्त्वपिन्त हित यायेगु चित्ते तथा बोधिचर्या ब्रत चले याई उह्य मनुष्यया निर्मल देह जुया तथागत पिनि पुत्र समानह्य जुया बोधिसत्त्व धायेका जन्म जुइदै । हानं संसारे मान व अपमानयात वास्ता मयासे राग, द्वेष, मोह आदि त्वःता थुगु दहले स्नान याइ व शुद्ध आत्मा जुया श्रोतागामि, सकृतागामि, अनागामि व अर्हत फल तक प्राप्त जुइ । गुह्य मनुष्यं थःगु आत्मा जक शुद्ध यायेगु इच्छा याना स्नान याई उह्यसित प्रत्येक बुद्धया फल प्राप्तजुइ । गुह्य मनुष्यं संसार सत्त्व प्राणिपिन्त हित याना तरय् यायेगु इच्छायाना व दहँले स्नान याइ उह्य सित बोधिज्ञान दया बोधि संभारं पूर्ण जुया सम्यक्संबुद्ध जुयेगु फल तक लाभ जुइ । स्वर्गय् देवतापिनिगु सुखया इच्छायाना स्नान याःसा इन्द्र जुइ दै । जुजु जुइगु इच्छाँ स्नान याःसा चक्रवर्ति जुजु जुइ दै ।

हे मैत्री बोधिसत्त्व जिनं विपश्चि तथागतया पालय् सत्य धर्म बोधिसत्त्व जुया च्वनावले व नागवास दहँले स्नान याना लः त्वना वयागु पुण्यद्वारा बोधिज्ञान लाना थुगु जन्मे तथागत तक ज्वी फुगु खः । अथेया कारणे गुह्यसियां नागवास दहँले स्नान याइ उह्यसिया फुक्क पाप नाश जुया निर्मल आत्मा जुया बोधि संभारं पूर्ण जुइ । थ्व नाग वास दहँ सकल तथागत पिसं अधिस्थान याना तःगुलिं प्रख्यात जुया च्वंगु जुल ।

हे मैत्री बोधिसत्त्व ! उजागु समये सत्ययुगस श्री विपश्चि तथागतं बन्धुमति नगरे धर्मोपदेशना यायेधुंका सकल भिक्षुगणपिं सहित व्वनाः थुगु नाग वास दहँ ले स्नान यायेधका बन्धुमति नगरं नागवास दहँस

विज्याःगु जुल । अनंलि नाग वास दहँले थ्यसेंलि सकल शिष्यपिन्त स्नान  
याकःलि हानं दहँया वायुव्य कोणे च्वंगु अतिकं तःजागु पर्वते भिन्नु संघपिं  
नापं विपश्चि बुद्धनं विज्याना समाधिन् च्वनाः वसपोल विपश्चि बुद्ध ध्यान  
समाधि योगं दना नागवासदहँले वस्वया पलेस्वाँया पुसा वांळया विज्याःगु  
जुल । थवले सकल भिन्नु बोधिसत्त्वपिसं बुद्धयाके न्यंगु जुल - हे भगवान  
बुद्ध ! ऋतगोलं थ्व दहँले छु वां ळया विज्यानागु । विपश्चि बुद्धं फुक्कस्यां  
तायेदय्क आज्ञा दय्का विज्यात ।

हे श्रावक संघ बोधिसत्त्वपिं ! जिं मेगु छुं वांळयागु मखु पलेस्वाँया  
पुसा वां ळयागु खः थका लिया जुइगु खँनं आज्ञा जुया विज्यात-

थ्व पलेस्वां पुसा वांळयागुलिं छु जुइ थाःसां थ्व पुसां दोलंदोहः दुगु  
पलेस्वां ह्वयाः स्वयम्भू धर्मध तु ज्योतिरुप उत्पति जुया विज्याइ । हानं  
वसपोलया पञ्चरश्मि या जलँ संसारे फुक्क उत्पात नाश जुइ संसारे  
दकोभनं महा मङ्गल जुइ । थनंलि सकल लोक पिसं श्री स्वयम्भू उत्पति  
जुया विज्याःगु खना द्रुनुगलं निसें लय्ताया सदाकालं श्रद्धा पूर्वकं सेवा  
याइ थुगु पुण्य द्वारा सकल लोकपिनि शुद्ध इन्द्रिय जुया कल्याण जुइ अले  
सुख वृद्धि जुया पुण्य संभारं पूर्णं जुया बोधि सम्भारं पूर्णं जुया सकल  
लोकपिन्त हित सुख वी फुल्ल जुया लिया अनुत्तर ज्ञान प्राप्त जुया बोधिसत्त्व  
व बुद्ध जुयेगु तक्कं फल प्राप्त जुइ थका श्री विपश्चि तथागतं आज्ञा दय्का  
विज्याःगु जुल । थथे श्री विपश्चि बुद्धं भविष्यवानि जुया विज्याःगु खँ सकल  
सभामण्डपं न्यना अति मन प्रशन्न याःगु जुल । अनंलि विपश्चि बुद्धंसकल  
भिन्नुतय्त मो ल्हुका नाग वास दहँनं हानं वन्धुमति नगरसंतुं लिहौं  
विज्याःगु जुल ।

थ्व खँ गोपुच्छ पर्वतस विज्याना श्री भगवान शाक्यमुनीन्द्रं मैत्री  
बोधिसत्वयात आज्ञा दय्का विज्याःगु श्री स्वयम्भू ज्योतिरूप उत्पति  
निदान जुल ।

इति श्री स्वयम्भू महापुराणे श्री स्वयम्भू उत्पतिः निदान कथायां प्रथमोऽध्यायः समाप्तः ॥१॥







॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण

द्वितीय अध्याय प्रारम्भ



थनंलि मैत्री बोधिसत्त्वं हाकनं श्री शाक्य मुनि भगवान् बुद्धयात्  
वंदना याना थथे बिन्ति यात- हे भगवान् शास्ता! श्व नाग वास  
दहँले श्री ज्योतिरूप स्वयम्भू गुणु इल्लय् गथे उत्पत्ति जुया बिज्याःगु खः,  
उगु खँ समस्त आज्ञा दय्का बिज्याहुँ धका बुद्धयाके प्रार्थना याःगु जुल।  
थथे मैत्री बोधिसत्त्वया प्रार्थना न्याना श्री शाक्यमुनि बुद्धं मैत्री बोधिसत्त्व  
यात् आज्ञा दय्का बिज्यात्- हे साधु मैत्री बोधिसत्त्व छं एकचित्त  
याना न्यं जिं श्री स्वयम्भू उत्पत्ति जूगु खँ कने धका श्री भगवानं थथे  
आज्ञा दय्का बिज्यात्-

श्रीःविमशिव तथागत निर्वाण जुया बिज्यासेंलि हानं कालान्तरे  
मनुष्याया परमायु प्रमाण ७०,००० न्ह्येयेदोल दँ जुया च्वन। थर्थिगु इल्लय्  
शिखि नाम तथागत लोके बुद्ध जुया बिज्यात्।

देव मनुष्यापिसं गुरु धका सत्कार याका माननीय पूजनीय जुया  
बिज्याना च्वंहा शिखि तथागतं छन्हु अरुणावति पुरया उद्याने च्वना धर्मः

उपदेश वियेगु धका विज्याना च्वंगु इलय् आपालं भिक्षुसंघ, बोधिसत्त्व, देवमनुष्या, असरा, सिद्धा, साध्य, विद्याधर, यक्ष, किन्नर, गरूड, राक्षस, दैत्य, नागगन सकलें अले ऋषिपिं, तिर्थंकरपिं, जुजु, मन्त्री, गृहपति सकल उपासक-उपासिका प्रमुख नाना देश, ग्राम, निगम, जनपदादि वासिपिं सकल लोकपिं वया श्री शिखि तथागतयात गुरू धका सत्कार याना माने याना पूजा याना वन्दना याना सकलें धर्मोपदेश न्यने धका एकाग्रचित्त याना च्वँ च्वँगु जुल । श्री शाक्यमुनि बुद्धं आज्ञा दय्का विज्यात, अवले जि जेमंकर बोधिसत्त्व धायेका जन्म जुयाः शिखि तथागतया सर्वसंघ जुया च्वना ।

हे मैत्री बोधिसत्त्व अर्थिगु बखते श्री शिखि तथागतं सभामण्डलस च्वंपिं सकल सियां ताये दय्क आदि, मध्ये, अन्तसं कल्याण ज्वीगु सद्धर्म उपदेश विया विज्याःगु जुल । उगु सद्धर्म उपदेश न्यना सकल सभामण्डलं थुइका सद्धर्म साधना यायेगु मनतया बोधिज्ञान चित्ते तथाच्वंगु जुल ।

हे मैत्री बोधिसत्त्व थुगुहे इलय् जलं पूर्णं जुया च्वंगु नाग बास दहँले शकट चक्र प्रमाण गाडाया घःचा प्रमाणं तफो जुया दोलंदो हः दुगु महापद्म धालसां पलेस्वांले तःच्वतं जाज्वल्य प्रमाण ज्योति पिहँ वया पलेमूलया दधुं संपूर्ण धर्मया खानि श्री स्वयम्भू ज्योतिरुप धर्मधातु संसारस प्रवृत्ति निवृत्ति ज्ञान प्रकाश यायेया कारणे थःथमंतुं उत्पत्ति जुया विज्यात ।

हे मैत्री बोधिसत्त्व गथिं ह्य स्वयम्भू धाःसां फटकिरथिं गु पञ्चरस्मिमय  
 जुया सद्धर्म सम्पतिया खानि जुयाः सत्त्व गुण, रजगुण, तमो गुणादिं  
 सम्पूर्णया आधार जुयाः सर्वाकार सर्वात्मा जुया विज्याः ह्य वैरोचनादि  
 तथागतपिनि स्थान जुया सत्त्व प्राणिपिनि चैतन्य जुया आदि अन्त मदया  
 सकल लोकपिसं वन्दना पूजना याये योग्य जुया विज्याः ह्य, आदि बुद्ध  
 स्वयम्भू विपश्चि तथागतं अधिस्थान याना तःगु पलेस्वांया पुसां उत्पति जुया  
 वःगु पलेस्वांले श्री ज्योतिरुप जुया चैत्यया आकार जुया उत्पति जुया  
 विज्याः गु खत । थथिं गु अवसरस थुगु पृथ्वी मण्डल सुमेरु पर्वत समेतं  
 सागर सहितं महाशुभ निमित्तं हर्षोत्पति जुया खुता प्रकारं पृथ्वी मण्डल  
 कम्पमान जुल । हानं स्वर्ग लोकया देवपुत्र पिसं नाना प्रकारया दिव्य स्वाँ  
 वा गाका हल, मङ्गल वाद्य थाना स्तोत्र याना हल । हानं श्री स्वयम्भू  
 ज्योतिरुप उत्पति जुये मात्रं दशदिशा सकभनं अत्यन्त स्वभायेमान जुया  
 वल । यज्ञ आदि याना छोयेकातःगु अग्नि दक्षिणावर्त जुया स्वस्तिया  
 आकारनं जाज्वल्यमानं छोयावल । हानं शीतल नस्वाःगु फय् वया तच्चतं  
 आनन्द जुल । आदित्यादि नवग्रहपिनं ह्यापास्वया तेज अप्व दयावल ,  
 तारागणादि सर्गते च्वंगु नौत दकोयानं तेज थिना वल । हानं श्री स्वयम्भू  
 ज्योतिरुप धर्मधातुया तेज दोलछि चन्द्रसूर्यया तेजसिकं आपालं जः प्याहाँ  
 वया त्रिसाहस्र महासाहस्र लोकधातु सकभनं खः वंगु जुल । थथे स्वयम्भूया  
 रश्मि खय्मात्रं सकभनं फुक्क मङ्गल जुया, महा धर्मोत्सव जुया, सर्व  
 उत्पात विघ्न नास जुया तथंगु शुभिन्न जुयावल । वसपोलया पञ्च  
 रश्मिया तेजं खय्मात्रं षोदश नरके भोग याना च्वं पि पापीतनं पापं  
 मुक्त जुया स्वर्गस जन्म काः वंगु जुल ।

वसपोल स्वयम्भूया रश्मि खय्मात्रं मिखां मखंपिनि मिखां  
खनावल, ह्यायेपनं मतापिसं ह्यायेपनं ताल, तुतिं मचूपिसं चुइ फत,  
धुसि तथूनं ह्य तप्यना वल, नय्पित्यापिनि नं फुदना वःथें चवन, लोये  
जुया च्वंपिनि उगु लोचं मुक्त जूपिं जुया शुद्ध इन्द्रिय जुया सुखं  
आनन्द जुया वल, प्वाथय् दुमिनि ह्युं भचाहे दुःख मजुइक याउँक  
मचा बुल ।

हे मैत्री बोधिसत्व धुकथं त्रैलोकस शुभ मङ्गल याना सकल  
तथागत पिनि आश्रय जुया विज्याःह्य श्री धर्मधातु वागीश्वर थःथमंतुं  
नाग वास दहँले उत्पत्ति जुया विज्याःगु स्वया आरुप्य धातुया मालिक  
जुया विज्याःह्य श्री महादेवं थःगु भवनया सकल प्रमथादि गणपिं  
व्वना श्री स्वयम्भू ज्योतिरुप दर्शन पूजा यायेत नाग वास दहँले विज्याना  
वन्दना पूजा याना विज्याःगु जुल । हानं रुपधातुया स्वामि श्री ब्रह्माजुं  
थःगु भवनया असंख्य ब्रह्म ऋषिश्वरपिं १००००० लखछि प्रमाणं थःगु  
गणपिं व्वना विज्यानाः महा हर्षमान पुर्वकं श्री स्वयम्भूयात पूजा  
वन्दना याना विज्याःगु जुल । कामधातुया मालिक नारायणजुं थःगु  
भवनया सारा देवमुत्रपिं व्वमाः श्री स्वयम्भू दर्शन पूजा याःवल ।  
त्रायत्रिंश भूवनया मालिक देवराज इन्द्रं सकल देवगणपिं अपसरा  
गणपिं सहितयाना पञ्चोपचारादि अनेतनेगु पूजा सामग्रि व्वना नाग वास  
दहँले विज्याना श्री स्वयम्भू ज्योतिरुप दर्शन पूजा याःगु जुल ।  
धुकथं अग्नि देवता दक्षिणया यमराजा, नैऋत्यया राक्षसाधिपति,  
पश्चिमया वरुण नाग राजा, वायुव्यथा वायु देवता, कुबेर आदिमहा-



ब्रह्मा सहितं भिगू दिशासं देव मनुष्यादिपि वया श्री ज्योतिरुपयात  
अनेगु प्रकारं पूजा वन्दना स्तोत्रादि याःवया च्वंगु जुल ।

पूर्व दिशाया मालिक धृतराष्ट्र धयाह्य जुजु गन्धर्वपि सहित  
ज्वना नाना वाद्य थाना म्ये हाला महारसं श्री स्वयम्भू दर्शन पूजा  
याःवया च्वन । दक्षिण दिशां कुम्भाण्डपिनि जुजु विरुधकं कुम्भाण्डपि  
सहित याना नाना वितान किंकिनिजाल आदि ज्वना महा उत्सवं  
श्री ज्योतिरुप दर्शन पूजा याःवया च्वंगु जुल । पश्चिमदिशां सकल  
नागतय् जुजु विरुपाक्ष नागपि सहित याना रत्न, दक्षणा ज्वना महा  
हर्ष पुर्वकं श्री स्वयम्भू ज्योतिरुप दर्शन पूजा याःवया च्वंगु जुल ।  
उत्तर दिशां यक्षपिनि जुजु वैश्रमणं यक्षपि सहित याना असुख्यगु  
रत्न माणिक आदि ज्वना वया श्री स्वयम्भूयात पूजा दर्शण याःवया  
च्वंगु जुल । गुह्यकपि, किन्नरपि, विद्याधर गण, सिद्धा गण, आध्य  
दैत्य चक्रवर्ति जुजु; अथेहे देश देशान्तरया सारा मनुष्य मणपि स्वते  
सकल लोकपिसं थःके दुगु पूजा वस्तु ज्वनाः अत्यन्त हर्ष पुर्वकं श्री  
स्वयम्भू ज्योतिरुप दर्शन पूजा याये धका भिगू दिशासं वया गुलिसियां  
अष्टाङ्ग प्रमाणयाना स्तोत्र ज्वना वन्दना याना च्वनः । गुलिसिनं सुगन्ध  
कस्तुरी, कपूर धुप थनाः गुलिसियां छत्र, ध्वज, पटाकादि, च्वामल  
व्यका; गुलिसियां प्रदिप महादिप छोयेका; गुलिसियां पञ्चोपचारादि  
पूजा याना भाव याना दर्शन यानाः च्वंच्वन । श्री स्वयम्भू ज्योति-  
रुपयात थथे पूजा भाव याःगुलि थ्व पृथ्वी हाकतं खुगु प्रकारं  
कम्प जुल ।

धुगु इलय् अरूणापति नगरया त्रिहारस शिखि तथागतया धर्म उपदेश न्यने धका च्वं पिं सभामण्डलं थ्व पृथ्वी कम्प जूगु स्वया सकलें संशये जूगु खत । थथे सभामण्डलं संशय जूगु स्वया रत्नपाणि बोधिसत्त्व थः फेतुना च्वनागु थासं दना शिखि तथागतया अग्रस ल्हाः निपां हाजोजलपा विन्तियात हे भगवान बुद्ध शिखि तथागत थौंया दिने छु हेतुं पृथ्वी कम्प जूगु खः धुगु विषय संशये जू पिं सभामण्डलतय्त कृपा तया आज्ञा दय्का विज्याहुँ ।

रत्नपाणिया विन्ति न्यना शिखि तथागतं आज्ञा दय्का विज्यात हे रत्नपाणि छं मनं समाधान याना न्यँ । थ्व भूमि महा उत्सवं कम्प जूगु खः । थ्वया कारण जिं कने न्यँ, हिमालय पर्वतया क्वसं अष्टाङ्ग गुणं संयुक्त जुया च्वंगु लखं पूर्णगु नाग वास दहँ धालसां भराये धंगु पुखु छगू दया च्वन । थथिगु दहँया दथुस रत्नमय शकट चक्र गाढाया घःचा प्रमाणं तफोयेक लखं थांवया पलेस्वां होया उगु पलेस्वांया दथुइ सकल तथागतपिनि छेँ जुया धर्मया खानि जुया विज्याःह्य श्री स्वयम्भू ज्योतिरुप उत्पति जुया विज्याःगु जुल । हानं वसपोल उत्पति जुये मात्रं ब्रह्मा, विष्णु महेश्वर आदि असंख्य प्रमाणं देवगण, सिद्धा-गण, साध्यगण, विद्याधरगण, ऋषिगण, यक्षगण, किन्नरगण, गन्धर्वगण गुह्यकगण, राक्षसगण, दशदिग लोकपालगण अथेहे मनुष्यगणपिं सहित भिगूदिशां वया नाग वास दहँले उत्पति जुया विज्याःह्य श्री स्वयम्भू ज्योतिरुपयात अने तने कथं भावनां पूजा भाव याना स्तुति वन्दना याना च्वंगु जुल । थथे पूजा याःवया च्वंगु सकल पुण्यया प्रभावं थ्व पृथ्वी मण्डल खुगू कथं भुवाये ब्वःगु खः । थथे श्री शिखि तथागतया आज्ञा न्यना रत्नपाणिं हाकनं विन्ति यात,- हे शिखि

तथागत छलपोलया कृपां जिमि संशय् जूगु मदय्क छलपोलं स्वयम्भू  
या महिमा आज्ञा दय्का बिज्यात, जिमितनं नाग वास दहँले थःथमंतुं  
उत्पति जुया बिज्याःह्य स्वयम्भू दर्शन यायेगु सकलसियां इच्छा जुल  
कृपातया छलपोलं सकलसितं श्री ज्योतिरुप स्वयम्भू दर्शन यायेत  
व्वना यंका बिज्याहुँ ।

थथे रत्नपाणि बोधिसत्वया बिन्ति न्यना शिखि तथागतं सारा  
बोधिसत्व भिच्छुसंघपिं फुक्कं व्वना अरूणावति नगरं नाग वास दहँ पाखे  
स्वया बिज्याःगु जुल । नाग वास दहँया नैऋत्य कोणस च्वंगु पर्वतस बिज्याना  
अनं नाग वास दहँले उत्पति जुया बिज्याःह्य श्री ज्योतिरुप दर्शण  
याना सकलसितं ध्याने तया बिज्याःगु जुल । आ थौंया अव्यापि उगु  
पर्वतयात ध्यानगिरि धालसां धिलाच्च धक्का नामं प्रख्यात जुया च्वंगु  
दु । उगु पर्वते बिज्याना वसपोल शिखि तथागतं श्री स्वयम्भू ज्योति-  
रुपयात स्तोत्रनं याना बिज्याःगु जुया च्वन ।

नमः श्री ज्योतिरूपायः ॥

श्री धर्म धातुः मणिसं करूणा वतारं  
नागादिवास न्हद पंकज कर्णि कास्थं  
नैरंजनं निरुपमं खसमं महेसं  
ज्योति स्वरूपमसमं प्रणतो ऽ स्मिनित्यं ॥१॥

श्रुत्वा सर्वमहिमतेः श्रवणेन दृत्वा  
नेत्रेण रूप ममिशं चरणे गत्वा  
हस्तेन पूज्यः चरणं मनसामु चिंत्यं  
ज्योतिः स्वरूप मसमं प्रणतोऽस्मिनित्यं ॥२॥

किंवर्यं यामि तवरूपमे चित्यमे तत्  
जिह्वेन्द्रियेण भवदीयतुतिकरोमि  
दोषास्त्वदोष अथवा भवदिय एव  
ज्योति स्वरूप मसमं प्रणतोऽस्मिनित्यं ॥३॥

ज्योति स्वरूप तुतिमीघ कृतिं पठन्ति  
निकेश शुद्ध विलसद् हृदय स्वभाव  
पाथोज कर्णिक कणामत माप्नुवन्ति  
स्वयम्भूवेति रूचिरेचिषिते लयन्ते ॥४॥

( इति स्वयम्भू पुराणे शिखि तथागत कुत ज्योतिरूप स्वयम्भू स्तोत्र समाप्त )

थुगु कथं स्तोत्र याना विन्ति यात । हे ज्योतिरुप स्वयम्भू  
छलपोलयात नमस्कार । छलपोल गथिह्म धालसां निरञ्जन निराकार  
जुया थथे च्वं अथे च्वं धका उपमा तय्बहः मदुगु रुप जुया सकल  
धर्मया खानि जुया करुणामय अवतार जुया नाग वास दहँया दथुं  
पलेस्वानया केशरस बिज्याना आकासथे आदि अन्तमदया बिज्याःह्म  
ज्योतिरुपयात सदां प्रणाम ॥१॥

छलपोलया तुल्ये मदया च्वंगु महिमा ह्यायेपनं न्यना आदि  
अन्त मदुगु रुप मिखां स्वया तुतिनं छलपोलयागु स्थाने वया ल्हतिं  
छलपोलया चरणे पूजा याना मनं विचाः याना ज्योतिरुपयात  
सदां प्रणाम ॥२॥

छलपोलयात थथेच्वं धका विचा याये मफया च्वंह्म थथिह्म  
छलपोलयागु रुप थथे च्वं धका जिं छु वर्णन याये, खालि थ्व म्ये  
दुगु लिं सम्म जक जिनं ज्याछयलेथे छलपोलयात स्तोत्र याना, थुकि  
छुं दोष दै वा मदै थ्व सम्पूर्ण क्षमा याना बिज्याये माल धका  
छलपोल ज्योतिरुपयात सदां प्रणाम ॥३॥

थुगु स्तोत्र गुह्य मानवं व्वना स्तुति याई वया सर्व पाप  
क्लेश मदया शुद्ध आत्मा जुया ज्ञानामृत लाना अति सुन्दर धाम-  
मये स्वयम्भू ज्योतिरुपे लिन जुया वने दै ॥४॥

थनंलि शिखि तथागतं सकल बोधिसत्त्व, भिक्षु संघपिन्त श्री  
स्वयम्भू ज्योतिरुप दर्शन यानाः वसपोलं सर्वसंघपिं सहित अरूणावति  
नगरसं तुं ल्याहाँ बिज्याःगु जुल ।



हे मैत्री बोधिसत्त्व उगु इलय् शिखि तथागतया पज्यास जि  
 जेमराज बोधिसत्त्व धायेका च्वं च्वना । हे मैत्री जिं श्री स्वयम्भू पूजा  
 फलया वर्णन याये छं न्यँ धका श्री शाक्यमुनि बुद्धं मैत्री बोधि  
 सत्त्वयात आज्ञा दय्का बिज्यात-

गुह्य मनूष्यं श्री स्वयम्भू चैत्यया अग्रे श्रद्धा पूर्वकं त्रिरत्नया  
 शरण वना उपोषधे च्वना पूजा याइ भाव याइ ध्यान याइ व  
 निश्चयनं बोधिसम्भारं पूर्ण जुया बुद्ध जुयेगु ज्ञान तक फल प्राप्त  
 जुइ । थथे श्री स्वयम्भूया सेवा ध्यान यानागुया पुण्य फलं महा  
 उत्तम कल्याण साधना यायेगु समर्थ दै । हे मैत्री बोधिसत्त्व ह्यापा  
 जुया बिज्याःपिं तथागत पिसनं आज्ञा जुया बिज्याना तःगु  
 लिपा जुया बिज्याइपिं तथागत पिसनं आज्ञा जुया बिज्याइ  
 तिनिगु ह्यापां निसैं आ तक जुया बिज्याःपिं सकल तथागत-  
 पिसं प्रशंसा याना च्वंगु श्री स्वयम्भूया स्थाने च्वना त्रिरत्न  
 शरण वना उपोषधे च्वना पूजा ध्यान यात धालसा महादुष्ट अघोरगु  
 सम्पूर्ण क्लेशावर्ण मुक्त जुया इन्द्रिय शुद्ध जुया निर्मलात्मा जुया  
 राग द्वेष मोह माया आदि सकल दोष मदया गवलेहे दुर्गतिस  
 जन्म जुइ माली मखु भिगु गतिस जन्म जुया कल्याण सत्पुणं युक्त  
 जुया च्वने दै ।

शुक्लं याकन दशपारमिता पूर्ण जुया बोधिज्ञान लाना तथागतपिंगु  
 पद समेतं लाना निर्वाण तकं वने दै । हे मैत्री ! बोधिसत्त्व शुलिया  
 कारणे धिचर्या बोपालन याना श्री स्वयम्भूया दर्शन ध्यान याना

श्रद्धा पूर्वकं सेवा याना त्रिरत्नया शरण वना उपोषधयात धारणा  
या धका थथे श्री शाक्यमुनि भगवानं आज्ञा दय्का बिज्याःगु जुल ।

थथे श्री शाक्यमुनि बुद्धया आज्ञा न्यना मैत्री बोधिसत्व प्रभृति  
सकल सभालोक सकलें बोध जुया श्री स्वयम्भू ज्योतिरुप चैत्ययात  
पूजा यानागुया फलया वारे श्री भगवान बुद्धयात बिन्तियात— हे  
शास्ता सर्वज्ञ भगवान बुद्ध थर्थिह्य स्वयम्भू चैत्ययात पूजा यानाया  
पुण्यफल सम्पूर्ण आज्ञा दय्का बिज्याहुँ । थथे सकल सभामण्डलया  
बिन्ति न्यना श्री शाक्यसिंह भगवान बुद्धं सकल सभालोकं तायेदय्क  
आज्ञा दय्का बिज्यात ।

हे सभालोकपि ! छिमिसं एकचित्त याना न्यं श्री स्वयम्भू  
चैत्या पुजाया फलया बिषय् गुह्य मनुष्यं हर्ष पूर्वक पञ्चामृत सहित याना  
सुगन्ध वस्तु तयागु लखं श्री स्वयम्भू चैत्ययात लुकाः स्नान याकिइ  
उह्यमनूया मन वचन शरीर शुद्ध जुइ अन्त्याकाले बुद्धया कुले जन्म  
जुइ ॥१॥ हानं गुह्य मनुष्यं सुगन्ध वस्तु चूर्ण याना नस्वागु धुप  
थना श्री स्वयम्भू चैत्याया सेवा याइ उह्य मनु देव दैत्यापिसं पूजा याये  
योग्यह्य जुया दिव्य देह जुइ ॥२॥ हानं गुह्य बुद्धिमानं श्री  
स्वयम्भूया शरणे च्वना पञ्च सुगन्ध वा अष्ट सुगन्धनं लेपन याना  
पूजा याइ उजोह्य मनुष्य सुगन्ध देह जुया अतिकं योग्यह्य जुया  
महा ऐश्वर्यवान जुया स्वर्गस देवपुत्र धायेका जन्म जुइ । हानं  
गुह्य मनुष्यं विधि पूर्वक चिवरादि नाना प्रकारया वस्त्र छापा पूजा  
याइ उह्य मनुष्यं धर्म राजा जुया ब्रह्मचर्या धारणा याये फुह्य  
जुइ दै । हानं गुह्य मनुष्यं श्री स्वयम्भूयात नाना प्रकारया स्वां पलेस्वां

उफोस्वां पालिजा स्वा, मांदार पुष्पादि दोहलपा पूजा याइ उह्यसिया  
 इन्द्रयासिनं तःधंगु ऐश्वर्य लाना बोधिज्ञानया फल प्राप्त जुइ । हानं  
 लखँ वा भूमिं उत्पति जूगु स्वां छानाया फल विशेषनं फल पृथक्  
 दुगु जुया च्वन । पुष्पकेतु तथागतया धारणि ७ ब्वनाः शोधन याना  
 स्वाँ छफो जक छाःसां आपालं पुण्य फल प्राप्त जुइ । गुह्य मनुष्यं  
 स्वांमा छाइ व देवराजा इन्द्र जुया सकल गुणं पूर्णह्य जुया बोधिज्ञान  
 तक लाई । गुह्य मनुष्यं घ्यो चिकं कपूरया मत छोयेका सेवा याइ  
 व तच्चतं बांलागु मिखा जुया आपालं सम्पत्तिया खानि दया राग  
 द्वेष मोह मदया जुजुपिसं पूजा याये योग्यह्य चक्रवर्ति जुजु जुइ  
 दै । गुह्य मनुष्यं श्री स्वयम्भूयात बांलागु सुस्वाद दुगु नैवद्य आदि  
 समर्पण याइ उह्य मनुष्य च्छिवान जुया सप्त रत्ननं संयुक्त जुइ ।  
 गुह्य मनुष्यं श्रद्धा पूर्वकं श्री स्वयम्भूयात साखति आदि पान वस्तु  
 दोहलपी व तृष्णा धयागु मदया बलवान तेज दुह्य जुया देवराज  
 इन्द्र जुया जन्म जुइ । गुह्येस्यां सकि, हि सकि, फलादि दोहलपी  
 उह्य धर्मे, ग्यःह्य जुइ । गुह्येस्यां भैषज्यादि गुलः दोहलपी उह्य  
 अन्तकाल मत्याःतलें निरोगी जुया अन्तकालस इन्द्र धायेका च्वने  
 दइ । हानं गुह्य मनुष्यं स्वयम्भू यात इलां प्याना बी  
 उह्य मनु सकल सियां पूजा याये योग्यह्य माने याये योग्यह्य  
 जुया सम्पूर्ण सिद्धि फल लाना तथागत पिंगु कुले जन्म जुइ । श्री  
 स्वयम्भूयात गुह्येस्यां नाना प्रकारया ध्वाँय् ब्वय्काबी व सत्गुण पूर्ण  
 जुया जुजुपिनिगु पद विप्रान्त जुया तथागतपिनिगु कुले जन्म जुइ ।  
 गुह्य मनुष्यं श्री स्वयम्भूयात नाना प्रकारयागु वा सीयागु छत्र दय्का  
 दोहलपिइ उगु पुण्यद्वारा स्वर्गस देवराज इन्द्र वा सकलसियां चूडामणि

जुया अनन्त सुख भोग याना च्वने दै अन्ते बुद्धपिनिगु कुले जन्म  
जुइ । गुह्य मनुष्यं श्री स्वयम्भूयात पञ्चरङ्गी पताकादि वयकाबी, ध्व  
पुण्यद्वारा पृथ्वीस जुजु जुया सदां मङ्गल जुया महासुख भोग प्राप्त  
जुया अन्तस बोधिसत्त्वया पद तक प्राप्त जुइ । हानं गुह्य मनुष्यं  
श्री स्वयम्भूयात ताय् आखेँ स्वां सहित होला पूजा याइ ध्व पुण्य  
द्वारा गबलेहे दुर्गतिइ वने म्वाःला सदां सतगतिस जन्म जुया लोक-  
पिन्त हित याना बोधिसत्त्व धायेकाः च्वने दै । गुह्य मनुष्यं श्री  
स्वयम्भूयात रत्नया धातुया दक्षिणा दोहलपी उह्य बिसाल सम्पत्ति  
पूर्ण जुया धर्म, अर्थ, काम, मोक्ष फल प्राप्त जुइ । गुह्येस्यां स्वयम्भूयात  
मनतया स्तोत्र याना वन्दना याइ उह्यसित सकल शास्त्रं पारंगत  
जुया महावादि राज, परिडत जुई । हानं गुह्य मनुष्यं श्री स्वयम्भूयात  
अष्टाङ्ग प्रणाम याना प्रदक्षिणा याइ वयात अष्टाक्षण दोषं मुक्त जुया  
चक्रवर्ति जुजु जुया सदां सधर्म साधना यायेगु जक मन जुया लिपा  
मोक्ष प्राप्त जुइ । श्री स्वयम्भूयात प्रदक्षिणा चाःहुला सेवा याइह्य  
सित पुर्वानु स्मृति लुमना वै वा आयु वृद्धि जुया सुन्दर शरीर जुया सकल  
लोकं पूजा याये माःह्य जुया लिपा बोधिज्ञान प्राप्त जुइ । गुह्येस्यां  
स्वयम्भू चैत्ययात सख्वालं पाना सख्वापा याइ थुगु पुण्यद्वारा दुःख  
आपत्ति मदया आयु वृद्धि जुया दीर्घायु जुया सत्तरत्नं संयुक्त जुया  
जुजु जुइ दै । गुह्य मनुष्यं स्वां माः छाया पूजा याइ उह्य मनु  
आपालं बाँलाःगु पलेस्वाथें कोमल शरीर जुया बोधि चर्या चले याइह्य  
जुइ । हानं गुह्येस्यां स्वयम्भू चैत्य जीर्ण जुया च्वं थाये वा स्थना  
च्वंथाये जीर्ण उद्धार वा भिकाबी उह्य मनुष्य व पुण्यद्वारा सत्तरत्नं संयुक्त

जुया सकल लक्षणं संयुक्त जुया निरोगि जुया धर्मे जक रस दुह्य  
 जुया सदाकालं मङ्गल जुया चक्रवर्ति जुजु जुया जन्म ज्वी अन्ते  
 अनुत्तर सम्यक्संबोधिज्ञान लाना मोक्षपद प्राप्त जुइ । हानं गुह्य  
 मनुष्यं श्री स्वयम्भूया मन्त्रं जाप याना वसपोलया न्होने चवना सुनां  
 ध्यान याइ जोगयाइ थथिहसित काय वाक चित्त शुद्ध जुया योग्येश्वर  
 जुया बोधिज्ञान प्राप्त जुया बोधिसत्त्व चर्या चलय् याइह्य जुया मुनीश्वर  
 धायेका चवने दे । हानं श्री स्वयम्भूयात सुनां धातुयागु वा चायागु  
 पिण्डपात्रे छुं वस्तु वा, छो, जाकि, जा, कय्गु, माये, म्वाः, चि  
 आदिं पूर्ण जुइक दुथना दोहलपी थुकिया पुण्य उलि थुलि दु धका  
 प्रमाण मदय्कं असंख्य पुण्यफल प्राप्त जुइ ।

हे मैत्री बोधिसत्त्व थ्व संसारे सकलया पुण्य फलया प्रमाण  
 दु, थुगु पिण्डपात्र दोहलपागु पुण्य संख्या यानां संख्या मदय्क पुण्य  
 दु । हे मैत्री बोधिसत्त्व श्री स्वयम्भूयात पूजा भाव थानागु पुण्यया  
 फल संख्या यानां याये मफु थुकिया पुण्य फल महा उत्तम धका  
 सीका श्री स्वयम्भूयात श्रद्धा पुर्वकं मनतया त्रिरत्नया शरण वना  
 पारमिता धारणा याना बोधिज्ञान लायेगु इच्छा याना गुह्येस्यां श्री  
 स्वयम्भूयात सेवा याइ थथेंजाःपिं पुण्यवानपिं दुर्गती गबलें वने म्वाःला  
 सदाकालं सतगतिस जक जन्म जुया बोधिचर्या चले याना सर्व  
 सत्त्वपिन्त हित याइह्य जुया दशपारमितां पूर्ण जुया बोधिसत्त्वमार्गि  
 पूर्ण जुया श्रावक, प्रत्येक महायान थ्व स्वंगु यानया ज्ञानं बोधि-  
 ज्ञान लाना बोधिसम्भारं पूर्ण जुया सम्यक्संबुद्ध पद तक  
 लाईगु जुल ।



हे मैत्री बोधिसत्त्व ध्वतेया कारणे चित्त प्रशन्न याना श्री  
स्वयम्भू ज्योतिरुपयात पूजा याना भाव याना श्रद्धा पूर्वकं ध्यान  
याना चित्त प्रसन्न याना भतिचा जक भाव याःसां असंख्य फल  
प्राप्त ज्वी ।

धुगु प्रकारं त्रिरत्न स्वरूप श्री स्वयम्भूयात ज्ञान पूर्वकं सीका  
श्रद्धा पूर्वकं प्रशन्न चित्त याना सदाकालं ध्यान भाव या धका श्री  
शाक्य मुनि बुद्धं मैत्री बोधिसत्त्वयात आज्ञा दय्का बिज्याःगु श्री  
स्वयम्भू ज्योतिरुप उत्पत्ति पूजा वर्णन जुल ।

इति श्री स्वयम्भू महापुराणे श्री स्वयम्भू उत्पत्ति पूजा वर्णनो नाम द्वितीयोऽध्याय समाप्त ॥२॥



At 10:00 AM

and at 10:15 AM

at 10:30 AM

at 10:45 AM

at 11:00 AM

at 11:15 AM

At 11:30 AM

at 11:45 AM

At 12:00 PM

At 12:15 PM

At 12:30 PM

At 12:45 PM

At 1:00 PM

At 1:15 PM



॥ नमो बुद्धाय ॥ नमो धर्माय ॥ नमो संन्याय ॥

## स्वयम्भू पुराण

तृतीय अध्याय प्रारम्भ



पुच्छाम चैत्यया न्ह्यःने च्वना श्री शाक्यमुनि भगवानयाके  
पूर्वकथा न्यने धुसेंलि मैत्री बोधिसत्त्वं श्री शाक्यमुनि भगवानयात  
हानं बिन्ति याःगु जुल- हे भगवान थर्थिजागु जलामय जुया तःधना  
च्वंगु दहँने गुह्य तथागतया पज्याय् लः सुका नेपाल मण्डल देश  
दयेकूगु खः संपूर्ण खँ आज्ञा दयेका बिज्याहुँ धका बिन्तियागु जुल ।

थुगु प्रकारं मैत्री बोधिसत्त्वं बिन्तियाःगु खँ न्यना श्री शाक्य  
सिंह भगवानं आज्ञा दयेका बिज्यात- हे मैत्री बोधिसत्त्व नाग वास  
दहँले लः सुका देश दयेकूगु खँ जिं कने एकचित्त याना न्यँ ।

परापूर्व काले मनुष्यपिनि आयु ६०००० खुइदो दँ जुया च्वंगु  
बस्सते त्रेतायुगया प्रथम चरणे मुनि मध्ये मुनीन्द्र जुया, धर्मराजा  
जुया, देव मनुष्यया शास्ता जुया व सर्वज्ञ जुया बिज्याह्य विश्वभू,  
नाम तथागत अनुपम धैगु महा तःधंगु नगरया उपकण्ठ  
धैगु गुईं तथागत पिनिगु आश्रमे च्वना सर्वसत्त्वया हित यायेया  
कारणे संघर्षि सहितनं धर्मचक्र प्रवर्तन याये धका वसपोल विश्वभू

तथागत उगु विहारया आश्रमे बिज्याना च्वंच्वन । हे मैत्री ! उजोगु इलय् जि पर्वताख्य बोधिसत्व जुया विश्वभू तथागतया सर्व संघ जुया च्वना ।

सभामण्डले बिज्याना च्वंछ्व विश्वभू तथागतया धर्मोपदेश न्यने धका श्रावक संघपिं जुल, ब्रह्मचारी गणपिं जुल, प्रत्येकपिं जुल, बोधिसत्व महासत्त्वपिं जुल, हानं सद्धर्म गुण वांछा याना च्वपिं महासत्त्वपिं जुल असंख्य प्रमाणं श्रोतादि गणपिं वया तथागतयात बन्दना याना बुद्धया अग्रस सकलें उपस्थित जुया च्वंच्वन ।

थुगु इलय् श्री विश्वभू तथागतं सभामण्डले सकलसिनं ताय्दयेक नाग वास दहँले स्वयम्भू ज्योतिरुप उत्पति जुया बिज्यागु खँ कना बिज्यागु जुल ।

बुद्धया थुगु आज्ञा न्यना सभामण्डल सकलसियां नाग वास दहँले उत्पति जुया बिज्याह्व स्वयम्भू दर्शन यायेगुइच्छा याना बिश्वभू तथागतयात विन्ति यात- हे तथागत ! जिमित श्री स्वयम्भू दर्शन यायेगु इच्छा जुल छलपोलं नाग वास दहँले जिमित ब्वनायंकाः श्री स्वयम्भू दर्शन याका बिज्याहुँ ।

थथे सभामण्डलं विन्ति यागु न्याना न्ह्याः धाःपिं सकसितं विश्वभू तथागतं स्वयम्भू दर्शन याके धका नाग वास दहँ पाखे ब्वना बिज्यागु जुल ।

अनुपम धैगु नगरं सकल लोक सहितं थुगु नाग वास दहँले थ्यांक बिज्यागु जुल ।

नाग वास दहँया किनाराय् थ्यंका सकलसिनं श्री स्वयम्भू दर्शन व पूजा याना नाग वास दहँनं अग्निकोनस च्वंगु पर्वतय् सकल लोकपिं ब्वना श्री तथागत थहाँ बिज्याःगु जुल । थुगु पर्वतस द्वाफोस्वां आदि अनेक जातंजातयागु स्वां होया च्वंगु जुल । थथे स्वां आपालं होया च्वंगु पर्वतस च्वना बुद्ध प्रभृति सकल भिक्षुपिं जुल, बोधिसत्त्वपिं जुल सारासियां व हे पर्वतया स्वां थ्वयाः श्री स्वयम्भू ज्योतिरुपयात पूजा, भाव व ध्यान याःगु जुल । थथे आपालं स्वां होया च्वंगु पर्वत जूगुलिं थ्व पर्वतयात फुल्ल पर्वत धालसां फुल्लच्व पर्वत धका थौंया अद्यापि नाम प्रख्याति जुया च्वंगु द हे दनि ।

थथे नाग वास दहँले बिज्याना श्री ज्योतिरुप स्वयम्भू दर्शन याना अनेगु धर्म कथा उपदेश बिया बिज्याना उह्य विश्वभू तथागतं थःह्यं ब्वना हयापिं सारा लोकपिं ब्वना हानं थःगु अनुपम नगरसंतुं लिहँ बिज्याःगु जुल ।

श्री शाक्यमुनि भगवान् बुद्धं आज्ञा दयेका बिज्यात- हे मैत्री बोधिसत्त्व थुगु इलय् महाचीनया पञ्चशीर्ष पर्वत धालसां न्यागू च्वका लुया च्वंगु पर्वते बिज्याना च्वंह्य महामञ्जुश्रीया निर्माण काय मञ्जुदेवाचार्य नाग वास दहँले ज्योतिरुप स्वयम्भू उत्पति जुया बिज्यात धैगु ज्ञान चक्षुं सीका बिज्याना श्रीमञ्जुदेवाचार्य थः न्ह्यथु लिथु कलाःपिं केशनी व उपकेशनी धयापिं सहितनं ब्वना चीन देशया राजकुमार धर्माकर हानं चीनया लोकपिं सहित नं महाकाल, गणेश आदि ब्वना नाग वास दहँले उत्पति जुया बिज्याःह्य श्री स्वयम्भू ज्योतिरुप दर्शन याये धका बिज्याःगु जुल ।



महाचीनं लोकपिं व्वना नाग बास दहँया इशान कोनया पर्वत  
पाखे श्रीमञ्जु देवाचार्य थ्यंक बिज्याःगु जुल । उगु पर्वतं नाग बास दहँ ने  
उत्पति जुया बिज्याःह्य स्वयम्भू ज्योतिरुप दर्शन याना सारास्यां पूजा  
याःगु जुल । थुजोगु कथं मञ्जुदेव प्रमुखं सकल लोकपिं उगु पर्वतस  
बिज्याना स्वयम्भू दर्शन याना चच्छि जागर्तना याना च्वंगु खत ।  
कन्हेखुन्दु सुथेजुसेलि वसपोल मञ्जुदेव गुरुं जवं चन्द्रहास खड्ग  
ज्वना देपां सफू ज्वना पञ्चबुद्ध दुगु मकुटं पुयाः “सकल लोकथात  
बासबीगु निम्ति नाग बासया लः सुकेत जि वनेत्याना छिपिं थ्व  
पर्वते च्वना स्वयाच्चँ ” धया बिज्याःगु जुल । थथे आज्ञा जूगु खँ न्याना  
वसपोलया कलाःपिं केशनी व उपकेशनी देवीपिं निम्हेसिनं श्री मञ्जु-  
देवयात थथे बिन्तियात— हे नाथ! जिपिं निम्हेसितनं छलपोलं व्वना  
यंका बिज्याहुँ । मञ्जुदेव गुरुं ज्यू वका कलाःपिं निह्यं व्वना दहँया लः  
गुखे व्वथ्याःगु खः उखे च्वंगु पर्वतयात तच्चाना लः पितछोये धका  
बिचाः याना केशनी, उपकेशनी नाप पर्वतं चाः चाः हिला स्वया  
बिज्याना च्वंगु जुल । थुगु इलय् फुल्लच्च धयागु पर्वते थ्यंका  
न्ह्यथुह्य केशनीदेवीं त्यानु चायेका भासु फ्युगु जुल । उह्य केशनी  
यात अन हे तया हानं मञ्जुदेवाचार्य व उपकेशनी पर्वत गया चाः  
चाः हिला लः व्वन्ह्याःगु स्वया बिज्याना जूगु जुल । थुबले हानं ध्यान  
गिरी धालसां धिलाच्च थ्यंका उपकेशनीदेवीं नं त्यानु चायेकल ।  
उह्य उपकेनीदेवीयात नं व हे पर्वते तया मञ्जुदेवं दहँया लः व्वन्ह्याःगु  
स्वस्वं थौंकन्हे कुरुवा धाःगु काँपोतल पर्वतस थ्यंका बिज्यात । श्री  
मञ्जुदेवाचार्यजुं चन्द्रहास खड्गं थुगु काँपोतल पर्वत तछय्ना बिज्यात ।  
थथे मञ्जुदेवजुं पर्वत तछय्ना बिज्यासेलि नाग बास दहँया लः

ह्वारारां पिहा वन । श्व लः पिहाँ वंगुलीं लखय् च्वंपि न्या, ब्यां, ताहा, संखू आदि लखय् च्वंपि नागतनं लिसें पिहाँ वंगु खत ।

थथे नागत लः लिसें पिहाँवंगु मञ्जुदेवाचार्य खना नागतयत्ता पित छोये मञ्जु धका सारा नागतयत् मञ्जुदेवाचार्ये चन्द्रहास खड्गं गाःभुया लः कुंका व हे लः कुंगु थासय् नागतयत् वास बिया बिज्यात । नाग वास दहँया लः कुंका नागतयत् वास बिया बिज्याःगु थाय् आःतकं धना हृद धालसां तःदहँ धका थौंतकं प्रख्यात जुया च्वंगु दहे दनि ।

थथे नागतयत् वास बिया हानं मेगु लः पना च्वंगु कच्छोद्र धयागु काउलेथे आकार वया च्वंगु पर्वत तछ्याना बिज्यात । अननं लः पिहाँ वन । हानं थौंकन्हे सूर्य धार धयागु थासय् लः पना च्वन । अननं पर्वत तछ्याना बिज्यात । हानं थौंकन्हे गोकर्ण धयागु थासय् लः पना च्वन अननं मञ्जुदेवाचार्य पर्वत तछ्याना लः पितव्रया बिज्यात । थथे प्यंगू थासे तछ्याना नाग वास दहँया लः पितव्रया बिज्यात । अनलि धिलाच्वय् च्वंह्य उपकेशनी फुल्लच्वय् च्वंह्य केशनी प्रभृत्ति निह्यं व्वना हानं इशान दिशाया पर्वतय् च्वना च्वंपि चीन देशं व्वना हयापिं लोकपिं व्वनाः थुगु दहँस लः सुना वना च्वंगु स्वया च्वन ।

थुबले नाग वास दहँया लः दक्कं सुना वँसेलि ज्योतिरुप स्वयम्भू उत्पत्ति जुया बिज्याःगु पलेस्वां धेचुला वनाः गोश्रृङ्ग पर्वतय् जूवंगु जुल । थुबले मञ्जुदेवाचार्य सारा लोकपिं मुंका गोश्रृङ्ग पर्वतय्

थत व्वना यंका श्री स्वयम्भू ज्योतिरुप दर्शन पूजा याके व्यूगु जुल ।  
थुवले सकलसियां तच्चतं लय् ताया पूजा भाव याना स्तोत्र पाठ  
ध्यान याःगु खत ।

हानं श्री मञ्जुदेव गुरूं सकल लोकपिं व्वनाः ज्योतिरुप स्वयम्भू  
उत्पति जुया विज्याःगु पलेस्वांया हा प्वः गन लाः धका स्त्रः विज्याःगु  
जुल । पलेस्वांया हा प्वः दुगु थासय् थ्यंका मञ्जुदेवाचार्य स्वया  
विज्याःवले पलेस्वांया हा प्वलं पृथ्वी दुनेया लः तःधा जुइक थहाँ  
वया च्वन । थथे लः धा थहाँ वया च्वंगु मञ्जुदेवाचार्य खना थथे  
खँ मती लुइका विज्यात । थथे हे लः बुया वया च्वन धाःसा हानं  
दहँ जुइत बेर मदु धका वसपोल मञ्जुदेवं लः प्वा तीगु जल स्तम्भ  
योग याना विज्यात ।

मञ्जुदेव गुरूया समाधि योगे उगु लः धा चिच्चा दना  
वंगुलिं श्री नैरात्मा देवी आदि वीर वीरेश्वरीपिं उगु समाधि योगे  
मञ्जुदेवयात दर्शन विया विज्यात । थथे योगय् वीर वीरेश्वरीपिसं  
दर्शन व्यूगु स्वया श्री मञ्जुदेवाचार्य जल स्तम्भ योगं क्वहाँ वया  
जल स्तम्भ योगं दिना वसपोल खगाननादेवीयात श्री मञ्जुदेवाचार्य  
मार्गशीर्ष कृष्णपक्षे नवमी आदित्यवार खुन्हु रात्री जागर्तना याना  
नाना प्रकारं धारणी व्वना मन्त्र जाप याना स्तोत्र याना च्वन ।  
कह्ने खुन्हु मार्ग कृष्ण दशमी खुन्हु सुथय् जुसेलि सुगन्धं स्नान याना  
काय, वाक, चित्त शुद्ध याना श्री खगननादेवी नैरात्मा गुह्येश्वरीदेवी  
यात पूजा याना विज्याःगु जुल ।

थथे श्री स्वयम्भू दर्शन पूजा याय्जीके धका व बसोबास याये दय्के धका नाग वास दहँया लः दक्वो पित व्छयाः भूमि खने दयेका विज्याना केशनी उपकेशनी देवीपिं सहितं श्री स्वयम्भूया पश्चिम भाग पाखे गोपुच्छाय पर्वतस वास याना विज्याःगु जुल । हानं थुवले ब्रह्मा, विष्णु, महादेव, इन्द्र, प्रमुखं सारा दश दिग लोकपालपिनं हर्षमान याना उपछन्दोह पीठ सुदर्जया भूमिस वयाः त्रिरत्नया शरण वना उपोषध व्रतय् च्वना श्री स्वयम्भू पूजा याना श्री गुह्येश्वरी देवीया मन्त्रं जपतप याना विज्याःगु जुल ।

थथे नाग वासया लः फुक्क सुनाः थलभाग जुया मनुष्यपिसं बसोबास यानाहःगु खत । थथे मनुष्यपिसं बसोवास याना हहँ छेँ दयेकाः च्वंगु जुल । थथे नाग वास दहँया लः सुना वं लिसे देश हे दयेका मनुष्यपिसं बास याःगु जुल । श्री मञ्जुदेवाचार्य निर्माण याना दयेका विज्याःगुलिं थ्व देशया नां मञ्जु पट्टन थयागु नां जुल । अले मञ्जुदेवं थःह्मं ब्वना हयाह्म चीन देशयाह्म राजकुमार धर्माकर यात जुजु यायेगु सलः याना तच्चतं उत्सव न्यायेका धर्माकरयात मुकुटं पुयेका राज्य सिंहाशने फेतुका थुगु मञ्जुपट्टन देया राज्यभिषेक बिया जुजु याःगु जुल ।

थुगु इलय् दको देवतापिं वयाः छत्रं कुयेका च्वाम्वलं गायेका पंखां गायेका ध्वजा पताका ब्वयेका उत्सव याःगु खत । मञ्जुपट्टन देया जुजु धर्माकरयात राज्याभिषेक बिया जुजु याना राजधानी राजपट्टन थयागु नां तथा देश, निगम राष्ट्र, राजधानी दकों दयाः

राजा प्रजा सकल सुख पूर्वकं व नियम पूर्वकं च्वंगु श्व नेपाल  
देश जुल ।

थथे शाक्यसिंह बुद्धं मैत्री बोधिसत्वयात आज्ञा जुल हे मैत्री  
बोधिसत्व श्री स्वयम्भू ज्योतिरुपयात दर्शन पूजा भावना ध्यान यानागु  
पूण्यं तच्चतुर्त्त उत्तमगु सिद्धि लाना त्रिमण्डल शुद्ध जुया दुर्गति  
निवारण जुया सदां सत्गती जन्म जुया चतुर्वर्ग फल लाना त्रिवर्ग  
गुण जस बिद्याया स्थान जुया सकल बोधि सामग्रिं पूर्ण जुया सत्त्वहित  
याये फयाः मोक्षफल प्राप्त ज्वी धका श्री शाक्यसिंह भगवानं आज्ञा  
दयेका बिज्याःगु जुल ।

इतिश्री स्वयम्भू महापुराणे महा ंहद सशोषण देश निर्माण नाम तृतीयोऽध्याय ॥३॥





॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण

चतुर्थोऽध्याय प्रारम्भ



गोपुच्छाय पर्वतस विज्याना च्वंह्य भगवान बुद्धयात हानं मैत्री बोधिसत्त्वं विन्तियात- हे शाक्यसिंह भगवान बुद्ध थ्व नागवास दहँया लः सुनाः भूमि खने दयाः देश निर्माण जूगु खँ जिमिसं न्यने धुन आः हानं तीर्थ आदि दया वःगु खँ आज्ञा दयेका विज्याहुँ धका विन्ति याःगु जुल । थथे मैत्री बोधिसत्त्वया विन्ति न्यना शाक्यमुनि भगवान बुद्धं आज्ञा दय्का विज्यात ।

हे मत्री बोधिसत्त्व ! एकचित्त याना न्यँ । मनुष्यतय्गु आयू ४०,००० पी दोल दँ जुया च्वंगु इलय् चमावति धयागु नगरे क्रकुच्छन्द तथागत उत्पत्ति जुया विज्याना च्वंगु जुल । वसपोल क्रकुच्छन्द बुद्ध गथिंजाह्य धालसाँ चय्गु व्यञ्जनं संयुक्त जुया द्वात्रींसत् लक्षणं पूर्णं जुया दशपारमिता दशबल संयुक्त जुया वः मनूया शास्ता जुया विज्याना च्वंह्य वसपोल क्रकुच्छन्द बुद्धं चमावति नगरे महा उत्तम जुया च्वंगु बिहारे धर्मसभा मण्डल दयेका सकल लोकपिन्त कल्याण जीगु उपदेश बिया विज्याना च्वंगु जुल । श्री शाक्यमुनि भगवान् :

आज्ञा जुया बिज्यात— जि उगु इलय् ज्योतिपाल बोधिसत्व धायेका जन्म जुयाः क्रकुच्छन्द तथागतया सर्वसंघ जुया च्वं च्वना ।

थनंलि श्री क्रकुच्छन्द तथागतं संसार उद्धार याये निमित्तं देश देश पत्तिं चाहुलाः धर्मोपदेश बीगु इच्छा याना सकल संघपिं सहित याना आपालं उपाशक उपाशिकापिसं व अने अनेपिं लोकपिसं सहित याना वसपोल क्षमाबति नगरं पिहाँ बिज्यात । देश देशपत्तिं थायेथासे बिज्याना धर्मोपदेश बिया चाहिला बिज्याज्यां कथथे नेपाल मण्डले थ्यंकः बिज्यागु जुल । थनंलि नेपाल देशे चाः हि ह्युं श्री क्रकुच्छन्द तथागत भिक्षुपिं सहित लोकपिनं ब्वना गोश्रृङ्ग पर्वतय् थहाँ बिज्याना द्रलंद्र हःया पलेस्वाँलय् जाज्वल्यमानं प्रकाश जुया बिज्याःह्य श्री स्वयम्भू ज्योतिरुपयात यथाविधिथे पूजा याना नानाप्रकारं स्तुति याना, अष्टाङ्ग प्रणाम याना प्रदक्षिणा दर्शन पूजा याना उगु पर्वतं क्वहाँ बिज्याना उत्तर पत्ति च्वंगु शङ्खोदक नाम पर्वत स्वया भिक्षुपिं सहितं प्यंगू बर्णया लोकपिं ब्वनाः थहाँ बिज्याःगु जुल ।

उगु शङ्खोदक पर्वतय् धर्म सभामण्डल दय्का सारासित बोध यय्या कारणय् श्री क्रकुच्छन्द तथागतं थथे आज्ञा दयेका बिज्यात—गुह्य बुद्धिमानपिसं थुगु उपछन्दोह पीठया आकार जुयाः सुदुर्जया भूमि स्वरूप जुया च्वंगु संपूर्ण धर्मकर्मया सिद्धि बिया च्वंह्य श्री स्वयम्भू ज्योतिरुप उत्पत्ति जुया बिज्याना च्वंगु थथिंज्यागु महान् पूण्य भूमी च्वना प्रवर्ज्यात्रत धारणा याना संम्यकसंबुद्धया शासने च्वमा बोधिसम्बर ज्ञान चले याना च्वनी थुजोपिं बुद्धिमानपिं सर्व क्लेशं मूक्त जुया तृष्णा क्षय जुया त्रिमण्डल शुद्ध जुया राग, द्वेष,

मोह आदि नाश जुया षड्इन्द्रियात त्याके फुह्य जुया निर्मल आत्मा  
जुया चतुर्वर्ह्य विहारे च्वना बोधिज्ञान लाना सम्यक्संबुद्ध पद प्राप्त  
जुइ धका श्री क्रकुच्छन्द तथागतं आज्ञा दय्का विज्याःगु जुल ।

थथे श्री क्रकुच्छन्द तथागतयागु आज्ञा न्यनाः सकल सभालोके  
ध्व संसारं मुक्त जुया निर्वाण वनेगु इच्छा याना प्रवर्ज्या व्रत यायेगु  
इच्छा याना गुण ध्वज धयाह्य ब्राह्मण आदि ४०० ब्राह्मणपिं हानं  
अभयानन्द जुजु प्रभृति ३०० क्षत्रिपिं हानं मेमेपिं आपालं वैश्य,  
शुद्र जनपिं जुल मेमेपिं सकलसिनं श्री क्रकुच्छन्द भगवान बुद्धयात  
थथे विन्ति याःगु जुल- हे भगवान बुद्ध, छलपोलया धर्मोपदेशं जिपिं  
सकलें बोध जूगु जुल जिपिं सकलसियां प्रवर्ज्या व्रतकया भिक्षु जुया  
बोधिचर्या धारणा याना च्वनेगु जुल । छलपोलं कृपातया जिपिं  
सकलसितं भिक्षु याना प्रवर्ज्या व्रते तथा विनय कना बोधि मार्ग  
तथा विज्याय्माल धका सकलसिनं विन्ति याःगु जुल ।

थथे सकलसिगु विन्ति न्यना क्रकुच्छन्द तथागतं गुणध्वज  
प्रभृति अभयानन्द क्षत्री आदि प्यंगू कुलया लस्कर सकलसितं यथे  
धका आज्ञा जुल- तथागतया चर्यास च्वना प्रवर्ज्या व्रत यायेगु  
इच्छा जूसा प्रवर्ज्या व्रतकया भिक्षु जुया बुद्धचर्या चलेया धका  
आज्ञा जुया थौंकन्हे सिद्धि पूच्च धयागु शङ्खोदक पर्वतय् तथा प्यंगू  
कुलया लस्करयात क्रकुच्छन्द तथागतं चूडाकर्म धालसां सँ पाशुक  
खाका विज्याःगु जुल ।

थ्व भिच्छु यानापित स्नान याकेत थुगु पर्वतय् लः मामां  
 ववं थौकन्हे वाक् दुवा धैगु थासय् थेंकानं लः मदया श्री बज्र-  
 सत्वया निर्माण काय जुया बिज्याःह्य क्रकुच्छन्द तथागतं सकलसितं  
 स्नान याकेगु वाक्य उच्चारण याःबले वसपोल बुद्धया वाक्यं हे पर्वत  
 तज्याना लः पिहाँ वःगु जुल । थथे वाक्य याय्वं हे पर्वत तज्याना  
 लः पिहांवःगुलिं थ्व पर्वतयात बाग्मती धालसां वाक्यमती धका नां  
 प्रख्यात जूगु जुल ।

थ्व हे लखय् सकलसियां स्नान यात । थ्वतेया कारने थ्व  
 बाग्मती तीर्थय् गुह्य मनुष्यं स्नान यायी उह्य मनुया सर्व पाप नाश  
 जुया वनी, गुह्य मनुष्यं थ्व तीर्थय् स्नान याना त्रिस्तनया शरण  
 वना उपोषध व्रतय् च्वनि उह्य मनुया त्रिकाय शुद्ध जुया बोधि-  
 संभारं पूर्ण ज्वी ऐश्वर्य गुणं युक्तह्य ज्वी । थथे धका सीका सदा  
 काखं बाग्मती स्नान याना देव पितृपित तर्पण बिये ।

हे मैत्री बोधिसत्व ! थुजोगु कथं उगु शङ्खोदक पर्वतय् गुण-  
 ध्वज आदि ब्राह्मण गणपिं अभयानन्द जुजु प्रभृति सकल क्षत्रि  
 गणपिं वैश्यगणपिं थ्वते चतुर्वर्ण जातया लोकपित चूडाकर्म याःगु सँ,  
 ग्वाय्, लुसि चुइकेत, लः गनं हे मदया च्वंबले छगू भाग सँ आकाशय्  
 ब्वय्का यंकल, छगू भाग सँ अनहे सिद्ध जुया वन । अनंलि ल्यंगु  
 छगू भाग सँ भिच्छुपिसं हे ज्वंका सँ चुयेके धका लः मामां वंबले  
 लः गनं हे मदया गथे याय् गथे याय् जुया श्री बज्रसत्वया निर्माण  
 काय जुया बिज्याःह्य क्रकुच्छन्द तथागतं थःगु हे वीर्य पराक्रमं पर्वत  
 तज्याना लः पिकया बिज्याना व हें लखय् सँ चुयेके ब्यूगु जुल ।

उकिं वज्रसत्वया निर्माण काय जुया विज्याःह्य क्रकुच्छन्द तथागतं  
वीर्यबलं पिकया विज्याःगु लः जूगुलिं उगु तीर्थयात वीर्यमती धका  
नं धाः । प्यांगू वर्णया लोकपिन्त भिक्षु छुगु छगु भाग सँ चुयेकूगुलिं  
केशावती तीर्थ धका नं धाःगु खः ।

सँ सिद्ध जूगु थासे सिद्ध शिखर च्व धालसां सिद्धपूच्च धका  
धाःगु जुल । थनंलि श्री क्रकुच्छन्द तथागतं थ्व प्यांगू वर्णया भिक्षु-  
पिन्त सप्तत्रिंशत बोधिपाक्षिका धर्मउपदेश विया, भिक्षु नियमया ज्ञान  
संपूर्ण आज्ञा जुया विज्यात । थ्व नेपाल मण्डल च्यागू वैतराग तीर्थ  
व थ्व वाग्मती व केशावती निगुलिं याना द्वादश तीर्थ आदि तीर्थत  
प्रसिद्ध जुल ।

सकल लोकयात भिक्षुचर्याय् तथा अष्टवैतराग तीर्थ दकभनं  
भ्रमण याना वसपोल क्रकुच्छन्द तथागतं आपालं भिक्षुपिं नेपाल  
मण्डलेतुं तथा वसपोल हानं क्षमावती नगरेतुं लिहाँ विज्याःगु जुल ।

थुगु खँ शाक्यसिंह भगवान बुद्धं मैत्री बोधिसत्वयात आज्ञा  
दय्का विज्याःगु जुल ।

इति श्री स्वयम्भू महापुराणे क्रकुच्छन्दाभि आगमन भिक्षुचर्या चरणं वाग्मती प्रभवनाम चतुर्थोऽध्याय समाप्तम् ।

10

11

12

13

14

15

16

17

18

19

20

21

22

23

24

25

26

27

28

29

30

31

32



नमो बुद्धाय । नमो धर्माय । नमो संघाय

स्वयम्भू महापुराण

पञ्चमोऽध्याय प्रारम्भ

मणिचूड वैतराग महात्म्य

ह्यापां मणिलिङ्ग वैतरागया खँ थथे ॥

भगवान् बुद्धं आज्ञा जुया बिज्यान् हे मैत्री बोधिसत्त्व परा-  
पूर्वकाले शाकेत नगरे ब्रह्मदत्त राजा व कान्तिमती महारानी राजा रानी  
जुया बिज्याना च्वंच्वन । थुह्य कान्तिमती महारानीया गर्भ दयावःगु  
अवस्थाय् गर्भय् च्वंह्य मचाया प्रभावं महारानीयात अनेगु दोहल  
उत्पन्न जुल । महाराजा ब्रह्मदत्तं महारानीया इच्छा जुक्व पूर्णयाना  
व्युगु खत । कथथे' फिला पूर्ण जुसेलि महारानी कान्तिमतीया पाखें  
रात्रिकाले पुत्र जन्म जूगु जुल । थुगु इले कुमार जात जूबले भद्र-  
गिरि किसि छह्य राजकुले द्वहाँ वःगु जुल । थ्व जन्म जूह्य मचा  
गर्थिजाःह्य धालसां संपूर्ण लक्षणं संयुक्त जुया छयनय् मणिरत्नं संयुक्त  
जूह्य जुल । थ्व मचा जन्म गुयेवं हे शाकेत नगर छगुलिं चान्हे हे  
मचायाछयनय् च्वंगु मणिया प्रभावं सुथय् जूगु थें द्यःतुयूगु जुल ।  
उह्य मचायात मणिचूड धका नां छूगु जुल ।

कुमार कथःथें तःधिक जुया न्यादँ दया वसेंलि बियाश्रमे तथा शिन्हा अध्ययन याकूगु जुल । कुमार मणिचूड सकल बियां पारंगत जुया तच्चतं करुणावानह्य जुया सत्वपिनि उपरे दया दुह्य करुणावान जुया थःह्य अबु ब्रह्मदत्त महाराजायाके विन्ति याना शाकेट नगरया दथ्वी भरायधंक दानशाला दय्का याचकपिनिगु लागिं मणिचूड कुमारं दानशाला चायेकल ।

मणिचूड कुमारं धाः धाः पित्त धाः धाःगु दान प्रदान याना ज्वंगु खत ।

थ्व दानशाला अन्हुयात मखु, निन्हुयात मखु, लच्छियात मखु, दच्छियात मखु, सदाँ सदाँयातं । थुखतं हिं हिं काःवःपित्त धाः धाःम्हेसित धाः धाःगु दान याना च्वंगु जुल । थुगु इलय् भवभुति ऋषिं पलेस्वाँनं बूह्य पद्मावती धयाह्य म्हाय् मचा मणिचूड राजकुमार यात कन्यादान बिया नीरगध-यज्ञया पूण्य फ्वंगु जुल । मणिचूड कुमारं भवभुतिया म्हाय् मचा पद्मावती कन्यादान कया ऋषिं फ्वंगु नीरगध-यज्ञया पूण्य दान बिइ धयागु निर्णय याःगु खत ।

मणिचूड कुमारं पद्मावती विवाह याना छु' दँ लिपा पद्मावतीया पाखें पुत्र जन्म जुल । उह्य मणिचूड कुमारया काय्यात पद्मोत्तर कुमार धका नां छुत । थुगु इलय् ब्रह्मदत्त जुजु थःह्य काय् मणिचूडयात शाकेट नगरया राज्यसिंहाशने फेतुका राज्याभिषेक बिया ब्रह्मदत्त महाराजा कान्तिमती महारानी निह्यतेपुलिं तपोवन बिज्याःगु जुल ।

थनंलि शाकेट नगरया महाराजा मणिचूड जुजु जुया देशे राज्य याना दान शालाय् च्वना हिया ह्मिथं दान काःवपिन्त दानयाना च्वन । थनंलि छन्दु भवभुति ऋषियात बी धयागु नीरगध यज्ञ यायेगु इच्छायाना ब्रह्मरथ धयाह्य राजपुरोहित लिसे सःलः याना नीरगध यज्ञ याय्गु ग्वसाः ग्वःगु जुल । नीरगध यज्ञ मण्डल तयार नं जुल उगु इले आपलं हे तापाक देशं न्याह्य ब्राह्मणपिं नं वया दान काः वःगु जुल । थ्व न्याह्य ब्राह्मणपिसं न्याता प्रकारं फवन । छम्हेस्यां म्हाय् बिया छोयेत खर्च फवन, निह्यमम्हेस्यां कायेयात दासत्वं मुक्त याय्त् खर्च फवन, स्वह्यमम्हेस्यां कलाःयात मुक्त याय्त् खर्च फवन, प्यह्यमम्हेस्यां वासः याय्त् खर्च फवन, न्याह्यमम्हेस्यां बुढा जूगुलिं मणिचूडयाके संपत्ति फवन । न्याह्य ब्राह्मणपिनिगु थुजोगु खँ न्यना महाराजा मणिचूडं करूणा चित्तं, दत्त चित्तं, त्याग चित्तं न्याह्यसितं माको माको संपत्ति दान बिया छोगु जुल ।

भिंगु दिन स्वयाः मू लुखानिसें, धुकू लुखातकं चायेका श्रद्धा पूर्वकं देश देशया जुजुपिं सहित निमन्त्रणा याना राजपुरोहित ब्रह्मरथ, ब्राह्मणपिं सहित तथा महाराज मणिचूडं नीरगध यज्ञ प्रारम्भ याःगु जुल । थुगु इलय् त्रायत्रिंश भवनं देवपुत्रपिं च्वना वःगु बिमान शाकेट नगरे थ्यंका बिमान मन्हात । थथे जूगु स्वया देवपुत्रपिसं देवराज इन्द्रयात शाकेट नगरे बिमान न्हा मवंगु खँ बिनित्याःवंगु जुल । थ्व खँ न्यना उग्रिमे इन्द्रं देवसभा यात । देव सभाय् ब्रह्मा वयाः- “बिमान मन्हाःगु मू खँ मणिचूड महाराजां नीरगध यज्ञ याःगु पूणयया प्रभावं जूगु खः” धका धाःगु जुल । थुबले देवराज इन्द्रं सापर्मिक धंदा कया च्वन ।

मणिचूडं नीरगध यज्ञ याना नीःन्हु दुखुन्हु तिहिने आका  
भाकाये मिछोया च्वंगु नीरगध यज्ञं महा भयंकर मूर्ति जुया च्वंह,  
ह्याउँक मिखा कना, धँवा पिकया मे चुलु चुलु लुयाः यच्च छह  
हाराक्क पिहाँ वल । वं नय्पित्याः पहलं व करूणा स्वरं महाराज  
मणिचूडयात स्वया थथे बिन्तिथात— हे महाराजा जि तच्चतं नय्  
पित्याना च्वन, नय्मखंगु तःन्हुहे दत, छःपिसं धाः धाःम्हेसित धाः  
धाःगु दान ब्यू धाःगु न्यनाः जि थौं नयेगु दान काः वया च्वना ।

वयागु खँ न्यना मणिचूडं थः दुतपित धयाः नय्गु बस्तुत  
देमाय् दंक तथा यच्चया न्ह्यःने न्ह्यच्याके हःगु खत । नय्गु दक्व  
न्ह्यच्याना यच्च थथे धाल— महाराजा जि यच्चया नय्गु बस्तु थ्व मखु, जि  
नय्गु बस्तु क्वा क्वा हि व ला खः । थ्व खँ न्यना जुजुं आज्ञा  
जुल— मन्त्रीपिं संग्रामे सीपिं वा खुसी वांछोयातःपिं सीपिनिगु ला  
हया थ्व यच्चयात नका छो । थ्व खँ न्यनेवहे यच्चं तं पिकया धाल—  
महाराजां छु खँ लहानागु, जि सीपिनिगु ला नैह्य मखु म्वाःपिनिगु, क्वा  
क्वा ला हि नैह्य खः । वयागु खँ न्यना जुजुं धाल— सुयात स्यानाः ला  
हि बी, छाय् धाःसा सुया जक धाःपा नय्यो ! हे यच्च अथे धाय्  
मत्ये बरू मेमेगु छु यो धा जिं छन्त नका व्छय् ।

मणिचूड महाराजयागु खँ न्यना अग्नि यच्चं धाल— महाराज !  
छःपिनिगु दान शालाय् धाः धाःपित धाः धाःगु दान यायी धाःगु मखु  
खनि । नय् पित्याःपित आशां व्याकीगु दानशाला खनी । थथे अग्नि  
यच्चया बचन न्यना मणिचूडं थःगु हे ला हि यच्चयात नका व्छयेगु  
मत्ती तथा महाराजं थथे धाल— हे यच्च ! सुयातं जिं स्याय् फैमखु

ब्रू जिगु हे ला हि वी । नय्ला यक्षजु ? थुलि धयाः मणिचूडं  
वसः त्वःना न्वःगु खड्ग ज्वना यज्ञ मण्डले च्वँच्वंषिं सकलसितं  
वोधयाना महाराजां थःगु ह्यय् च्वंगु ला थः थह्यंतुं खड्गं ध्यना हि  
बाः बाः वय्क यक्षयात ला व्यूगु जुल । यक्षं ला कया क्वप्प नया  
ओत । जुजुं ला विया वं च्वन यक्षं ला नया वं च्वन ।

थथे जुजुं थमंतुं थःगु ला ध्यना दानयाःगु लोकपिसं स्वयां  
स्वय्मफया सकलें खोया जुजुयात लोकपिसं विन्नियाना धया च्वन-  
महाराज ! छलपोलं आमथे लाध्याना दान याना विज्याय् मत्ये  
छलपोल निधन जुल धाःसा जिमित सुनां दान याःवै महाराजा छलपोल  
मदय्का जिपिं गथे च्वँच्वने । महाराजा ला ध्यना विज्याय् मत्ये ।

अथे धाःसां मणिचूडं धिर्ज्यानाः अग्नि यक्षयात ला ध्यना  
दान याना हे च्वन । अग्नि यक्षं जुजुं ध्यना व्यूगु ला नयां  
लुमधना काचाक्क जुजुयात ज्वना क्वात्तुक म्हुतुं वां न्याना अग्नि  
यक्षं जुजुया हि चुकु चुक्यानाः त्वन । स्वया च्वंषिं सकलें  
खया च्वन ।

जुजुं मिखा तिसिना हि त्वंका हे च्वन । यक्षं जुजुयात त्व  
नं, त्वःतल भाराक्क मिक भूमी थसः पाः वन । जुजु स्मृति हीन  
जुया बेहोस जुल । उबले खुताजिं पृथ्वी कम्प जुल लोकपिं सकलसियां  
स्वय्मफया अर्थे भारा भारां ग्वतुल । सारालोकपिं खल । महारानी  
पद्मावतीं हि ब्वाला ब्वाला वयेका, ला पाँय् पाँय् मदय्का बँय्  
ग्वतुला सीह्यथें च्वँच्वंह्य थः भात मणिचूड महाराजायात घय्पुत्ता-



हे नाथ ! हे महाराजा ! छलेपोलं छु याना विज्याना जिपिं गथे  
 याना म्वाया चवने, हे नाथ, हे स्वामि । छक स्वया विज्याहुँ पद्मावती  
 धका : छक धया विज्याहुँ आः जि गथे याय्गु हे भक्त वत्सल, हे दानवीर  
 हे नाथ ! काये खःगु छक स्वया विज्याहुँ । कायेह्य कुमार नं हि  
 स्वः स्वः वःह्य अबुथात घय्पुना तःसलं- यो पिता, यो बा, धका  
 खया चवन ।

महारानी पद्मावतीं थःगु सँ थःह्यं पुयाः बिरह सह यानां  
 सहःयाय् मफया थःगु नुगले थःह्यंतुं दाया- हे नाथ ! शाकेट नगरे  
 गथे याय्गु, जिपिं सुया खःाः स्वया म्वानाचवने धका हा हां खया  
 चवन । ख खं हे मणिचूडया ह्यय् पद्मावती व पद्मोत्तर कुमार  
 भोसुना चवन ।

थुबले हे मणिचूडया बुलुहुं स्मृति दयावया होसवया, चाया  
 वसेंलि खया चवंपिं पद्मावती रानी व पद्मोत्तर कुमारयात- हे  
 पद्मावती, हे पद्मोत्तर, खय्मत्ये, थव संसारे सदां चवने मदु छन्दु  
 त्वःता वने माला चवंगु दु अथे जूगुलिं छिपिं खय्मत्ये धिर्ज या  
 धका धया अग्नियच्चयात ला ध्यना नका हे चवन ।

अग्नियत्तं मणिचूडयात- आः जित ला हि नय् गात जि  
 प्वाः जाल, उकिं छःपित आशिर्वाद बी, जित ला हि नकाः प्वाः  
 जायेका ब्यूगुलिं छपिं याकनं हे त्रायत्रिस भूवने स्वर्गया जुजु  
 इन्द्र जुयेमा ।



यक्षया धुजोगु आशिर्वाद न्यना जुजु मणिचूडं धया विज्यात  
हे यक्ष छ जिमि कल्याण मित्र स्वः । जिं ला हि दान यानागु  
चक्रवर्ति ज्वी, इन्द्र ज्वी धका दान यानागु मखु । जिं थ्व दान-  
शालाय् च्वना दान यानागु पुण्य दःसा याकनं हे बोधिसंभारं पूर्ण  
जुया सम्यक्संबुद्ध जुइ दय्मा । थ्व जिगु प्रणिधान स्वः ।

महाराजा मणिचूडयागु धुजोगु वचन न्यना अगियत्तं यक्षया  
भेष त्वःता इन्द्रया थःगु रुप धारणा याना- जि इन्द्र स्वः धका धाःपाः  
जुया च्वंगु मणिचूडया ह्यय् मृतसंजीवनी धयागु वासः पाका इन्द्र  
अनंतुं अन्तर्धान जुयावंगु जुल । व वासलं याना मणिचूडया शरीर  
हापार्थेतुं दिव्यदेह जूल । महाराजा मणिचूड नीरगध यज्ञयात नी  
छन्दु दुखुनु पूर्णयाना पुरोहित ब्रह्मरथयात भद्रगिरि किसि दान  
व्यूगु जुल ।

थथे मणिचूडं ब्राह्मण्यात किसि दान व्यूगु दुस्प्रह जुजुं स्वया  
ब्राह्मण्यात किसि छु याय्त ? दान बी धुंछ जूसां लित कया व  
किसि जित हिं धका धाःगु जुल । दुस्प्रहया खँ न्यना मणिचूडं लिसः  
बिया विज्यात- दान बीधुंगु वस्तु लित काये मत्यः । उकिं छलपोलं  
लोभ तया विज्याय् मते । मणिचूडं थुलि धाय्वं हे दुस्प्रह जुजु  
तंचाय हस्तिनापुरेतुं लिहाँ वंगु जुल ।

मणिचूडं भवभुति ऋषि सःतके वक्षया नीरगद यज्ञया पुण्य  
दान याःगु जुल । भवभुति आशिर्वाद बिया थःगु आश्रमेतुं ल्यहाँ  
वन । हानं छन्दु दानशालाय् हे मानवक धयाह्य मुनि शिष्य छह्य  
वया थथे धका मणिचूडयात विन्ति याःवल ।

हे महाराजा जिमि गुरु मारिचि ऋषियात गुरु दक्षिणा बियेत  
 झलपोलयाके झता काः वया च्वना । वयागु खँ न्यना मणिचूड  
 महाराजा- झलपोलयात छु माल धया विज्याहुँ धका धया विज्यात ।  
 अले व मुनि- हे महाराजा जिमि गुरुयात गुरु दक्षिणा बियेत  
 झलपोलया पद्मावती रानी व काये राजकुमार पद्मोत्तर पवं वया  
 च्वना धाल ।

मानवक मुनिया थुजोगु खँ न्यना मणिचूड जुजुं थः प्रिय  
 जुया च्वंविं पद्मावती महारानी व पद्मोत्तर कुमारयात जवं व देपा  
 लहातं च्वना हाम्मः कूश तथा लः धाः हायेका संकल्पयाना मानवक  
 मुनिथात दान व्यूगु जुल ।

थुह्य मुनि पद्मावती व पद्मोत्तर निह्यं दान कया थंका  
 थःह्य गुरु मारिचि ऋषियात गुरु दक्षिणा व्यूगु जुल । पद्मावती  
 महारानी अले मारिचि ऋषियागु आश्रमे च्वना वँ पुयेगु, लः काः  
 वनेगु, पूजाभः तयेगु, धुमि च्याकेगु, छुसि माः वनेगु, नय्गु जोरे  
 याय्गु, आरति थिक याय्गु आदि भ्वाति नं याय्गु ज्या यानाः दिन  
 चर्या याना च्वंगु जुल । हानं पद्मोत्तर कुमारं नं मारिचि ऋषिया  
 आश्रमे च्वना विद्याअध्ययन याना च्वंगु जुल ।

मणिचूड जुजुं दान वी धुंह्य किसि भद्रगिरि लितकया मव्यू  
 धका दुस्प्रइ जुजु तंचाया हस्तिनापुरं म्वाःसां म्वाःसां शैन्यत वझ्या  
 हया लडाईं याःवःगु जुल । महाराजा मणिचूडं त्वाय् माली धका

देश्यात त्यागयाना प्यह्य प्रत्येक बुद्धिपिनिगु पाखें शाकेट नगरं पिहा  
विज्यात थुबले दुस्प्रह जुजुया शेन्यतसें देशे तच्चतं हे अत्याचार  
याःगु जुल ।

मणिचूड राजां देश त्वःतायना चाःह्यु ह्युं शुद्ध भूमि, धर्म  
भूमि, पूरणभूमि नेपाल मण्डले ध्यंकः विज्यात । थोंकन्हं मणिशिल  
धैगु पर्वतय् विज्याना त्रिरत्नया शरण वना अनुत्तर सम्यक्स्वोधिज्ञान  
लायेगु इच्छायानाः उगु पर्वतया तपोवने विज्याना च्वंगु जुल ।

शाकेट नगरे हस्तिनापुरया शेन्यतय् पाखें देशवासिपिन्त तच्चतं  
हे पीडित जूगु जुल । थथे अन्याय अत्याचार जूगु स्वयां स्वय्  
मफया मणिचूड जुजुया मंत्रिं शेन्यत सकलें मुंका मारिचि च्छपियागु  
आश्रमे वना पद्मोत्तर कुमारयात व्वना हया शेन्यत संगमयाना  
शाकेट नगरे लडाईं याःगु जुल । अले हस्तिनापुरया शेन्य तय्त  
त्याका पद्मोत्तर कुमारं हे शाकेट नगरे राज्ययाःगु खत ।

छन्हु पद्मावती गुईं सिसाफल खाःवना च्वंवले अनंवः धनंवः  
मदय्क, व्याधा छह्य वया पद्मावतीयात काचाक्क बुयायंका मणिचूड  
राजा विज्याना च्वंगु थासय् यंका अनेकथं महारानीयात सँपुया दाया व  
व्याधां सास्तियाना च्वन । थुबले पद्मावती सास्नां पीडित जुयाः  
जुजुयात पुकारेयाना खल । अय्सां ध्यानयाना च्वंह्य जुजुं थय्क  
छक्क हे मिखाकना मस्वः । व खना पद्मावती महारानीं थथे धाल-  
धन्य जि नाथया चित्त, थः कलाःयात थुपाय्च्वतं सास्नायातनं मिखा  
छक्क कना हे मस्व । गुलि जक छाःगु चित्त ज्वी ।

महारानीयागु थुजोगु वचन ताय्व मणिचूडं मिखाकना व्याधायात थथे धाल - हे व्याधा पतिव्रता धर्मय् च्वंपिं मिसातय्त आमथे सास्ना याय्मत्ये इमिसं सराः बिल धाःसा लगय् जुइयो ।

जुजुयागु वचन ताय्व व्याधां भन पद्मावतीयात सास्तियात । पद्मावतीं सराः बी त्यन । थुबले व्याधां व्याधायागु भेष त्वःता इन्द्रयागु रुप धारणायाना जुजु व महारानी याके क्षमा फवनाः पद्मावतीयात मारिचि ऋषियागु आश्रमे तय् यंकूगु जुल । अत्यन्त रमणिय सिमा स्वाँमा दयाच्वंगु, स्वाँया सुगन्ध वयाच्वंगु, अने अनेपिं भंग पंचिं मधुर सलं गुंजय जुया च्वंगु थासय् च्वना मणिचूड जुजु तग्वःगु लोहँतय् फयतुना थःगु देशवासी व जनता व दानशालाय् फवंवइपिं याचकतय्त लुमंका आः जिथाय् छुं दान काःवैपिंनं मदु काःवःसां जिं छुं दान याय्गु मदु धका बिचाः याना च्वंबले अनंवः थनंव मदय्क न्याह्य ब्राह्मणपिं पाखां थहाँ वया च्वंगु मणिचूड राजां खन । खनेवं मणिचूडं इमित बिज्याहुँ बिज्याहुँ धका थःगु आश्रमपाखे यंका ल्हाः तुति सिका सिसाफल नका मणिचूडं न्याना बिज्यात हे ब्राह्मणपिं थधिज्याःगु दुर्गम बनान्तरे छलपोलपिं गन बिज्याय्त बिज्यानागु ?

महाराजा मणिचूडयागु आज्ञा न्याना ब्राह्मणपिसं जुजुयात थथे धका बिन्तियात-- हे महाराजा जिपिं वयागु कारण छलपोलयात बिन्तियाय् न्याना बिज्याहुँ । हस्तिनापुरे दुस्प्रह महाराजाया देशे महामारीया ल्वय् उत्पत्ति जुया जिमिगु देशे असंख्या लोकपिं सिना वन । उकिं व ल्वय् शान्त यायेत छलपोलया शरीरे च्वंगु शिरो-

मणि फोने धका जिपिं छलपोलयात मामां वया, जिमिगु भाग्यं थौं  
 छलपोलयात जिमिसं नाप लाःगु जुल । हे दानवीर दया सिन्धु  
 महाराजा ! छलपोलं सर्वसत्वयात दयातया विज्यात, छलपोलं जिमिगु  
 हस्तिनापुरे च्वंपिं लोकपित नं करुणा तथा जिमिगु देशे च्वंपित  
 जीवन रक्षा यायेया कारणे छलपोलया शरीरे च्वंगु मणि छगः दान  
 फवने प्रशन्न जुया विज्याय् माल । हैं महाराज ! छलपोल गथिंज्याह्य  
 धालसा पूण्यात्मा, महात्यागी, सत्वप्राणीया उपरे करुणा दुह्य हैं  
 महाराजा जिमिगु देश हस्तिनापुरे च्वंपि सत्व प्राणीपिन्त करुणा  
 तथा छलपोलया शिरे च्वंगु मणि छगः दान याना विज्याहुँ ।  
 छलपोलया मणि दान कया जिमिसं हस्तिनापुरे यंका छलपोलया  
 मणि सिला उगु लखं देशे सकभनं हा हा याना सकसितं लः त्वंका  
 बिई । हे महाराजा थथे याना बियागुलिं हस्तिनापुरे ल्वय् शान्त  
 जुया देशे दुर्भिच्छ आदि शान्त जुइ ।

ब्राह्मणपिनिगु बिन्ति न्यना मणिचूड जुजु अति खुसिजुया  
 ब्राह्मणपिन्त कल्याण मित्र भाःपा महाराजा मणिचूडं थःगु मने  
 धुजोगु खँ बिचाःयात- “अहो आश्चर्य धन्य धन्य जि गथिंज्यागु भाग्य,  
 थौं जिगु शिरे च्वंगु मणि हे दान बी दुह्य जि जुल । वसपोल  
 ब्राह्मणपित जिगु मणि दान बिया हस्तिनापुरे जुया च्वंगु महामारी  
 ल्वय् शान्त ज्वीगु जुल । जित तच्चतं हर्ष जुल ।”

अनं लिपा महाराजा मणिचूडं न्याह्य ब्राह्मणपित थथे आज्ञा  
 जुल- हे ब्राह्मणपिं हस्तिनापुरे जुया च्वंगु, दुर्भिच्छ व ल्वय् शान्त  
 याय्त जिं जिगु छयनय् च्वंगु मणि छलपोलपित दान बीगु निश्चय



जुल । थौंया दिने जिं मणि दान याना दान पारमितानं पूर्ण याये  
 फयेमा थ्व भव संसार समुद्रं पार जुये फयेमा बोधिसंभारं पूर्ण जुयेमा  
 थौंया दिने जिं मणि दानयानाः सत्त्व प्राणीया उपरे सदां सदां सेवा  
 याय् फयेमा धका प्रणिधान याना कमण्डलुस लः कया हया न्याह्य  
 ब्राह्मणपित मणिचूडं थथे आज्ञा दयेकल- हे कल्याण मित्रपिं, हे  
 ब्राह्मणपिं ! थौंया दिने छलपोलपिं बिज्याना जिगु मनोरथ पूर्ण यायेत  
 बिज्यात । धन्य छलपोलपिं, जिं छलपोलपित मणि दान बियेगु निश्चय  
 जुल धका आज्ञा जुया मणिचूडं थुकथं प्रणिधान याना बिज्यात ।  
 “थ्व मणि दान यानागुया पूरणं पृथ्वीपति चक्रवर्ति जुजु ज्वी धका  
 दान यायेत्यनागु मखु । त्रायत्रिसया देवराजा इन्द्र ज्वीगु कामनानं  
 यानागु मखु, वैकुण्ठया नारायणया पद लाके धकानं मखु, कैलाशया  
 महादेव ज्वी धकानं मखु, चतुरमुख ब्रह्मा ज्वी धकानं मखु केवल  
 अनुत्तर सम्यक्संबुद्ध ज्ञान लाना बुद्ध जुया संसारे दक्ख प्राणीपित  
 उद्धार याये फयेमा धका खः । रोगीपिनि त्वय् शान्त याये फयेमा,  
 अगतिपित गती लाके फय्मा । जिं थ्व मणि दान याये त्यना, थ्व  
 दान बियागु हस्तिनापुरे दुर्भिक्षं पिडित जुया च्वंपिं लोकपिनि महा-  
 मारी शान्त यायेया कारणे जिं थ्व मणि दान यायेगु निश्चय जुल”  
 धका मणिचूड राजां प्रणिधान याना बिज्यात ।

थथे मणिचूड राजां पणिधान याये मात्रं थ्व पृथ्वीस खुगू  
 प्रकारं कम्पमान जुया भुखाय् ब्वल भिगू दिशाय्त्सं अन्धकार जुया  
 आकुल व्याकुल जुया, चन्द्रसूर्यया तेज मदयाः स्वया स्वथा थाय्  
 उरः ब्वया च्वंथ्ये च्वन ।



दिशा दिशापतिं मि छो थें खने दया वल । आकासय् देवतापिं कोलाहलं हाला जुल । स्वांमा पतिकं स्वां हायावन सिसा-फलमाय् सिसाफल हायावन । उगु बने च्वंपिं धुँ, चला, भालु वनया जन्तु भंगः पंक्ति पिन्हुया चिचा दना बिस्त्यु व वं हाला जुल । हानं देव, यक्ष, गन्धर्व किन्नर नाग सकल लोकय् हाहाकार जुया वल । हानं ब्रह्मा, नारायण, महादेव, इन्द्र आदि लोकपाल देवलोकपिं आकासय् वया भयभित जुया, आः छु ज्वीन धका हाहाकारं हाला च्वन ।

थुजोगु इले मणिचूडं ब्राह्मणपित स्वया थथे आज्ञा दयेका बिज्यात- हे ब्राह्मणपिं जिगु त्रिन्ति न्यना बिज्याहुँ । छलपोलपिसं जिगु छय्ने कःतिं फाया थ्व छँय्ले च्वंगु मणि हानापं ल्येथना कया जिगु ल्हाती बिया बिज्याहुँ । अले संकल्प ब्वना बिज्याहुँ बोधिज्ञान लायेया कारणे जिं छलपोलपिनिगु ल्हाती थ्व मणि दान बी । बिस्तारयाना बिज्याय् मत्ये याकनं जिगु छय्ने कःतिं फाया मणि लिकया बिज्याहुँ । थथे ब्राह्मणपित धयाः तग्वःगु ल्वहँ अगःलय् फ्यतुना पूर्व स्वया हानं आज्ञा जुल- विलंब याना बिज्याये मत्ये हे ब्राह्मणपिं । याकनं कःतिं फाया बिज्याहुँ । थथे धयाः मिखा तिसिना महाराजा मुलपतिथ्यानाः फ्यतुना बिज्याना च्वन ।

उगु इले वनदेवी छह्म बिज्याना मणिचूडयात करुणा तयाः ब्राह्मणपित वनदेवीं थथे आज्ञा जुल- हे चण्डाल ब्राह्मणपिं थथे परम पूण्यात्मा जुया बिज्याःह्म महाराजायात छाय् कःतिं छय्ः फाय्त्यना ?

बनदेवीयागु थुजोगु वचन न्यना महाराजा मणिचूडं आज्ञा जुल- हे बनदेवी दान काःवःपित गना विज्याय् मत्ये । हस्तिनापुरे जुया च्वंगु महामारी ल्वय् शान्त याय्त मणि काःवःगु खः । हानं व हे देशे महामारी ल्वय् शान्त याय्त जिं मणि दान याय्त्यनागु खः । जिगु दानपारमिता प्रतिज्ञा भंग याना बिज्याय् मत्ये । मणिचूड महाराजां थथे त्याग वचनं धाःगु न्यना साधुवाद बिया बनदेवी लिहाँ वंगु जुल ।

अले मणिचूडया छय्नय् कःतिं गथे याना फाय् धका ब्राह्मणपिं आतां च्वन । मणिचूडं हानं नं ब्राह्मणपित आज्ञा दयेकल- हे ब्राह्मणपिं ! बिस्तारयानाः बिलम्बयाना बिज्याय् मत्ये याकनं जिगु छय्नय् कःतिं फाया मणि लिकया बिज्याहुँ । मणिचूड राजां थथे बारंबार आज्ञा जुसेलि ब्राह्मणपिसं मणिचूडया छय्नय् कःतिं दिका मणि लिकाय्त छँय् फाःगु जुल ।

दयासागर जुया बिज्याःह्य मणिचूड राजां अत्यन्त ज्वयाच्वंगु कःतिं छँय् फायेके बिया अत्यन्त कष्ट सहःयाना वाकु छिना फक्व धिर्ज याना ब्राह्मणपिनि उपरे दयाचित्त तया हि बाः बाः वेका सुंक सहःयाना बिज्याना च्वन ।

ब्राह्मणपिसं कःतिं भवाँय् भवाँय् कियां च्वन । मणिचूड राजाया कपालं तच्चतं हि बाः बाः वयाहे च्वन । थुबले आकासं देवलोकपिसं साधुवाद बिया च्वन मणिचूड राजां वेदना जूगु सहःयाना थथे चिन्तनायाना च्वन । “जित न्ह्याक्वहे वेदना कष्ट जूसां जिगु वीर्य बलं सहित याना सहःयाये । जित दुःख जूसां सकल प्राणिपिं उद्धार

जुयेमा, सकल सत्त्व प्राणीपिनिगु लागि त्याग चितं थ्व मणि दान  
 यानागु पूरणं अनुत्तर सम्यकसंबोधिज्ञान लाये फयेमा ।” थथे धका  
 आशिका याना मणिचूड राजां कःतिं फाःगुहे सहःयाना च्वन । वरू  
 दुनुगलंसिसें थजाःगु इच्छा यानाच्वन “थथे थमं धिर्जयाना छुं जूसां  
 थःगु ला हि दान विया मेपिनि प्राण रक्षा याये धका इच्छा याना  
 च्वनागु यक्व दत्त थौं तिनि थःगु इच्छा पूर्ण जुल थुगु मणि दान  
 सिद्ध मज्जिकं जिगु थ्व स्मृति हिन्न मज्जीमा” धका मन धिर्जयाना  
 हस्तिनापुरया महामारी रोगं पिडित जुया च्वपिनि उपरे करुणा उत्पत्ति  
 याना विज्याना च्वन ।

थुगु प्रकारं शान्तवादि दानवीर करुणावानह्य मणिचूडयात  
 ब्राह्मणपिसं छय्न् य् कःतिं फाया हि बाः वयेक छय्न् य् च्वंगु मणि  
 हा नापं वयेक ल्याहें थनाः लिकाल । थ्व बेलस मणिरत्नया तेजं  
 श्री मैत्री बोधिसत्वया श्री वत्साकार चिह्न लुयावल । मणिचूड राजा  
 लोहं फाँतय् थसःपाःवन । मणिचूड राजाया छय्न्नं मणि लिकाःगु  
 थासं हि बाः वयाः लः बाः वयाच्वंगु थासय् त्वाकज्याना ह्याँउसे  
 च्वना लः न्ह्यानावना च्वन ।

छुं भचा लिपा मणिचूड राजाया स्मृति वया तीजक दना  
 ल्वहं फाँतय्तुं फ्यातुना विज्यात अले ब्राह्मणपिसं छय्न् फाया लिकाःगु  
 मणि जुजुया लहाती तथा बिल । जुजुं अत्यन्त खुसि जुया ब्राह्मणपित  
 मणिदान व्यूगु जुल । थुबले मणिचूडं मणिदान व्यूगु पूरणं खुगू प्रकारं भुखाय्  
 व्वल । ब्राह्मणपिसं मणिचूडयाके मणि दान कया वनाः थौंकन्हे मणिचूड  
 थयागु दहं ले मणि सिला, अपिं थःगु देश हस्तिनापुरे स्वयाःवंगु जुल ।

मणि लिकाःगु घालं जूगु वेदना सहःयाये मफया मणिचूड  
गजा हानं मूछर्या जुल । थुबले प्रत्येक बुद्ध बिज्याना वासलं पाका  
मणिचूड राजायात जुयाच्चंगु वेदना शान्त याना बिल ।

मणि दान कयायंकूपिं ब्राह्मणपिं हस्तिनापुरे ध्यंका जुजु दुस्प्रहयात  
दक्व खँ कनाः मणिचूड राजायागु मणि लःल्हाना बिल ।

अले मणिचूड राजायागु मणि सिलागु लखं देशय् हाहायाना  
बिल, सकल जनतापित मणि सिलागु लः त्वंका बिल । थुलियाना बीवं  
हस्तिनापुरे जुयाच्चंगु दुर्भिच्छ महामारी दक्व रोग शान्त जूगु जुल ।

मणिचूड राजायागु छय्न्य च्वंगु मणि दान कया हस्तिनापुरे  
जुयाच्चंगु रोग, दुर्भिच्छ आदि शान्तयात धयागु खँ पद्मोत्तर कुमारं  
सीका थः अबु मणिचूडयात स्वःवने धका आपालं शैन्य मुंका तपो-  
वने वना अबु स्वःवंगु जुल ।

उखे पद्मावतीं खुगू प्रकारं भुकम्प जूगु स्वया मणिचूड राजा  
यात छु जुलथे धका धंदा कया मारिचि च्छियात बिन्तियाना च्छि  
सहित मणिचूड राजा बिज्याना च्वंगु तपोवने वया मणिचूड राजायात  
प्रणाम याना जूगु खँ न्यना च्वन । थुगु हे इले हानं भवभुति  
च्छिजुनं समाचार सीका मणिचूडयाथाय् बिज्याःगु जुल । थुगु हे  
इले आपालं शैन्य मन्त्री सहित पद्मोत्तर कुमारनं उगु हे तपोवने  
ध्यंक वयाः मांबौयागु पालि भपुया बिन्तियात— हे पिताजु ! भीगु  
देश शाकेट नगरे लिहाँ बिज्याना हापार्थे दानशाला ग्वया सत्व

प्राणिपित करूणा तथा दान प्रदानं सत्त्वं प्राणिपिनिगु दुःख फुका  
बिज्याहुँ । शुलि धया पद्मोत्तर कुमारं मणिचूड राजा व पद्मावतीयात  
रथय् तथा थःगु देशे स्वका हःगु जुल ।

भवभुति ऋषि व मारिचि ऋषि आशिर्वाद बिया थःगु आश्र-  
मय्तुं लिहाँ बिज्याःगु जुल ।

पद्मोत्तर कुमारं थः मां अबु मणिचूड राजा व पद्मावतीयात  
थःगु देश शाकेत नगरे हया सिंहाशने तथा हानं राज्य याके  
ब्यूगु जुल ।

थुबले हानं मणिचूड राजा शाकेट नगरे राज्ययानाः दानशाला  
चायेका धाः धाःपित धाः धाःगु दान प्रदान यानाच्वंगु जुल ।

थ्व खँ भगवान बुद्धं मैत्री बोधिसत्त्वयात आज्ञा दयेका बिज्याःगु  
तीर्थ महात्म्ये मणिलिङ्गेश्वर महात्म्य जुल ।

थ्व मणिलिङ्ग तीर्थय् स्नान याना तकुस्वां दान यायेगु श्री  
वत्स, बालसुकि नागराजा मेला श्रावणा शुक्ल गुंपुहि पीठ उग्रतारा ।

श्री स्वयम्भू महापुराणे अष्ट वंशरागे मणिचूड महात्म्य समाप्त ।

.

0.

0.

1. 2.

.

111...

111...

1

0

.

111...

111...

0

111... 111...

111... 111...

0

1

111...



नमो बुद्धाय । नमो धर्माय । नमो संघाय

## स्वयम्भू महापुराण गोकर्ण वैतराग महात्म्य



पुनर्वार मैत्री बोधिसत्त्वं भगवानयाके विन्तियात- हे भगवान !  
छलपोलं मणिचूड वैतराग उत्पत्ति जृगु खँ आज्ञा दयेका बिज्याःगु  
न्यने धुन । निगूगु गोकर्णेश्वर वैतरागयागु खँ आज्ञा दयेका बिज्याहुँ ।

थथे मैत्री बोधिसत्त्वया विन्ति न्यना भगवान बुद्धं आज्ञा  
दयेका बिज्यात- हे मैत्री बोधिसत्त्व मन तथा न्यँ । परापूर्वकाले  
पाञ्चाल धैगु देशय् वृषकर्ण धयाह्य जुजु जुया च्वन । थुह्य जुजुया  
गोकर्ण धयाह्य याकः काय् राजकुमार दया च्वन । वृषकर्ण जुजुं  
पाञ्चाल देशय् धर्म, न्याय व निरितिं राज्ययानाः प्रजालोकपित प्रतिपाल  
याना च्वन ।

गोकर्ण राजकुमार ल्याय्ह्य जुया वसेलि थः अबु जुजु जुया  
च्वंगु दय्क दय्कं हे थः जुजु ज्वीगु बिचाः याना थः वौ वृषकर्ण  
महाराजाया न्ह्यःने राजकुमारं विन्तियात- हे पिताजु ! छलपोल बुन्हा  
जुल उर्कि थ्व पाञ्चाल देशया प्रजागणपित जिं प्रतिपाल याये । हे  
पिता ! जित राज्याभिषेक बियाः जित थ्व देशया जुजु याना राज्य  
अधिकार बियाः छलपोल ऋषि भेष कया तपोषने तप ब्रत याः बिज्याहुँ ।

गोकर्ण राजकुमारयागु थुजोगु खँ न्यना वृषकर्ण जुजुं तःचवतं  
नुगले स्याका व तंम्वेका धया बिज्यात- हे चण्डालह्य काय्मचा !  
जि दय्क दय्कं जितः बने छोया छं राज्य याय् धायेत छ भचा हे  
मछाः मजूला ? जि यत्तले राज्य थाना चवने छन्त लाय्माल ?

अबुयागु थुजोगु बचन न्यना गोकर्ण कुमारं अबु खना तंम्बय्का  
छाःगु बचनं थथे धाल- हे अबु ! जिं छलपोलयात तप ब्रत याः हुँ  
धका धयां जित भन चण्डाल धका धाल । गुलि जक राज्य यायेगु  
आशादुह्य छःपिं । जिं स्वयंभवे छःपिं बुन्हा जुई धुं'कानं राज्य यायेगु  
इच्छादुह्य, धर्म यायेगु व तपोवन बनेगु चित्त मदुह्य । छःपिं हे  
चण्डालथे च्वं ।

काय्यागु थुजोगु खँ न्यना महाराजां- जि दयेक दयेकं राज्य  
ताके याइह्य छथेज्याःह्य काय् दःसां छु प्रयोजन, सिनावंसां ज्यु धाल ।  
अबुयागु थुजोगु बचन न्यना काय्म्हेस्यां हानं चित्त मभिह्य अबु  
कन्हे कंसतुं छ मृत्यु जुईमा गुलितक जक छ जुजु जुया चवनी ।

काय्यागु छाःगु बचन न्यना वृषकर्ण राजां धाल- छन्त जिं  
जिह्य काय् धया च्वनां छ जा काय् मखु शत्रु खनि, जि दयेक  
दयेकं राज्य याय् धका धाइह्य । धिकार छंगु जन्म । अबुयागु थ  
बचन न्यना काय्म्हेस्यां छ जिह्य अबु मखु शत्रु हे खनि धाल ।  
थथे वं वयात शत्रु वं वयात शत्रु धका अबु व काय् निह्य हिं हिं  
महात्वापु थाना च्वंगु जुल ।

छन्दु अबुह्य वृषकर्ण महाराजां कायन् लहाःगु छाःगु वचन  
न्यने मफया तंचाया थथे धाल- हे कुपुत्र ! छं थुलि जित अपमान  
याइ धका मसिया । छंत जिं जिगु राज्ये तय्मखुत, सम्पतिनं छुं  
छुं बी मखु छ जिह्य कायन् मखुत । छ अवश्यनं शत्रु समानह्य  
जुल । छ जिगु देशं पिहाँ हुँ । अबुयागु थ्व वचन न्यना गोकर्ण  
कुमारं अबुयात थथे धाल हे पापात्मा राजा ! छं जित याकः काय्  
धका सीक सीकं शत्रु धाल । छ जिह्य अबु हे मखु खनि । धिकार  
धिकार ! जिला शत्रुया बीजं जन्म जुल खनि ।

थुजोकथं निह्य काय् व बौ हाला च्वन । हाहां हाहां काय्  
म्हेस्यां तं पिकया अबुयात लहानि प्रहार यात । अबुह्य वृषकर्ण राजां  
सहःयाये मफया काय्यात प्रहारयात । थुजोकथं निह्य काय् व बौ  
दागादुगु जुइक ल्वात । अनंलि वृषकर्ण जुजुं तंम्वेका दूतपितं  
धाल- हे दूतपिं ! थ्व चण्डाल कुमारयात भीगु पाञ्चाल देशे तय्मते ।  
थ्व जिह्य काय् मखु साक्षात शत्रु खनि । थ्वैत छुं हे बी फैमखु  
आः थर्थे हे थ्वयात देशं पितना व्छ । वृषकर्ण जुजुं दूततय्त्त धाःगु  
खँ न्यना गोकर्ण कुमारं अबुयात धाल- हे चण्डालह्य शत्रु अबु !  
जिं थयार्थे छ कन्हे कंस हे मृत्यु जुइमा । छन्त जिं अग्नि सँस्कार,  
पिण्डदान, जलदान आदि छुं हे याय्मखु । जिगु लहानि पिण्डदान  
मयाकं छ पापी गथे जुया गतिलाइ ? स्वेका । छन्त अगति मयासें  
त्वन्ते मखु धका अबुयात आप आदि बिया उह्य काय्मचा गोकर्ण  
तमं तमं पाञ्चाल नगर त्वःता पिहाँवन ।

अले अबुह्य वृषकर्ण महाराजां नं पिहांवंह्य काय्यात- हे चण्डाल  
शत्रु थुजोह्य कुपुत्रह्य काय्मचा, छं याःगु पापं याना छ थुगु हे जन्मे  
नरक भोग याइह्य जुइमा धका श्राप बिया छोट ।

थःगु देश त्वःता पिहाँ वंह्य गोकर्ण कुमार ववं ववं अनवने  
थनवने मदया जंगलं जंगलं ववं थुह्य गोकर्ण कुमार कर्म विपाकं  
याना कर्मभूमी लाःवन । व थासय् छह्य मनूयात सिमा छमाय्  
प्यपुं क चिनातल । व सिमायागु चुपिथें च्वंगु सिमाहलं उह्य मनूयागु  
ह्यय् प्वाः प्वाः गंक ला पाँय् पाँय् कुतु वेक हि बाः बाः वेक कया  
च्वन । व घालं याना व मनूयात सीनं मफु म्वाय् नं मफय्क वेदना  
जुया च्वन ।

वयात खना गोकर्ण कुमारं न्यनः- हे दाजु छन्त आमथे  
सुनां यानातःगु ? व मनूनं गोकर्ण कुमारयाके छि सु सीह्य लाकि  
म्वाःह्य तिनि धका न्यन । गोकर्ण वयात जि वृषकर्ण जुजुया काय्  
गोकर्ण कुमार खः जि म्वाःह्य तिनि सीह्य मखु धका लिसः बिल ।  
थ्व खँ न्यना असिपत्र नरकय् भोगयाना च्वंह्य व मनुखं धाल- हे  
कुमार जिला मां बौयात तच्चतं हे दुःख बिया वयाह्य सी धुंकूह्य  
जि खः । जि याना वयागु कर्म विपाकं याना थन जित कर्म भोग  
याका तःगु खः । छपिं थन म्वाः म्वाकं हे गथे लाःवल ? छपिन्त  
अवश्यनं कर्म पाशं चिनाः थन हःगु खै ।

कर्म विपाक भोगयाना च्वंम्ह्यसिगु खँ न्यना गोकर्ण राजकुमार  
थ्व थासं मेथाय् स्वया वमेगु यात ।

मेथाय् नं हानं गोकर्ण राजकुमारं कालचक्र छय् नय् चाःहीका  
छय् नं न्ह्यपु व हि वाः वाः वेकाः सास्ना याकाः थःगु हि व न्ह्यपु  
थःह्यंतुं नया च्वंह्य कर्म विपाक भोग याना च्वंह्य पापी खन । वयाके  
नं गोकर्ण राजकुमारं न्यन- हे दाजु ! छन्त आमथे सासना सुनां  
याना तल ? छु कारणं छ आमथे जुइका च्वना ? कालचक्रं हीका  
च्वंह्य पापीं धाल- हे महापुरुष ! थुगु सासना सुनानं याःगु मखु ।  
जिगु कर्मतुं याकूगु खः ।

गोकर्ण धाल-- गथे छंगु कर्म याःगु ? भोगयाना च्वंह्य धाल-  
पूर्व जन्मे मांबौयात नकें मनकेंयाना लालाथे वः वियावयागु अपराधं  
थुगु कर्म भूमी च्वना थुजोगु कालचक्र छय् नय् तथा चानं हिनं  
सासना नया च्वने माःगु खः । जि थुगु प्रकारं दुःख सिया च्वनागु  
ताकालं दत थनितिनि थ्व नरकं जि मुक्त जुइगु जुल । छाय् धाःसा  
मांबौयात अपराध मयापिं सुनं थुगु कर्म भूमिस वैमखु । छ नं मां  
बौयात अपराधयाना वःह्य जुई । आ छं नं थ्व चक्र छय् नय् चाः  
हीका सीनला सीनला धयार्थे च्वंक दुःख बेदना भोग याइगु जुल ।  
छ जित पाःहिलेत वःह्य खः ।

थथे कर्मभोग याना च्वंह्य पापीयागु वचन न्यना गोकर्ण  
कुमारं थः बौयात प्रहारयाना वैगु अपराध लुमनाः अत्यन्त ग्याना  
उखें थुखें स्वया- हा हा जि कर्म आः गथेयाय् जि थन च्वनां थीक  
ज्वीमखुत धका गोकर्ण राजकुमारं नमो रत्न त्रयाय धका धाधां मिखा  
तिसिना उत्तर पाखे स्वया वथासं त्रिस्युवन । कालचक्र छय् नय् हीका  
च्वंह्य पापीं ततःसलं थथे धयाहल-- हे गोकर्ण आम कर्मपाशं चिना



हय धुंकूह्य छ गनवनी ? न्याथाय् वंसां छन्त जीमखु वंगु वंगु  
थासय् लित्तूलिना थुगु थासय्तुं हया छन्त थुगु थासय् तया छँयल्य्  
कालचक्र हीकीतिनि । थथे धया हःगु न्यना गोकर्ण राजकुमार बेगं  
बिस्थुं वना च्वन ।

गोकर्ण राजकुमारं नमो गत्तन त्रयाय धका धया वनाच्चंगु  
पुण्यया प्रभावंयाना कर्मभूमिं छलय् जुया ववं ववं छगू ग्रामया लँपु  
पाखे लाःवन । गोकर्ण कुमारं लँय् वयाच्चंह्य छह्य उपाशकयाके ग्याग्यां  
न्यन- जि वृषकर्ण जुजुया काय् गोकर्ण खः । जि अबुयात तच्चतं  
अपराध याना वयाह्य खः । जि अबुयात द्रोह यानावयागु पाप छु  
उपाय याःसा व छु धर्म याःसा ल्हनि ? जि गन वने माल ?  
जित उगु उपाय कृपातयाः कना दिसँ रे ! विन्ति धाय् । गोकर्ण  
कुमारयागु थुजोगु खँ न्यना उह्य उपासकं धाल- हे कुमार ! आम  
पितृद्रोह पाप फुकेगु उपाय जिं कने एकचित्त याना न्यां, तथागतपिसं  
अधिष्ठान यानातःगु हानं महा पापी जुया नरक भोग याना च्वंपिं  
पापीपित नरकं उद्धारयाना विज्याइह्य श्री आर्याबलोकितेश्वरं नं अधिष्ठाना  
याना तःगु तपोभूमि हिमालय पर्वतया सतिक्क नेपाल मण्डल पूण्य  
भूमि वागमती खुसि व अमोध फल दायनी खुसि संगम जुया च्वंगु  
पूण्य तीर्थ छगू दयाच्च्वन । उगु तीर्थे सर्व पाप शोधन जुयाच्चंगु  
निमित्तं याना शोधन तीर्थ धका नं धाः । हे गोकर्ण ! उगु तीर्थे  
वना श्री आर्याबलोकितेश्वरया स्मरण याना षडक्षरी मन्त्र जप  
याना त्रिरत्नया शरण वना उपोषध व्रत च्वनाः तीर्थ सेवा याःहुं  
धका उह्य उपासकं धाःगु जुल ।



थथे उपाशकया वचन न्यना गोकर्ण कुमार नेपाल मण्डल  
पूण्यभूमि सीके धका अननं प्रस्थान याना ववं लय् नापलाक्वासिके  
न्यन्यां नेपाल मण्डले थ्यांका श्री स्वयम्भू दर्शन याना अननं मामां  
पूण्य तीर्थे थ्यांक वल । पूण्य तीर्थे थ्याँसेलि गोकर्ण कुमार हीहिं  
तीर्थे स्नानयाना त्रिरत्नया शरण वनाः फियागु चैत्य दय्का उपोषध  
व्रतय् च्वना षडक्षरी मन्त्र जपयानाः हीहिं तीर्थ सेवा याना  
च्वंगू जुल ।

थुगु प्रकारं गोकर्ण कुमारं पूण्य तीर्थे च्वना तीर्थ सेवा याना  
च्वंगु भिनिदँ दयावसेलि पाञ्चाल देशे जुजु जुया च्वंहा वृषकर्ण  
महाराजा मृत्यु जुया वन । मृत्यु जुयावंहा वृषकर्ण जुजु संस्कार  
हीन जुया अगति जुल । वृषकर्ण जुजु अगति जुया राजकुले दक्व-  
सितः दुःख बिया पिरेयाना च्वंगु जुल । थुजोगु प्रकारं जुजु अगति  
जुयाः दुःख बिया च्वंगुलिं उगु लाय्कुली सुं हे च्वने मछाला लाय्कू  
छगुलिं शुन्य जुया च्वन ।

उजोगु इले गोकर्ण राजकुमार पूण्य तीर्थे त्रिरत्नया शरण  
वनाः उपोषध व्रतय् च्वना तीर्थव्रत यानाच्वंगु सुखावति भूवनस  
विज्याना च्वंहा श्री आर्यावलोकितेश्वरं लोक दर्शन नाम समाधिं  
सीका विज्यात । अले गोकर्ण कुमारयात मुक्त याय्या कारणे  
गगनगंज बोधिसत्वयात सःता थथे आज्ञा दय्का विज्यात- हे गगन-  
गंज बोधिसत्वः छ नेपाल मण्डलयागु पूण्यतीर्थे उपोषध व्रतय् च्वनाः  
तीर्थसेवा यानाच्वंहा गोकर्ण राजकुमारयात याकनं उच्चार याना वा ।

श्री करुणामययागु थुजोगु आज्ञा न्यना गगनगंज बोधिसत्व  
 सुखावति भूवनं बिज्याना पूण्य तीर्थस थ्यंकः बिज्यात । वसपोल  
 गुगुप्रकारं बिज्यात धाःसा थःगु शरीरं सूर्यया तेजथे रश्मि पिकया  
 पलेस्वाँ छफो ज्वना थःगु रश्मि गोकर्ण कुमारयात खय्का बिज्यात ।  
 थुबले गोकर्ण राजकुमारं दना- अहो आश्चर्य थ्व तेज थ्व रश्मि  
 गनं वल धका स्वःबले थःगु हे न्ह्यःने श्री गगनगंज बोधिसत्व  
 बिज्याना च्वंगु खना गोकर्ण राजकुमारं काचाकाचां प्रदक्षिणा याना  
 वन्दना यानाः थथे धका बिन्ति याःगु जुल- छलपोल सुथे गुह्यथे  
 जिं मसिल कृपा तथा आज्ञा दय्का बिज्याहुँ ।

कुमारयागु थुजोगु बिन्ति न्यना गगनगंज आज्ञा जुया बिज्यात-  
 जि करुणामयया आज्ञा अनुसारं सुखावति भूवनं वयाह्य गगनगंज बोधि-  
 सत्व थयाह्य खः । थ्व खँ न्यना कुमारं- हे बोधिसत्व जुया बिज्याःह्य ।  
 जि जुलसां थःह्य पिता वृषकर्ण यात द्रोह याना वयाह्य पितृद्रोही  
 खः जिगु पाप दक्क लहनीगु उपाय कृपायाना आज्ञा दय्का बिज्याहुँ  
 गोकर्ण राजकुमारयागु थ्व बिन्ति न्यना बोधिसत्वं आज्ञा जुल- हे  
 गोकर्ण राजकुमार छं हापां छिमि पिता वृषकर्ण जुजुयातनिं उद्धार  
 या । छाय्धाःसा छिमि पिता वृषकर्ण मृत्यु जुया संस्कार हीन जूगुलिं  
 अगति जुया च्वन । उकिं वयात षट्गती लाका बी माल । आः छं  
 हापायागु कु संस्कार त्वःता छं पिता वृषकर्णया नामं थ्व पूण्य तीर्थे  
 पिण्ड दान यानाः पितायात गती लाकाः उद्धार याना बिये माल ।  
 छिमि पिता सुगती लात कि छंगु पितृद्रोही पाप नं फुना वनि ।

बोधिसत्त्व गगनगंजया आज्ञा अनुसारं गोकर्ण कुमारं छन्दु  
निन्दु लिपा हे वसपोल गगनगंज बोधिसत्त्वया हे न्ह्यःने उगु पूण्य  
तीर्थे पिता वृषकर्ण जुजुया नामं श्रद्धा पूर्वकं पिण्डदान याःगु जुल ।  
गोकर्ण राजकुमारं बुद्ध, धर्म, संध, सुखावति भूवनया लोकेश्वर आदि  
आह्वान याना थःह्य पिता वृषकर्ण जुजुया नामं पिण्डदान याःगु  
पूण्यंयाना षडगती जन्म काःवने मफया च्वंह्य अगतिह्य वृषकर्ण जुजुयात  
क्रायंयाःगु पिण्डदानयागु फलं सुगति प्राप्त जुल । अगतिं सुगति  
प्राप्त याःह्य वृषकर्ण जुजुं पिण्डदान ब्यूम्ह काय् गोकर्णयात आशिर्वाद  
बिया सुखावति भूवने बास लावंगु जुल ।

थुबले गोकर्ण गगनगंज बोधिसत्त्वयात पूजाभाव याना थथे  
बिन्ति याःगु जुल- छलपोलयागु आज्ञा अनुसारं पिण्डदान यानागु  
पूण्यंयाना अगती लाना च्वंह्य जिमि पिता सुगति प्राप्त जुल । जिगु  
पितृद्रोह पापनं फूगु जुल । अले अनेगु प्रकारं प्रार्थना याना गगन-  
गंज बोधिसत्त्वयात गोकर्ण राजकुमारं वसपोल सदाकालं थन हे बिज्याय्  
माल धका प्रार्थना याःगु जुल ।

गोकर्ण राजकुमारं थथे प्रार्थना याःगु न्यना वसपोलं राज-  
कुमारयात सत्त्व प्राणीपिनिगु लागि छथासं च्वने मज्यू जगतया  
कारणे सकभनं जुयेमा धका वसपोलं पलेस्वांया चिह्न तयाः थःगु  
शरीरं रश्मि पिकयाः छगः ल्वहँतय् तेज खय्का वसपोल गगनगंज  
बोधिसत्त्व अन्तरध्यान जुया बिज्याःगु जुल । वसपोलं रश्मि खय्का  
थकूगु ल्वहँ थौंया अद्यापि गगनगंज बोधिसत्त्व धका प्रख्यात जुया

च्वंगु दु । हानं गोकर्ण राजकुमारयात उद्धार यायूत बिज्याःगु जूगुलि  
व थाय् गोकर्णेश्वर धका धया च्वंगु दु । थुगु स्थान तीर्थयात हे  
गगनलिङ्गेश्वर धालसां गोकर्णेश्वर वैतराग धका नां प्रख्यात याःगु जुल ।

थनंलि गोकर्ण राजकुमारं उह्य लीन जुया बिज्याःह्य बोधि-  
सत्वयात नमस्कार व प्रदक्षिणा याना थःगु पाञ्चाल नगरेसंतु वन ।  
अन वना वं देशे राज्ययाना अष्टमिपत्ति उपोषध व्रत धारणायाना, श्री  
करुणामयया भजनयाना सकल लोकपित प्रतिपाल याना सुख आनन्दनं  
च्वनाच्वंगु जुल ।

थ्व हे कारणं याना श्रावण मासया कृष्णपक्षे अमावसि  
सोमवार खुन्हु गोकर्ण तीर्थे वना गुह्य मनुष्यं स्नानयाना सीपिनिगु  
नामं पिण्डदान याइ, हानं उपोषध व्रतय् च्वना त्रिरत्नया शरणे वनि  
अले गोकर्णेश्वर वैतरागयात पूजायाना तीर्थ सेवा याइ उह्य मनुष्यया  
पितृजुयावंपिं बौ, बाज्या, आदिपिं सडगती लाना इमित सुखावति  
भूवने बास लाइ । उजोगु कर्मयाःह्य मनुष्य नं जीवन दतले एश्वर्य  
भोग यायेदुह्य व अन्तकाले बोधिसंभारं पूर्ण जुया संम्यक्संबोधि पद  
तक प्राप्त ज्वीह्य जुइ ।

थ्व दक्व खँ श्री शाक्यमुनि भगवानं मैत्री बोधिसत्व प्रमुखं  
सकल सभालोकं ताय् दयूक थ्व गोकर्णेश्वर वैतरागया खँ आज्ञा  
दयेका बिज्याःगु जुल ॥२॥

बाग्मत्यां पितृवत्यां यत्र संगमे गृष्म रत्न तीर्थमतो श्रावण कृष्ण औसि  
स्नान- वँचू भर्ति स्वां दान- पलेस्वां  
गगनगंज बोधिसत्त्व, गोकर्णेश्वर, पीठ-रूद्रायणी  
नाग- तक्षक नागराजा ।

श्री स्वयम्भू महापुराणे गोकर्णेश्वर वैवराण महात्म्य समाप्त ॥२॥



पुस्तक संख्या १०००

१९९९

पुस्तक संख्या १०००

१९९९

१९९९

१

१९९९





नमो बुद्धाय । नमो धर्माय । नमो मंत्राय

## स्वयम्भू महापुराण किलेश्वर वैतराग महात्म्य



थनंलि पुनर्वार मैत्री बोधिसत्त्वं ल्हात हाजोलपा श्री शाक्य-  
मुनिया चरण कमले बन्दना याना विन्तियात- हे भगवान ! हे  
सर्वज्ञ जुया विज्याःह्य छलपोलं गोकर्ण वैतराग सिद्धजुगु खँ न्यांका  
विज्याय् धुंकल । आः हानं किलेश्वर वैतरागया खँ न्यनेगु इच्छा  
जुल सकललोक हित यायेया कारणे छलपोलं कृपातया आज्ञा दयेका  
विज्याहुँ । थथे मैत्री बोधिसत्त्वया विन्ति न्यना सकल सभां ताय्  
दयेक श्री शाक्यमुनि भगवान बुद्धं आज्ञा दयेका विज्यात ।

हे मैत्री बोधिसत्त्व परापूर्व काले थ्व नेपाल देश सत्ययुगय्  
नामवास दहँ जुयाः असंख्य नागराजापिसं बासयाना च्वंगु जुल ।  
थुजोगु नागवास दहँया दथुं दलंद्र हः दुगु पलेस्वां छपवः होयाः व  
हे पलेस्वांया दथ्वी ज्योतिरुप स्वयम्भू उत्पत्ति जुया प्रकाश जुया  
विज्याना च्वंगु ताकालं दया वसेंलि उत्तर दिशास महाचीन देशे  
विज्याना च्वंछ्छ श्री मञ्जुश्रीया निर्माण काय मञ्जुदेवाचार्य गुरूं श्री  
स्वयम्भू ज्योतिरुप दर्शन याय् धका थः कलाःपिं केशनी उपकेशनी  
सहित सकल लोकपिं ब्वना थ्व नागवास दहँले विज्यात ।

थनंलि थुगु दहँले बिज्याःह्म श्री मञ्जुदेवाचार्य श्री स्वयम्भू  
ज्योतिरुप दर्शन व पूजा याय् धुंका थुगु दहँया लःदको पितळोया  
भूमि स्थल याय् धैगु इच्छा याना बिज्यात ! दहँया लक्षण स्वया  
कापोतल धालसां थौंकन्हे कुदुवाल धयागु स्थानस च्वंगु पर्वत चन्द्र-  
हास खड्गं तळ्याना नागवास दहँया लः फुक्क पितळया बिज्यानाः  
लिपा वसपोलं हे शहर दय्का बिज्यासेलि आपालं मनूत वया बस्ती  
दय्का वसोबास यानाच्च्वंगु जुल ।

थुगु कथं आपालं काल वसेलि कुलिक नागराजां दको नागत  
मुंका भीगु जलासय स्यांका स्थल भाग दयेकल धका दको नाग-  
तय्त तंपिहाँ वयेका बिल । अले वं हानं नेपाल देश ह्यापार्थे दहँ  
दयेक्यगु सल्लाह त्रिया कुलिक नागराजा थौंकन्हे चारुगिरी धयागु  
चांगु पर्वतय् च्वना सकल नागतय्त थाय् थासय् च्वंगु हसि काप  
प्वाः तिकेबिल । वा वय्का जलवृष्टियाना लः वधय् याना लःकुंका लखं  
नेपाःदे थना हया च्वन ।

लः बधय् जुया ववं नेपाल देशे छें पिहाँ वने हे मजीक लः  
जाया छें छें हे लः दुहाँ वल । अथे जुजुं लखं हे नेपाःदे त्वप्पीथें  
च्वना वल । थुजले सकल लोकपि ग्याना आः गय् याय् आः गय्  
याय् धका अनेक प्रकारं हाला थःपिं स्वाइगु आशा हें मदया अनेक  
देव देवतापिनिगु शरण वना पुकारेयाना च्वन । गुलिं मनूत कुल  
देवतायागु शरणे, गुलिकरूणामय आर्याबलोकितेश्वरया शरणे वना प्रार्थना  
व स्मरण याना च्वन । गुलिं मनूत नमो बुद्धाय, नमो धर्माय, नमो  
संघाय, नमो रत्नत्रयाय धका पुकारेयानाः जिपिं सकलसित करुणा

दृष्टिं स्वया रक्षायाणाः उद्धार याय्माल धका हाला च्वन । गुलिं मनूत विशद्वं विशद्वं हालाः ख्वया च्वन । गुलिं मनूत आः त्रिपिं सकलें फुत, श्री मञ्जुदेवाचार्यया कीर्ति नं मदगु जुल धका नाना प्रकारं हाला ख्वया श्री ज्योतिरुप स्वयम्भूयाके शरण वना च्वंगु जुल ।

थथे नेपाल मण्डले नागत दक्व मुना कुलिक नागराजा प्रकोप जुया हसिकाप प्वाःतिना जलवृष्टि आदियाणा वा वयेका लः बधय् यानाः हानं दहँ हे दय्केत नागतसें सनाच्वन । लोकपिं दक्वं सिना वर्नीगु महाभयनं त्रास चाया त्रिरत्नया शरण वना श्री ज्योतिरुप स्वयम्भूयाके शरणवना, पुकारेयानाः दुःखं पीडित जुया ख्वया हाला च्वन धैगु श्री करुणामय आर्यावलोकितेश्वरं लोक दर्शन धयागु समाधि योगं सीका लोकया उपरे करुणा तया हतासं हतासं समन्त भद्र बोधिसत्वयात सःता श्री करुणामयनं थथे आज्ञा दयेकल- सकल सत्वपिंत कल्याणयाना च्वंह्य हे समन्त भद्र बोधिसत्व ! छ याकनं नेपाल मण्डले वना लोकपिंत उद्धार याय् माल । अन कुलिक नाग राजां नागत दक्व मुंका नेपाल देशयात हानं ह्यापायार्थे दहँयाय्त लः कुना लः बधय् याना हयाच्वन लोकपिं मर्णान्तकया महाभयनं दुःख ताया हालाः ख्वया च्वन । छ अनवना कुलिक नाग आदि दक्व नागपिंत बुझय् याना शान्तियाना वयेमाल ।

थुलि श्री आर्यावलोकितेश्वर करुणामयया आज्ञा न्यना उह्य समन्त भद्र बोधिसत्वं चिन्तामणि ध्वजा छपु ज्वना जाज्वल्यमानं तेज प्रकाशयाना सुखावति भूवनं प्रस्थानयाना नेपाल मण्डल स्वया

क्वहाँ बिज्याःगु जुल । नेपाल मण्डल हानं दहँ जुइथें च्वंक लः  
जाया वःगु स्वया वसपोल समन्त भद्र बोधिसत्वं बिचाःयाना चारुगिरी  
पर्वतय् च्वना च्वंहा कुलिक नागराजायागु ह्यय् गया वयागु छय्न्य  
थःह्य ज्वनावथागु ध्वाय् स्वाना बिज्यात ।

समन्त भद्र बोधिसत्वं ध्वाय् स्वाना बिये मात्रं कुलिक नाग  
राजाया बल मदया वन । कुलिक नागयागु छय्न्य ध्वाय् स्वाःगु  
नागतसें खनेवं दक्व नाग त्रास चाया बिस्युंवन । हसिकाप प्वाःतिना  
च्वंपि नागतनं बिस्युंवन । हसिकापया प्वाः चालावना दहँले च्वंगु  
लः दक्व पिहाँवन । मनूत दक्व वचय् जुल ।

धुगु इलय् थःगु ह्यय् गया ध्वाय् की स्वाना बिज्याःह्य  
समन्तभद्र बोधिसत्त्वयात स्वया कुलिक नागराजां बिनित्यात हे नाथ  
समन्तभद्र बोधिसत्त्व ! जिगु अपराध क्षमा याना बिज्याहुँ । अले  
समन्तभद्रं नागयाके न्यना बिज्यात- हे नागराजा ! छलपोलं छाय्  
हानं दहँयाना बिज्याय् त्यनागु ? कुलिक नागं बिनित्यात जिमिगु नाग  
वास दहँ स्यांकाः मनूतसें वसोवास याःगुलिं हानं नेपाल मण्डल  
हापायार्थें दहँ दयेके धका जिपिं नाग दक्व जाना सनाच्च्वनागु खः ।  
थौं छलपोल जिगु ह्यय् बिज्याःगुलिं उफोस्वांया मालं ब्रुवाय्थें जिगुह्य  
अति आनन्द शीतल जुल । थौंया दिने छलपोल जिमिगु भाग्यं  
दर्शन दत्त धका कुलिक नागराजां समन्तभद्र बोधिसत्त्वयात अनेक  
प्रकारं स्तोत्रयाना बन्दना याःगु जुल ।

समन्तभद्र बोधिसत्त्वं सकलयात हित यायेगु कारणे आज्ञा  
जुल- हे कुलिक नागराजा छ नम्बेके मत्ये क्रोध याय्मत्ये दुःख  
तायमत्ये छं थ्व मञ्जुदेवाचार्या कीर्ति स्यंकेगु ज्या याय्मत्ये । थ्व  
कीर्ति नाश याय्गु तःसकं अयोग्यगु खः, छाय् धाःसा श्री स्वयम्भू  
ज्योतिरूप उत्पत्ति जुया सकल देव मनुष्यपिसं वासयाना च्वने धुंकूगु  
थ्व धर्मक्षेत्र पूण्य भूमियात स्यंकेगु मत्तिइ तय्मत्ये स्यंकेनं मत्ये ।  
थर्थिज्यागु पूण्यभूमि धर्मक्षेत्र सकलया वसोवास स्यंकल धाःसा आपालं  
वर्षतक नरकभोग याय्माली । उकिं करपिनि वसोवास स्यंकेमत्ये ।  
हे कुलिक नागराजा नेपाल मण्डले हे वसोवास याय्गु इच्छा दुःसा  
केशावति व विमलावति निगुलिं होना च्वंथाय् वासयाना च्वंहुँ थःगु  
मनोरथ पूर्ण जुइ ।

समन्तभद्र बोधिसत्त्वया आज्ञा न्यना वसपोलयात वन्दनायाना  
केशावति व विमलावति संगम जुया च्वंगु तीर्थस कुलिक नागराजा  
वासयाना च्वंवंगु जुल । थनंलि समन्तभद्र बोधिसत्त्वं उगु चारूगिरी  
पर्वतया सत्तिक च्वंगु दहँया लिक्क च्वंगु त्वहँतय् तेज पिकया थःमं  
ज्वना वयागु ध्वाँय् स्वानाः अनहेसंतुं अन्तर्ध्यान जुया विज्यात ।  
उखुन्दुनिसें समन्तभद्रं कुलिक नागयात की स्वाःगु ध्वाँय् त्वःता  
थका विज्यात । उकिं व थाय् किलेश्वर वैतराग थका नामं प्रसिद्ध  
जूगु जुल ।

थथे थका श्री शाक्यसिंह भगवान बुद्धं मैत्री बोधिसत्त्व प्रमुखं  
सकल सभा मण्डलं ताय्दय्क थ्व किलेश्वर वैतरागया खँ आज्ञा  
दयेका विज्यागु जुल ।

शंखोदक बत्यां शंख कुधा संगम संका  
 किलेश्वर कुण्ड तीर्थ स्थान- केतकि स्वां  
 दान- ध्वजा । पीठ- श्री संतुं ।  
 नाग- शंखपाल । समन्तभद्र बोधिसत्व  
 मेला- श्रावण शुक्ल नाग पञ्चमी ।

श्री स्वयम्भू महापुराणे किलेश्वर वंतराग महात्म्य समाप्त ।





॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण कुम्भेश्वर वैतराग महात्म्य

पुनर्वार मैत्री बोधिसत्त्वं श्री शाक्यसिंह भगवान् बुद्धयात ल्हात हाजोजलपा थथे विन्तियात- हे सर्वज्ञ शास्ता छलपोलया अनुग्रहनं ध्वजया आकार श्री किलेश्वर वैतरागया खँ न्यने धुन आःहानं कुम्भेश्वर वैतरागयागु खँ न्यनेगु इच्छा जुल छलपोलं सर्वसत्त्वपित उद्धार यायेया कारणे आज्ञा दयेका बिज्याहुँ ।

थथे मैत्री बोधिसत्त्वया विन्ति न्यना श्री भगवान् बुद्धं सकल सभामण्डलं तायेदयेक मैत्री बोधिसत्त्वयात आज्ञा दयेका बिज्यात ।

परापूर्वकाले मञ्जुपटन धयागु नगरे सर्वपाल धयागु नां जुया च्वंहा बय्छु दयाच्वन । व वैद्य गथिजाःहा धाःसा बैद्यशास्त्रं पारंगत जुया च्वंहा नाडि स्वया रोग पत्ता लगय् याय् फुहा व वासः नं याय् सःहा जुया संपूर्ण चिकित्सा शास्त्र सया च्वंहा जुया च्वन । थ्व बैद्य अनेक रोगया वासः दयेके सःहा भैषज्य शास्त्रं निपुण जुया च्वंहा सर्वपाल धयाहा जुयाच्वन । थ्वं सकल रोगीपित रोग स्वयाः वासःयाना रोगनं लायेका च्वंहा खः । हानं थ्व बैद्य मन्त्रतन्त्रनं

सयाः मोहन, ताडन, किरण, बसिकरण आदि सुविद्या व कुविद्या  
सःह्य जुया च्वन । थ्वं नानाप्रकारं भारेनं यायेसयाः लोकं साप  
व्हाःह्य खः ।

थथे जूसां थ्व बैद्यया मन तृष्णा व लोभंयाना हिलावनाः  
रोगीपिनिगु रोग लायेका बियानं हानं रोग बधय् याना बीयःह्य  
जुल । मयो मयोपितला वासले विष तया नका स्याना बी योह्य  
नं जुल । हरेकसित मन्त्रतन्त्र याना नाना रोग उत्पत्ति याना दुःख  
बिया थःमंतुं लायेका नं बिया बांलाक रोग लायेका बियागुया मू  
मबिल धाःसा हानं मन्त्र प्रयोग याना स्यानानं वीगु यात । थथे  
अयोग्य कथं सर्वपालं बैद्यज्या सनाजूगु लोकपिं सकसिनं सिल ।  
गुलिस्यां व बैद्ययात ख्वाल न्ह्यःने हे धयानं हल ।

अथे धया हयेव व सर्वपाल बैद्यं तं पिकया लोकपित भन  
उत्पात कथं दुःख बिया जुल । छन्हुया दिने सर्वपाल बैद्यं याना  
जूगु कुकर्म दक्वं देशयाह्य जुजुं सीका सर्वपाल बैद्ययात ज्वनाः वं  
मखुथे याना जूगुया सजाय बियेमा धका जुजुं आज्ञा जुया बिज्यात ।  
जुजुया आज्ञा अनुसारं राजपुरुषपिसं सर्वपाल बैद्ययात ज्वनेत ग्वःसा  
ग्वयाः माःजुल । थ्व खँ सर्वपाल बैद्यं सीका थःगु मखुगु ज्यां  
थःहेतुं ग्याना दक्व छेँ, बुँ धन सम्पत्ति त्याग याना धुँयागु  
छेँगुलिं जँय् हिना, चायागु धन्वतरि कलश छगः ज्वनाः, बाचा इले  
मञ्जुपटन त्वःता व बैद्य बिस्तुवन । ववं ववं सुथय् जुसेलि बाग-  
मतिया सिथय् गुँचा छगुलि दुहाँ वना भासुलना सुलाः वं बिचाःयाना  
च्वन- धिकार जिं मखु मखुगु ज्या याये लात, जिं गथिं गथिंज्यागु

पापकर्म याय्लात । आः जि गनवने गनचवने जुजुं मखंगु थाय् गन  
 दै, राजपुरुषपिसं मखंगु थाय् गन दै अवश्यनं जित ज्वनायंका दण्ड  
 कण्डयाना दाया चिना कुनीतिनि । जुजुया राजपुरुषपिसं मखंक  
 च्वंवेनेगु थाय् गन दै । हानं जुजुं जक मखंक च्वंवनानं छुयाय्  
 जिं मखुथे वासःयाना लोकपिं स्यानागु कर्म विपाकं ला जित वं वं  
 थाय् त्वःति मखुनि अवश्य जिं यानागु कुकर्मया कर्म विपाक भोग  
 मयासें गाइ मखुनि । आः जि गय् याय् । आः जिं यानागु पाप  
 फुकेत धर्म कर्मयाय् माल । छुयाय्, छुयाय्, थःमं यानागु पापं  
 थःततुं दाह जुइका थःमं ज्वनावयागु चायागु कलश छगः थःगुहे  
 न्ह्यःमे तया वं स्यूगु श्री वज्रपाणीयागु आराधनायाना वाग्मति तीर्थे  
 स्नानयाना त्रिरत्नया शरण वना च्वनाच्वन ।

व सर्वपाल बैद्यं थुकथं दुःखसिया धर्मयाना च्वँच्वंगु भिनिदँ  
 दसेंलि सुखावति भूवने बिज्याना च्वंह्य श्री आर्यावलोकितेश्वर करू-  
 णामयनं लोक संदर्शन धयागु समाधि योगया ज्ञानं सीका वज्रपाणि  
 बोधिसत्वयात सःता आज्ञा दयेका बिज्यात । हे वज्रपाणि बोधिसत्व  
 छ नेपाल मण्डले वना वाग्मति किनारे गुँचाय् च्वना सर्वपाल बैद्यं  
 छन्त आराधना याना त्रिरत्नया शरण वना च्वंगु भिनिदँ वर्ष दत ।  
 वं आपाः हे मनूतय्त बिष आदि मन्त्र प्रयोगयाना स्याना वःगु  
 दु । थुगु अपराध याःह्यसित जुजुं ज्वनि धका विस्त्युं वया च्वँच्वंगु  
 तःदँ दत । आः छ वना वयात कुकर्म त्वनके बिया शुभकर्म आदि  
 पुण्य कर्म यायेगु उपाय कना सर्वपाल बैद्ययात उद्धार याना वा ।

श्री आर्यावलोकितेश्वरयागु थुजोगु आज्ञा न्यना उह्म वज्रपाणि  
बोधिसत्त्वं सुखावति भुवनं नेपाल मण्डल स्वया गमन जुया  
विज्याःगु जुल ।

थनंलि वज्रपाणि बोधिसत्त्व आकाश मार्गं विज्याना सर्वपालं  
तपस्या याना च्वंगु स्वया सर्वपाल बैदयं हे स्थापना यानातःगु  
चायागु कलश धालसां कुभय् दुहाँ विज्यात । थनंलि कुम्भया जल  
जाया लः भय् भय् बिया वल ।

थुबले कुम्भ तज्याना भूमी लिन जुया लखँ थहाँ वया कुम्भ  
तीर्थ धयागु दया वल । अले वहे तज्याना लः पिहाँवःगु कुम्भं वज्र,  
घण्ट, डमरू, त्रिशूल ज्वना च्वंङ्ग अर्ध चन्द्रमा दुगु जटा मुकुटं  
पुयाः नरशिरमालां ऋग्वाया, धुँयागु छेंगुलिं जँय् हिना अक्षोभ्य मूर्ति  
शिरे तथा महा जाज्वल्य प्रमाणं तेज पिक्या कुम्भं थहाँ विज्याना  
सर्वपाल बैदययात वज्रपाणिं दर्शन बिया विज्यात । थुगु बेलस सर्व-  
पाल बैदयं वज्रपाणि बोधिसत्त्व दर्शन प्राप्त जुयेमात्रं थः च्वना च्वनागु  
आसनं दना प्रदक्षिणायाना बन्दनाधाना अति मन हर्षयाना सर्वपालं  
वज्रपाणि बोधिसत्त्वयात थथे स्तोत्र याःगु जुल ।

नमः श्री वज्रसत्त्वाय

हे वज्रनाथ त्वं सर्वाङ्ग भस्म भूषितं ।  
रत्ना भरण संयुक्तं सुवर्णं किरीट धारणम् ॥  
अक्षोभ्य शिरसि धृत्वा ज्योति रूपं महाप्रभुं ।  
वज्र घण्टश्च डमरू त्रिशूल पाश धारिणम् ॥

चक्र मुद्राघरं वीरं अर्धचन्द्र शिरस्थितं ।  
 हास्य लास्य विलासिन अमृतेन प्रतोषितम् ॥  
 माला वज्रकोटि गलितं धरितं नृशता शिवा ।  
 बाद्यन मार संत्राशा घण्टेन बुद्ध तोषिता ॥  
 वज्र विरासिनी संगे योगिनी गणना वृतं ।  
 सत्वय मोक्ष मार्गाय बहुमार्ग प्रदर्शितम् ॥

हे वज्र नाथ जुया विज्याःह्य छपिं ह्यञ्जह्यं खरानिं बुला रत्नया  
 तिसां तिया लुँया किक्किपा छुया अत्यन्त ज्योति पिकया अक्षभ्यां  
 तथागतया प्रतिमा ह्यूनय् छुया वज्र घण्ट डमरू त्रिशुल पाश आदि  
 ज्वना चक्र मुद्रायाणा अर्धचन्द्र जटाय् छुना विज्याःह्य वीर अमृत  
 रस भपा नरशिर मालां कोखाया वज्र मालां कोखाया हिला प्याखं  
 हुया विलासयाणा घण्टया बाढ्या बुद्ध गणपित संतोषयाणा भारतयत्  
 त्रास बिया योगिनी गणपिं सहितंयाणा सत्वपित आपालं मोक्ष वनिङ्गु  
 लँपु क्यना विज्याःह्य वज्रया नाथ जुया विज्याःह्य, हे वज्रपाणि बोधि-  
 सत्वयात नमस्कार ।

थथे सर्वपालं थुगु स्तोत्र यागु जुल । थुगु स्तोत्र गुह्यस्यां  
 वनिङ्ग उह्य मनू योगेश्वर धायेका जन्म ज्वी ।

थुगु स्तोत्र न्यना सर्वपालयात वज्रपाणिं आज्ञा जुल- हे  
 सर्वपाल बैढ्य ! छं तपुयातःगु कलश धालसां कुम्भ तज्याना दया  
 वःगु कुम्भ तीर्थे लिपा उदरमुखी धयाह्य जुजु छह्य वया थ्व तीर्थस

स्नान याःवैतिनि उगु इलय् थुगु थासय् ललितापुर धयागु देश ज्वी  
तिनि । छं हानं कुम्भ स्थापना यानातःगु कुम्भं उत्पत्ति जूगु तीर्थ  
जूगुलिं थ्व तीर्थया नां कुम्भ तीर्थ धका नामं प्रख्यात जुया वैतिनि ।

थ्व तीर्थय् च्वना कोति जपयात धालसा मन्त्रसिद्धि प्राप्त ज्वी  
तिनि धका आज्ञा जुया वज्रपाणि बोधिसत्वं त्वहँ छगले तेज खयेका  
वसपोल वज्रपाणि अन्तर्ध्यान जूगु जुल । हे मैत्री बोधिसत्त्व अबले-  
निसें थ्व तीर्थयात कुम्भेश्वर धका नामं प्रख्यात जूगु जुल ।

थनंलि सर्वपाल बैद्यं उगु कुम्भेश्वर तीर्थस वज्रपाणि बोधि-  
सत्त्वया ध्यान भावनायाना च्वँच्वं छन्दुया दिने मृत्यु जुया योगेश्वर  
धायेका जन्म काःवंगु जुल धका श्री भगवानं मैत्री बोधिसत्त्वयात  
आज्ञा दयेका बिज्याःगु कुम्भेश्वर तीर्थयागु खँ ववचाल ।

घट स्फोटक प्रभावत्यां कुम्भेश्वर संगमे कुम्भ ँहद तीर्थ ।

नाग- अशोत्तर नागराजा

वज्रपाणि बोधिसत्त्व

स्नान- लवंजिफो स्वां

दान- कलश

मेला- श्रावण शुल्क गुंपुहि ।



॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण गर्तेश्वर वैतराग महात्म्य

पुनर्वार मैत्री बोधिसत्त्वं श्री शाक्यमुनि भगवान् बुद्धयात ल्हात हाजोजलपा थथे धका बिन्तियात- हे भगवान् बुद्ध ! छलपोलया अनुग्रहनं कुम्भेश्वर वैतरागया खँ न्यने धुन । आः हानं गर्तेश्वर धालसां गोपालेश्वरयागु खँ न्यनेगु इच्छा जुल । छलपोलं सर्वसत्त्वपित उद्धार यायेया कारणे गर्तेश्वरया महात्म्य आज्ञा दयेका बिज्याहुँ ।

थथे मैत्री बोधिसत्त्वया बिन्ति न्यना श्री भगवान् बुद्धं सकल सभा मण्डलं ताय्दयेक गर्तेश्वरया महात्म्य आज्ञा दयेका बिज्यात । परापूर्वकाले नेपाल मण्डले पाश्चाल धालसां थौंकन्हे पनौति नां जुयाच्चंगु देशे सकल शास्त्र विद्यां पूर्ण जुया च्वँह्य बुद्धपाल धयाह्य श्रावकाचार्य धालसां गृहस्थ भिक्षु छह्य दयाच्वन । उह्य बुद्धपालया आश्रमे शास्त्र स्यँवःपि आपाःहे शिष्य मचात दुगु जुल । स्यँवःपि शिष्य मचापित धाःधाःगु शास्त्र स्यना विद्या इना च्वँह्य थुह्य बुद्धपाल जुया च्वँच्वन । हानं थुह्य बुद्धपाल धाय्का च्वँह्य बुद्धपाल श्रावकाचार्यया थाये आखः ब्वँवःपि शिष्यवर्गपि आपाःहे बिद्वान जुया वना च्वँच्वन ।

“विद्यार्थीतय्गु कुतः व स्यनीह्य शिचकं नं कुतः याःसा जक विद्यार्थीतय्गु बुद्धि च्वन्ह्याना विद्यार्थीत विद्वान जुया वइ ।”

शिचक व शिष्यया कोशिश दत धाःसा सय्के सीके अःपुगु खत । थुलिमछि विद्यांपूर्णा जुया च्वँह्य बुद्धपालया मञ्जुगर्त नांयाह्य बक फुटय् मज्जूह्य ग्वाज्यःह्य काय् छह्य दु ।

बुद्धपाल पण्डित जुयां छुयाय् मेमेपित धाःसा धाःधाःपित धाः धाःगु शास्त्र स्यना पारंगत याना बियाच्वन थःह्य काये मञ्जुगर्तयात धाःसा स्वर व व्यञ्जन आख छगःनं धाय्के मफु ।

बुद्धपालं थः कायेयात आखः सय्के बी धका गुलिखे हेका-बाबु आखः ब्वं आखः ह्यसीकि, आखः च्व, याकनं सय्कि स्व बाबु खंला मेपिसं ब्वनाः सय्का वन । छला जिमि काय् जुयानं आखः मसय्कल धाःसा लोकं जित छु धाइ स्यूला ? संसारे विद्या धयागु तःधं, आखः मसःह्य मनू लोकय् छि छि जुइ स्यूला ? बाबु मञ्जुगर्त आखः ब्वँ सय्कि वसः, तिसा छन्त माःगु तक नं जि बिइ । अबु न्ह्याक्व हे हेकूसां मञ्जुगर्तया बक हें फुतय् मजू । आखः सय्के वं फु हे मफु । हानं अबुह्य बुद्धपालयात मेपिसं थथे धयाहल- मेपित धाःसा धाःह्यसित धाःगु स्यना बीफु थः काय् यात धाःसा न, त छग आखः धायेके मफुह्य, छुयाय् व आचार्य पण्डित जुयां । ख नं खः मेपित धाःसा स्यना कना बीफु, थः काय् मञ्जुगर्तयात धाःसा आखः छगः धायेके मफु सय्के बी मफु । स्यना जूलिसे छगः आखः सय्कूगु मखु, म्वाल धाय् धाःसा

लोकया खँ । थथे हेकां हेके मजिल धका बुद्धपालं थः काय् मञ्जुगर्त यात दाया, चिना, ब्व विया स्यन । हानं स्मृति दया नुगः दया वैगु वासः समेतं नका थः काय्यात आखः स्यन अय्न् मञ्जुगर्तयात आखः च्वकेनं मफु ब्वंकेनं मफु । मञ्जुगर्त पटमूर्ख जुयाहे च्वन ।

थः काय् मञ्जुगर्तयात हाकनं ख्याना आखः ब्वंकेत सन । अथेनं स्यने मफया गथे याना जि काय्यात आखः स्यने माली ! आखःला सय्के मव्युसें हे मज्यू, आः गथेयाय् गनछोया ब्वंके छोये माल धका मने अन्दोल याना; आश्वयात महामञ्जुश्रीया निर्माण काय् मञ्जुदेवाचार्य गुरुया चैत्यस्थान गोश्रृङ्ग पर्वत स्थाने छोया सेवा याके छोसा तिनि उह्य गुरुया अनुग्रहणं जिकाय् मञ्जुगर्तयात ज्ञान प्राप्त ज्वी धका बुद्धपाल आचार्य मने बिचाः यात । अले बुद्धपाल आचार्य थःथाय् आखः ब्वँ वयाच्चं पिं सकले शिष्यपिंत सःता थः काय् मञ्जुगर्तयात न्ह्यःनेतया शिष्य वर्गपिंत थथे धाल- स्व मचात छिपिं फुक्क जिमि शिष्यपिं खः । छिमिसं जिं स्यना विया थें सय्का सीका बिद्यां पारंगत याना च्वंच्वन । अय्सां जिमि काय् मञ्जुगर्त ब्रह्म धाःसा न्ह्याक्व हे स्यंसां वं आखः सय्के सीके मफया च्वंच्वन । उकिं छिमिसं जिं धयाथाय् स्वयम्भूया पश्चिम पाखे मञ्जुश्री पर्वतस जिकाय् मञ्जुगर्तयात यंका मञ्जुश्री निर्माण चैत्य दर्शन याका पूजा याका हिँ ।

शिष्य मचातय्सं गुरुयागु आज्ञा न्यना ज्यू गुरु धका बिन्ति यात । अनंलि बुद्धपालं मञ्जुगर्तयात, सकल शिष्य मचातय्त हुँ धका बिदा बिल ।

गुरुं विदा विसैंलि शिष्यपि सकलस्यां गुरुयागु पाली भपुया ।  
मञ्जुगर्तयात व्वना पाञ्चाल देशं स्वयम्भू पर्वत स्वया गमन जृगु जुल ।  
अथे स्वयम्भू पर्वत (गोपुच्छ पर्वत) वने धका वंपि मञ्जुगर्त सहित  
शिष्य मचात ववं तुव्वया लँपुइ लात । अले अन सकलस्यां तु  
त्वः त्वः थुला नल ।

सकलस्यां तु नय्गाका पासापिसं मञ्जुगर्तयात थथे धाल-  
तुनय् मगाःनिला वने त्यल नु । इमिगु खँयागु लिसले मञ्जुगर्त  
तु वां न्या न्यां छिपिंजक हुँ जिला वय् ह्याल धाल । वयागु खँ  
न्यना पासापिसं- मञ्जुगर्तयात आमथे छु खँ ल्हानागु छन्त हे आखः  
सय्कयगु नितिं वयागु आमथे धाय् ज्पूला नु धाल । मञ्जुगर्त  
हानं- जिला वय्ह्याल जित आखः नं सय्के मयो जित आखः सिवे  
साखः हे साः धाल । पासापिसं हानं नं मञ्जुगर्तयात- स्व मञ्जुगर्त  
छिमि पिता जिमि गुरु बुद्धपालं छंगुहे लागि छन्त मञ्जुश्री गुरुया  
थाय् आखः सयेके वीत छोया हःगु वनेनु धाल । मञ्जुगर्त अभनं  
-ह्याः ह्याः जिला ह्या हे ह्याः धाल । पासापिसं गुलिखे हेकलनं  
मञ्जुगर्तयात खँ न्यंके मफु तु जक न्हय्या च्वंच्वन । पासापिं  
सकस्यां आः गथेयाय् मञ्जुगर्तयात भीसं गोपुच्छ पर्वतय् मञ्जुश्री  
स्थाने यंके फैं रुवाःमवल बुद्धपाल गुरुं भीत छु धाइथें धका धन्दा  
कया सल्हा यायां हाला च्वन । मञ्जुगर्तयात गुलि हेकलनं हेकां  
हेके मफुत ।

हेकां हेके मफुसैंलि अन हे तु व्वय् च्वाम्वः ज्वंका पासापिसं  
मञ्जुगर्तयात धाल- गुलि मल्लि धयानं छं वने ह्याः धाल आः ह्याःसा

म्वाल थ्व च्वाम्बलं गाय्वा आकाशय् थस्वया नमोबागिश्वराय  
 सां धा । धुलि धया व शिष्य मचातय्सं आकाशय् थस्वया मञ्जुश्री  
 गुरु लुमंका हे गुरु महामञ्जुश्री जिमि गुरुया काय् तच्चतं मूर्खह्य  
 जुया च्वन छःपिंथाय् यंका हिं धका जिमि बुद्धपाल गुरुं जिमित  
 छोया हःगुखः अय्सां जिमिसं थ्व मञ्जुगर्तयात छःपिंथाय् मञ्जुश्री  
 पर्वतय् हय् मफुत आः जिमित कृपातया मञ्जुगर्तयात वक् फुटय्  
 ज्वीका आखः मय्का नुगः दयेका विज्याहुँ धका धाल । अले  
 मञ्जुगर्तयात आकाशय् च्वाम्बलं गाय्के बिया “नमोबागिश्वराय”  
 धाय्के बिया वया नाप नापं ँगूहे पाखं मेपिं शिष्य मचातय्संनं  
 नमोबागिश्वराय धका हाला च्वन ।

उगु इले मञ्जुश्री गुरुं व मचातय्सं याःगु प्रार्थना ताय्का  
 इपिं च्वँच्वंथाय् हे मञ्जुश्री गुरु थ्यांकः विज्यात ।

महामञ्जुश्री गुरु थ्यांकः विज्याःगु खंका सकल शिष्य मचा-  
 तय्सं मञ्जुश्री गुरुया पालि भोपूवन मञ्जुगर्त छम्हेस्यां जक अंन्या  
 मवंसे अर्थेहे स्वयाच्वन । अले पासापिसं मञ्जुगर्तयात थथे धाल-  
 हे मञ्जुगर्त ! गुरु विज्याःगु मखनाला ? हे मूर्ख ग्वाज्यः गुरुयागु  
 पालि भोपूवने म्वाःला ? गुलिखे पासापिसं धालंनं मञ्जुगर्त पालि  
 भोपू मवंसे ख्वाः जक स्वया च्वन ।

गुलिखे धयानं मजीवं व शिष्य मचातय्सं मञ्जुगर्तयागु ल्हाः  
 ज्वना ध्वास्यास्यां साला यंका वयागु छय् महामञ्जुश्री गुरुयागु पाली  
 लाक्क भवसुका बिल ।



उगु समयस मञ्जुश्री गुरुं करुणा तथा मञ्जुगर्तया छयन्त्य  
 लहाः तथा थना थथे आज्ञा जुल- ध्व संसारे कर्मया भोग मयासे  
 मगाः महा पण्डितया काय् जुयानं छुयाय् महा मूर्ख जुया च्वंच्वन,  
 म्वाल म्वाल दँ दँ ! हे मञ्जुगर्त छंगु अज्ञान नाश जुया क्षण मात्रं  
 ज्ञान दया सकल विद्यां पूर्ण जुयेमा । थुजोगु आशिर्वाद बिया पालि  
 भोसुना च्वंहा मञ्जुगर्तयात महामञ्जुश्री गुरुं थना विज्याःगु जुल ।

थुलि महामञ्जुश्री गुरुया आशिर्वाद दयमात्रं आखः छगः धाय्  
 मसःह्य पटमूर्ख मञ्जुगर्त क्षण मात्रं न्ह्यलं चाःह्यथें जुया सकल  
 ज्ञानं परिपूर्ण जुया वल । अले मञ्जुगर्त मञ्जुश्री गुरुया पालि भोपुया  
 लहाः निपां विन्तियाना थुगु स्नोत्र यात—

शशधर मित्र शुभ्रं खड्ग पुस्तक पाणि ।

सुरु चिर मति शान्तं पञ्च चीरं कुमारम् ॥

पृथुत्तर वरमोक्षं पद्मपत्रा यताक्षं ।

कुमति दहन दक्षं मञ्जुघोषं नमामि ॥

चन्द्रमार्थें तुयूवर्ण जुया खड्ग पुस्तकया चिह्न दुगु लहाः अर्थात्  
 खड्ग पुस्तक ज्वना बांलाःगु भिंगु बुद्धि जुया शान्त स्वभाव जुया  
 न्यागु वर्णया सचिका तथा अथवा न्याता वर्णया बस्त्रं पुना कुमारया  
 अबस्था जुया च्वंहा । हानं तवधंगु मोक्षया ज्ञान वरदान बिया पलेस्वाँया  
 हलथें जाःगु मिखा जुया विज्याःह्य कुबुद्धियात नाश याय्गुली चतुरे  
 जुया विज्याना च्वंहा श्री मञ्जुघोषयात नमस्कार ॥१॥



विभूत सकल कोष क्षालिता ज्ञान दोषं ।

स्मरण भजन तोषं दूर रागादि दोषम् ॥

विहित ससुर घोषं सिद्धि दाख्या द्यदोषं ।

कृत जड परि शोषं मञ्जुघोषं नमामि ॥

सकल शब्द शास्त्रया भण्डार जुया अज्ञान रुपि दोषयात  
सिला लुमंका भजन याय्मात्रनं खुसि जुया राग द्वेष मोहयात  
तापाक छोया विज्याना च्वँह्य हानं देवलोकपिसं स्तोत्र याका सकल  
दोष फुका सिद्धि वरदान विद्या अज्ञान रुपि जडयात फुका विज्याःह्य  
श्री मञ्जुघोषयात नमस्कार ॥३॥

गणपति शर जन्म श्री महाकाल सिंह ।

परिवृत निज वर्गेर्भाव मीन्दी वराक्षं ॥

असि शर जप माला पुस्तकं संवहन्त ।

उरसि ललित माला मञ्जुघोषं नमामि ॥

गणेश, कुमार, महाकाल सिंह आदि थव परिवारपिसं चाः  
हुयेका उफोस्वांया हःथें जाःगु मिखा जुया विज्याःह्य । हानं खड्ग,  
शर, पुस्तक ज्वना नुगः पाचय् जपमाला कोखाया शोभायमान  
जुया विज्याःह्य श्री मञ्जुघोषयात नमस्कार ॥४॥

सुरपति समनापा मीश श्री दाग्नि रक्ष ।

पवन प्रमथ पालैः संवृतं स्मेर वक्त' ॥

खगपति रथ गोगं ब्रह्म बन्धं रमोमा ।

विहित चरण भक्तं मञ्जुघोषं नमामि ॥

इन्द्र, यमः, वरुण, कुबेर, अग्नि, राक्षस, वायु महादेव आदि  
गणपिसं चाःदुयेका मुसु मुसु न्ह्युगु ख्वाः जुया बिज्याःह्य । गरुड-  
गया च्वँह्य नारायण, ब्रह्मा, लक्ष्मी, पारवती थ्वते सकसिनं चरण  
कमले नमस्कार याका भजना याका बिज्याना थ्वँह्य श्री मञ्जुघोषयात  
नमस्कार ॥५॥

यदसि कठिन धारा छेद मार्गाभि भारा ।

सकल शलिल धारा पतिता गांग मम्भः ॥

वहु परिचय स्थल्या भूमि रदयापि रेजे ।

वहुतर महिमानं मञ्जुघोषं नमामि ॥

गुगु छलोपोलया अत्यन्त ज्वया च्वंगु चन्द्रहाँस खङ्गं पर्वत  
त्वाथया लख पिहाँ वनेगु लँ दयेका लखया धारा क्वफाना गङ्गाजिस  
मिले जुइका पृथ्वी खने दयेका थौँया अदयापि बाँलाना च्वन । थथे  
आपालं महिमा वया बिज्याःह्य श्री मञ्जुघोथयात नमस्कार ॥६॥

भव दभि नवनुत्या तोषिता गुह्यदेवी ।

निखिल निगम सारा सुप्रकाशा तिरेजे ॥

भवजल निधिपारं दान कल्प द्रुमाग्रं ।

गलित बहु महोग्रं मञ्जुघोषं नमामि ॥

छलपोल मूगु स्तोत्र दयेका स्तुति पाःशुलिं श्री गुह्यश्वरी देवी  
 खुसि जुया प्रकाश जुया बिज्यात सारा देशनं शोभायमान ज्जीका  
 बिज्याना च्वंहा हानं संसार रुपी समुद्रं पार तरेयाना कल्प बृद्धया मूल  
 च्वका समान जुया धाःधाःगु वर प्रदान बिया कोधी गणपित गले  
 याना बिज्याना च्वंहा श्री मञ्जुघोषयात नमस्कार ॥७॥

विभुजति जन लोको धर्मधातु महेशं ।  
 दश शत दल पक्षे संस्थितं ज्योति रीशं ॥  
 तदपि तव प्रशस्तं देव महात्म्य मीशं ।  
 विभ जति भुजुगेशो मञ्जुघोषं नमामि ॥

दोलछि हः दया च्वंगु पलेस्त्रांया स्रःने बिज्याना च्वंहा ज्योति  
 रुप धर्मधातुयात सकल लोकं भजन याना च्वन ।

वसपोलया सिवेनं छलपोलया महात्म्य आयाः दया सकलसियां  
 इश्वर जुया बिज्याःहा । हानं नागया मालिक शेषनागं समेतं भजन  
 याका बिज्याःहा मञ्जुघोषयात नमस्कार ॥८॥

पठतिय इदमित्थं मालिनी पद्म बन्धः ।  
 स भवति कवि राजो वादि सिंहासनं तत् ॥  
 सकल कवि सभासु प्रोज्वल द्वाक् सुधारः ।  
 कलित सकल विद्या भूषणो भव्य दक्षः ॥

गुह्यसिनं थुगु मालिनी छन्दयागु स्तोत्र व्रनि उह्यसें वदि-  
 तयागु सिंहासन त्याका कविमध्ये राजाजुया सम्पूर्ण कवि मण्डलया

सभास वाक् चतुर जुया उज्वलह्य ज्वी । हानं सकल विद्यानं शोभा  
दया कल्याणया रुप तथा अत्यन्त चतुरह्यनं ज्वी ॥६॥

थुलि स्तोत्र व्वना हानं मञ्जुश्री गुरुयात च्वाम्बलं गाय्का  
जित चमा याना विज्याहुँ धका मञ्जुगर्त बिन्ति याःगु जुल । थुलि  
स्तोत्र याःगु न्यना कविश्वर जुयेमो धका मञ्जुगर्तयात आशिर्वाद  
बिया महामञ्जुश्री गुरु अनंतु अन्तर्ध्यान जुया विज्यात । वथाय्  
थौया अद्यापि फम्पी देशया पूर्वपत्ति "गर्तेश्वर" धालसां गोपालेश्वर  
धका दहे दनि ।

अनंलि मञ्जुगर्त आदि सकल शिष्य मचात मुनाः थःगु  
पाञ्चाल देशेतुं लिहौ वंगु जुल ।

पाञ्चाल देशे थ्यंका थः गुरु बुद्धपालयागु छये वना शिष्य  
मचातय्सं थथे बिन्तियात- हे गुरु छलपोलं धया विज्यार्थे गोपुच्छ  
पर्वतय् वने धका वनावले अन मथ्यानिबले जिपिं सकलें पासापि  
तुब्बय् लात । अन तुब्बय् जिपिं पासापि सकलें दुब्बां वनाः तु नया  
च्वंच्वना । अले लिपा सकस्यां तु नय् सिधय्का मञ्जुगर्तयात वनेनु  
धका धयांला मञ्जुगर्त आखःया सिकं साखः साः धका तुब्बं दहे  
मदं । उबले जिपिं सकलें मिले जुया मञ्जुगर्तयात गुलिखे हेका  
अय्न् मञ्जुगर्त व थासं दहे मदं । अले मञ्जुगर्तयात सकलें जाना  
नमो बागिश्वराय धाय्का च्वामोलं आकाशय् गाय्के बिया । उबले  
अन महामञ्जुश्री गुरु विज्याना मञ्जुगर्तयात वर प्रशाद बिया विज्यात  
धका अनया सम्पूर्ख जुक्व खँ गुरुयात शिष्य मचातय्सं कंगु जुल ।

मञ्जुगर्तनं थःअबुया पालि भपुया थःगु जुक्व खँ दक्व कना  
महामञ्जुश्री गुरुयात स्तोत्र यानागु “शशधर” धयागु मालिनि छन्दया  
स्तोत्र व्वनानं अबुयात न्यंकल । थः कायेमचां महामञ्जुश्री गुरु  
दर्शण यानाः वर प्रशाद प्राप्त यानावःगु व स्तोत्र व्वंगु न्यना बुद्धपाल  
श्रावकाचार्य तच्चतं लय्ताल ।

अथेहे थुह्य मञ्जुगर्तयागु थुगु “शशधर मिवशुभ्रं” धैगु स्तोत्र  
मुनां मत्तिइ श्रद्धानं व्वनी वया अज्ञान दक्व मदया दक्व शास्त्र  
स्यूह्य विद्वान जुइ ।

थथे श्री शाक्य मुनीन्द्रं मैत्री बोधिसत्त्वयात आज्ञा दय्का  
विज्याःगु गर्तेश्वर धालसां गोपालेश्वर तीर्थया खँ क्वचाल ।

गोपाल वत्थां यत्रसंगम्ये कूपतिन्हद गर्तेश्वर वतराग

कुंवर नाग राजा मञ्जुगर्तेश्वर

स्नान-- धवस्वाँ

दान- च्चामो

पीठ- दक्षिणकाली

मेला- भाद्र शुक्ल चौथी

( श्री स्वयम्भू महापुराणे गर्तेश्वर वतराग महास्थ समाप्त )

THE  
MIDWESTERN

1915

THE  
MIDWESTERN

THE  
MIDWESTERN

THE  
MIDWESTERN

THE  
MIDWESTERN

THE  
MIDWESTERN

THE  
MIDWESTERN

THE  
MIDWESTERN

THE  
MIDWESTERN

THE  
MIDWESTERN



॥ नमो बुद्धाय ॥ नमो शर्माय ॥ नमो संभाय ॥

## स्वयम्भू पुराण फणिकेश्वर वैतराग महात्म्य



पुनर्वार मैत्रीबोधिसत्त्वं श्री शाक्यसिंह भगवानयात वन्दना  
याना विन्तियात- हे भगवान बुद्ध छलपोलया कृपां गोपालेश्वरया खँ  
न्यने धुन । आः हाकनं फणिकेश्वरया वैतरागया खँ न्यनेगु इच्छा  
जुल, सर्वसत्त्वया हीतया कारणे फणिकेश्वर वैतरागया खँ आज्ञा जुया  
विज्याहुँ । थथे मैत्रीबोधिसत्त्वं विन्तियाःगु खँ न्यना श्री शाक्यसिंह  
भगवान बुद्ध फणिकेश्वर वैतरागया खँ आज्ञा दय्का विज्यात ।

हापा छुं छगु इलय् कपिलबस्तु धयागु नगरे ओंदियान नां जुया  
चर्चह्य श्री वज्राचार्य छह्य दयाच्वन । उह्य ओंदियान आचार्य नेपाल  
मण्डले वया श्री स्वयम्भू ज्योतिरुप दर्शन यायेगु इच्छा पूर्वसेवा  
चाहिला नेपाल मण्डले थ्यांका श्री स्वयम्भू ज्योतिरुप दर्शन यानाः  
थौं कम्हे फँपि धयागु पर्वते वना उगु बने आपालं न्यात दुगु पुखुया  
सिंथे च्वना अष्ट सिद्धि लायेगु इच्छा याना तपस्या यानाः यज्ञ  
कुण्डले दय्का शमिधा आदि सिं तँतँ तथा अग्नि स्थापना याना यज्ञस  
मिच्छोयेका उगु मिच्छाःगु यज्ञ कुण्डले अष्ट सिद्धि लायेगु कारणे  
स्वाः स्वापिं न्यात यज्ञ कुण्डले दुया होम याना च्वन ।

थुथाये ओंदियानं मिच्याःगु यज्ञं म्वाःपिं न्या दुयेवंहे भूमि  
तज्याना यज्ञ कुरडले लःबुया वया मि फुक्कं सिना वनाः तीर्थ उत्पति  
जुयावल । न्यातय्त्नं लुँया सितरा दुपिं जुयावल । थथे प्रादुर्भाव  
जुया च्वँबले कामधेनु सा छह्य वया दुदुनालं दुदु हायेकः वःगु जुल ।  
हानं थुह्य कामधेनु साँ मनुभाषां ओंदियानयात थथे धाल हे ओंदि-  
यान छं कामना यानागु अष्टासिद्धि लायेगु इच्छा जूसा त्रिरत्नया  
शरण वना उपोषध ब्रत च्वँ थुगु पुण्यद्वारा छंगु इच्छा पूवनी धका  
धया उह्य कामधेनु सा अन्तरध्यान जुया वन । थनंलि साँ धाःथे  
ओंदियान त्रिरत्नया शरण वना उपोषध ब्रत धारण यानाः च्वंच्वन ।

थुकथं ओंदियानं त्रिरत्नया शरण वना उपोषधे च्वना जप  
ध्यान याना च्वंगु तःदँ दसेंलि सुखावतिइ बिज्याना च्वंह्य श्री करुणा-  
मयेनं सीका सर्वनीवरण विष्कम्भि बोधिसत्वयात सःता थथे आज्ञा  
जुया बिज्यात । हे विष्कम्भि नेपाल मण्डले वना ओंदियान आचार्य  
यात अष्टासिद्धि वरदान वियाः इच्छा पूर्णयाना व्यूहुँ । थथे श्री  
करुणामयया आज्ञा न्यना सर्वनीवरण विष्कम्भि बोधिसत्वं थःगु  
शरीरं जाज्वल्यमानं तेज पिकया नेपाल मण्डले बिज्याना ओंदियानं  
तप याना च्वंथाये बिज्याना प्रशन्न जुया बिज्यात । थबले श्री  
सर्वनीवरण विष्कम्भि बोधिसत्त्व बिज्याःगु खना थःगु आश्रमं दत्तावन्ता  
कृताञ्जलियाना चरणकमले भवपुया विन्तियात— धन्य जिगु भाग्य थौं  
थधिंह्य बोधिसत्त्व जित उद्धार यायेत बिज्यात धका लय्ताया यथा  
विधित्थे पूजायाना स्तोत्रयाना हानं विन्तियात हे नाथ छलपोलयात  
बारंबार नमस्कार ।

छलपोल नागया तिसाँ तिया अर्धचन्द्राकार जटा छुया शोभा  
दया च्वंहा, हानं नागया फणां कुयेका बिज्याःह्य थर्णिह्य छलपोलयात  
सदाँ नमस्कार । हानं सर्वनीवरण विष्कम्भि बोधिसत्व धायेका पञ्च  
बुद्ध दुगु मकुटं पुया शोभायमान जुया सर्वसत्व प्राणिपित उद्धार  
याना बिज्याःह्य, नरक भोग याना च्वंषि पापी तयूतनं उद्धार याना  
बिज्याइह्य छलपोल असंख्य गुणया खानि जुया बिज्याःह्य छलपोलयात  
नमस्कार । थथे ओंदियान आचार्यया विन्ति न्यना सर्वनीवरण  
विष्कम्भि आज्ञा दयूका बिज्यात ।

ओंदियान छंगु भाव खना जि सन्तोष जुयेधुन, छ अष्ट-  
सिद्धिया भाव लाःह्य छ जुल । छं आः याना च्वनागु यज्ञ तोता  
श्री गगण योगिनी आराधना याना होम याना मांसाहुति यज्ञ या ।  
गुगु यज्ञया प्रभावं श्री गगण योगिनी प्रदत्त जुयाः छन्त अष्टसिद्धि  
आदि वर प्रशाद बिया बिज्याइ धका आज्ञा जुयाः सर्वनीवरण  
विष्कम्भि बोधिसत्वं थःगु अंशं मच्छाकारगु त्वहँते तेज तोता फणिकेश्वर  
वैतराग धका प्रख्यान्त याना अन्तरधान जुया बिज्यात । अनंलि  
बोधिसत्वया आज्ञार्थे ओंदियानं यज्ञ कुराडल दयूका अग्निस्थापना  
यानाः मि वळयेका घृतधारा हायेका श्री गगणेश्वरी योगिनी आराधना  
याना मि वळयाच्चंगु यज्ञ मण्डले थःथमंतुं थःगु ह्यय् च्वंगु ला  
ध्यनाः यज्ञस दुया मांसाहुति यज्ञ याना च्वन ।

थनंलि उह्य आचार्य गगणेश्वरी वज्रयोगिनी आराधना यानाः  
थःगु ह्यय्च्वंगु ला थह्यंतुं ध्यना बिधिपूर्वकं मांसाहुति होम श्रद्धा

पूर्वकं याना च्वंबले आकाशं गगण योगिनी वज्रयोगिनी विज्याना  
 आकासय् च्वनाः थःगु स्वरुप दर्शण बिल । अवले ओंदियान आचार्य  
 लहाः निपां हाज्वलपा बिन्तियात- हे वज्रयोगिनी थौं छलपोलया दर्शण  
 याये खँगुलिं जिगु जन्म सफल जुल । हे जननी आः छलपोल थुगु  
 मण्डले सदाकालं विज्याना प्रशन्न जुया अष्टसिद्धि वरदान बिया  
 विज्याये माल, जिगु जीवन दत्तले छलपोलयात पूजा याये धका  
 बिन्ति यासेलि श्री वज्रयोगिनी न तेज पिकया उह्य आचार्य भावना  
 याना च्वंगु मण्डल प्रतिमास प्रवेश जुयाः आज्ञा दय्का विज्यात-  
 हे ओंदियान आचार्य थुगु (छं भावना याना च्वंगु मूर्तिस) गुह्यस्याँ  
 पूजाभाव याइ उह्यसिनं अष्टसिद्धि लाना बोधिज्ञान लाइ धका आज्ञा  
 दय्काः उह्य आचार्यायात अष्टसिद्धि वर बिया अन्तरधान जुया विज्यात ।

हे मैत्री बोधिसत्व थर्थिगु फणिकेश्वर वैतराग न्याकुति वना  
 सिद्ध जूगु तीर्थ खः । मच्छ मंगलया आकार जुया सिद्ध जुल ।  
 थर्थिह्य ज्योतिरुपयाके गुह्य मनुष्यं व्रत, जपतप होम याना श्री वज्र-  
 योगिनीयात पूजा याइ उह्य मनुष्यायात अष्टसिद्धि लाना लिपा पुण्या  
 सम्भारं पूर्ण जुयाः सम्यक्सम्बुद्धया पद तक फल प्राप्त जुइ धका श्री  
 भगवान बुद्ध आज्ञा दय्का विज्याःगु फणिकेश्वर वैतराग तीर्थया  
 खँ ववचाल ।

फणिवत्यां यत्र संगमे सहस्र धारा तीर्थ फणिकेश्वर वैतराग

सेसनाग

फणिकेश्वर सर्वनीवरण विष्कम्भि बोधिसत्त्व

दान- न्या

स्नान- कपुसिह्नाय्

पीठ- वज्रयोगिनी

मेला- आश्विन शुक्ल पञ्चमी

( इति श्री स्वयम्भू महापुराणे फणिकेश्वर वंतराग महान्याय संपाप्त )







॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण गन्धेश्वर वैतराग महात्म्य

पुनर्वार मैत्रीबोधिसत्त्वं श्री शाक्यसिंह भगवान् बुद्धयात बन्दना  
याना विन्तियात- हे भगवान् छलपोलया अनुग्रहनं फणिकेश्वर वैतरागया  
खँ न्यने धुन आः हानं गन्धेश्वर वैतरागया खँ न्यनेगु इच्छा जुल  
छलपोलँ गन्धेश्वरेया खँ आज्ञा दय्का बिज्याहुँ । थथे मैत्रीबोधि-  
सत्त्वया विन्ति न्यना गन्धेश्वरया खँ श्री भगवानं आज्ञा दय्का  
बिज्यात ।

गुगु इलय् ओँदियान आचार्यं फणिकेश्वर वैतराग सिद्धयात,  
लिषा “अष्ट सिद्धिया प्रत्यक्ष जिं स्वय्” धका आचार्य फणिकेश्वर  
वैतराग पाखें उत्तर दिशा ववं कछपाल पर्वते थाहाँ वना किसिया  
छेंगु लायाः उकिया द्योने कुशासन तथा उकिया द्योने थः फयतुना  
स्वीनिह दुगु छत्र स्वाना तपस्या यायेत स्वीसःकोःति देवतापिं आराधना  
याना पूजा भाव तपस्या थाना च्वंच्वन । तर वहे पर्वते च्वना  
च्वंछ गणेश छह जक मसःतूगु जुया च्वन । थबले व गणेशं थाहाँ  
वया स्वःवबले ओँदियान आचार्यं थःत मथ्याकुसें इन्द्रादिदेव लोकपिं  
सकलें बिज्याका पूजाभाव याना भोजन आदि याका बिरा बियाः

देवतापित लित छोया च्वंगु व ध्यान तप याना च्वंह्य ओंदियानयात  
 खना गणेद्योनं तं पिकया थथे धका हाला च्वन- अहो आश्चार्य  
 जिगु पर्वतेतुं च्वना तपयाना, जितःतुं बाहेक याना सकल द्योपित  
 भोजन याकाः जितः मसःतु, ननं मनकू स्व स्व ! जिगुहे अंश  
 किसिया छय्गु लाना फयतुनाः जितःला सापहे हेला याना च्वन... ।  
 हीजिं थ्वइत... । धका गणेद्यो तंचाया ओंदियानयात खत्तम याये  
 धका मत्तिइ तया गणेद्योनं थः परिवारगण शैन्य संगम यात ।

गणेद्योया शैन्यत पुटन, कटपुटन, अपस्मारग्रह, अमनुष्य  
 गण नाग गण, राक्षस गण थजाःपिं फुक्क संगम याना गणेद्योनं  
 इमित स्वया थथे धाल- हे मारगणपिं छिमिसँ सिलला जिगु पर्वते च्वना  
 सकसितं सःता भव्य नकेगुहँ, भन थ्व पर्वतया थुवा- जितः मसःतेगु  
 हँ ! जिं सहःहे याये फुगु मखुत, स्व छिमिसं जिं धयागु खँ न्यँ- थ्व  
 पर्वत च्वय् च्वनाः तप याना च्वंह्य ओंदियान आचार्ययात छिपिं  
 सकलें वना खत्तम याःहुँ । थथे गणेद्योया खँ न्यना पुटन, कटपुटन  
 अपस्मारग्रह, अमनुष्य गण, नाग गण, राक्षस गण सारा समूह जुया  
 ओंदियानया तप ध्यान याना च्वंगु थासे वना वयागु तप भंग यानाः  
 वयात तपं थना सापमिक सास्ति याये धका गुलिसियाँ बाग्मतीया  
 लः व्हलाबिल, गुलिसियाँ काउलेया रुप जुया पर्वते दुने दुने थ्यंक  
 ह्युया पर्वत चलःव्हया वफायेत सन । गुलिं केन्या जुयाः, गुलिं  
 ताहा जुयाः, गुलिं अनेक गाःह्युइपिं वँ कीत जुया पर्वत द्वाः द्वाः  
 खनाः ह्युत् ह्युया पर्वत चलः व्हया विया च्वन ।

न्याक्वहे पर्वत चलः ळसां ओंदियान आचार्यायात पर्वतं  
 वफाये मफु तपनं थने मफु । ओंदियानंला तारण किरण तथा  
 तःगु जुया च्वन । थथे मारगणातसें ओंदियानयात छुं याये मफुगु  
 स्वया “जिहे वना थ्वइत खत्तम याये” धका गणेद्योहे वन । थथे  
 तंस्वयका प्रकोप जुया वःह्य गणेद्योयात खना आचार्य “थ्व गणेद्योनं  
 जितः छुयाः वःगुथे” धका ग्याना तुरन्तहे विघ्नान्तक आराधना यात ।  
 थ्व इलय् अष्टसिद्धि लाना सिद्ध वाक्य जुया च्वंह्य ओंदियान आचार्य  
 आराधना याःगुलिं याकनंहे श्री विघ्नान्तक विज्याना ओंदियानया  
 न्ह्योने च्वना थथे आज्ञा जुया बिज्यात- हे आचार्य छुयाकारणे जित  
 आराधना यानागु ? ओंदियानं विघ्नान्तकया चरण कमले प्रणामयाना  
 थथे विन्तियात हे विघ्नान्तक जिगु विन्ति, जि तप यानाच्वना-  
 ह्येसित आपालंहे मारत वया पर्वत गाःखना पर्वत चलः ळया जितः  
 कुर्केत सन हानं किसि खाः वःह्य छह्य गणेद्यो वया जितः सास्ति  
 यायेत वल अके जि छलपोलयात आराधना यानागु खः ।

ओंदियानं थुलिजक धायेवं विघ्नान्तक लथुंहे प्रकोप जुया  
 तं पिकया खड्ग लम्हुया पर्वते दुने-दुने गाःम्हुया च्वंपित खड्गं  
 पर्वते भवा भवा सुया माःजुल । पुटन, कटपुटन, अपस्मार, अमनुष्य  
 थुपिं फुक्क गुह्यं गुह्यं चखुंचा जुया व्वयावन उके चखुंतीर्थनं  
 धाल । गुलिं गुलिं वखुं जुया विस्युं वन अथे जूगुलिं वखुं तीर्थ  
 धका धाल । थुकथं थ्व गुह्यकत अनेक रुप जुया विस्युंवन । गुलि  
 गुलिसितला विघ्नान्तकं स्यानाहे बिल । लीपा गणेद्योयात खंका  
 ज्वंवन गणेद्यो ग्याना पर्वतं हुरुरु हसिकार स्वया विस्युं वल । तर

विधनान्तकं वयात लिलाका ज्वँहे ज्वन । ज्वनेवंहे ग्वतुयेका स्वथ्याक  
 न्हुया धँवा ज्वनाः साःबले धँवा बापु जुया ल्याहाँ वल । अले वहे  
 धँवां गणेद्योया छयने दाल छय् तज्याना हि वल । थवले गणेद्यो  
 खयया खयया बिन्ति यात- हे प्रभु विधनान्तक जित थुलित सास्ति  
 छाये याना बिज्यानागु जि वेदना सह याये मफुत विवेक याना  
 बिज्याहुँ । विधनान्तक- हे गणेद्यो ओंदियानयात छं छाये तप भङ्ग  
 याये त्यनागु ? थथे विधनान्तकया खँ न्यना गणेद्योनं बिन्तियात-  
 स्वया बिज्याहुँ विधनान्तकजु जिगु थासे जिगु पर्वतेतुं च्वना जि  
 छहसित बाहेक याना सारा देवतापित निमन्त्रणा याना सःता भोये  
 नका तपयाना च्वन । थुकथं जित अपमान याना हेपय् याःगुलिं  
 जि नुगः मझिना तं प्याहाँ वया जिनं मारगण व्याक्कं ठळया थ्व  
 आचार्यायात विधनयाके बिगागु खः ।

गणेद्योया थुलि खँ न्यना विधनान्तकं ओंदियानयात थथे  
 आज्ञा जुया बिज्यात । हे ओंदियान छनं गुह्येसिगु पर्वते च्वना  
 वयातहे मथ्याकुसे भोये यायेगु तप यायेगु मत्य । आवंलि आःछं  
 न्ह्यागुयाःसाँ थायेया मालिकयातनिं मानेया, सःति अलेतिनि मेगु  
 ज्याया । आः न्ह्यागुयाःसां गणेशयातनिं पूजाभावया अले छंगु कार्य  
 सिद्ध जुइ । गणेशयातनं चित्त बुझेयाना विधनान्तक अनसंतुंअन्तर-  
 ध्यान जुया बिज्यात । थनलि ओंदियान आचार्य श्री विधनान्तकं  
 आज्ञा जुया थकूथें ह्यागं गणेद्योयात पूजायाना भोजन याका चेमा  
 फवना हानं वहे थासे च्वना निर्विघ्नं तप ध्यान याःगु जुल ।

ओंदियान आचार्य तपव्रत याना च्वंगु धर्मया खँ सुखावती बिज्याना च्वंह्य श्री करुणामयनं सीका बिज्यानाः क्षितिगर्भ बोधिसत्वयात सःता आज्ञा दय्का बिज्यात- हे क्षितिगर्भ बोधिसत्व छ नेपाल मण्डले वना कछपाल पर्वते तपव्रत याना च्वंह्य ओंदियानया मनोरथ पुरेयाना वा । थथे श्री करुणामयया आज्ञा न्यना क्षितिगर्भ बोधिसत्व सुखावती भुवनं आकाश मार्ग बिज्याना ओंदियानं तप व्रत यानाच्वंगु कछपाल पर्वते थ्यंका प्रशन्न जुया बिज्यात । थथे क्षितिगर्भ बोधिसत्व बिज्याःगु खना ओंदियान समाधि योगं दिना बोधिसत्वया चरण कमले प्रणाम याना बिन्तियात- छलपोल सुखः गुह्य खः जिं ह्यमसिल आज्ञा दय्का बिज्याहुँ । क्षितिगर्भं आज्ञा जुल जि श्री करुणामयया आज्ञानुसारं छंगु मनोरथ पूर्ण याना बी धका वयाह्य क्षितिगर्भ बोधिसत्व खः । थुलि आज्ञा जुइ वहे ओंदियानं बिन्तियात- जि पूर्व जन्मया भाग्ये थों छलपोल दर्शन प्राप्त जुल । जि अष्टसिद्धि लायेधका तपयाना च्वनाह्य खः । क्षितिगर्भं आज्ञा जुल- हे आचार्य छंगु मनोरथ पूर्ण जुइमा । अष्ट वैतराग पूर्ण जुलकि छंगु कामना अवश्य पूर्ण जुइ ।

थुलि वर प्रशद बियेव ओंदियानं बिन्तियात- हे क्षितिगर्भ आः छलपोल न्हावलेँ थनहे बिज्याहुँ जि म्वाना च्वँत्तले छलपोलया सेवायाना च्वने । ओंदियानया बिन्ति न्यना क्षितिगर्भ बोधिसत्वं आज्ञा जुल- जि थनजक सदाकालं च्वने मज्जु जगत उद्धार यायेया निर्मित जिगु अंश चिह्न थन तोताथके धका थःगु गन्ध रश्मि ल्वहँते खय्काः थथे आज्ञा जुल- हे आचार्य थ्व जिगु तेज मन्धलीन ज्जु खँते



जितुं भाःपा सेवा पूजा सुनां याइ उहसिया कुष्टादि सर्व रोग  
नास जुया दिव्य देह जुइ धका आज्ञा जुयाः उह चित्तिगर्भ  
बोधिसत्व अन्तरव्यान जुया बिज्यात ।

हे मैत्री बोधिसत्व उखुन्हूया दिनं निसैं चित्तिगर्भ बोधिसत्व  
यात गन्धेश्वर वैतराग धका प्रख्यानंत जुल । हानं स्वीनिह दुगु छत्र  
नं सहित याना योग साधना याना सिद्ध जूगुया निमित्त छत्र मङ्गलया  
आकार जुया चन । थजाःगु वैतरागे गुह्य मनुष्यं पूजा भाव ब्रत  
धर्म सेवा याइ उह्य मनुष्य कुष्टरोग आदिं सर्व रोग शान्त जुया  
सर्व विघ्न मदया बोधिसम्भारं पूर्ण जुया अनुत्तर संम्यक्सम्बुद्ध पद  
तक लाइ । हे मैत्री बोधिसत्व ओदियान आचार्य गन्धेश्वर वैतराग  
सिद्ध यानाः अननं अष्टसिद्धिया प्रभाव स्वयधकाः गोपुच्छ पर्वत पाखे  
स्वया वन धका श्री भगवान बुद्धं आज्ञा दय्का बिज्याःगु गन्धेश्वर  
वैतरागया खँ कवचाल ।

गन्धेश्वर वैतराग तीर्थ

सुन्दर नाग

चित्तिगर्भ बोधिसत्व

दान- त्वं छत्र

स्नान- सिंहाये स्वाँ

पीठ- कवयेना गणेशो

मेला- कार्तिक शुक्ल पूर्णिमा



॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण विक्रमेश्वर वैतराग महात्म्य



थनंलि हानं मैत्री बोधिसत्त्वं श्री शाक्यसिंह भगवानयात बन्दना  
याना विन्तियात-- हे भगवान बुद्ध, विक्रमेश्वरयागु खँ न्यनेगु इच्छा  
जुल छलपोलं कृपातया थुगु खँ आज्ञा दय्का बिज्याहुँ । थथे मैत्री  
बोधिसत्त्वयागु विन्ति न्यना भगवान बुद्धं विक्रमेश्वर वैतरागया खँ  
आज्ञा दय्का बिज्यात ।

हे मैत्री बोधिसत्त्व उह्य ओंदियान आचार्य गोपुच्छ पर्वतया  
समीपे थ्यांका चिकीचाजाःगु पर्वते च्वना शंख पुया मन्त्रजप योग  
ध्यानयाना तप याःगु जुल । थुह्य ओंदियान आचार्य जपथाना मन्त्रं  
शंख पुगु ध्वनि सुखावति भुवनस बिज्याना च्वंह्य श्री करुणामयनं  
ताया वसपोलं समाधि योगं सीका खगर्भ धयाह्य बोधिसत्त्वयात सःता  
आज्ञा जुया बिज्यात हे खगर्भ बोधिसत्त्व छ नेपाल मण्डले वना  
गोपुच्छ पर्वतया ल्यूने च्वंगु पर्वते तपस्या याना च्वंह्य ओंदियान  
आचार्ययात उद्धार याना वा । श्री करुणामयया आज्ञा न्यना खगर्भ  
बोधिसत्त्व सुखावती भुवनं नेपाल स्वयाः ऋहाँ बिज्याःगु जुल ।

गोपुच्छ पर्वतया लिउने च्वंगु पर्वते च्वना शंख पुया तपयाना ।  
 च्वंह्य ओंदियान आचार्य पुया च्वंगु शंखहे खगर्भ बोधिसत्व प्याहाँ  
 वया प्रदत्त जुया विज्यात । उगु इलये व पर्वते गना च्वंगु सिसा-  
 फल स्वांमा लता लहरा आदिं च्वजाया वल, स्वांतनं व्हयावल ।  
 थथे अनेकथं प्रादुर्भाव जूगु स्वया हानं थह्य पुयागु शंख श्री खगर्भ  
 बोधिसत्व प्याहाँ विज्याःगु स्वया दर्शन याना-- अहो गज्याःगु भाग्य !  
 थौं जि जन्म जुयागु सफल जुल, जिगु मनं तुनागु इच्छा पूवनीगु  
 जुल । धका ओंदियानं खगर्भ बोधिसत्वयात अनेक प्रकारं श्रद्धा पूजा  
 स्तोत्र याना वन्दना याना च्वन । थुगु इलय् बोधिसत्वं आज्ञा  
 दय्का विज्यात- हे ओंदियान आचार्य धन्य छंगु तप छयाःगु  
 पुण्यद्वारा अष्टसिद्धि फल लाःह्य जुल । हे आचार्य आःछ मोक्ष  
 वने फुह्य जूसांतवि छ मोक्ष वने मज्यूनि । छायेधाःसां थ्व नेपाल  
 मण्डले जि प्रमुखं च्याह्य बोधिसत्वपिनिगु तेज लीन जुल । थुके जिगु  
 तेजया अंश थनहे तोते धका थःगु तेज तग्वगु त्वहँ छगले खय्काः  
 हाकनं आज्ञा दय्का विज्यात- हे ओंदियान जि धयार्थे च्याह्य  
 बोधिसत्वपिं थ्व नेपाल मण्डले वैतरागया रूपे लीन जुये धुंकल ।  
 आः भविष्य कालया खँ कने न्यौ ।

कालान्तरे सहस्र दल पद्मे बियाःह्य श्री ज्योतिरुप स्वयम्भूयात  
 गुगु इलय् चैत्यं तपुया गुप्त याइ । अनंलि आपालं दँ लिपा थ्व  
 च्याह्य वैतरागया बोधिसत्वपिनिगु नां लोप जुया च्याह्यसितं महादेव  
 लिंग धका पूजा याइ अर्थिगु इलय् कलियुग प्रवेश जुयाः थुगु  
 नेपाल मण्डले दुर्भिन्न जुइ । वा मवया पिना-पिनागु बुया मवया

मनूतये नय् मखना हाहाकाल जुइ । थजाःगु इलय् जगतया गुरू  
 श्री आर्यावलोकितेश्वर वसपोल कामरु कामक्ष धेगु देशे राक्षसपिनिगु  
 कुले निर्माणकाय जुया अवतार जन्म कया बिज्याइ । उगु इलय्  
 छनं थ्वहे नेपाल मण्डले बन्धुदत्त धयाह्य वज्राचार्य जुया जन्म  
 जुइ । महापरिडन सिद्ध जुइ अले प्यंगु दिशासँ नां प्रख्यान्त जुइ ।  
 हानं थ्व नेपाल मण्डले बिघ्न दुर्भिन्न आदि शान्त यायेया कारणे  
 सत्त्वपिनिगु कारणे छंगु शास्त्र मन्त्रया प्रभावं वसपोल श्री करुणामयया  
 निर्माण काय श्री लोकनाथ थन नेपाले बिज्याका, वसपोलया मूर्ति  
 दय्का देवालये स्थापना याइ वहे करुणामय दच्छिइ छक रथयात्रा  
 याना थ्व नेपाले सुवृद्धि जुयेका जलवृष्टिनं यानाः पिना-पिनागुनं बुया वइ  
 अले वाया दुने जाकिनं अवलेहे दै । थुलि ज्या फुक्क सिधय्का  
 वहे श्री करुणामयया चरणे प्रवेश जुया छ जाति जरा मरनया दुःखं  
 मुक्त जुइ ।

थुलि आज्ञा जुया खगर्भ बोधिसत्त्वं आशिर्वाद बिया अनं  
 अन्तरध्यान जुया बिज्यात । वसपोलं ल्हँते तेज खय्का थकूथाये  
 विक्रमेश्वर वैतराग धका नामं प्रख्यान्त जुल । शँखया सलं उत्पत्ति  
 जुया सिद्ध जूगुलिं थ्व वैतरागयात शंखाकार वैतराग नं धा,  
 विक्रमेश्वर वैतरागनं धा । थौं कन्हे आदेश्वर धका धाइगु जुया  
 च्वन । मैत्री बोधिसत्त्वयात भगवान बुद्ध आज्ञा जुया बिज्याःगु  
 अष्ट वैतरागया खँ क्वचाल ।

शंखधारातीर्थ विक्रमेश्वर वैतराग तीर्थ

शंख नाग

खगर्भ ओधिसत्व

दान-- शंख

स्नान-- सां न्हूगु चा

पीठ-- चण्डी

मेला-- श्रावण शुक्ल पूर्णिमा (कार्तिक लच्छिनं खः)

( इति श्री स्वयम्भू महापुराणे विक्रमेश्वर वैतराग महात्म्य समाप्त )



॥ नमो बुद्धाय ॥ नमो धर्माय ॥ नमो सदाय ॥

## स्वयम्भू पुराण अष्ट वैतराग पुण्य वर्णन



भगवान् बुद्धं मैत्री बोधिसत्त्वयात् हानं थथे आज्ञा जुया विज्यात- हे मैत्रीबोधिसत्त्व अष्ट वैतराग तीर्थ सेवाया फल कने न्यौ । गुह्य मनुष्यं बाग्मती तीर्थे नित्य स्नान याना उपोषधे चवना, त्रिरत्नया शरण वना, फिया चैत्य दय्की, उह्मेसित उगु पुण्यद्वारा आत्मा शुद्ध जुया सर्व सम्पत्तिं पूर्ण जुया संसारे सदाकालं सुखं चवने दै अन्तकाले सुगतिस वास लाइ । अथेहे गुह्य मनुष्यं अष्ट वैतराग तीर्थे ध्यःनं स्नानयाना सेवायाइ उह्मेसित आरूप धातु भुवने जन्मकाःवनि । गुह्य मनुष्यं कष्टिं स्नान याइ उह्म रूप्य धातु भुवने जन्म काःवनीसा थुगु अष्ट वैतराग तीर्थे गुह्य मनुष्यं साखनं स्नान याइ उह्म विद्याधर भुवने जन्म जूवनि । दुदुं स्नान यागु पुण्यं चन्द्रमाया भवने जन्म जुइ । गुह्य मनुष्यं स्वांनं स्नान याइ उह्मेसिया इच्छा पूर्ण जुइ । गुह्मेसिनं तीर्थे चवना दीप दान याइ उह्म दिव्य चक्षू जुया जन्म जूइ । गुह्मेसियां नस्वाःगु गन्धं स्नान याना धर्म याई उह्म सुगन्ध देह जुया देवलोके जन्म जुइ ।




थुगु अष्ट वैतराग तीर्थे च्वना गुह्यस्याँ लुँ दान याइ उह्य-  
 सित चतुर वर्ग फल प्राप्त जुइ । हानं वैतराग तीर्थे च्वना दुदु  
 दान यातधाःसा आरुप्य भुवने जन्म जुइ । गुह्य मनुष्यां वैतराग  
 तीर्थे होम याना धर्मयाइ उह्येसित नाना दुःख कस्त मोचन  
 जुया वनि । हानं गुह्यसियाँ तीर्थे च्वना रत्न दान याइ उह्य सर्वरत्नं  
 पूर्ण जूगु थाये जन्म जुइ । गुह्यसियाँ तीर्थे वस्त्र दान याइ उह्य  
 दिव्य देह जुया जन्म जुइ । नाना वाद्य थाना तीर्थ सेवा यात-  
 धालसा दिव्य श्रोत जुया जन्म जुइ । हानं बिल्वपुत्रं स्नान यातधालसा  
 सदां मङ्गल जुइ । करवीर स्वांनं स्नान याना धर्म याइ उगु पुण्य  
 द्वारा साधु जुइ । हानं उह्य मनुष्यां पुष्प फलपत्र छाया फिया  
 चैत्य दय्का तीर्थ सेवा याइ उह्य मनुष्य रुपवान जुया देवल्लोके  
 जन्म जुइ । गुह्यनियाँ तीर्थे च्वना जप स्तोत्र याना तीर्थ सेवा याइ  
 उह्य श्री वंत जुया महाभिज्ञ जुइ । गुह्यसियाँ वैतराग तीर्थे च्वना  
 दण्डवत याइ उह्य सकलसियाँ बन्दना याये योग्यह्य जुइ ।

थुगु कथं नेपाल मण्डले अत्यन्त पवित्र जुया च्वंगु पुण्य  
 भूमि, हिमालयां चाटुला च्वंगु सुदर्जया भूमि उपलन्दोह पीठ प्रसिद्ध  
 जुयाः सुखावति लोकधातु तुल्य जुया बुद्ध बोधिसत्त्वपिसँ अधिस्थान  
 यानातःगु थुगु नेपाल मण्डल खः । थर्थिजाःगु नेपाल मण्डले दया-  
 च्वंगु तीर्थे स्नान यात धालसा सकल पाप नाश जुया सर्वसिद्धि  
 फल प्राप्त जुइगु । थथेया निर्मित सुनं मनुष्यां पाप मोचन याना  
 शुभ फल लायेगु इच्छा याना थुगु अष्ट वैतराग तीर्थस स्नान या,  
 फिया चैत्य दय्का पूजा या, त्रिरत्नया शरण हूँ, उपोथधे च्वँ, जप



या, होम या, देवतापित जल तर्पण ब्यु, मिनावने धुंकुपित उद्धार  
 याना सत्गती लाकेगु कारणे अष्ट वैतराग तीर्थे जल तर्पण ब्यु,  
 पिण्ड दान या, तीर्थ सेवा या थुगु पुण्यद्वारा त्रिमण्डल शुद्ध जुया  
 समस्त कामना पूर्ण जुया सधर्मसाधना याइह्य जुया बोधिसम्भारं  
 पूर्ण जुया साक्षात् बुद्ध पद तकं लाइगु फल प्राप्त जुइ ।

( इति श्री स्वयम्भू महापुराणं अष्ट वैतराग महाम्य वर्णन नाम समाप्त )





॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण द्वादश तीर्थे स्नान विधि



अनंलि हानं मैत्री बोधिसत्त्वं लहाःनिपां हाजोपा श्री शाक्यसिंह  
भगवानयात विन्तियात- हे भगवान हे शास्ता ! छलपोलया कृपां  
केशावती उत्पति जुयाः देश ग्रामादि वसोवास जृगु खँ न्यने धुन ।  
आःहाकनं द्वादश तीर्थ धयागु गन गन संगम (मिले) जुया च्वन,  
भिनिगु तीर्थया नां छु छु जुया च्वन, गुगु मेलाये स्नान थायेगु,  
छुकें छुकें स्नान थायेगु, विधि गथे गथे दया च्वन, छु छु फल  
दया च्वन हानं गथिं गथिं पि नाग राजापिं वास यानाच्वन थुगु खँ  
सम्पूर्ण सत्त्व प्राणिया उपरे करुणा तथा आज्ञा दय्का बिज्याहुँ  
धका प्रार्थना यात । थथे मैत्री बोधिसत्त्वं विन्ति याःगु खँ न्यना  
श्री शाक्यसिंह भगवानं मैत्री बोधिसत्त्वया खाःस्वया सकल सभा-  
मण्डलं तायेदय्क आज्ञा दय्का बिज्यात-

हे साधु मैत्री बोधिसत्त्व छिमिसं छगुचित्त याना न्यां । द्वादश  
तीर्थया खँ, थाये, मेला, विधान, पुण्यफल व नागराजा समेतं जिं  
छिमित कने । थ्व खँ गथे धाःसां हापां वागमति व अमोघ फल

दायिनी संगम जुया च्वंगु तीर्थयात शोधन पुण्य तीर्थ धयातल ।  
 थ्व तीर्थे स्नान यानागु फलं दशांकुशल पाप मोचन जुयावनि ।  
 थ्व दशांकुशल पाप धयागु छु छु धाःसा प्राणाति पात धयागु छगु,  
 अदत्तादान निगु व कामेसु मिथ्याचार स्वँगु थुलि शरीरं याइगु पाप  
 धाइ । हाकनं मृषावाद छगु पैशुन्य निगु संभिन्न स्वँगु व पारुष्य  
 प्यंगु थुलि वचनं याइगु पाप । हाकनं व्यापाद छगु अबिद्या निगु  
 मिथ्यादृष्टि स्वँगु थुलियात चित्तं याइगु पाप धाइ ।

थुलि भिता पाप गथे धकाधाःसां, प्राणाति पात धयागु बिना  
 कारणे दायेगु, चीगु सास्ति यानाः प्राण कायेगु, हिंसादि कतःयात  
 स्यायेगुयात प्राणाति पात धाई ॥१॥ अदत्ता दान— मेपिनिगु धन  
 सम्पति वा छुं बस्तुत मवियेकं कायेगु, हेकाः वा खुया कायेगु  
 पापयात अदत्तादान धका धाई ॥२॥ कामेसु मिथ्याचार— करकिया  
 मिसा वा मिजंपिं लिसे संगम यायेगु पापयात हे कामेसु मिथ्याचार  
 धका धाई ॥३॥ थुलि स्वता थःगुहे शरीरं याइगु व्यवहार खः, त्वःतेमाः ।

आः हाकनं वचनं याइगु प्येता पाप, मृषावाद— धयागु मखुगु  
 खँ ल्हायेगु वा फत्ताः खँ ल्हायेगुयात धाइ ॥१॥ पैशुन्य— करपित  
 चूक जोना चुकलि यायेगु पापयात पैशुन्य धका धाइ ॥२॥ हानं  
 संभिन्न धयागु जाना च्वंपित फाया बीगु पापयात संभिन्न धाई ॥३॥  
 व्यापाद— मेपित द्रोह यानाः करपिंगु दुःख वा मभिस्वे धका जुइगु  
 पापयात व्यापाद धका धाई ॥४॥

मनं याइगु स्वता पाप, वारूष्य- विनास कारणे मेपित नुगले  
स्याक्क ब्वो वियेगु याना जुइगु पापयात पारूष्य धका धाई ॥१॥  
अविद्या- कतःया ज्युगु स्वे मफया करपित नास यायेत स्वयेगु वा  
यायेगु पापयात अविद्या धका धाई ॥२॥ मिथ्यादृष्टि- धर्म पाप  
धयागुहे मदु धका धर्म पाप विचा मयास्ये नास्तिक ज्ञाने चवनेगु  
पापयात हे मिथ्यादृष्टि धका धाई ॥३॥

थथिजाःगु भिता पापकर्म याये म्वायेके या निंतिं थ्व शोधन  
पुण्यतीर्थे गुह्य बुद्धिमानह्य मनुष्यं ढाफो स्वांनं नीळन्हु तक मो  
ल्लुयाः देव पितृपित जल तर्पण विया फिया चैत्य दय्का उपोषध  
व्रते चवनाः त्रिरत्नया शरण वनाः जप ध्यानादि यानाः थुगु तीर्थ  
याह्य ह्याउँवर्ण जुयाच्वंह्य, छंयले मणिरत्न दृह्य न्हेगु फणां वाँलाना  
च्वंह्य तच्चक नागयात अर्घ याना जल घटादि दान यानाः दृःखि  
याचकपित दान प्रदान याना तीर्थ व्रत याइ उह्य मनुष्यया चक्षु,  
श्रोत घ्राण, जिह्वा, काय व मन शुद्ध जुयाः सकल पाप मोचन  
जुया, सर्वक्लेशावर्ण मुक्त जुया बोधिसत्त्व महासत्त्व धायेका बोधि-  
संभारं पूर्ण जुया स्वंगु प्रकारया ज्ञान प्राप्त जुया संम्यक्सम्बुद्ध पद  
तकं फल प्राप्त जुइ । थनया प्रवकाल वा मेला श्रावण कृष्ण औसि  
सोमवार सिंहसंक्रान्ति खुनु खः ॥१॥

थनंलि मारदायनि व बाग्मती संगम जुया च्वंगु शान्त  
तीर्थ । गुगु तीर्थे तुयुगु वर्णह्य फणास तच्चतं थिनाच्वंगु मणिरत्नं  
सुशोभित जुया च्वंह्य शिखि नाम नागराजां वासयाना च्वँच्वन ।  
थुगु तीर्थे गुह्य बुद्धिमानह्य मानवं नीळन्हु तक धालेपति स्वांनं स्नान

यानाः फिया चैत्य दय्का पूजायाना उपोषध द्रते च ना त्रिरत्नया  
 शरण वना नागयात अर्घयाना देव, पितृपित जल तर्पण विया  
 गुताबीव आदि दान विया खगानना देवीयात पूजा भाव याना  
 दुःखिपित शुद्धात्मां दान प्रदान याइ; उह्य मानव त्रिमण्डल शुद्ध  
 जुया बोधिसत्वया पद लाना गुण ज्ञानं पूर्ण जुया पुण्य संभारं पूर्ण  
 जुया निर्वाण पद प्राप्त जुइ थ्वया प्रवकाल भाद्रशुक्लपक्षे प्रतिपदा  
 शुक्रवार कन्या संक्रान्ति ॥२॥

मणिरौहिणी व वाग्मती व पातालं थाहाँ वयाच्वंगु लः रुद्रधारा  
 संगम जुयाः त्रिवेणी जुया च्वंगु तीर्थयान शंकर तीर्थ धाइ । थुगु  
 तीर्थे लावँजिफो स्वांनं स्नान याये । थुगु तीर्थे ह्यवः जक स्नान  
 दान याःसां गंगासागरे भिको स्नान दान यानासिकं अप्य फल प्राप्त  
 जुइ । थुगु तीर्थे चापु थें तुयुगु वर्णह्य, न्हेगु फणां सुशोभित जुयाः  
 मणिरत्नया तेज दया च्वंह्य शंखपाल नागराजां वास याना च्वन ।  
 थुह्य नागयात अर्घ याना फिया चैत्य दय्का पूजाभाव यानाः  
 त्रिरत्नया शरण, वना, उपोषधे च्वना चन्द्रमा ज्वलं दान यानाः  
 दुःखि गरिबपित दानप्रदान यानाः तीर्थ सेवा याइ; उह्य मनुष्यया  
 शुद्ध देह जुया राग, द्वेष, मोह आदिं मदया पञ्चेन्द्रिय त्याके फुह्य  
 जुया सर्व सम्पतिं पूर्ण जुया हानं सदाकालं सत्गती जन्म कयाः  
 बोधिसम्भारं पूर्ण जुया बुद्ध जुयेगु पद तकं प्राप्त जुइ । प्रवकाल  
 आश्विनशुक्ल द्वितीया बृहस्पतिवार तुलासंक्रान्ति ॥३॥

थनंलि वाग्मती व मञ्जरी संगम जुया च्वंगु राजतीर्थे ह्यामुह्य.  
 न्हेगु फणां युक्तह्य मणिरत्नं सुशोभित जुया च्वंह्य सुरूप नाम नाग-



राजां वास याना चत्रन । श्व तीर्थे गृह्ण मनुष्यं इता-थिता चां नी  
छन्दु तक स्नान याना उह्य नागयात अर्घ यानाः फिया चैत्य दय्का  
पूजाभाव याना त्रिरत्नया शरण वना, उपोषधे च्वना लाकां कुसा,  
तुतां, निसला आदि दान याना जपतप यात धालसा उह्य मनुष्य  
शुद्ध शरीर जुया राजनक्षत्रं संयुक्त जुया निरोगि जुया बोधिसम्भारं  
पूर्ण जुया तथागत पद प्राप्त जुइ । थुगु थासे कार्तिक शुक्लपक्षे  
तृतीया वृश्चिक संक्रान्ति सुक्रवार खुन्दु मेला चले जुइ ॥४॥

हानं केशावती व विमलावती निगु खुसी मिलय् जुया च्वंगु  
थायेयात मनोरथ तीर्थ धका धाइ । थुगु तीर्थे नख्यानं ५१ नी  
छन्दु तक मो लहुया फियागु चैत्य दय्का पूजाभाव याना हानं श्व  
तीर्थया न्हेगु फणां संयुक्त जुयाः मणिरत्नं सुशोभित जुया च्वंह्य  
कुलिक नागराजायात अर्घ यानाः त्रिरत्नया शरण वना उपोषध ब्रते  
च्वना पिण्डपात्र शिशलाकू आदि दान यानाः दुःखिजनयात फुथे  
दानप्रदान याना जपतप ब्रते च्वंह्य उह्य मनुष्ययात मनोरथ पूर्ण  
जुया लिपा बोधिज्ञान प्राप्त जुइ । थनया मेला मार्गशीर्ष शुक्लपक्षे  
पञ्चमी धनु संक्रान्ति शनिश्चरवार खुन्दु चले जुइ ॥४॥

हाकनं केशावती, कुशुमावती, व भद्रमती संगम त्रिवेणी जुया  
च्वंगु निर्मल तीर्थस नी छन्दु तक कलिह स्वाँनं मो लहुया फिया  
चैत्य दय्का पूजाभाव याना हानं व तीर्थया पीतवर्ण ह्यासुह्य मणि-  
रत्नं संयुक्तगु फणां सुशोभित जुया च्वंह्य अपलाल नागयात अर्घ  
यानाः देव पितृपित जल तर्पण विया, त्रिरत्न शरण वना, उपोषध  
ब्रते च्वना, धातु, वह, जाकि दान आदि दुःखिपित दान याना

चव्हमिति कलह, विघ्न आदि मदया यस कीर्ति प्राप्त जुह्य जुया  
चतुर ब्रह्म विहारे चवने दुह्य जुया पुण्यमम्भारं बोधिसम्भारं पूर्ण  
जुया अन्ते निर्वाण पद तकं प्राप्त जुइ । प्रवकाल पौषशुक्ल पष्टि  
मकर संक्रान्ति आदित्यवार खुन्दु ऋतुः ॥६॥

हानं सुवर्णावती व केशावती संगम जुया चवंगु निधान तीर्थ ।  
थुगु तीर्थे गुह्य मनुष्यं अजु स्वाँनं नी छन्दु तक स्नान याना,  
चेत्य पूजा यानाः उगु तीर्थयाह्य वाउँह्य मणिरत्नया फणां संयुक्त  
जुया चव्ह्य नन्दोपनन्द नागराजा निह्यसितं अर्घ यानाः देव पितृ-  
पित जल तर्पण विद्या त्रिरत्नया शरण वना, उपोषधे चवना, लुं,  
वा दान याना याचकपित फुथे दान विद्या चव्ह्यसित सर्व सम्पत्ति  
पूर्ण जुया अन्ते मोक्ष पद प्राप्त जुइ । थुगु तीर्थे माघशुक्ल सप्तमी  
कुम्भसंक्रान्ति आदित्यवार थ्व खुन्दु मेला चले जुइ ॥७॥

हाकनं पापनाशिनी व केशावती संगम जुया चवंगुयात ज्ञान तीर्थ  
धका धाइ । थ्व तीर्थे नी छन्दु तक तुयु सितुं स्नान याना  
चेत्य पूजा याना व तीर्थयाह्य तुयुह्य न्हेगु फणां युक्त जुया मणि-  
रत्नं याना वाँलाना चव्ह्य वालसुकि नागयात अर्घयाना, कंसया थल  
(कयँ) आदि दान याना उपोषधे चवना त्रिरत्नया शरण वना दुःखिपिं  
लोकपित दानप्रदान याना तीर्थ सेवा यात धालसा उह्य मनुष्ययात  
आयु वृद्ध जुया ज्ञान गुण बुद्धि युक्तह्य जुया तथागत पद यागु  
ज्ञान तक प्राप्त जुइ । थनया प्रवकाल फागुण शुक्लअष्टमी मीन-  
संक्रान्ति शनिश्चरवार खुन्दु ऋतुः ॥८॥

वाग्मती व केशावती संगम चिन्तामणि तीर्थ गुगु तीर्थे तुयुह्य  
 न्हेगु मणिरत्न फणां संयुक्तह्य वरुण नागराजां वास याना च्वंगु दु ।  
 उगु तीर्थे पञ्चगन्धं नी छन्दु तक स्नान याना फिया चेत्य दय्का  
 पूजाभाव याना व तीर्थयाह्य वरुण नागयात अर्घ्य विया नवरत्नादि  
 दानप्रदान याना दुःखिपिन्त दान विया उपोषधे च्वना त्रिरत्न शरण  
 वनाः तीर्थ व्रत च्वंह्य मनुष्यया मत्तिइतःगु पूर्ण जुया कथर्थे बोधि-  
 सम्भारं पूर्ण जुया संम्भक्कसम्बुद्ध फल प्राप्त जुइ । प्रवकाल चैत्रशुक्ल  
 दशमी मेष संक्रान्ति शुक्रवार ॥६॥

हानं वाग्मती व रत्नावती संगम जुया च्वंगु प्रमोद तीर्थ ।  
 थ्व तीर्थे पलेस्वानं नीछन्दु स्नान याना फिया चेत्य दय्का पूजा  
 भाव याना व तीर्थयाह्य तुयुह्य मणिरत्नया फणां सुशोभित जुया  
 च्वंह्य पद्म नागराजायात अर्घ्य याना खाता लासा आदि दान याये ।  
 दुःखिपितनं थह्य दान याना उपोषध व्रते च्वना त्रिरत्नया शरण  
 वना गुह्यसें तीर्थ सेवा याइ उह्यसित लोकं येका च्वने दे । थन  
 वैशाख शुक्ल द्वादशी वृष संक्रान्ति बृहस्पतिवार खुन्दु प्रवकाल  
 खः । थुखुन्दु मेला जुइ ॥१०॥

हानं वाग्मती व चारुमती संगम जुया च्वंगु सुलक्षण तीर्थ  
 खः । थ्व तीर्थे आभर्ति स्वानं स्नान नीछन्दु तकहे यानाः फिया  
 चेत्य दय्का पूजाभाव याना व तीर्थे वास याना च्वंह्य तुयुगु  
 वर्णह्य फणाये मणिनं युक्त जुया च्वंह्य महापद्म नागराजायात अर्घ्य  
 याना त्रिरत्नया शरण वना उपोषधे च्वना आत्मा बिम्ब आदि ध्यः

कयँ थले, कष्टि सिजः थले तथा दानप्रदान याना दुःखिर्पित दान  
 याना गुह्य मनुष्यं तीर्थ सेवा याइ उह्य मनुष्ययात सम्पूर्ण लक्षणं  
 युक्त जुया अन्त्ये बुद्ध फल तक प्राप्त जुइ । थनया प्रवकाल ज्येष्ठ  
 शुक्लपक्षे द्वादशी मिथुन संक्रान्ति बुधवार खुन्हु खः ॥११॥

वाग्मती व प्रभावति निगुलिं संगम जुया च्वंगु तीर्थयात  
 जय तीर्थ धका धाइ । थुगु तीर्थे सर्वोषधि स्नान याना फिया चैत्य  
 दय्का पूजाभाव याना त्रिरत्नया शरण वना उपोषध ब्रते च्वना  
 लासा आदि दान याना तुयु वर्णह्य मणिरत्नं संयुक्तगु फणां  
 सुशोभित जुया च्वंह्य श्री कान्त धयाह्य नागयात अर्घ याना  
 दुःखिर्पित दानप्रदान गुह्येस्यां याइ उह्यसित मारगण त्याके फुह्य  
 जुया मारजित जुया बुद्ध पदया ज्ञान प्राप्त जुइ । थर्थेजाःगु तीर्थे  
 आषाढ शुक्लपक्षे त्रयोदशी कर्कट संक्रान्ति सोमवार खुन्हु मेला  
 जुइ ॥१२॥

( इति श्री स्वयम्भू महापुराणे द्वादश तीर्थे स्नान विधि वर्णन समाप्तम् )

॥ नमो बुद्धाय ॥ नमो धर्माय ॥ नमो संघाय ॥

स्वयम्भू पुराण

द्वादश तीर्थ महात्म्य प्रारम्भ

पुण्य तीर्थया महात्म्य



ध्व नेपाल देशे नागवास दहँ जुया च्वंगु इलय् महाचीन  
पञ्चशीर्ष पर्वतं मञ्जुश्रीया निर्माणकाये मञ्जुदेवाचार्य विज्याना श्री स्वयम्भू  
दर्शन याये धुंका नागवास दहंनं दक्षिण दिशाम च्वंगु पर्वत चन्द्रहास  
खङ्गं तक्षाना नागवास दहँया लः फुक पितछोया मञ्जुदेवाचार्य शहर  
दय्का विज्याःगु देशय् लोकपिसं बसोबास याना च्वसेंलि आपालं  
नागत मध्ये तक्षक नागं तं पिकया उखें थुखें चाः चाहुला बसोबास  
याना च्वंषिं लोकपित न्याना विष लगेयाना स्याः जुल । थुकथं  
लोकपित धसे याना स्याना जूगु पापं तक्षक नागयात महारोगं कथा  
ह्ये विखु फुक्क बोला वया ला कुचा कुचा कुतुं वया ह्य ल्ह्यं  
घाःया घाः जक जुया, वया, उकुह्य जुया ध्वगिना द्वाच्या द्वाच्यां  
जुया तच्चतं दुर्गन्धय नवया थुगु कथं महारोगं कःगु जुल ।

थुगु कथं महारोगं कयेका तक्षक नागं दुःख सिस्सुं याना  
यानागु उपायेनं ध्व त्वय मलासेंलि थःथमंतुं प्राणाति पात करकियात  
स्यानागु पापं ध्व महारोग कुष्ठरोग जुल धका पश्चाताप चाया तक्षक



नाग पुण्य तीर्थे वना उपोषधे च्वना त्रिरत्नया शरण वना श्री अमोध  
पाश लोकेश्वरया उपवास च्वना अष्टमी व्रत चले याना च्वंगु जुल ।  
थथे पुण्यतीर्थे च्वनाः श्री अमोधपाश लोकेश्वरया उपोषध व्रते च्वना  
त्रिरत्नया शरण वना च्वंगु पुण्यं याना छुं दँ लिपा तक्षकया महा-  
रोग लनावंगु जुल । तक्षक नाग हापायार्थे हृष्ट-पोष्ट जुया दिव्य  
देह जूगु खत ।

थुकथं तीर्थ सेवा याना च्वच्चं छन्दुया दिने त्रिरत्न (बुद्ध  
धर्म व संध) या शरण वना श्री अमोधपाश लोकेश्वरया व्रत दना  
कार्तिक महिनाया मुखः अष्टमी (पशुपति महाद्योयात मुखतं पुयेकीगु  
दिन) स तक्षक नागराजा खुसी धिसक्वय् निभापाना च्वंगु जुल ।  
थुगु इलय् पपु त्वाँय् त्वाँय् संका गरूड छह्य ब्वया वयाः पुण्य  
तीर्थे निभाः पाना च्वंह्य नागयात खंका आकाभाकाये भाराक दाःवन ।  
गरूडं दायेवंहे तक्षक बिस्सुंवन । गरूडं भाराभारां सना तक्षकयात  
भाराक पपुतिं दाया लुसि ताताः हाकःगु पञ्जां त्याप ज्वन । तक्षक  
ग्याना फ्यारारां सना गरूडया पञ्जां छुते जुया स्वायायां बिस्सुवन ।  
गरूडं भाराक दायाखतं नागयात छथु क्वात । गरूडया त्वाथं नाग-  
यात क्वायेवं घाः जुया हि वल अले तक्षकं गरूडयात धाल- हे  
पंक्षिराज गरूड, जित क्षमा याना बिज्याहुँ । जि श्री अमोधपाश  
लोकेश्वरयागु उपोषध व्रत दना महारोगं लाःह्य खः । जित सास्ना  
यायेमते । गरूडं धाल- सास्नाला छु ! छ जिगु नसाहे जुसेलि  
छन्त जिं त्वःते फै मखु छन्त जिं स्याना नय्मानि । धयाकथंहे  
गरूडं तक्षक नागयात पपुतिं दाया पञ्जां क्वात्तुक ज्वना त्वाथं क्वाना



ला थाता याना लिकाल नागयात वेदनाला तच्चतं हे जुल । तक्षकं  
क्षमा फवननं गरूडं क्षमा व्युहे मव्यु । भन तं पिकया तक्षकयात  
क्वातु क्वात । गरूड व नागया तःधंगु त्वापु जुल । गरूडं तं  
पिकया खःचिया धाःथें जाःगु पपुतिं तक्षकयात भारा भारां दायाः  
मिल्हया तच्चतंहे सास्ना यात । गरूडं नागयात दाःगु पपूया त्वःदं  
तच्चतं फय्वया सिमाहे क्वः दल । नागयात छकः जक पपुति  
भाराक दाइबले फाता फाता पुला हुंकन थ्यंक थ्यंवनि । अले  
तक्षक स्वायायां त्रिस्थंवनि । हानं गरूडं लिना पञ्जां क्वातुक ज्वना  
त्वार्थं क्वाइ । नाग फ्यारं फ्यारं सना गरूडया पञ्जां छुते जुइ ।  
थुकथं गरूडं नागयात सास्ना याइ ।

तःको मछि क्षमा फवनं क्षमा मव्युसे गरूडं स्यायेत सँसेलि  
लिपा ज्वनेत वःह्य गरूडयात नागं हित्तु हिना खुसिया लखे थुत्तु  
थुन । गरूडं भारा भारा मिल्हत, नागं क्वातुक हित्तु हिना लखे  
थुत्तु थुना स्याहे स्यायेला धैथें याना विल । गरूडया पपु फुक्कं  
प्याना ब्वया वने मफया भुगुलुं च्वन । अलेला भन तक्षकं हानं  
हानं हित्तु हिना लखे थुना सास्ना याना च्वन । युगु इलय् गरूडं  
मत्ति तलकि “थ्व तक्षकं जित स्याहे स्याइन आःगथे याये” धका  
तच्चतं ग्याना गरूडं नारायण लुमंका थथे प्रार्थना यात - हे नारायण !  
बिष्णुजु जित छलपोलया वाहन खः तर थौं जित तक्षकं स्याइन  
हे बिष्णु नारायणजु छलपोलं जित रक्षा याना प्राण वचे याना  
बिज्याहुँ । थवले बैकुण्ठया नारायणजुं गरूडयात दुःख जूगु खँ  
सीका हथा-हथासं शंख, चक्र, गडा व पद्म ज्वना क्षण मात्रं पुण्य

तीर्थे श्यांकः विज्यानाः थःह्य वाहन गरूडयात सास्ना याना तःगु  
 स्वया नारायणं तच्चतं तं पिकया तक्षक नागराजा यात चक्रं कयका  
 स्याना वि धका चक्र प्रहार याये तेन । थबले तक्षक ग्याना “आः  
 जि फुत वसपोल नारायणं जित चक्र प्रहार याइन, आः जि गधे  
 याये जित सुनां रक्षा याइ” धका तक्षक नाग नागराजां श्री अमोध  
 पाश लोकेश्वर करुणामययात लुमंका- हे करुणामय हे जगतया  
 नाथ जित नारायणजुं चक्रं प्रहारयाना स्याइन, जित प्राण रक्षा  
 याना विज्याहुँ धका नागं श्री करुणामय स्मरण याना प्रार्थना याःगु  
 जुल । थबले सुखावती भुवने विज्याना च्वंह्य श्री करुणामयनं लोकसं  
 दर्शन धयागु समाधि योगं सीका विज्याना हथासं सिंह गया श्री  
 करुणामय पुण्यतीर्थे श्यांकः विज्यात ।

थबले श्री करुणामय विज्याःगु नारायणं खना तच्चतं मञ्जाला  
 काचा काचां श्री करुणामया चरण कमले भोपुया विन्ति यात- हे  
 करुणासिन्धु लोकनाथ करुणामय जितः क्षमा याना विज्याहुँ करुणा-  
 मयनं आज्ञा जुया विज्यात- हे नारायणजु छलपोल देवता खः थ्व  
 गरूड धयाह्य पंक्षि ख थ्व तक्षक छह्य की खः । छलपोलं निह्यसितं  
 शान्त याना विज्याये मालं भन क्रोध याना विज्यात थथे क्रोध  
 याना विज्याये मज्यु । थथे करुणामयया आज्ञा न्यना सापहे लज्जा  
 चाया थथे विन्ति यात- हे करुणामय छलपोलयात जिगु अङ्गे  
 धारणा यानातय् छलपोल जिगु अङ्गे विज्याहुँ धका श्री करुणामय  
 यात नारायण जुं थःगु ब्वहले क्वबिया गरूड गया विज्यात,  
 करुणामय नारायणं क्वबिया च्वंह्य गरूडयात सिंहं क्वबित हानं

सिंहया तुति तक्षक नाग हिन गथे धासां-- सिंहया द्योने गरूड,  
गरूडया द्योने नारायण, नारायणया द्योने श्री करुणामय व सिंहया  
तुति तक्षक नागराजा । थनंलि प्यह्मेसितं क्वविया सिंह ब्वया  
चारुगिरी धालसां चांगु पर्वते जूवंगु जुल । थुह्म करुणामययात हरि  
हरि हरि हरि वाहन लोकेश्वर धका धैगु नामं प्रख्यान्त जूगु जुल ।

थौया अद्यापि चांगु पर्वते जुगादि नवमी खुन्हु हरि हरि हरि  
हरि वाहन लोकेश्वरया प्रवकाल चले जुया च्वंगु दहे दनी । पुण्य  
तीर्थे तक्षक नाग उद्धार जुया वंगु खँ क्वचाल ।

( इति श्री स्वयम्भू महापुराणे पुण्यतीर्थ महात्म्यमभाष्य )





॥ नमो बुद्धाय ॥ नमो धर्माय ॥ नमो सचाय ॥

## स्वयम्भू पुराण शान्ततीर्थया महात्म्य



परापूर्व काले सत्यदेवी मदया तप याना बिज्याःह्य महादेव  
यात कामदेवं तप भंग याना बिसेलि महादेवया तपंचायेवं वसपोलया  
क्रोधदृष्टिं कामदेव भस्म जुया वन ।

कैलाश पर्वतया जुजु श्री महादेवयात, हिमालय पर्वत राजां  
थः म्हाये पारवती श्री महादेवयात कन्यादान बिया विवाह याना  
बिल । थथे पारवती विवाह याना बिज्याना पारवती सहित महादेव  
कैलाश भुवनस बिज्याःगु जुल । पारवतीया गणेश कुमार निह्य पुत्रपिं  
जन्म जुल ( एव खँ स्वस्थानि बाखनय् दु ) । तर मचात निह्य  
दय् धुंकानं महादेवं गजि धतुर नया त्वना जुया च्वन । मदं कायेका  
श्मशानया भस्मं बुला नागयात ज्वना क्वखाया चन्द्रमाया प्रतिमा  
जटाय् छुना भूत, बेताल, सीक प्रमथ गनपिं मुंका दिग-दिगंवर जुया  
त्रिशुल ज्वना डमरु थानाः थान-थानान्तरस नृत्य याना प्याखं हुहुँ  
ससले हिमालय पाखेनं प्याखँ हू जुल ।

थथे दिग-दिगंवर जुया महादेव प्याखं हूवःगु हिमालय पर्वते  
 च्वंपिसं खंगु जुल । खँक्वोसियां- पारवतीया गथे योगु जुइ महाद्यो  
 स्व स्व ! लज्जाहे मदुह्य धका स्वक्वो खँक्वो हाला च्वन । महाद्यो  
 धाःसा भन दिगंवर जुया लाःलाःथे ससःया दरवार क्वं क्वं हे प्याखँ  
 हू जुल । थथे जिलाजं दिगंवर जुया प्याखँ हूवःगु हिमालय पर्वत  
 राजा ससःअबुनं खन ससःमामँनं । ससःअबु व ससःमाँ निह्यस्यां  
 स्वया च्वन- स्व गन्याःह्य महाद्यो लज्जा धैगु भचाहे मदु स्व स्व !  
 भन प्याखँ हूगु स्व ! हिमालय पाले च्वंपिं खँक्व सकलें लज्या  
 चाल । महाद्यो धाःसा भन यो यो थे प्याखँ हुया जुल छन्दु मखु  
 निन्दु मखु हिं हिहे प्याखँ हू जुइगु ।

छन्दु पारवती हिमालये थः छें वन खनि । सखिपिसँ धाल--  
 पारवती मय्जु छिमि भातला धार्थें खःका ! पारवती- छाये ?  
 सखिपिं- छिमि भात महाद्यो छन्त मलोः । पारवती- छाये मलो  
 महाद्यो जि भात ? सखिपिं- छं भात महाद्यो खँला हिं हीहे थन  
 वया प्याखँ हू वैगु । पारवती- खैका ! सखिपिं- खैकाऽ ? हिं  
 हीहे प्याखँ हू वैगु खँ न्यँनेला ? भूत, प्रेत, पिशाच आदि प्रमथ  
 गनपिं सारा मुंका दोँचा गया धुँया छेंगुलिं हिना, किसिया  
 छेंगुलिं न्यया विभुलिं बुला बिखु जोना क्वखया दिग-दिगंवर जुया  
 लाःलाःथे प्याखँ हुला वैगु स्यूला छं ! पारवतीया व धाये थ्व धाये  
 मदया मछाला लायेकुली वना माँ अबुयात वन्दना यात । माँ  
 अबुनं न्यंकल- छु मैँचा छिमि भातला जिपिला सीथें मछाल स्यु !  
 गथे छं छुनं मधायाला ? छिमि भात हिंथंहे थन वया दिग-दिगंवर



जुया प्रमथ गनपिं सहित यानाः लाःलाःथे प्याखँ हू वैगु स्यूला छं !  
 गथे मछा मजूह्य जुइ ससले ससलेहे प्याखँ हू वैगुका । मस्युह्य  
 धायेगुला स्यूह्य धायेगुला ! मैँचा छं छुनं मधयाला गय् ? पारवती  
 थ्व खँ न्यना तच्चतं मछाल । पारवतीया मने “याकनं ल्याहाँ वने  
 भातयात रुवा रुवा त्याये” धका मत्ति तया च्वन । निभाद्यो मबीनि  
 बलेहे पारवती कैलाशे ल्याहाँ वन । महाद्यो छें मडु । प्याहाँ वना  
 च्वन । बलकि धाये धका मने खँ तया पारवती च्वना च्वन ।  
 गजिं कायेका महाद्यो द्वाहाँ बल । द्वाहाँ वय्वहे पारवतिं धाल-  
 छलपोलला छु ! महाद्यो छु छु ? पारवती छू छुका ! ससले थ्यंक  
 प्याखँ हुँ जुयेगु मछा मजूला छःपिं ? महाद्यो- छाये जि प्याखँ  
 हू जुया छं लज्जा जुलला ? पारवती तं चाया- छःपितला छुया  
 लज्जा नया त्वना यय्यो थाये वनाः यो योथे जुयाः छु ससलेनं  
 प्याखँ हू जुयेगुला ! जिमि माँ अबुया गुलि वेइज्जत जुल, जुलि  
 लज्जा; छःपिनि धका छुनि छु । महाद्योनं पारवतीया खँ न्यना  
 तंम्बय्काये जि प्याखँ हुया छिमि माँ अबुयात छुया लज्जा चाये  
 माःगु दु ? न छं लज्जा चाये माःगु ! पारवती- छःपिसँ अम्थे  
 धया विज्याये ज्युलाः ! महाद्यो- अज छं नं जित हेला यानागु !  
 ज्ञान ब्यू वयागु ! का छनं जितः म्वाः का हुँ जिगु छें प्याहुँ !  
 धका पारवतीयात चानेहे पितना हल ।

भातं पितिका पारवतीया अथे याये थथे याये धैगु हे मन्त  
 दुःख जुल । थःछें वनेधाःसा लज्जा मछा मजु ह्येसिया कला बल धका

धाइ । कैलाशे वने धाःसां भातं दाइ गन वने गन वने जुया चान्हे  
 शान्ततीर्थे वना च्वंच्वन । कन्हे खुन्हु सुथे जुइवं तीर्थे मोन्हुया  
 फिया चैत्य दय्काः पूजा भाव याना त्रिरत्नया शरण वना श्री  
 करुणामय अमोघपाश लोकेश्वरया उपोषधे (अष्टमी ब्रते) च्वना ही हिं  
 श्री गुह्येश्वरी देवीया सेवा याना च्वंच्वन । छन्हु श्री गुह्येश्वरी  
 प्रशन्न जुया पारवतीयात सुनानं मखंक गुप्त यानाः रक्षा याना  
 तैतल । थुगु कथं पारवतीं शान्ततीर्थे स्नान यानाः फिया चैत्य  
 दय्का पूजा याना उपोषधे च्वनाः श्री गुह्येश्वरी देवीयात पूजाभावं  
 व्रतयाना च्वंच्वगु जुल ।

महाद्योया गुबले पारवती लुमन अवले वं मखन उखें थुखें  
 माल मलु । ससले वनानं स्वः वननं मलू याने दहे मदु । गुलि  
 स्वयां हिकमिक दंक माःजुलनं पारवतीयात गनं लुइके मफया महाद्योया  
 नुगः मछिकाः रुवहे रुवल । गणेद्योयानं थः माँ मदुगुलि उखें थुखें  
 माः जुल मदु । महाद्योनं थः प्रमथ गणतयत् मायेके छत्त तर  
 लुइकेहे मफु । थुकथं महाद्योनं फुक्क भुवनपतिं माःलनं खंके मफया,  
 थों कन्हे शंखमो धयागु वाग्मती सिथय् महाद्यो तपस्या च्वंच्वन ।  
 माः पिसं मालां च्वन तिनि । अनलि महाद्यो तपस्या च्वंगु तःदं  
 दस्येलि थुगु पृथ्वी तज्याना सप्त पातालं निसें लः थाहाँ  
 वया शंकर तीर्थे मिले जूवल । अकें उगु तीर्थया लःधाःयात रुद्र  
 थारा धका नां च्वन । थों तकं त्रिवेणि जुया उगु शंकर तीर्थ नां  
 तीर्थ जुया च्वंगु जुल ।

महाद्योनं तपस्या याःगु खुला दसेलि श्रीह्येश्वरी देवी प्रशन्न  
जुया पारवती माला जूपिं प्रमथ गण तयत्त शान्त तीर्थे नस्त छारणिं  
उला क्षण मात्रयात दर्शण व्युगु जुल । थवले प्रमथगण तयस्  
पारवती पुलुक्क छक खना हानं मखँसेलि इमिं थःथवे सःलः जुल  
हे पासापिं पारवती पक्काँनं थन दु । आः व भीसं पिकाये फै  
मखु धैगु खँ लहाना हथा-पथासं महाद्योयाथाये वना थथे ब्रिन्ति  
याःवन ।- हे महादेव ! हे प्रभु !! जिमिसं पारवती दर्शन याना  
वय् धुन अवश्य शान्त तीर्थे तप याना बिज्याना च्वंगु दु । छलपोल  
बिज्याना स्वः बिज्याहुँ । थथे प्रमथ गण तयस् ब्रिन्ति यागु खँ  
न्यना तपयाना च्वंछा महाद्यो जप मालाहे वाँछ्या काचा काचां  
शान्त तीर्थे वन । तर अपसोच पारवती मखं महाद्योनं न्यन-  
हे प्रमथ गणपिं पारवती ग्व ? गणतयस् धाल- हे जगदिश्वर थन  
शान्त तीर्थेहे खनागु खः ! महाद्योनं ग्वलेसा ग्व ? धाधां उखें  
थुखें माःजुल पारवतीयात गनंहे खंके मफु ।

थवले महाद्योनं ध्यान याना बिज्याना बिचाः याना बिज्यात  
“अवस्येनं श्री गुह्येश्वरी देवी वसपोलं मखंक तथा बिज्यात जुइ”  
धका ज्ञानं सीका “ आः जिं श्री गुह्येश्वरी देवीया सेवा मयासें  
पारवती लुईके फैमखुत” धका महाद्योनं श्री गुह्येश्वरी देवीया शरण  
वना बिलाप याना थुगुकथं स्तोत्र याना ब्रिन्ति यात- हे जननी  
जगदिश्वरी जि छलपोल याके शरण वया, जि पारवती तना तच्चतं

दुःख जुया मालाजुयागु थों कन्हे खुदँ दय्धुंकल थों तक्कं लुङ्के मफुनि । हे जननी, पारवती छक ल्वीका बी माल । धका मिग्वा निपासँ ख्वबि वय्का महाद्योनं बिलाप याना श्री गुह्येश्वरी देवीयात पूजाभाव याःगु जुल ।

थथे महाद्योया पूजाभावं श्री गुह्येश्वी देवी प्रशन्न जुया महाद्योयात दर्शन ब्यूगु जुल । गुकथं क्यन धाःसां जव पत्ति द्वःछि ल्हाते द्वःछिह्म महाद्यो तथाः, ख्वगु द्वःछि ल्हाते द्वःछिह्म पारवती तथा विश्वरूप जुया श्री गुह्येश्वरीं महाद्योयात दर्शन बिया बिज्याःगु जुल । श्री गुह्येश्वरीं आज्ञा जुया बिज्यात- हे महादेव छंह पारवती गुह्य खः कया यंकि । महाद्योनं थःह्म पारवती उह्य थुह्य धाये मफया महाद्योनं श्री गुह्येश्वरीयात बिनित्यात- हे खगानना नैरात्मा देवी छलपोलं गुह्य प्रशन्न जुया बिया बिज्यात उह्य जिं काये । थथे महाद्योया बिनित न्यना श्री गुह्येश्वरी देवीं आज्ञा जुल । हे महादेव आवंलि पारवतीयात अपमान याये मखुसा जक बी । महाद्योनं सत्यनं अपमान यायेमखु धका सत्य वाचा याःगु जुल । थथे महाद्योनं सत्यवाचा यासेंलि श्री नैरात्मा गुह्येश्वरी देवीं द्वःलछिह्म महाद्यो द्वःलछिह्म पारवतीनं अन्तर याना पारवतीयात ल्हाःज्वना महाद्योयात लःल्हानाः थथे आज्ञा जुया बिज्यात- हे महेश्वर छं मिसा पारवती थ्व खः यंकि । पारवतीं महाद्योयात पालि भोपुया व चेमा फवन । अनंलि महाद्यो पारवती मिलय्

बुधा श्रीगुह्येश्वरी देवीयात वन्दया याना कैलाशेतुं ल्याहां  
वंगु जुल ।

अबलेसं निसें महाद्योयात उमामहेश्वर धका नामं प्रख्यान्त  
जूगु जुल । शान्त तीर्थे पारवती देवी श्री करुणामयया व्रत दना  
उद्धार जूगु खँ ववचाल ।

( इति श्री स्वयम्भू महापुराणं शान्त तीर्थ महात्म्य समाप्तम् )






आपका नाम सुनाकर मैं बहुत खुश हूँ। आपका पता लिखिए।

। बहुत धन्यवाद

आपका पता लिखिए। मैं भी लिखूँगा।

। आपका पता लिखिए। मैं भी लिखूँगा।

। आपका पता लिखिए। मैं भी लिखूँगा।



आपका पता लिखिए। मैं भी लिखूँगा।

आपका पता लिखिए। मैं भी लिखूँगा।

आपका पता लिखिए। मैं भी लिखूँगा।

आपका पता लिखिए। मैं भी लिखूँगा।



॥ नमो बुद्धाय ॥ नमो धर्माय ॥ नमो सत्ताय ॥

## स्वयम्भू पुराण शंकर तीर्थया महात्म्य



परापूर्व काले पाञ्चाल धयागु नगरे गोपाल धयाह्य साजवा  
ब्रह्म ब्रह्म दया चवन । छन्हुया दिने उह्य गोपाल ह्मिथँ थें गुइँ  
सा जःवना च्वंबले व गुइँ धुँ छह्य वया सात फुक्क ग्याना चिच्चा  
दनाः भःभःन्हुया बिस्युंवन । सा जवाःया सात गन वनथें धका माःजुया  
च्वंबले व गुइँ तिसि यकोसया च्वंगु खना तिसिनिं खानाः नय्  
धका तिसिमाये गया तिसि नया च्वंबले थः नया च्वनागु तिसिमाय्  
स्वया उगु सिमाये सया च्वंगु तिसि बांलाःथें च्वना थुगु सिमां  
उगु सिमाये वना तिसि खानाः नःवन । हानं अन नैच्वनागु स्वया  
मेगु बांला ताल उखेहे वन । थुकथं सिमा हिलाः वना च्वंह्य दैव  
संजोगं सा जवा च्वना च्वंगु सिमा कच्चा त्वधुला सिमां कुतुं वया  
क्वसं च्वंगु ज्वले कुतुंवन ।

वः ज्वः गथे च्वं धाःसां तसकं तज्जा जुया भ्यात्नाःनं जाना  
च्वंगु व आपालं प्या आदि न्याये यःपिं कीत दयाच्वंगु थजाःगु गाले साजवा  
गोपाल कुतुं वनाः थाहां वयेमफया भ्यात्नाले कुतं वना बुत्तु बुयेका ह्य

छह्मं प्या आदि की तसें न्याका महाकष्ट जुयेका साजवा थथे ततःसकं हालाच्चनकि “जि फुत जि फुत आः गथे याये जि सीन जितः सुनां रक्षा याःवइ ? हा हा देव !” तच्चतं करुणा चायापुगु सलं हाला च्वन ।

थथे अगाःधे कुतुवनाः प्यन्हु खुन्हु वहे गुईं नसा माःवया च्वंह्म धर्मकुवर धयाह्म माकःनं गोपाल करुणा सलं हाला च्वंगु ताया माकःलं थथे मत्ति तल- “थ्व गाले अवश्य मनू कुतु वना च्वन । थ्वयात जि अगाधं थकया बी ! तर जि थ्वयात क्वबि फैला मफैला ” धका वं ह्वापां तःग्वगु ल्वहँ छगःनिं क्वबिया स्वत । अले व माकः अगाःधे क्वहाँ वना सा जवायात क्वबिया गालं थतहया सिमा क्वय् दिकल । व धर्मकुवर माकःया भुइचःतिहे हाल वयात क्वव्यूगुलिं । तसकं ह्य न्यलाः त्यानु चाया सिमा क्वय् ग्वतुला मिखा पुलु पुलु कनाः बुलुहुँ माकःनं मनू भाषां धाल- हे मानव ! अगाधं छन्त मफु मफु थत हयागुलिं जितः तसकं त्यानुल उकें जि भतीचा भासुफिं छनं भतीचा भासुफ्यु धका धया माकः गोतुल, गोपाल अर्थेहे च्वंच्वन ।

तर भासु फिना च्वंह्म माकःया ह्य न्योगुलिं यानाः न्ह्यो वल । थुथायेलाक व सा जवानं थथे मत्ति लुइकल “जि प्येन्हु प्येन्हु दय् धुंकल आतक छुं नय् खँगु मदुनि उकें जि तागत मदया सनेहे मफय् धुंकल आः जि गथे याना छें वने ! आःबले थन छुं ला भचा नय् दःसाला भचासां तागत दै अले छें वनेफै, माःगु यायेफै तर ला धाःसा गन काःवने” धका मत्ति तया च्वंह्म गोपाल

थःत अगाधं शकाःह्य माकःयात स्वया “श्व हे माकःयात स्याना ला  
नय्दःसाला जि बल्लाह्य जुइ अले छें वने” धयागु कुबिचार याना  
अनहे च्वंगु तग्वःगु ल्वहँ ल्होना यांकया मिखा तिसिना माकःयात  
कय्कूगु जुल ।

तर सा जवानं कय्कूगु ल्वहँतं धर्मकुवर माकःयात मलासें  
तिन्हुया नं न्याय्थे घारांक मेथाये न्याःवन उथाये हे यना च्वंहा माक  
व सलं याना भसंग न्ह्यलं चाल । छु सःवःगु धका चाक्कःलिं मिखा  
व्या स्वःबले गोपालया खाः खिउँका नुगःद्यः नापं थर थर खाका  
सुंक च्वना च्वंगु खन । माकलं न्यन- हे सा जवा ! घारांक छु  
सःवःगु ? छ ग्याये मते खःथे धा छु सःवःगु ! ? अपराधि महापापि  
सा जवानं सः खा खा तुका बिन्ति यात-

हे माक ! छलपोलं जित चेमा याना बिज्याहुँ जि अज्ञानि,  
मस्युसें यायेलात । जि नय् मखंगु प्यन्हु दय् धुंकल उकें नय्  
पित्याःगुलिं याना छःपिंत स्यानाः ला नयाः बल्लाकाः तिनि छें वने  
धका मत्तिइ तयाः जिं छःपिंत स्यायेत ल्वहँतं कय्कागु खः तर छःपिंत  
मलासे तिन्हुया मेथाये कया श्व सः वःगु खः हे माकः ! श्व जिगु  
अपराध चेमा याना बिज्याहुँ । थथे गुण मस्यूह्य बैगुणिया खँ  
व्यना माकःनं धाल-

अहो आश्चार्य श्व संसारे मानव जुयानं थथेंजाःगु पाप कर्म  
यावे त्यन ! थःत प्राण बचेयाना ब्पूह्येसितहे छं स्यानाः ला नय्गु  
मत्तिइ तया ल्वहँतं कय्का स्याये त्यन, हे मानव छ अपराधि खःसां

छन्त जिं धाये, थ्व पापं छं तच्चतंहे दुःखसिया च्वने मालियो हे साजवा छंगु पाप ल्हंकेगु उपाये जिं कने मन तया न्यो-  
न्यो-

नेपाल मण्डले भिनिगु तीर्थ दु व द्वादशतीर्थे वना स्नान याना फियागु चैत्य दय्का पूजाभाव याना त्रिरत्नया शरण वना उपोषधे च्वना तीर्थ ब्रतय्चवं । थथे तीर्थ सेवा मयायेकं छंगु पाप ल्हनी मखु, हे मानव आ छ थःगु छें ल्याहाँ हुँ ।

थथे व धर्मकुवरया खं याना गोपालया नुगः नाल, तच्चतं हे करुणा चायापुक मिखाँ खोबि स्वः स्वः वय्का, सः खा खा तुका माकःयात बिन्ति यात- हे माकःरुपि धर्मात्मा, जि तच्चतं दुर्बल नय्मखँगु हे प्यन्हु मछि दय्धुंकल उकें जि...जि पला छीगुतकं सामर्थ मदु जि छें ल्याहाँ वने फैमखु धका बिन्तियात । थथे साजवाया बिन्ति न्यना व माकःया करुणा वना गुईं च्वंगु सिसा-बुसा खाना हया प्वाः जायेक नकल । हाकनं माकःनं हे गोपालयात लुकुं छिया पाञ्चाल नगरया लँपुइ तय् हया धर्मकुवर माकः गुईं तुं ल्याहाँ वन ।

उखे गोपालया छें वया कायेपिसँ थः अबु साजःवंह्य छें ल्याहाँ मवःगुलिं माः जुया च्वंगु जुया च्वन । उखुन्हुनं ह्यिगः ह्यिगःथें थाये हिला अबु माःजुपिं कायेपिसँ अबु मफू मफु लय् वया च्वंगु खना कायेपिसं बिचाः याना छें व्वेनायंकल । अनंलि छें अबुयात नकाः त्वंका बिचाः यानाः ह्यापायार्थे हे सुख पुर्वकं च्वना च्वंगु जुल ।

तर दछि दत्या दसेलि गोपालया हापा थःत प्राण बचेयाना  
व्यूह माकःयात ल्वहँतं कय्कूगु पाःपंगाना ह्य छह्यं कुष्ठ रोगं थिल ।  
कुष्ठ रोग, लिपा तच्च जुया लहाः तुतिया पचि हे ध्वगिनाः कुतुं  
वल । ह्य छह्यं द्वाच्या द्वाच्यां जुइक पाके जुया हि, हि स्वालां  
वया गोपालयात तच्चतं कष्ट जुल । थुकथं ल्वय् तच्च जुया या-याःगु  
वासलं मथिया दुर्गन्ध नवया छें जक हे मखु जःलाखःलापि हे  
चवने मफत । थुकथं ल्वय् तच्चया नवया चवनां चवने मफया  
जहानपिं सकलें व खनाः कुचाया छेंथा जहानपिसँ वयात छैनं पित-  
हया पीगंया फलेचाये वांञ्छय् हल ।

थुगु इलय् व लं जुइपिं लँजुवात पीठे देइके वनेत वनी  
तर व कुष्ठ रोगं कया च्वंहा साजवायात खनाः सकलें घच्चायाः  
मस्वसे वनि । व नवःगुला लय् नापं जुइ मजिल । दे छगुलिं  
धयार्थें नवल । अथे जूगुलिं अन पीठे देइके वनीपिं सकलें मुन व  
देया जुजुयाथाये वना बिन्ति याःवन- हे महाराजा ! पीठे महारोगि  
छह्य वाये हया तःगुलिं लय् हे जुइ मजीक नवयाः दे छगुलिं नवया  
चवनेहे मजिल । व ल्वगिला ह्य छह्यं ध्वगिना हि हि स्वालां प्याहाँ  
वया च्वंहा लुममं हे घच्चाना वः । महाराज ! थ्वइत थन तया  
तःसाळा मे-मेपितनं ल्वय् सरे जुइका । हे महाराज थ्वयात देसं  
पिने वांञ्छय् यंके माल ।

थुकथं प्रजालोकपिं सकलें वया बिन्ति याःवगु खँ न्यना जुजुं  
मन्त्रीपित सःता- दुतपिसं क्वबियेका व कुष्ठ रोगियात गुइं वांञ्छये



यंकि धका जुजुं आज्ञा वियाव्छत । जुजुया आज्ञानुसारं द्रुतपितं  
उह्य साजवा गोपाल महारोगियात वाकेव्छत ।

उह्य साजवा महारोगी गुईं च्वना नय्गु नय् मखना माय्  
माय्याना वना बय् च्वंगु घाय् नया च्वन । लः त्वने मखना तच्चतं  
कस्त नया च्वन । थुकथं व कुष्ठरोगं पिदित जुयेका गुईं गोपाल  
याकःचा दुःख सिया च्वन ।

छन्हुया दिने व गुईं मेगुहे देयाह्य जुजु शिकार ह्यितः वःबले  
तच्चतं ध्वगी नवःगु चाया, थन छु नवया च्वंगु धका द्रुतपितं मायेका  
स्वःबले वहे महारोगियात खना द्रुतपिसं जुजुयात विन्तियात- हे  
महाराज हुँकन महारोगि छह्य वांव्छया तःह्य नवगु ।

इमिगु खँ न्यना जुजु थःहे वना महारोगियात स्वया न्यन  
हे महारोगिं छ सु ? छंगु छँ गन, थजाःगु गुईं सुनां तय्हल ?  
महारोगिं धाल- हे महाराजा ! छु याये जि महा पापि जूगुलिं  
थथिंगु कुष्ठरोगं कया दुर्गन्ध नवःगुलिं सकलयात जिगु काशणं दुःख  
जूगुलिं जित थुगु गुईं वांव्छय्हःगु खः । जिं थःत प्राण बचे याना  
व्यूह्य माकः छह्यसित जिं स्यानाः ला नय्तेना, हे महाराज थ्वहे  
पापं जित थजाःकथं दुःख सिया च्वनेमाःगु धका ख्वख्वंहे धयाच्वन-  
आः जिगु दुःख फुकेगु लँ केना बिज्याहुँ महाराजा छु याःसा जिगु  
दुःख लनि ।

महारोगि साजवाया खँ न्यना जुजुं आज्ञा जुल- जिं छंगु  
त्वय् लाय्के फइमखु । थुलि धायेव हे वया माकलं धाःगु खँ भवास्



लुमनं अलि वं जुजुयात विन्ति यात- हे महाराजा छःपिसं जितः  
उद्धार याना विज्याये फु ! गुकथं धाःसां, जिगु पाप व थ्व ल्वय्  
हंका व्छयेत विनां द्वादश तीर्थ सेवा मयाकं थ्व पापं मुक्त जुइ  
मखु । लाइमखु अथेया निर्मित जित द्वादश तीर्थे तय्यंका विज्याहु !  
धका विन्ति यासेलि जुजुं थः द्रुतत निहसित व ज्या व्वया व्छत ।

जुजुया आज्ञा कथं द्रुतपिसं महारोगियात व्वबिया शंकर  
तीर्थे तय् हःगु जुल । थनंलि गोपालं अन च्वना थह्यं फुथे हिं  
हिं मोल्हुया फिया चेत्य दय्का त्रिरत्नया शरण वना तीर्थ सेवा  
याना च्वन । दच्छि दत्या लिपा गोपालया चित्त शुद्ध जुया धर्म  
चित्तोत्पति जुया वल । शंकर तीर्थ सेवा याना च्वंगु पुण्ययाना  
साजवाया व ल्वय् लाना वना च्वन थुकथं हिं हिं तीर्थस मोल्हुयाः  
त्रिरत्न शरण वनाः उपोषधे च्वनीह्य जुया वल थथे यानाः व शंकर  
तीर्थे च्वना थुकथं धर्म याना च्वंसेलि वयात व पुण्यं महारोगि  
हिया ह्थिं लाना व वं भिनिदं दसेलि उह्य गोपालया सुचुक्कहे  
फुक्क कुष्ठरोग लाना दिव्य देह (शरीर) जुल ।

थनंलि थःछेँस च्वंपिं काये, म्हाये, जाहानपिं लुमनाः तीर्थ  
थःगु छेँ वने धका गोपाल शंकर तीर्थ पाञ्चाल दे स्वयाः वंगु जुल ।  
थनंलि थःगु छेँ गोपाल थ्यंका जाहान परिवारपिनिगु ख्वाः स्वयाः  
थथे धाल- हे जिगु काये, म्हायेपिं जहानपिं मकस्यां कुशल जू  
मखुला ! वयागु खँ न्यना छेँ च्वंपिं सकलें आतां । लिपा कायेपिसँ  
न्यन- छ सु गनं वथाह्य ? गोपाल- हे पुनापिं जि छिमि अबु खः ।  
छु छिमिसँ जितः ह्यमसिलला ! वया काये म्हायेपिं पत्या मजुया

थथे धाल-- छ जिमि अबु मखु छ सु खः, जिमित हेका छु खँ लहाः  
वयागु ? जिमि बौ ला कुष्ठरोगं कया गुईं वांछया थकूगुहे थनि  
भिनिदँ दय्धुंकल सी धुंकल जुइ, जिमित छं थः जान नाला हेक  
वय्म्वः का छेँ प्याँहुँ । थथे जानपिसँ धाःगु खँ न्यना गोपालं धाल--  
हे पुतापिं छिमि बौ जिहे खः, जिं हेका खँ लहानागु मखु जिगु  
खँला न्यौ धका काय्पित थःगु खँ कन ।

जितः गुईं वांछया तल । अन जिं तच्चतंहे दुःख सिया  
च्वंच्वना । जि मसिई । जिगु पापं याना जिं कष्ट जक नया च्वने  
माल । तर छन्दु, मेगुहे देयाह्य शिकार हितःवःह्य जुजुं जितः खन ।  
जि लिसे खँ लहाये धुंका लिपा जितः शंकर तीर्थे तय्के व्छत ।  
जि वहे शंकर तीर्थे च्वना ह्थिं मोल्हुया त्रिरत्नया शरण वना तीर्थ  
व्रत याना च्वना । उकथं जिं तीर्थ व्रत याना च्वनागु पुण्य द्वारा  
अन तीर्थ सेवा याना च्वनागु भिनिदँ दसेलि जितः जुया च्वंगु  
कुष्ठरोग शान्त जुया वन । हे पुतापिं जिगु खँयात अथेनं पत्या  
मजूसा शंकर तीर्थे ह्थिं मोल्हु वैपिं सकल सियाँ जितः ह्यस्यु अन  
वनाः न्यां वने नु । वया जहानपिसँ वयात अथेनं पत्या याये मफया  
वया जहानपिं सकलें शंकर तीर्थे वना अन मोल्हु वया च्वंपिके  
न्यन । मोल्हु वःपिसँनं गोपालया तीर्थ सेवा याना कुष्ठरोग लाःगु  
व्याक्कँ खँ कन ।

अमिसँनं वहे खँ कनेव काये म्हाये सकल जहानपिं तच्चतं  
लय्ताया थ, अबुया तुति भपुया थथे धाल-- जिमिसँ छलपोलयात  
ह्यसीके मफुत धन्य जिमि बा छेँ बिज्याहुँ नु धका धाय्व गोपालं

धाल हे जहानपि जिगु खँ न्यं ! गथे धालसाँ पाप पुण्यया प्रभावं  
प्रत्यक्ष जिं खने धुन गुगु शंकर तीर्थे मोल्हुया फिया चैत्य दय्का  
उपोषधे च्वना त्रिरत्नया शरण वना तीर्थ सेवा यानागु पुण्य द्वारा  
जिगु लवय् लन ।

जि महारोगं मुक्त जुया दिव्य देह जूसाँ सदाँ म्वाना च्वने  
दुगु मखु । आः जि थ्व हे शंकर तीर्थे मसीतलें थ्वहे तीर्थे वास  
याना तीर्थ सेवा याना च्वने जि छेँ वय् मखुत छिपिं जक छेँ  
ल्याहाँ हुँ धका जहानपि जक लित वळल अले गोपाल शंकर तीर्थे  
च्वना ह्मिथं स्नान याना मोल्हुया चैत्य दय्का पूजाभाव याना  
त्रिरत्नया शरण वना उपोषधे च्वना थुकथं तीर्थ सेवा यायां अन्तये  
व सिनाः सुखावति भुवने जन्म काःवंगु जुल ।

थथे महा पापि महारोगं कःह्य गोपाल साजवा उद्धार जुया  
वंगु खँ वबचाल ।

( इति श्री स्वयम्भू महापुराणे शंकर तीर्थमहात्म्य समाप्त )

[illegible][illegible]

FIVE THIRTY EIGHT TWO FOUR SIX FIVE

1945 15

THE UNITED STATES OF AMERICA

204 1.25

॥ नमो वृद्धाय ॥ नमो वृद्धाय ॥ नमो मध्याय ॥

## स्वयम्भू पुराण राज तीर्थया महात्म्य

परापूर्व काले बन्धुमति धयागु नगरे आपालं धन सम्पति  
पूर्ण जुया च्वंहा कर्ण धयाहा महाजन छहा दया च्वन । थुहा  
महाजनया वर्ण लक्ष्मी धयाहा महाजननी दया च्वन । तर अमि  
मस्त छहाहे मद्रु । निसन्तान । उकिं सन्तान कामनां अनेक व्रत  
दना धर्म याना जुल । दैव संजोग, वर्णलक्ष्मीया गर्भ दया वःगु जुल ।

महाजननीया गर्भला दत्त तर प्वाथे दसांनिसें कर्ण महाजनया  
हिं-हिं छिया धयाथें सम्पति पाःजुया वना च्वन । हानं व्यापार  
याना याना थासे द्याना च्वन । थुकथं ही हिं द्याजक द्यायां काये  
मानिगु धेवा ह्ययानं ब्यू मदया कर्ण महाजनया थःहे वना व्यापार  
याःवनेगु मत्तिइ तल । वया छें सम्पति फुनां वना च्वन । गुलिं  
खुया यंकल गुलिं हेका यंकल छें हे खर्च याये माल ।

अले महाजनं थः कला लिसे खँ लहात— हे प्रीय ! छंगु  
गर्भ धाःसा ब्रधे जुजुं वल तर सम्पति धाःसा हिया हितं घते जुया  
वना च्वन । आःजिं छुयाये बिना धन मदय्कं जिं छिमित गुकथं

लहि ! भन छं मचा बुलकिला मचा बू ब्यांके माली हानं मचा  
जंको या, वतवन्ध या, तःधिकः जुइ ईहिपा याना ब्यु अने कथं  
खर्च याये मानि अकें छे जक छवंचवनां गनं धेवा वइ ? थुकिया  
लागि आः जि रत्नाकर वने छन्त खर्चनं जि ठळया हया च्वने ।  
हे प्रीय ! छ हत्थाये चाये मते छं इलय् ब्यलय् नया त्वना छे बिचाः  
याना च्वं धका थुकथं कलायात चित्त बुझे याना बंजा तयत्  
सुचं बिल ।

अनंलि भिंगु दिन शुभ ब्यलाये सगं कया बणिजालपिं सकलें  
मुना कर्ण शार्थवाह महासागरया रत्नाकर ब्यपार वने धका बन्धुमति  
नगरं प्याहाँ बल । देश, ग्राम, राष्ट्र, राजधानि, गुँ, पर्वतआदि  
निगम थाये थासे ब्यापार यायां वना च्वन । महाजनयात ब्यापारे  
याःयाःथे मज्यु द्याजक द्यात । थथे ब्यापारे द्याजक द्याःगुलिं छे  
खर्च भचाहे ठळया हय् मफत ।

बन्धुमति नगरे महाजननी वर्णलक्ष्मीया महाजन ब्यपार वँसेलि  
छे दुथे फुथे नयाः च्वना च्वन । गर्भधाःसा हिया हिये बधे जुया  
बल कथथे च्याला गुला दसेलि गर्भे च्वंह्य मचा लां दना भिला  
पूर्ण जुसेलि छन्हुया दिने वर्णलक्ष्मीया सुतिकाया बेथा जुया गर्भ  
पटन जुल, कायेमचाहे बुल । तर व मचा गजाःह्य धाःसां हया  
वर्णहे हाकुसे ह्यंग्वाःथे च्वंह्य, हाये फ्याफःह्य, म्ये मिखाथे ह्याउँसे  
गुलि गुलिचिंगु जुया तेफुचानं क्वलाछि प्रमानं प्याहां वया च्वंह्य,  
सँनं ततःपुह्य वानं प्वाथंनिसें दुह्य वानं ततःपु जुया हानं ह्याः तुति



चिं चिचीहाक जुया ग्वाथ्या-माथ्या स्वथ्या बागःचाह्य थुकथं भिंच्याता  
दोषं युक्त जुया च्वंहा अलक्षणाह्य मचा बुल ।

थुजोह्य काये मचा जन्म जुया खुन्हु दुखुन्हु आका भाकाये  
वान्हे वर्णलक्ष्मीया छेँ मिनल । चिच्चाये दना हाल त्वाःया जःला  
खःला सकस्यानं छेँ मिनःगु खन । देखिं धयार्थे वया मि स्यायेत वल,  
स्यायेत सन तर लः लूलिसे भन च्याना वल वर्णलक्ष्मी मचा जोनाः  
प्याहाँ वल । वर्णलक्ष्मी थःगु छेँ व्हःगु स्वया ततःसलं जिगु छेँ, जिगु  
तिसा जिगु सम्पति धका हाहाँ ख्वया च्वन । सारा फुक्क मनूत  
इपां थिपां मदय्क लः हहँ लुया च्वन तर मि च्यानां च्वन सुनांहे  
स्याये मफु । वर्णलक्ष्मीया सम्पति छेँ सुधांतं नौ जुया वन । अनंलि  
व अलक्ष्मिनाह्य कायेमचा जोना वर्णलक्ष्मी छेलिइसं च्वना बछि परसि  
मचायात लाना बछि फाया वयाकें थ्वयाकें मदय्क फवना कयाः  
अति कष्टं जीबिका चले यानां च्वन ।

महाजननी वर्णलक्ष्मी आः फवगिं जुल । उखें थुखें वना उगुं  
थुगुं मदय्क ज्यायाः जुइ माल । थुकथं दुःख सियाः वं थः कायेयात  
पालन पोषन याना च्वन । वर्णलक्ष्मीयात थबले सकलसियां हेलायात  
तर न्हाह्येसियां न्हाग्गुधाःसां थःगु मन धिर्जयाना सःयानाः करपिंथाये  
भ्वातिं जुया ज्यायानाः नया च्वन । थुकथं दुःख सिस्युं वर्णलक्ष्मीया  
काये अलक्ष्मिनाह्य च्यादँ दत ।

थबले व मचा तःधिक जुया वःसाँ मांहासित भं दुःख जुल ।  
वर्णलक्ष्मी गन गन ज्या वन अन अन, गन गन फवं वन अन अन

सुधांतं कुलचन जुया वल । मचायात नके त्वंकेत विथा हःगु छे  
सुद्धान्तं ल्वापु जुया वल । थुकथं वना वना थासे कुलचन जुसेलि  
सुनानं इमित ज्यानं मबिल फोनेनं मबिल भन हक्काः वोविया  
हइगु जुल ।

छे नय्गु अन्न छगःहे मदु, ज्या माःवनं सुनां ज्या मव्यु  
मानं कायेनं द्यां लात । थुकथं मामं दुःख स्यूगु कायं स्वय् मफया  
मांयात थथे धाल- यः मां ! छ छेहे च्वना च्वं जि नगरे वनाः चाःहिला  
फवना हय् नय्गु वस्तुत ज्वना वय् जितः तय्गु थल छगः व्युरे  
मां ! थथे कायेह्मां धाःगु खं न्यना मामं कायेयात चायागु मिलाचा  
छगः बियाः काहुँ धका धाल । मामं व्यूगु मिलाचा ज्वना छे प्याहाँ  
वया व चाया मिलाचा ज्वना नगरे चाःहिह्युं फवं जुया च्वन ।  
तर वं वं थाये अलक्षिनाह्म मचा वल धका मनूतय्सँ वयात वीगुला  
गनः गन लुखाया खापा तिना हइगु । सुनांहे फवने व्यूगु मखु ।  
भन ह्याये मदुह्म हाकुह्म अथे थथे धका अनेकथं गिजय् याना हइगु ।

गुलि गुलिसियाँ करुणा तथा थ्व मचा नय् मखंह्म खःधका  
जाकि छह्यु निह्यु बिया हल । थुकथं अजाःपिंहे दया दु दुपिके  
फवना जु जुं व मिलाचाये जायेक जाकि दत । व जाकि ज्वनाः वं  
“थ्व जाकि जिमि मांयात बी यंके वले मां गुलि लय्ताइ जुइ”  
धका मत्तिइ ततं छे पाखे स्वयाः ल्याहाँ वया च्वन । थःगु छे भचा  
मध्यनि वले लय् ह्मिता च्वंपिं मचातसें वं जाकि फवना हःगु खनाः  
हाकुचा वल अलक्षिनाह्म मचा वल धका गिजेयाना फुक्क मस्तसें हाहु  
याना वया फवना हःगु जाकि दुगु मिलाचाये कथिं दाया तछयाना

बिल । जाकि दक्कं वय् वात । व वाःगु जाकिनं खिचात वया  
नयाबिल । थह्मं फवना हयागु जाकि दाया वाका व्यूगुलिं नुगः  
मडिका अनहे ग्वाराः ग्वारा तुला नुगः चे चे तुयेका ख्वया च्वन ।

उखे मांहोसिया थकाये ताउतनं ल्याहाँ मवःगुलिं धन्दा  
कयाः छेँ प्याहाँ वया मचा माःजुल । वय् ग्वारा तुला ख्वया  
च्वंगु खनेवंहे मामं नुगः मडिका व्वां व्वां वया यो पुता ! छु जुल  
छन्त धका काचा काचां कायेयात थना कत्तिक घय्पुल । मचां  
मांयात घय्पुया हिकु दिकु ललं ख्वया थथे धाल- यः मां ! जिं  
नगरे चाहिह्युं फवनाः थ्व मिलाचाये जायेक जाकि दय्का छेँ वया  
च्वनाबले लय् ह्मिताच्वंपिसँ खना जित खिचात सःता हय् हय्  
व्याका जित ध्वाना कोथला जाकि दुगु मिलाचाय् कथिं दाया तछयाना  
बिल । हानं व वाःगु जाकिनं खिचातसें नयाबिल । जि जायेक  
दय् धुंकूगु मिलाचा तछयाना बिल । थथे कायेयागु खँ न्यना मांह-  
हरे दैव, हे पुता म्वाल ख्वय्मते थधिंगु कष्ट दुःख सुयातं मजुइमा  
धाधां थःनं सुकु सुकु ख्वइ । हानं थह्मंतुं मनयात कत्ताना धीर्ज  
याना कायेनं मांनं छेँ ल्याहा वन ।

उगु इलय् उखे रत्नाकरे वना च्वंह्य कर्ण शार्थवाहं पौ विया  
हःगु धका छह्य महाजनं वर्णलक्ष्मीयात पो लःल्हाना अनया समाचार  
महाजनं धयाहःगु खँनं कन- हे वर्णलक्ष्मी छं स्वामिया लाभ धयागु  
छुं महु वना वना थासे त्वापु जक जुया व्यापार धयागुहे याये  
मफु । उकेँ “थन भचाहे खर्क वळया हय मफु अथेया निम्ति छ

हथाये चाये मते' धका धयाहल धका कनाः उह्य महाजन थःगु  
छे' ल्याहाँ वन । थुजोकथं थः भाःतयागु खँ न्यना वर्णलक्ष्मीया  
तच्चतं नुगः मल्लिका दो-पदो बिलाप जकथाना च्वंच्वन ।

लिपा कर्णशार्थवाहं गथेनं याना रत्नाकर व्यापार पुरा याना  
ल्याहाँ वलनं द्वङ्गाये च्वना ल्याहाँ वःबले सागरे द्वङ्गा फाता पुला  
ज्वना वःगु सम्पति फुक्कं चुयेकः यंकल कर्णशार्थवाह छह्य जक  
वचे जूगु जुल । हानं कर्णशार्थवाहया न्हाथेयानानं धन भचाला  
कमाये याना यंकेहे माः धैगु मत्तिइ तया अनं याकःचाहे रत्नाकर  
व्यापार वन ।

थुखे मां कायेया ह्मिथं नय् त्वने नापं मखना तच्चःगु दुःख  
सिया उखे' थुखे' फवना महाकष्टनं जीवन हना च्वन । थुकथं इमिसं  
दुःख सिया च्वंगु जःला खःला इष्टमित्रपिसँहेनं स्वयां स्वय् मफया  
माँहोसित छह्येस्यां थथे धाल- हे वर्णलक्ष्मी ! छन्त आह्य अलक्षिना  
काये दत्तले सुख सीमखु दुःख जक सिया च्वने माली उकिं छिमि  
मचायात नेपाल मण्डले पुण्य क्षेत्रे तीर्थ सेवा याके वळ, छे' तयूमते  
धका दो-पदो धासेलि माँह्य' बिचाः याना स्वत "थ्व खँ धार्थे खइ  
छायेधाःसां थ्व मचा प्वाथे दसांनिसे' ऐश्वर्य फुनावन हानं मचा  
बुइव खुन्हु दुखुन्हु छे'हे मिनल अथे जूगुलिं थः कायेहे जूसां छे'मं  
पितवळया तीर्थ सेवा याके वळय्" धका मत्तिइ तया थः कायेयात  
सःता थथे धाल- यः पुता जिकाये आः छुयाये छ अलक्षिण जूगुलिं  
छ जक बुइवं छे' मिनल सम्पति फुक्क फुना वन, यःपुता जि काये

छंगु अलक्षण शान्त याये माःगुलिं छ तीर्थ सेवा हुँ पुता नेपाल  
मण्डले द्वादश तीर्थ धयागु दया च्वन उगु तीर्थे वना सेवा यानागु  
पुराय द्वारा थह्यं गुगु कल्पनायात उगु पूर्ण जुइ । उकेंयाना छंगु  
अलक्षण शान्त जुया सुलक्षण जुइ उकिं यः पुता छ तीर्थ सेवा  
याना वा हुँ धका धासेलि कायेह्यं “मामं धाःगु खँ धार्थे ख,”  
धका भाःपा मामयाके बिरा कया तीर्थ सेवा वनेत अनुमति फवन ।

थवले मामं कायेयात तीर्थ सेवा व्छय्त कुसा, तुतां मिलाचा  
छगः बिया तीर्थ सेवा वनावा धका अनुमति ब्यूगु जुल । मामं  
अनुमति बिइवं मांयागु पालि भपुया तीर्थ सेवा वने धका छेनं  
पिहाँ वन । कथःथे चाःहिह्युं नेपाल मण्डले थ्यंका तीर्थ पतिं चाः  
हिह्युं शंकर तीर्थे थ्यंका अन तीर्थे वःपिंके न्यन- हे दाजुपिं थ्व  
तीर्थया नां छु खः ? तीर्थे वःपिसँ धाल- हे बाबु थ्व तीर्थया नां  
शंकर तीर्थ खः । थ्व तीर्थे महारोगिह्य गोपालया व त्वय् लानाः  
उद्धार जुल धका कन ।

थ्व खँ न्यना व तीर्थया सिथं सिथं ववहाँ ववं थौं कन्हे  
राजतीर्थ धैगु स्थाने थ्यंकः वन अले वहे तीर्थे स्नान याना अनहे  
भिखाचा छेँ दय्का तीर्थया सिथे सँतुं बासयाना च्वँवन । व  
अलक्षणाह्य मचां हिया हियं मोल्हुया फिया चैत्य दय्का त्रिस्तया  
शरण वना चैत्य पूजा याना अष्टमि आदि प्रवकाले उपोषधय् च्वना  
थुकथं तीर्थ सेवा याना च्वंशु जुल । नय्त न्यायले अन मोल्हु



वइपिंके फवना फवनाः नया चवन । थुकथं तीर्थ सेवा यायां दच्चि  
दसेंलि मचाया अलक्षण भचा शान्त जुया वन । न्यादँ खुदँ दसेंलि  
व मचाया अष्टादश कुलक्षण शान्त जुया दिव्य सुन्दर शरीर जुया  
वःगु जुल । थथे जुइ धुंकूसानं उह्य मचां वहे राजतीर्थे चवना तीर्थ  
सेवा याना च्वंगु जुल ।

थुथाये रत्नाकरे वना च्वंह्य बौह्य कर्णशार्थवाहया व्यापार याना  
यानागु सफल जुया असंख्य धन लाभ जुया वल । थनंलि कर्ण  
महाजनं ह्यापा फूगु धन सायेकानं हानं मेमेगु आपालं सम्पति  
कमये याना महाजनं “आःला जि छें ल्याहाँ वंसाँ जिल” धैगु मत्तिइ  
तया सम्पति फुक्क उँट, गधा तय्सँ क्ववियेका रत्नाकरं ल्याहाँ वल ।

बन्धुमति नगरे थ्यन थःगु छें पाखे स्वयाः वन तर थःगु  
त्वाले थ्यंकाः थःगु छें मदया ख्यो जुया हायेकं च्वाकं घायें जक  
बुया च्वंगु खना मन हतास चाया पलखला मूर्छा कल हानं फक्क  
धीर्ज याना थःथितिपिंके न्यना स्वत-- हे दाजु किजापिं छिमि आनन्द  
कुशल जू मखुला, थ्व जिगु छें गथे जूगु जि जहानपिं गन चवना  
चवन थ्व जिगु छें गथे हायेकं च्वाकं ब्व जुल धका न्यँसेंति त्वाः  
बापिसँ धाल- हे कर्ण साहुजु छि थन महु छिह्य काये बुयाः खुन्हु  
दुबले आकाभाकाये चाहय् छें मिंनल । छिह्य जहान व मचा  
निह्यं बचे जुया छें प्याहाँ वल । छें च्वंक्क सारा सम्पति फुक्क  
मिंनया वन । थुकथं ह्यापा जूगु खँ फुक्कं महाजनयात कन ।



महाजनं धुगु खँ न्यना तच्चतं नुगः मल्लिका धाल- अथेसा  
जिह्वा कला, काये गन च्वंचन छकः सःता बिया दिसँले ।  
थथे महाजनया खँ न्यना वर्णलक्ष्मी च्वंच्वंथाये वना इमिसँ धाल-  
हे वर्णलक्ष्मी साउनी ! कर्णशार्थवाह भाल आः छितः सतके हःगु धका  
धयाः वन । थथे धाःगु खँ न्यना वर्णलक्ष्मीया थःगु वस भ्वाथःगुलिं  
थः भातया न्ह्यःने हे वने मल्लाला च्वन । जि गथे वने धका अति  
मल्लाला कर्णशार्थवाह च्वना च्वंगु थासे क्व क्व छुना थ्यंकः वनाः  
थ, भातया खा खनेवहे छुं धाये मफया मिखाँ खोबि हायेका हा  
वाःगु सिमार्थे भारांक थः भातया पालिस भवसुवन ।

कर्णशार्थवाहं थः कलाःयात जुया च्वंगु दुःख खना फक्क  
धीर्ज याना थव कलाया लहाः ज्वना थना थथे धाल- हे प्रिये !  
छनं छेँस गथे जुयेका गुजोगु विपत्ति कयेका च्वंच्वना । गुजोगु  
आश्चर्य, छेँ दक्कं ख्यो जुया हायेकं फफं ब्व गथे जुल ? धुगु खँ  
छकः जितः कँ धका न्यँसेलि वर्णलक्ष्मी ख्वख्वँ भातया खाः स्वया  
लहानिपां हाजोपा छेँ जूगु खँ फुक्कं छसीकथं कनाहल ।

हे स्वामि ! जि गर्भ दुह्य तोता छि रत्नाकर भासेलि जि पुत्र  
जन्म जुल । जन्म जुयाः खुन्हु दुखुन्हु अकस्मातं छेँ मिनल केवल मचा  
व जि जक छुं युक्ति पिहाँवयाः वचे जुया । छुँ छुँ हे मदयूक  
सकतां नौ जुया वन । थुकथं फुक्क खँ कन । थुलि खँ न्यने  
धुंका साहुनं धाल- म्वाःल न्ह्यागु जूसाँ जुइ धुंकल हे प्रिये ! आः  
व काये मचा ग्व गन वन सःता हजि ! थथे धाःगु खँ न्यना

वर्णलक्ष्मीं धाल-- हे नाथ कायेया खँ जिं छु कने ? हे नाथ ! थ्व खँ गथे धाःसा सकल ज्ञातिवर्गपिसँ जितः आह्म मचा अलक्षणाह्म, आह्म मचा प्वाथे दसेंनिसें छिमि फुक्क सम्पति हासनास जुया वन । अथेनं आह्म मचा दत्तले छन्त सुख जुइ मखु । देशे नापं दुःख बीत बेर मदु अथेया निम्ति आह्म मचा पित व्छया तीर्थ सेवा याके व्छ धका दो-पदो धासेलि जिं कायेयात माःगु सकतां स्यना तीर्थ सेवा याके व्छयातया खुदँ दय् धुंकल । उकिं छें मचा मदु धका कन ।

थथे कलाःनं धाःगु खँ न्यना महाजनं धाल-- हे मिसा थ्व छता छं मखुथे यात । छाये धाःसां जि सन्तान मदु धका तच्चतं धन्दा कया च्वना आः छं दुह्य कायेनं पित व्छया च्वन । धिक्कार छंगु बुद्धि छं अलक्षणाह्म जूसां पितव्छय् माःगु मखु छें तथा लहिना तय् माःगु । हे प्रिय ! आः काये मचा माःवने, मचा मलुयेकं जि ल्याहाँ वय् मखु तर छता खँ, भी काये गथे च्वं ? जिं ह्यसीके फइला ? थथे कर्णशार्थवाहं धाःगु खँ न्यना वर्णलक्ष्मीं कन-- हे नाथ भी काये तच्चतंहे हाकुसे ह्यंग्वाथें च्वंह्य ह्युतुसि तवाला जुया मिखाफुसि स्वाःह्य सँ छें छें च्वं, बागःचा ल्हाः ताताःहाक प्वा तग्व स्वेहे गरखेसे च्वंह्य भिंच्यागु अलक्षणं युक्तह्य थथिंह्य काये मचा ।

थुकथं कायेया वर्णन न्यना थह्यं ज्वना वयागु सम्पति दक्वं कलायात लःल्हाना कायेयात माःवने धका कर्णशार्थवाह थःगु दे बन्धुमति नगरं प्याहाँ वन । तीर्थ तीर्थ पत्तिं मामां ववँ नेपाल मण्डले थ्यन । अननं तीर्थ पत्तिं मालाः न्यना जुजुं राजतीर्थे

द्व्यँसेलि उगु तीर्थे खुसि सिथेलाक च्वंगु बलचाये छह्य अत्यन्तहे  
बाँलाःह्य कुमार ध्यान याना च्वंगु खन । अले वयाथाये न्ह्यःने वना  
थथे न्यन- हे महापुरुष थुगु तीर्थे सेवा याःवःपिं मध्ये हाकुह्य  
मिखा ह्याउँसे चाक चाकलाःह्य, हाये फ्याफःह्य तेफु क्वलाछि हाकःह्य  
सँ छेँ छेँ च्वंह्य थजाःह्य अलक्षणाह्य मचा छह्य खँला ?

थुथाये व बाँलाःह्य कुमार न्यन- हे महाजन छि सु खः ?  
गनं भायाह्य धया दिसँ रे । महाजनं धाल- जिगु देला बन्धुमति  
नगर खः जिगु नां कर्णशार्थवाह खः धका थुलि कनेवंहे काचा काचां  
बलेचां क्वहाँ वयाः- यो बा ! छि जिगु पिता खः । छिगु काये  
जिहे खः धका कर्णशार्थवाहया पाली भपुल । कर्णशार्थवाहं धनाः  
धाल- हे सुन्दर पुरुष जिमि कायेला हाकुह्य, हाये फ्याफःह्य सारा  
अंग बांमलाह्य अलक्षणाह्य खः छं जितः गथे अबु धया, जिं छन्त  
गथे काये धाये ?

थथे अबुया खँ न्यनाः काये मचां धाल- हे पिता जि हापा  
छि धयाद्यूथे अलक्षणाह्य, अङ्ग प्रत्यङ्ग बांमलाह्य खः । जित मांनं  
तीर्थ सेवा हुँ धका व्ह्या हल । अनं जि थुगु तीर्थे सेवा याना  
च्वंच्वना । थुगु राजतीर्थ सेवाया पुण्य प्रभावं खुदँ दसेलि हापा  
जुया च्वंगु अलक्षणा फुक्कं शान्त जुया सुन्दर देह जूगु खः । अथेनं  
छि पत्या मजुल धाःसा जिं भीगु छेँ हापा दुःख सियागु खँ फुक्कं  
कने बा नं न्यना दिसँ ।

यो बा ! हापा छि तच्चतं भनवानह्य आपालहे सम्पति दया  
चन । अनंलि मांया गर्भे जि दसेंनिसें हि हिंद्रिया धन हनावना  
मदया वना च्वंगुलि मांयात तोता छि महासागरया व्यपार भाये  
धका भाल । छि रत्नाकरे भाया प्यला दसेंलि जि बुल । अनं  
खुन्हु दुखुन्हुहे भीगु छेँ आकाभाकाये मिनल । जि छह्य जक मांन  
बुया पित हया रत्नायाना तल मेगु सम्पति धाक्व मिनया वन ।

अनंलि मांनं तच्चतं दुःख सिया ज्ञातिवर्ग पिंथाये नोकर चवना  
थःगु लहाःचुला जितः नकाः त्वंका लहिना तल । उक्थं जि च्यादं  
दसेंलि जःला खःलातसें मांयात धाल- “आम अलक्षणाह्य मचा दत्तले  
छन्त सुख सीमयु आम्थे दुःख जक जुइ । अकें छिमि कायेयात  
छेँ पितव्छया तीर्थ सेवा याके व्छ” धका धाल । थ्व धाःगु खँ  
मामँ न्यनाः जितः खँ स्यनाः तीर्थ सेवा याके व्छयाहःगु खः ।  
अनंलि जि तीर्थ पत्ति न्यना ववँ थुगु राजतीर्थे थ्यँसेलि थ्वहे तीर्थे  
चवना त्रिरत्नया शरण वना उपोषध व्रते चवना । तीर्थ सेवा याना  
चवनागु पुण्यं याना अलक्षण नास जुया जि सुन्दर रुप जूगु खः ।  
यः बा ! जिं छितः देकागु मखु धका सम्पूर्ण खँ बिन्ति यागु जुल ।  
थुगु खँ न्यना कर्णशार्थवाह छखें अजू चाल छखें मनं मनं तच्चतं  
लय्ताया धाल- थः काये मचा धन्य धन्य छंगु तीर्थ सेवा यागु  
पुण्य । आः भीपिं थःगु छेँ वनेनु धका कायेयात व्वनाः निह्य थःगु  
दे पाखे स्वया ल्याहाँ वंगु जुल ।

थुगु इलय् वहे बन्धुमति नगरे निसन्तानह्य जुजु सिनाः देसे  
जुजु यायेपिं मदया मन्त्री, कर्मचारी पुरोहित सकलसियां सःलः याना

किसिं जुजु मायेकेगु । किसिं नाह्य जुजुयान भीसँ सत्कार यायेगु  
धका सकलसियाँ सःलः याना ऐलावती तुयुह्य किसियात शुवर्णया  
पूर्णकलश छयने तय्हा जुजु मायेकेत राजकुलं तोता हल । थबले  
अन जुजु जुइगु इच्छां लोकपिं आपालं बांवाँलाःगु बसतं पुना तिसां  
तिया किसिया क्वं क्वं न्ह्यःने इधु थिधु जुया च्वन तर किसिं  
सुइतंहे जुजु मना ।

थजावले कर्णशार्थवाह व कायेह्य छें ल्याहाँ वया च्वंपित  
किसिं खँका स्वाथ्या स्वाथ्या वनाः सुन्दर पुरुषयात पूर्णकलश लखँ  
लुका जुजु नाःगु जुल । थुवले सकलसियाँ वयातहे जुजु धका सत्कार  
याःगु जुल । अनंलि उह्य सुन्दर पुरुषयात राजदरवारे यंका बिधि  
अनुसारं राज्याभिषेक विया राज्य सिंहासने फयतुकाः चामलं गायेका  
छत्रं कुयेका राजमकुटं पुयेका सुन्दर महाराजा धका जयासिर्वाद  
बिया सिंदुर जात्रा आदि याना उत्सव न्यायेकूगु जुल ।

उखे वर्णलक्ष्मीयातनं काये मचां तीर्थ सेवा यानाः बांलाःगु  
शरीर जुया राज्य ऐश्वर्य प्राप्त जूगु खँ थ्यंका विल । थ्व खँ न्यना  
सापहे लय्ताया च्वंच्वन । अनंलि सुन्दर महाराजां माँ अबुयात  
सःतके व्रज्या राजकुले तया मां बायागु सेवा याना च्वन ।

थथे राजतीर्थे भिंच्याता अलक्षणह्य बालक उद्धार जुयाः जुजु  
जुया उद्धार जूगु खँ क्वचाल ।

7/10/10

2/10/10

1/10/10

10/10/10

1/10/10

1/10/10

1/10/10



॥ नमो बुद्धाय ॥ नमो धर्माय ॥ नमो सत्ताय ॥

## स्वयम्भू पुराण मनोरथ तीर्थया महात्म्य

हापा-हापा अगु इलय् अथाये गुईं अह्म व्याधा दया च्वन ।  
व व्याधाया न्हाबले गुईं चाःहिलाः पशु तयत् स्यानाः वयागु ला  
नया थःगु जीवन इना च्वंगु जुल ।

न्हाबले थें अन्हुया दिने व व्याधा गुईं सिकार हितः वम ।  
उखुन्हु वं अह्महे पशु तयत् स्याये मफु । गुईं द्वाहाँ वं लीपा  
अगु थासे चल्ला अह्म च्वंगु खन । खनेवंहे उह्म व्याधां धनुषे  
तीर ताछायाः यांकया चल्लायात कय्के त्यन । वं कय्के त्यंगु चल्लां  
खंकाः ग्यानाः चल्ला गुँ गुँ विस्युं वन । विस्युं वंह्म चल्लायात  
व्याधां लिच्छू लिना तीरं कय्का जुल । तर कय्कु पत्ति चल्लायात  
तीरं मकः । चल्ला विस्युंहे वना च्वन, व्याधां लिच्छू लिच्छुं तीरं  
कय्कांहे च्वन । तीर आपालंहे फुत तर अथुहे लाके फुगु मखु ।

अलीपा व्याधां धनुषे तीर ताछाया यांकया ताके यानाः तोला  
व्छत । व तीर सररं वना चल्लाया व्यक्कय् कल । अथेनं थः  
अपु वने यायेसु अर्णि थःअ कःगु तीर व्यक्कय्सु अर्णा वरणा

बेतोदँ विस्यु ववं मनोरथ तीर्थे थ्यंका भाराक गोतुल । व्याधानं  
 व्वायँ ववं अन थ्यंकाः चल्लायात स्वया चवन । चल्लायात तच्चःगु  
 वेदना जुल । तीरं कःगु वेदना सःयाये मफया । ह्युतुनं हि व्वाला  
 व्वालां प्याहाँ वल । अले चल्लायात मर्नान्त अबस्था वल । चल्लां  
 मनोरथ तीर्थया लः छक त्वना थथे मतिइ तल “हे तीर्थराज जितः  
 थो तीरं कय्कूह्य, जितः थुकथं दुःख व्यूह्येसित जिं लिपायागु जन्मे  
 थथेहे बदला काये दय्मा” थथे धाधाहे चल्ला फ्यारा फ्यारां सनाः  
 तील्ल प्यन अनहेसंतुं सित ।

अनंलि उह्य चल्ला मृत्यु जुसेलि अनहे संखोदक धयागु  
 पर्वते मां धुँया गर्भे प्रवेश जूवन । हानं प्येन्हु खुन्हु लिपा उह्य  
 व्याधानं अकस्मातं मृत्यु जुया वहे संखोदक पर्वते गुँफाया गर्भे  
 प्रवेश जूवन । अनंलि लां पूर्ण जुसेलि इमि मचा बुल । अनंलि थी  
 थि निह्यसियाँ शरीर प्रष्ट जुया वल । थुखे धुँनं तःधिकः जुल उखे  
 फानं तःधिक जुसेलि अपिं धुँ व गुँफा थी थि निह्य उगु गुईं  
 ह्यिता जुजुं छन्हुया दिने धुँ व गुँफा निह्यं नाप लात । थी थि  
 निह्यसियां ख्वाः चूलायेवंहे पूर्व जन्मया कर्म सत्रुताया भावना वयाः  
 निह्यसियां अहँकार वया तच्चतं ल्वापु जुल । वं वयात भग्तेयात  
 मेह्यं थुह्येसित भग्तेयानाः न्यात निह्येसियाँ हि बाः खन । उकथं  
 अपिं ल्वाल्वां ववं मनोरथ तीर्थे थ्यन । अननं इपिं ल्वाल्वां  
 लीपा धुँयात थःगु त्वाथँ दाया तीर्थे ग्वतुयेका बिल । हानं धुँ  
 गुँफायात न्यानाः सालाः तीर्थे ग्वतुयेका बिल । थुकथं धुँ व फा  
 निह्यं वं वयात बस्वात वं वयात याना; व तीर्थे लखे लछार पछार

जुइक ल्वा ल्वाँ निह्वाँ सनां सने मफया मनान्तया वेधा जुयेका तीर्थे ग्वतुला मनोरथ तीर्थया लः त्वँ त्वहे धुकथं धुनँ फानँ प्रणिधान यात- हे तीर्थराज जिपिं पशु योनी जन्मकया थुजोकथं ल्वापु जुया थजागु दुःख सीमाल । आः जिपिं देवपुत्र धायेका जन्म जुये दय्मा । थथे प्रणिधान याना धुनँ गुँफानं वहे मनोरथ तीर्थेसँतुं मृत्यु जुयावन ।

मनोरथ तीर्थया लः त्वना प्रणिधान याःगु पुण्यं याना पाप नाश जुया धुँ व गुँफा निह्वाँ स्वर्ग भुवने त्रायत्रिस भवने देव योनी देवपुत्र धायेका जन्म जूवगु जुल । थनंलि स्वर्गया अधिपति देवराज इन्द्रं तीर्थिक देवपुत्र निह्वाँ सःता थथे न्यन- हे तीर्थिक देवपुत्रपिं छिमिसं छु धर्म याना वयागु पुण्यं याना थन स्वर्गते जन्म कावया ? धका न्यँसेलि देवपुत्रपिसँ देवराजयात विन्ति यात- हे देवराज इन्द्र ! जिमिसँ दानधर्म, तप व्रतादि छुं याना वयापिं मखु । जिपिं निह्वाँ पूर्व जन्मे धुँ व गुँफा धायेकाः जन्म जुयाः थःथवे बिरोध याना । जिपिं निह्वाँ तच्चतं ल्वाना, निह्वेस्यौ हि वाः खन, घाः जुल, अथेनं ल्वाल्वाँ ल्वाल्वाँहे जिपिं मनोरथ तीर्थे थ्यंकाः सी त्येका तीर्थया लः त्वनाः प्रणिधान याना मनोरथ तीर्थे हे सिनावना । उगु मनोरथ तीर्थया लः त्वनाः प्रणिधान याना वयागु पुण्यया प्रभावं जिपिं निह्वाँ थन स्वर्गलोके जन्म जूवय् दुगु खः धका कँगु जुल ।

देवपुत्रपिनिगु खँ न्यनाः इन्द्रं थथे मत्तिइ तल “धन्य धन्य नेपाःया मनोरथ तीर्थ । गुगु तीर्थया लः जक स्वनाया प्रभावला

स्वर्गलोके जन्म जुयाः थनया सुख भोग प्राप्त जुल धासैलि भन  
बिधि पुर्वकं स्नान दान व्रत आदियात धाःसा छु जक मनोरथ पूर्ण  
मजुइ ! अथेया कारणे जिनं मर्त्य मण्डले क्वहाँ वना उगु तीर्थे  
स्नान दान पूजाभाव याःवने” धका मत्तिइ तयाः पालिजा स्वां  
मेमेगु नस्वागु मांदार आदि स्वांत ज्वना देवराज इन्द्र त्रायत्रिस  
भवनं क्वहाँ वःगु जुल ।

उगु इलय् फुसिं ख्यः धयागु छगु गामे मनमय्जु धयाह्य  
छह्य दया च्वन । गुह्येसिया माँ अबुनं मदय् धुकल, दाजुकिजा  
सुं मदुह्य, तता केहेँ पिं दुगुनं बिया वळय् धुकल । तर व छह्य  
जक तच्चतंहे बांमलाःह्य छयाकःह्य, हाये मदुह्य, हाकुसे च्वंह्य सक-  
सियां हेला याना तःह्य जुया पय्नंनं मचूह्य जुया च्वन । उह्य  
मनमय्जुयात सकसियाँ पय्नं मचूह्य धका अने-तने धयाः गिजय्  
यानाः हेला याइगु जुया च्वन । अले थथे धाइपित मनमय्जुं  
थथे धाइगु जुया च्वन- “छिमि मनू भात जि इन्द्र भात जुइतिनि  
स्थूला ! आपाः जितः द्वेपय् याना च्वने मते ।” धार्थेहे इन्द्रया  
कला जुयेगु मनेतया ही हिं मनोरथ तीर्थे वनाः मनमय्जुं तीर्थ  
सेवा याना च्वन ।

छन्दु ही हिंथें तीर्थे च्वना मोल्हुया तीर्थया सिथे च्वना  
फिया चैत्य दय्काः पूजा याना च्वंबले मनमय्जुं तापाकंनिसें खुसिया  
सिथं सिथं वया च्वंह्य इन्द्रयात खन । खनेवंहे मनमय्जुं इन्द्रयात  
वसिकर्ण आकर्षन याना मोहनि याःगु जुल । इन्द्रयात मोहनि ग्यल ।  
लिपा इन्द्रं खन तीर्थ सिथे चैत्यपूजा याना च्वंह्य मिसा । खनेवंहे



“व मिसौ जितः होस मदुनि” धका थःगु रुप तोता मानव रुप धारणा याना व मिसा खना तच्चतं मोह जुया मनोरथ तीर्थे स्नान यानाः इन्द्रं तीर्थयाके थथे फवन- हे तीर्थराज हुं मिसा छह्य जिगु वरण सेविका याये दय्मा । थथे तीर्थयाके फवनाः तीजक मन-मय्जुयाथाये वनाः भेषधारीह्य इन्द्रं थथे न्यन- हे मय्जु छंगु छें गन ? छंगु छें जितः थौं चच्छि बासँ बियादिफइला ?

थथे भेषधारीया खँ न्यना मुसु मुसु हिला तच्चतं नाइगु सलं-- हे महापुरुष बिज्याहुँ धका अति हर्ष इन्द्रयात थःगु छें व्वना यंकल । मनमय्जु बहि मजृतले नका, त्वंका माने याना तल । भेषधारि इन्द्रयात मोहनी लगे जुया व मिसा खना मोहित जुया चच्छि यंकं मनमय्जुलिसे रसरंग याना च्वंगु जुल । कन्हे खुन्दु सुथे जुसेलि बांलाःह्य मिसा स्वःचलेला गलः दुह्य, छय्काःह्य, हाकुह्य स्वेहे मयइपुसे च्वंह्य खनेवं इन्द्र भसंग वना “अहो आश्चार्य ! जि इन्द्र थें जाःह्य जुया गथिंगु थासे वया च्वन” धका मत्तिइ तया मनमय्जुयात थथे धाल-- हे मिसा जि जुलं इन्द्र धका थःगु स्वरुपे वया जि स्वर्गया जुजु छ्क । आः जि छंथाये चछि च्वने धुन आ स्वर्गे वने तेना । थथे इन्द्रया खँ न्यना वँ बिन्तियात- हे नाथ ! जितःनं छलपोल लिसें सर्गते व्वना यंका बिल्याहुँ ।

मनमय्जुया खँ न्यना इन्द्रं आज्ञा जुल-- हे मनमय्जु ! आः बुयाये जितः छ यःसां सर्गते व्वना यंके मज्यूनि उकिं छन्त वरदान विषाथके । छं धुगु तीर्थे स्नान याना त्रिरत्न शरण वना श्री

करुणामयया उपोषध व्रत दाना च्वनाच्वै । छंगु व पुण्यं यांना स्वर्ग  
लोके थहाँ वय् दै । थनिंनिसैं छ इन्द्रायणी जुल धका वर प्रशाद  
विया देवराज इन्द्र स्वर्गेतुं थहाँ बिज्याःगु जुल ।

थुगु तीर्थे गुह्य बुद्धिमानं स्नान दान जप ध्यान व्रत च्वनी  
वया मत्तिइ तःगु खँ पूणं जुया सर्व सिद्धि प्राप्त जुया अन्ते सुखावती  
भुवने वास लाना मोक्ष प्राप्त जुइ ।

( इति श्री स्वयम्भू महापुराणे मनोरथ तीर्थ महात्म्य समाप्त )





॥ नमो बुद्धाय ॥ नमो धर्माय ॥ नमो मयाय ॥

स्वयम्भू पुराण

निर्मल तीर्थया महात्म्य



परापूर्व काले पाञ्चाल नगर धयागु थौं कन्हे पनौती वज्रपाद  
नां जुया च्वंहा महापण्डित वज्राचार्य छ्हा दया च्वन । उह्हा  
वज्राचार्य सकल शास्त्रं पूर्ण जुयाः सकल विद्यां पारंगत जुया सकल  
लोकपित धाःधाह्मेसित धाःधाःगु शास्त्र स्यनीह्हा जुया च्वन । वयागु  
छेँ विद्याश्रमथेहे जुया च्वन । उह्हा वज्रपादया सुहे जहानपिनं मदु  
याकःचा । तर वं न्ह्याक्वहे धाःह्मेसित धाःगु व्याकरण, छन्द शास्त्र  
ज्योतिष शास्त्र, वेद-वेदांत आदि मन्त्रोच्चारण आदि स्यना कना  
विया च्वंसाँ जस कीर्ति मव्यूगु जुया च्वन । भन अपजस जक  
विया नाना तरहनं आलोचना यानाः खं ल्हाइगु जुया च्वन ।

थथे सारा शिष्यपिसँ जस मव्युसे अपमान याःगुलिं वज्रपाद  
वज्राचार्यया वीतराग जुया छु च्वंच्वने थजाथाये धका सारा छेँ बुँ  
धन सम्पति व्याक्कं त्वःता सुनाःनं मसीक छेँ प्याहाँ वना पनौति  
देहे त्वःता थाये थासँ चाःचा हिला ववं उदयागिरिया क्वसँ निर्मल  
तीर्थस वया “आः जि ध्व तीर्थे सेवा याना श्री स्वयम्भूया शरण

वना ध्वहे तीर्थे बास याये' भका मत्तिइ तथा उगु तीर्थे स्नान  
 याना श्री स्वयम्भूस वना ज्योतिरूप दर्शन पूजा याना अनंवया तीर्थे  
 फियागु चैत्य दय्का चैत्य पूजा याना जप स्तोत्र पाठ आदि याना  
 ध्यान योगे चवना हिं छसा जक नया रात्रीकाले कर्णवीर श्मशाने  
 योग याना ओँगल सि हःले प्रज्ञापारमिता थूगु षडक्षरी मन्त्र चवया  
 निर्मल तीर्थे चुयेका चा हि थुकथं वज्रपादं तीर्थ सेवा याना  
 च्वंगु जुल ।

थुकथं वज्रपाद वज्राचार्य तीर्थ सेवा यायां छुदँ दसेलि छन्दुया  
 चाहये श्मशान योग याना च्वंगु इलय् उगु योगे श्री विद्याधरी आकाश  
 जोगिनी प्रशन्न जुया कोटि सूर्यया तेज पिकया जवं वज्र खवं  
 करोटक धारणा यानाः वज्रपादयात दर्शण व्यूगु जुल । थबले वं  
 श्री विद्याधरी देवी दर्शण प्राप्त याःगु जुल । श्री विद्याधरी देवीं  
 वज्रपादयात थथे भका आज्ञा जुया विज्यात-- हे वज्राचार्य छंगु पुर-  
 श्ररण भाव खना जि खुशि जुइ धुन आः छन्त उद्धार याये भका  
 जि वयागु खः । आः जिके छु वर फवनेगु इच्छा दु व वर फवं ।  
 थबले श्री विद्याधरी देवीया आज्ञा न्यना वज्रपादं सर्गते थस्वया ह्लाः  
 निपाँ बिन्तियात-- हे जगत जननी विद्याधरी देवी छलपोलया कृपां  
 सकल शास्त्रं पारंगत जुया सकलशिष्यपित इमिसँ धाःधागु शास्त्र  
 स्यना बिया चवना । हे माता ! अथेनं सुनानं जितः जस मव्यु  
 भन जितः अपजस जक बिया चवन । हे जननी ! आः जितः  
 छलपोल प्रशन्न जुया सकल शिष्यपिसँ जितः जस कीर्ति व्यू वय्के  
 माल । हे विद्याधरी देवी ! थुगु वर प्रशन्न जुया विज्याये माल

धका वजूपादं विद्याधरी देवीयाके बर फ्वंगु जुल । थथे वजूपादया  
बिन्ति न्यना श्री विद्याधरी देवीं आज्ञा जुया बिज्यात- हे वत्स !  
जिं छन्त जस कीर्ति सकल सिद्धि आदिं बियेधुन धन्दा कायेमते  
आः सकल शिष्यपिसँ छन्त गुरू धका अनेगु धन द्रव्यादि सिरपाउ  
ज्वना थन थ्यंक वया मानय् याःवइ तिनि । हापा हापा काये  
मखंगु सिरपाःनं छन्त व्यूवइ तिनि छँ धन्दा कायेमते धका श्री  
विद्याधरी देवीं आज्ञा दय्का बिज्याःगु जुल ।

थथे देवीं आज्ञा जुया बिज्याःगु न्यना वजूपाद तच्चतं लय्-  
ताया हाकनं सर्गते थस्वया बिन्ति यात- हे जननी ! छलपोलयात  
जिं हानं गवले दर्शन याये दे, जिं लिपा छलपोलयात दर्शन याये फइ  
मखु । अथे जूगुलिं ललपोलं जितः वरुणा तथा सदांया लागिं थुगु  
थासेतुं बिज्याये माल धका बिन्तियाःगु जुल । थथे बिन्तियाःगु  
न्यना विद्याधरी देवीं आज्ञा जुया बिज्यात- हे वजूचार्य ! जि सदां  
धन च्वने मज्यु जिगु तेज बिह तोता थके छं जितुं भाःपा सेवा  
याना च्वँ धकाः आज्ञा दय्काः श्री विद्याधरी देवीं रश्मि पिकया  
अन्तरधान जुया बिज्याःगु जुल ।

उखे पनौति देशय् च्वंपिं वजूपादया शिष्यपिसँ गुरू लुमंकाः  
सकलसियाँ सःलः जुल- भी गुरू मखनागु ताःकाःलं दय्धुंकल भीसँ  
गुरूयात मानय् यानाः पूजा छुं मयानानि गुरू गथे गथे जुल,  
तंचालला थन दुला मदुला ! गुरू मन्त धाय्व भी मस्तेत सुनां  
स्यनाबि अर्थिजाःह्य गुरू मेपिं गन दइ ? थुगु देशये ज्ञानि पण्डित  
मदुसेलि नाना उपद्रव जुइ गुरू बिनां संसारे मेगु छुं महु । उकिं

आ भीसँ सिरपा ज्वना वनाः गुरुयात मालाः वसपोलयात सिरपाः  
 बिया माने याना थुङ्काः भीसँ ज्वना हय् धका सःलः याना गुलि-  
 सिनं गोकुल गुलिसिनं चुल्या, अंगु, बेनालि बेताचिं समेतं अनेगु  
 पात-पट्टाम्बर जरि-जवाफया बस्त्र ज्वना हानं लुँ वह आदि अष्ट  
 धातु नवरत्न आदि अनेगु भारा वर्तन सकतां ज्वना सकल शिष्यपिसँ  
 गुरु माःवने धका मामां थाये-थासे न्यना माला ववँ नेपाले निर्मल  
 तीर्थया सत्तिक च्वंगु कर्णवीर श्मशाने पुरश्चरण तप याना च्वंह  
 वज्रपाद गुरु खन ।

गुरुयात खनेवंहे सकसियां लय्तातां गुरुयात स्वचा चाउला  
 चरण कमले भोपुया थह्यं ज्वना वयागु बस्तुत तोता ल्हाःनिपां  
 हाजोपा बिन्ति यात- हे शास्ता, हे गुरु ! छलपोलं जिमिगु अपराध  
 चेमा याना बिज्याये माल । हे नाथ ! जिपिं अज्ञानि जुयाः  
 छलपोलयात दुःख बिया छपितं लुँ सेवा यायेफुगु मखुनि केवल  
 अपमानजक याना च्वना उगु दलं द्वः अपराध चेमा यानाः थुगु  
 किंचित् गुरुदक्षणा कया बिज्याहुँ धका बिन्ति याना तिसा-वसः  
 द्वहलपित । थबले वज्रपाद आचार्य श्री विद्याधरी देवी लुमंका  
 शिष्यपिनि उपरे अनुग्रह तथा शिष्यपिसँ वृगु सिरपाः कया आशि-  
 र्वाद बिया, थह्यं कयागु सिरपाः फुक्कं श्री भट्टारक दय्केगुली  
 फयागु जुल ।

गुरुया आशिर्वाद कया शिष्यपिं सकलें लय्ताया हाकनं  
 बिन्ति यात- हे गुरु ! आः छलपोल भीगु देशे ल्याहाँ बिज्याना  
 हापायार्थे जिपिं सकलसितं शास्त्र स्यना आनन्दनं बिज्याहुँ धका

शिष्यपिसँ विन्ति यात । भुगु खँ न्यना वज्रपादं इमित स्वया आज्ञा  
दयकल- हे शिष्यपिं ! जि पनौति देशये वय्मखुत ध्वहे निर्मल  
तीर्थे यावद् जीव दत्तले तीर्थ सेवा यानाः श्री परमेश्वरीया ध्यान  
योग यानाः जि च्वंचवनेगु जुल । श्रिपिं जक सकलें थःथःगु छें  
ल्याहाँ हुँ धका गुरूँ आज्ञा जुसेलि शिष्यपिं सकस्यां गुरूया पालि  
भपुया विरा कया सकलें पनौतीतुं ल्याहाँ वंगु जुल ।

अनंलि वज्रपाद वज्राचार्य थःत विद्याथकूगु गुरू दक्षणा फुक्कं  
खर्च याना उदयागिरि पर्वते श्री विद्याधरी देवी स्थापना यायेगु मत्तिइ  
तया गुरू दक्षणा विद्या थकूगु सारा सम्पति खर्च याना श्री  
विद्याधरी देवीया मूर्ति दय्का उगु कर्णवीर श्मशानया समीपे उदयागिरी  
नाम पर्वते च्वे बिहार दय्काः श्री विद्याधरी देवीया प्रतिमा स्थापना  
यानाः दशकर्मादि प्रतिष्ठा यानाः जीव न्यास तया श्री वज्राचार्येया  
जीवन दत्तले उह्य भट्टारकथा सेवा यानाः संसार चक्रं मुक्त  
जुया वन ।

थुकथं निर्मल तीर्थे वज्रपाद वज्राचार्य श्री विद्याधरी देवी  
स्थापना यानाः उद्धार जुया वंगु खँ क्वचाल ।

( इति श्री स्वयम्भू महापुराणे निर्मल तीर्थ महात्म्य समाप्त )

2

1000

1000

1000

1000

1000

1000

1

1000

1

1

1



॥ नमो बुद्धाय ॥ नमो धर्माय ॥ नमो संज्ञाय ॥

## स्वयम्भू पुराण

### निधान तीर्थया महात्म्य



ल्लगु इलय् पाञ्चाल धयागु नगरे पञ्चचूड नाम महाराजां  
राज्य याना च्वन । उह्य जुजुया स्वह्य कायेपिं दया च्वन । तःधिकः-  
ह्येसिया नां रत्नचूड, दातिह्य दिव्यचूड व कान्छाह्य दीनचूड ।  
धुपिं स्वह्य राजकुमारपिं मध्ये चीधिकःह्य दिनचूड राजकुमार ही हिं  
जू जक ह्यिता आपालं सम्पति फुका च्वंगुलिं पञ्चचूड जुजुं “स्वह्ये-  
सितं इहिपाः याना ब्यूसा ससलं धाइ धका दीनचूडं जू ल्वायेगु  
त्वःतीला” धैगु मत्तिइ तथा स्वह्येसितं इहिपाः याना बिल । अथेनं  
दीनचूड कुमारं जू जक ह्यिताः आपालं धन नास यात ।

जुजु पञ्चचूडं गुलिखे धालनं दीनचूडयात जू ल्वायेगु बानि  
त्वतके मफु । थथे जुसेलि पञ्चचूड महाराजां स्वह्येसितं सर्वस्व  
दक्क सम्पूर्ण धन सम्पति स्वंगु भाग थलाः इनाबिल । रत्नचूड व  
दिव्यचूड निह्य राजकुमारपिसँ थः अबुं इनाब्यूगु सम्पूर्ण धन बाँलाक  
बिचाः यानाः सुखं मां अबुं धाःगु खँ न्यना मां अबुया सेवा याना  
च्वन । चीधिकःह्य दीनचूड राजकुमार ल्ह्य धाःसा हि, चाहे मभासें

जू जक त्वाना बौनं इना ब्यूगु सम्पति फुक्कं बुकल । थुकथं जू  
 त्वा त्वाँ थः कलाःया तिसा वसः वसः नापं हिहिद्विया जू त्वानाः  
 बुका च्वन । कलाःह्यं गुलि धालनं खँहे मन्यंसे जू हितु हितुं  
 सारा सम्पति फुक्कं फुत । धन सम्पति छुं छुं मदया खर्चयाये  
 मफया लिपा नय्नापं मखना तच्चतं दुःख जूगु जुल ।

थन्याःकथं दुःख जुसेलि कलाःह्यं दीनचूडयात थथे धाल- हे  
 नाथ ! आम छु ज्या याना बिज्यानागु ? बौनं इना ब्यूगु सम्पति  
 दक्कं नास याना हानं जिमि मां अबुं बिया हःगु वसः नापं बुका  
 बिये धुकल आः ही हिं छि छु नयेगु छु तिया च्वनेगु ? नय्  
 त्वने नापं मखन अथेनं मनं सीके, थुइकाकाये मफुला ? हे नाथ !  
 जू त्वायेगु त्वःताः मेगु ज्या याना बिज्याहुँ । थजाःगु गुलि कलाःत  
 बिन्ति यात अहं दीनचूडं खँहे मन्यंसे जू हिताः कलातं मसीक  
 छेँ सुत्तां बुकल ।

छेँ त्याकूह्यसियाँ दीनचूडया कलाःयात छेँ थनाः पितना वृद्धत ।  
 थौं भातह्य जूवाद्यो जूगुलिं कलाह्यं अनेक दुःख सिस्सुं थःछेँ वनाः  
 च्वंवेगु जुल । अनंलि जूनं बूह्य दीनचूड कुमारया वना वना थास  
 साहु कयंपिसँ ज्वना बेइजत याना हल । थथे सकसियाँ दीनचूड  
 यात थुकलं बिया बोबिया अपमान याना, सुनाःनं पत्यार मदया नय्  
 मखना न्ह्योने लाःथाये द्यनाः न्ह्योने लाःथाये नया दुम्बसिये माल ।  
 थथे दुःख सिस्सुं अन देसये च्वने मछाला देशं पिने वन । अनंलि  
 दीनचूड उखेँ थुखेँ चाःहिह्युं स्वयम्भूया न्ह्योने निधान तीर्थ थ्यँसेलि  
 दीनचूडया सापहे पित्याःगु सह याये मफत । आः गथे याये धका

उखें थुखें स्वया जु जुं उगु थासे धः ऋगुलिइ न्यात वया च्वंगु खेनाः  
धले वःपिं न्यात लानाः स्वाः स्वाःकहे न्यात नया च्वन ।

थवले उगु तीर्थे स्नान याना च्वंपिसँ खना धाल- हे भाजु !  
छि सु ? छाये अथे न्यात लानाः स्वाःस्वाकहे नया च्वनागु, अथे  
न्यात स्याना नय्त्यःला ! नय्मते । थथे धाःगु खँ न्यना दीनचूडं  
धाल- हे दाजुपिं ! आः छुयाये, अन्न नय्धाःसा खर्च मदु । महा  
दरिद्र कंगाल जुया च्वना । अथेनं नय् पित्याःगुलिं सहयाये मफया  
थ्व न्या लानाः नया च्वनागु खः धका करुणा स्वरं धाल । थथे  
दीनचूडया खँ न्यनाः मोल्हु वःपिसँ धाल- हे दरिद्र छ आमथे  
दुःखिह्म खःसा छन्त जिमिसँ फुगु उपकार याये छं आमथे न्यात  
लानाः नय्मते धका नय्गु अन्न, मधिचधि बिया दीनचूडयात नके  
त्वंके याःगु जुल ।

थथे नय्गु दसेलि न्यात लाना मनल । उखुन्हु निसें तीर्थे  
स्नान याना तीर्थे स्नान यावैपिके भिक्षा फवना नया तीर्थेतुं बास  
यानाः च्वंच्वन । थथे तीर्थे च्वंच्वं दीनचूडं तीर्थे फिया चैत्य दय्काः  
नाग दय्का फुथे पूजाभाव यानाः त्रिरत्नया शरण वना तीर्थ सेवा  
यानाः च्वंच्वंगु जुल । थुकथं दीनचूड तीर्थ सेवा याना च्वंगु खुदँ  
ति दुबले उगु तीर्थे बास याना च्वंपिं नन्द व उपनन्द धयापिं  
नागराजापिं प्रशन्न जुया दीनचूडयात करुणा तथा स्नान यावःह्यात  
नागपिसँ दर्शन बिया मनूभाषां आज्ञा जुल- हे दीनचूड ! थुगु  
तीर्थे छं छु कामना याना तीर्थ सेवा याना च्वनागु खः उगु कामना  
अवश्येनं पूर्ण जुइ छं धन्दा काये स्वा । थथे नागपिनिगु आज्ञा

न्यना दीनचूडं बिन्तियात- हे तीर्थया नाग राजा ! जि सम्पति आपालं जू लवाना बुका वयागुलिं तचोतं दुःख जुयेका चवनेधुन । आजि आपालं सम्पति दय्मा, झलपोलपिसँ जित धन बिया उद्धार याना बिज्याहुं धका मिखाँ खोबि हायेका दीनचूडं नागपिंत बिन्ति याःगु खत ।

थथे दीनचूडया खँ न्यना नन्द उपनन्द नागराजापिसँ आज्ञा जुल- हे दीनचूड कुमार ! छ दरिद्र जुया च्वंगु खः । अथेनं छं छुं धन्दा कायेमते । छन्त धन सम्पति सम्पूर्ण जुयेका आनन्दं सुखं चवने दय्केगु उपकार जिमिसँ कने छं एकचित्त तया न्यँ- हे दीनचूड थौंया चान्हे छ चवनेगु बलेचाया न्होने च्वंगु खयले छ मद्यंसे स्वयाच्चँ बाचातिके उगु खयले गनधाये मि व्हयावइ अन छं चिं तयाति यो तुयु तुयु धायेव उगु थासे गाःह्युया स्व अन धनया घःनिगः लुयावइ । उगु धनया घः निगलं कया थःगु छें वना सकल लोकपिसँ मानेयाका धर्मकर्म यानाः महासुखँ, आनन्दं च्वंहुं धका आज्ञा दय्काः नागपिं निह्यं प्रन्नरधान जुयावन ।

अनंलि उह्य दीनचूड राजकुमारं नागपिसँ आज्ञा जूथें उखुन्हुया चान्हे मद्यंसे बलेचास चवनाः खयःपाखे स्वयाच्चन । धार्थें बाचा जायेका व खयले छगु थासँ मि व्हथें धनया तेज प्याहाँ वल । खनेवं कुमार बाधक दना व्वां व्वां तेज प्याहाँ वःगु थासे कथि धस्वाका चिं तया थकल । अनंलि प्रातकाल जुसेलि उगु थासे गाःह्युया स्वःबले रत्नपूर्ण जुया च्वंगु घः निगः लुयावल । व घः निगलं कया “धन्य धन्य नागराजा” धका प्रशंसा याना थः च्वंचवनागु

बलेचास वया घः दिका थथे मने विचा यात आजि गन वने धासां  
देशं प्याहाँ वयागु हे खुदँ दय् धुंकल । हानं थोंया अद्यापि मां  
अबु कल्लानं विचा सँचा यावःगुनं मखु मावःगुनं मखु । जित  
सकस्यां माया तोते धुंकल । आजि थःगु देशय् ल्याहाँ वनागुया  
छुं प्रयोजन मदु । अथेया निमित्त जिगु जीवन दत्तले जि म्वाना  
च्वत्तले थ्वहे निधान तीर्थे च्वना तीर्थ ब्रत याना च्वने धका मत्तिइ  
तया दीनचूड निधान तीर्थेसंतुं च्वना नागराजापिंगु बर प्रशादं दुगु  
रत्नया धले च्वंगु रत्न आदि दुःखिपिं फवर्गिं तय्त दान-प्रदान  
याना पुण्य यात लाभयानाः सुख आनन्दं तीर्थ सेवा यानाः दीनचूड  
तीर्थे च्वंच्वंगु जुल ।

ताःकाल दसेंलि छन्हुया दिने कुमार मृत्यु जुया वंगु जुल ।  
दीनचूडामणि मृत्यु जुयाः वहे निधान तीर्थे च्वंपिं नाग तय्गु कुले  
वना जन्म जूवन । निधान तीर्थे सेवा यानाः उपोषध ब्रत च्वना  
वयागु पुण्यं याना उह्य नागराजाया पुत्र जुया जन्म कयाःनं पूर्व  
जन्मया खँ लुमंहा जुया, थःत पूर्वजन्मे दुःख जूगु लुमंका जिं थ्व  
तीर्थ सेवा यानाः त्रिरत्नया शरण वनाः स्नान, दान याना वयागु  
पुण्यं याना गुगु तीर्थस हानं असंख्य सम्पति दुगु स्थाने नागया  
पुत्र धायेका जन्म काये दत्त आः हानं थुगु जन्मे रत्न सुवर्ण आदि  
खुसी चुयेकाः लोकपित बिद्या धर्म याये धका नागराजां नागलोकया  
रत्न आदि शुवर्ण तीर्थे चुयेकाः हया बिद्या च्वन ।

थथे गुबलेँ शुवर्ण चुयेका गबलेँ धन द्रव्य चुयेके हया  
लोकपित उद्धार यासेंलि लोकपिसँ उगु धन द्रव्य कया दान पुण्य

यानाः धर्मकर्म याना च्वन थुकथं उह्य नाग पुत्रं धन दान यानाः  
 रत्न शुवर्ण चुयेकः हयाः लोकपित उद्धार याना च्वँच्वं काल समये  
 वँसेलि उगु तीर्थेसंतुं नागपुत्र मृत्यु जुया देवयोनी देवपुत्र धायेका  
 जन्म काःवगु जुल ।

थथे निधान तीर्थे जुवाद्यो दीनचूड कुमार उद्धार जुया  
 वंगु जुल ।

( इति श्री स्वयम्भू महापुराणे निधान तीर्थ महात्म्य सम.प्त )





॥ नमो वृंदाय ॥ नमो घमांय ॥ नमो मधाय ॥

स्वयम्भू पुराण

ज्ञान तीर्थया महात्म्य



परापूर्व काले कर्पूरवती नां जुया च्वंगु देशये अज्ञान सिन्धु  
धयाह्य जुजुँ राज्य याना च्वन । उह्य जुजु तच्चतंहे ध्वाह्य बुद्धि  
भ्याहे मटुह्य । गजाःह्य जुजु धाःसां नःसाँ त्वंसाँ साः मसा धयागु  
हे मस्यूह्य क्वाः रुवाउँ धयागुनं छुं मस्यूह्य नय्जक दःसाँ गाःह्य  
न्याय-अन्याय धयागुनं छुं मस्यु । जुजु जुयाःनं प्रजापित न्याये  
याये मसःह्य । छुँ छुंहे वास्ता मटुह्य अज्ञान सिन्धुह्य जुजु जुया  
च्वन । थजाःह्य महा मूर्खह्य जुजु जुया च्वंगुलिं देशवासिपित  
महादुःख । अथे जूगुलिं महामन्त्रीं न्याय याना च्वँच्वने माःशु जुषा  
च्वन । थथे न्याय आदि छुँ छुंहे जुजुं मयाःगुलिं प्रजापिसनं  
जुजुयात मानेमया भारदार जागिरदारपिसनं जुजुयात मानेमया जयेकार  
नमस्कार मया । धुलि तक्कि जुजुया कलाःनं नापं अज्ञान सिन्धु  
जुजुयात मानेनं मया स्वामि धका बिचानं मया रुवाःहे मस्व ।  
अथे जूगुलिं रानिं जुजुलिसे रसरङ्ग धयागुहे मटु ।

अथे थः स्वामि महाराजा मूर्ख जूगुलिं रानिं थः भातयात वास्ता मयासे मन्त्री लिसेहे अनाचारया आसक्त याना जुया च्वगु जुल । थुकथं सुनाःनं वास्ता मयासेलि अज्ञान सिन्धु जुजु थः कलानंहे वास्ता मयाःगु स्वया दे त्याग याना देशं पिहाँ वया उखें थुखें चाचाह्यू जूगु जुल । जुजु बेपत्ता जूसाँ मन्त्री आदि सुनानं माःवंगुनं मखु महारानीहे वास्ता मया । बरू मन्त्रीतय्संहे राज्य याना च्वन ।

उखे अज्ञान सिन्धु महाराजा देश बिदेश चाःहिह्युं नेपाले ज्ञान तीर्थ धयागु थासे थ्यंगु जुल । उगु तार्थ खनेवहे अज्ञान सिन्धु जुजुया चित्त सुद्धि जुया धर्म स्मृति दयावल अनंलि काचा काचां ज्ञान तीर्थे वया स्नान यायेत लं त्वःतल । थथे तीर्थे स्नान यायेत लं त्वःते मात्रँ थःगु कपूर्खती नगरे सकलसियां हेलायागु, कलानं तोतूगु खँत सकतां मने लुया वल । थःह्येसियाँ देशये न्याय याये मफुगुनं सिया वल । अले थःह्यंतुँ जि महामूर्खह्य खः धका सीका आःजि थुगु ज्ञान तीर्थे च्वना जिगु जीवन दत्तले तीर्थ सेवा याना च्वने धका प्रतिज्ञा याना अज्ञान सिन्धु जुजु उगु ज्ञान तीर्थे संतुं भिखाचा छेँ दय्का हीहिं तीर्थे मोल्हुया फिया चैत्य दय्का पूजाभाव याना त्रिरत्नया शरण वना पर्वकाले उपोषधे च्वना तीर्थे मोल्हुवइपिके भिक्षा फवनाः नयाः जीवन हना च्वंगु जुल ।

थुगुकथं तीर्थ सेवा याना च्वँच्वं आःपालं दँ बितय् जुसेलि उह्य जुजु तीर्थ सेवा याना च्वंगु पुण्यं तीर्थे बास याना च्वंह्य देवपुत्र छह्यसियां जुजु खना प्रशन्न जुया थथे धया हल- हे अज्ञान

सिन्धु महाराजा ! छं तीर्थ सेवा यानाः त्रिरत्नया शरण वनाः  
उपोषध व्रत च्वंगु पुण्यं याना छं पूर्वजन्मे याना वःगु पाप शान्त  
जुल । छं पूर्वजन्मे छु पापकर्म यानावल धाःसां, हे महाराजा ! छं  
पूर्वजन्मे धर्मशास्त्र दक्क मियाः स्यंकाः ध्वंस यानाः नयाः त्वनाः  
कुर्म याना वःगु पापं थुगु जन्मे महामूर्ख जुया छुं छुं मसिल ।  
सकल लोकं अपमान, व हेपये जक याका च्वने मागु खः । आः  
छलपोलं थुगु ज्ञान तीर्थे सेवा यानाया पुण्यं छलपोलया चित्त शुद्ध  
जुया पूर्वजन्मया पाप सम्पूर्ण नाश जुया वन । आः हानं थुगु  
जन्मया खँ लुमंहा जुया कर्पूरवती देशेतुं मन्त्रीया कुले जन्म कयाः  
वहे देशे जुजु जुयेदइतिनि धका आज्ञा जुया अनहेसं उह्य देवपुत्र  
अन्तरधान जुया विज्याःगु जुल ।

थथे तीर्थ वासि देवतां आज्ञा जूगु खँ न्यना अज्ञान सिन्धु  
महाराजां उगु वचनयात एकमन याना उगु ज्ञान तीर्थे ह्रीहिं स्नान  
याना फिया चैत्य दय्का पूजाभाव यानाः त्रिरत्नया शरण वना,  
उपोषध व्रते च्वना तीर्थ सेवा याना च्वंगु जुल । थुकथं जुजुं तीर्थ  
सेवा याना च्वँच्वं ल्हुया दिने मृत्यु जुया वंगु जुल । अनंलि  
उह्य अज्ञान सिन्धु महाराजा देवपुत्रं आज्ञा जूथें कर्पूरवती देशे  
मेह्यहे मन्त्रीया कुले वनाः जन्म जूवन । व मचायात अज्ञान शोधक  
धयागु नां छुत । कथःथें तःधिकः जुया सकल विद्यां पारंगत जूगु  
जुल । थुगु इलये देशे जुजु मद्गु तःदँ दय्धुंका महामन्त्री, भार-  
दार, पुरोहित च्वना सःलः याना देशे जुजु मदय्कं मजिल धका

विचाः याना भिह्न सकल विद्यां पारंगतह्य, सकल शास्त्रं पारंगतह्य, ज्ञानिह्य, भद्रह्य, कल्याणह्य जुजु यायेमाः थथे राजगुणं युक्तह्य भीगु देशे सु दु ? वहे जुजु यायेमालि धका सःलः याना माला स्वःबले मन्त्रीया काये अज्ञान शोधक दारक यातहे कर्पूरवती नगरया राज्यसिंहासने फयतुके लायेकह्य खनाः सकले लय-ताया वयात राजमकुतं पुयेका राज्याभिषेक बिया व देशया जुजु याःगु जुल ।

उह्य महाराज अज्ञान शोधकं देश प्रजालोकपित विचाः याना धर्मया न्यायं प्रजापित प्रतिपाल याना च्वंच्वन । थथे अज्ञान शोधक महाराजां राज्य याना च्वच्वँ पूर्वजन्मया पूणयया प्रभावं पुर्वानुस्मृति ( पूर्वजन्मया खँ ) लुमना वल । थथे पूर्वजन्मया सम्पूर्ण खँ लुमना वसेलि व महामन्त्रीं याना च्वंगु अत्याचार व महारानीं याना च्वंगु अत्याचार सीका सकल मन्त्री व कर्मचारी तयेत सःता सभा मण्डल दय्का उह्य अज्ञान शोधक जुजु सकलसियां न्होने थः अज्ञान सिन्धु जुजु धायेकाः जन्म जुयाबले थः मूर्ख जूगु खँ, मन्त्रीं न्याययाःगु खँ, कलानंहे वास्ता मयासें महामन्त्री लिसे आसक्त जूगु व थःत सुनाःनं वास्ता मयाःगु, देश तोता प्याहाँ वनाः ज्ञान तीर्थे सेवा याना च्वनागु अले व तीर्थे बास याना च्वंह्य देवतां व्याकरण जूगु व्याक्क फुक्कं खँ सकसितं कनाः महामन्त्री व महारानीया अनाचार जूगु खँ कनाः निह्यसितं कर्पूरवती नगरं पितना व्छगु जुल ।

थुकथं महाराजां कर्पूरवती नगरे धर्मं प्रजालोकपितं प्रतिपाल-  
यानाः राज्यं चले यानां च्वंच्वंगु जुल । अनंलि छुं दँ लिपा महा-  
राजा अज्ञान शोधक जुजु सिना वनाः सुखावती भुवने बास लाःवंगु  
जुल । थथे ज्ञान तीर्थे अज्ञान सिन्धु महामूर्खह्य जुजु उद्धार  
जुया वंगु जुल ।

( इति श्री स्वयम्भू महापुराणे ज्ञान तीर्थ महात्म्य समाप्त )



1000

1000

1000

1000

1000

1000



॥ नमो भगवते ॥ नमो भगवते ॥ नमो भगवते ॥

## स्वयम्भू पुराण

### चिन्तामणि तीर्थया महात्म्य



हापाः हापा वासव धयागु गां ह्यु दया च्वन । व गामे  
आपालं धन दया च्वंहा छ्हा सेन महाजनया काये छ्हा दयाच्वन ।  
उह्य कायेयात बौह्यं कोटि मू वंगु कुरुडल न्यानाः हायेपनय् सुइका  
तःगुलिं कायेया नां कोटिकर्ण धका छुना तःगु जुया च्वन । उह्य  
कोटिकर्ण ल्यायेह्य जुयाः वुना ज्याये तेवा बिइ ससेंलि उह्य काये  
मचा कोटिकर्ण शार्थवाह महासागरया रत्नाकर व्यापार यावनेगु  
मत्तिइ तथा मां बौनं मसीक देशे दक्क वंजापिं मुंका रत्नाकर  
व्यपार वनेगु ज्याखँ कोछिनाः लिपा मां ऋबुया न्ह्योने वना थथे  
बिन्ति यात- जि रत्नाकर व्यापार वनेत्यना जितः बिदा बिया  
बिज्याहुँ । थथे याकः काये कोटिकर्ण आकाभाकाये रत्नाकर वने धका  
बिरा पवँवःगु खना मामं धाल- हे बाबु ! छ, छाये रत्नाकर व्यापार  
वनेमाःगुदु, छिमि अबुं कमये याना तःगु सम्पतिहे यक्क दु । छ  
रत्नाकर वने माःगुहे मदु । नय् त्वने पुनेगु गुलिमाः उलि छन्त  
माक्क दहेदु, छ रत्नाकर वनेमाःगु खहेमखु । बानं दय्का तःगु

सम्पति जक विचाः याना च्वंसां गाः- हे बाबु ! छ रत्नाकर वने धाये मते ।

थथे मामं धाःगु खँ न्यना कायेह्यं धाल- जि रत्नाकर वनेगु खँ कवल्ली धुन वनेगु जुइ धुंकल । जितः गनेमते । मामं धाल- अथे मखु बाबु, रत्नाकर वने धयागु साप थाकु । गूँ गूँ वनेमा; पर्वत गय्मा; नय्त्वने धाये मदु; वावः फय् व धायेमदु; चिकु तानो धायेमदु; नय्पित्यात धायेमदु हानं गूँ वनेबले धुँ, सिंह, भालु जन्तु जनावरतय् भय् दु । सागर छिना वनेमा; द्वंगाये च्वनाः वनेबले सागरे स्वँज ग्वँजत वय्यः ततःधिकःपिं न्यात काउलेत वया द्वंगा फाता पुयेका वीयः । स्वँज ग्वँजतय्सँ नय्यः । वा फय् वयाः सागर बधय् जुयाःनं द्वंगा फाता पुलेयः । थजाकथं थाकु, ग्यानापु छ वने धायेमते पुता ! छ जि याकः काये खः धका नुगः मछिका ख्वयाः कायेयात गना च्वन । कायेह्य कोटिकर्ण शार्थवाह तँम्बया मानं धाःगु खँ मन्यंसे भन मांयात- जि छु सीवने त्यन धकाः गनागुला ? अमङ्गल याःवैह्य थुइक धका मांयात थुकलं विया छिद्र वचन हाना मांयात बोबिया मामं धायेक धायेकं वणिजाःत मुँका छेँ प्याहाँ वन ।

थौँ कोटिकर्ण शार्थवाह सारा वणिजालपिं मुँका रत्नाकर वनेधका थःगुदे तोता अनेगु दे, गाँ, निगम, जनपद आदि चाःहिह्युं गूँ पर्वत गया ववँ आपालं दिन बितय् जुसेलि महासागरया सिथये वणिजालपिं सकलें थ्यंकः वन । सागर छिनाः रत्नद्वीपिं (रत्नाकरे) थ्यंका शार्थवाह वंजातनापं आपालं रत्नादि लाभ याःगु

जुल । धुकथं रत्नाकर व्यापार सिधय्का शार्थवाह बंजातनापं रत्नत  
ज्वंकाः ल्याहाँवःगु जुल । ववँ-ववँ निरञ्जन गुईं थ्यंका कोटिकर्ण  
शार्थवाह भचा भासुलनेत च्वँत्तलें रत्नत ज्वना वःपिं वंजाःत ह्वापा  
वनाच्वन । लिपा शार्थवाह भासुलंगु थासँ दना वंवल्ले वंजाःत नाप  
लाके मफय् धुंकल । लिपा साहुया लँ दनाः वंजाःत छवे साहु  
याकःचा छवे लान ।

सल गयाः वनाच्वंद्द शार्थवाहं लँदात धयागु जकसीवं हंसँ  
थाये तोतल । वंजाःत गनवन जुइ धका सल व्वाका गुईं उखें  
धुखें माःजुया च्वन । लिपा सल व्वाय् वंद्द वनंतुँ दिके मफु ।  
वेतोदं व्वाय् वन । गुँ तोता फिसलँ फिसलँ वनां च्वन । निभा तच्वर्त  
थिना च्वंगु दु, छवें निभाया ताप मेखें फिया ताप । गुकें याना  
सल याकनं न्यल फिसलेतुँ भाराक ग्वतुल, सल अनंतुँ सित ।  
साहु हानं फिसलं गुँ पाखे स्वयाः ल्याहाँ वया च्वन । फी पलाहे  
तय्फुगु मखु चुईं चुईं पू । पुक्कहे पलाः त्रिना बल्ल बल्लं  
गुईं थ्यंक वल । लः त्वने प्याःचाया वल तर लः गनंहे दुगु मखु ।  
अथेनं गनं दैला धका लः मालावं वनांच्वन । ववं ववँ यमद्वार  
पाखे लात । अननं वं लः त्वनेगु दैला धका स्वःवले तच्वर्तहे ग्यानापुपिं  
कालकूट दण्ड ज्वना च्वंपिं खन । साहुं अमिके न्यन थन लः  
त्वनेगु दैला ? अमिसँ नमवा लः न्हाःगु सः तायेतद भवारारारा  
तर अमिसँ नमवा । लःया जक सः तायेवला इमिसँ नमवासाँ लः  
त्वने धका दुने द्वाहाँ वनाः लः मावन तर लः गनंहे मखँ । वँ  
बिचाः यात लः त्वनेगु थन अवश्य दे तर गनं मदु । दुने थ्यंक वनाः  
स्वः वना च्वन ।

अथाये अपुचःहे प्रेतत मुना च्वन । इपिं गथेच्चं धाःसां मुलुया  
 कयूँप्वा ह्वःथें चिप्वागु ह्युतु, लहाः तुति चिचीपु जुया चिमिसं ह्य  
 त्वपुयेक दयाच्चंपिं । प्वाः धाःसा तःग्वपिं थजापिं प्रेतत खनेव थुमिके  
 लः दै जुइ धका ब्वायूँ ब्वायूँ वनाः जितः लः त्वनेगु छक बिया  
 दिसँरे, जि तच्चतंहं लःत्वने प्याःचाल । प्रेततसें न्यन- छ सु ? जि  
 वासव ग्रामया कोटिकर्ण । प्रेततसें धाल- हे साहु ! थनला प्रेत  
 नरक खः थन लः त्वने दैमखु । जिमिसँ लः त्वने मखंगु भिनिदँ  
 दयूँधुंकल । थथे प्रेततयूगु खँ न्यना वं हाकनं न्यन- छिपिं छु कर्म  
 आमथे जुइका च्वने मागु ? प्रेततसें धाल- हे कोटिकर्ण ! हापा  
 जिपिं मनुष्य जुया च्वनाबले मां बौपित बोबिया, जिमिसँ सुं दुःखि  
 पित दान धयागुहे मबिया भन वी त्यंपितनं दान यायेमते धका  
 गना वया । थुगुहे कर्म बिपाकं आः जिपिं प्रेत धायेका जन्म जुयाः  
 दुःख सिया च्वनापिं खः ।

थथे प्रेततयूगु खँ न्यनाः साहु अनँनं द्वाहाँ वनाः लः मावन ।  
 हानं मेह्य पापी छह्य खन, वं गजाकथं कर्म बिपाक भोग याना  
 च्वन धाःसां निभाद्यो बिनाः चान्हे जुलकि अन, बिमाने च्वना  
 अपशरापिं वया अनेक साभिं नका त्वंका रतिक्रिडा याना च्वनी ।  
 द्यो तुयु तुयु धार्थें च्वनेव उह्य पुरुषयात त्वःता अपशरात बिमाने  
 च्वना सर्गते थाहाँ वनी । उगु इलय् अपशरापिसँ त्वःता वनेभुंकूगु  
 जुया च्वन । साहु वनाः वयाके तीजक न्यन- छि सु खः ? जित  
 लः छक त्वंकिले ! उह्य पुरुषं धाल- थन हाला दियेमते .... का  
 ...बल ! ( खिचातसें ब्हाउँ ब्हाउँ उना हःगु सः तायेदत । ) छि

सु खः हौं ? जि वासव ग्रामया कोटिकर्ण । पुरुषं धाल - हे साहु !  
 याकनं फलेचाये थाहुँ, महासे न्वनाचवँ ! साहु वाताहाँ च्वनाच्वन ।  
 वं धाल - खिचात वल इमिसँ छितः न्याइ थाहुँ थाहुँ । साहु काचा  
 काचां फलेचाये थाँवना सुला च्वन । खिचात प्यह्य वया व पुरुषयात  
 वयाखतं व्हाउँक न्याना ला पायूँ लिकाना नल । हि बा बा वल,  
 थुकथं सास्ति याना च्वन । सित बा बा सित ! धायेक न्याना  
 थस पायेका चि चित्यानाः ला नया हि त्वना ह्मिछि तक सास्ति  
 याना तल ।

यो खिउँ खिउँ धायेव खिचात प्यह्य उखेवं थुखेवं  
 मदयेक वन । जब बहि जुसेलि न्याबले थे अपशरापिं वया वासलं  
 बुका बियेमात्रं घाः फुक्क लनाः ह्वापायार्थे जुल । अले नका त्वंका  
 रश क्रिडा यानाः सुख पुर्वकं च्छि च्वँच्वन । अले हाकनं बिमाने  
 च्वना अपशरापिं वँसेलि फलचां क्वाहाँ वयाः साहुनं थथे न्यन-  
 अहो आश्चार्य ! छुया कारणे छितः थथे जुया च्वंगु ? उह्य कर्मभोगि  
 पुरुषं थथे धका धाल - हे शार्थवाह ! जिनं छह्य वासव गामे  
 लामीह्य औतत्रिक धयाह्य खः । जिं करपित स्यानाः ला मियाः  
 जीवन हना च्वना, थुगु पापं हीहिं खिचात वया न्याकाः सीला  
 -सीला धैथे च्वंक कर्मभोग याना च्वना । हानं चान्हे चान्हे ह्वापानं  
 दना तीर्थे वना स्नान यानाः परमेश्वरपिंथाये वना धर्मकर्म याना  
 जुयागु पुण्यं याना चान्हे चान्हे बिमाने च्वना वयाः अपशरापिं श्याः  
 नका त्वंका अनेक रशरंग यानाः सुखभोग, आनन्द याना च्वना ।



हे साहु ! पाप कर्मया फलं दुःख भोग याना चवना धर्मया  
फलं सुख भोग याना चवना । आः छि वासव ग्रामे ल्याहाँ भाये-  
बले जिह्म कायेयात जिगु खँ छगु कना ब्यु । छु धाःसाँ- छिमि  
बा लामियाः नया जृगु पापं थथे कर्मया भोग याना चवन । ही  
हिं खिचातसें न्याका महाकष्ट नया चवन छिमिसं ला मीगु ज्या  
त्वःति । जि लामीगु त्वाकःया तःले शुबर्णया धले दुने सम्पति तथा  
गारे याना तथागु दु । व घः लिकयाः छिमिसँ जिगु नामं पिण्डादि  
दान विद्या सकल दुःख दरिद्रपित दान--प्रदान यानाब्यु, थुलि याना  
बिल धाःसा जि मुक्त जुइ धका जिमि कायेपित धया ब्यु धका  
बिन्ति यात ।

थुलि खँ न्यने धुंका शार्थवाह अननं दुने वनाः लः माजुल ।  
अननं छह्य पापी खन । पापीयात द्यो ख्यूंया चाहे जुलकि अनेक  
किसिमयापिं ताहात वया सीला सीला धैथें चवक न्याना सास्ति  
याना तैगु, द्यो तुयु जुलकि व फुकसियाँ त्वःता वनीगु । हिने जुलकि  
अपशरापिं वया सासागु वस्तु नका त्वंका तैगु । बःहि जुलकि  
हानं ताहात वया न्याःवइगु । थबले उह्येसिके वनाः लः फवंबले  
वं न्यन- छि सु ? जि वासव गांया कोटिकर्ण । स्वयादिसँ साहु ।  
जिनं वासव गांया ब्राह्मण खः । तर जिं हिने हिने धर्मकर्म याना  
जुइजु चाहे जुलकि परस्त्री गमन याजुयागुलिं चाहे चाहे जितः  
सीला-सीला धयार्थें चवक अनेक की, सर्पत वया धसे याका कर्म  
बिपाकया भोग याना चवने माल ।



हि वासव गामे भायेबले जिगु कायेपित जिगु कर्म बिपाकया  
 खँ फुकक कनाः आश्रमया तःले जि रत्न दुनेतयाः लुँया घः दुथना  
 तयागु दु व घः लिकया दुःखिपित दान-प्रदान याना व्यु धका  
 धवाव्यु । थथे पापी पुरुषया खँ न्यना साहुं "जिला म्वाः म्वाकंहे  
 नरक लोके लाःह्य जुल जि मांयात वो बियागु पापं जि थन्याःथाये  
 लागु खः" धका मने पश्चाताप चाया व थासँ भभन्दुया व्वाँ व्वाँ  
 वना च्वन ।

उखे वासव गामे च्वंह्य मांह्येसिया जिकाये याकनं लिथ्यनेमा  
 धका अनेक धर्मकर्म यानाः पुण्य दान बिधा च्वंगु जुल । वहे पुण्यं  
 साहु व कर्मभूमिं छुते जुया जनपद पाखे लावःगु जुल । थबले नय्  
 त्वने मखना अनेक गांचा-गुंचा चाःचाहिला फवना फवनाः नया  
 जुया च्वन । थुह्य शार्थवाहया बंजाःत वासव गामे थ्यंका वया मां  
 अबुपित कोटिकर्ण शार्थवाह सित धका कनाः बंजातय्संहे सारा  
 सम्पति थ थःगुछेंसँ यँकूगु जुल । कोटिकर्णया मां अबुपिसँ थःकाये  
 सित धागु खँ न्यना याये माःगु संस्कार फुक यानाः पिरुडदान  
 नापं बिया सीह्य थः कायेया नामं धर्मशाला, सतः दय्का शिलापत्र  
 नापं तया व्यूगु जुल ।

थुखे कोटिकर्ण शार्थवाह चाःहिह्यु नेपाल मण्डले चिन्तामणि  
 तीर्थे थ्यंगु जुल थबले थःगु दे वासव गां वने मसया, मांयात  
 थुकलं बियाः वोबिया वःह्येसियाँ उगु चिन्तामणि तीर्थे मोल्हुया  
 थथे चिन्तना यात "जि मांयात वोबियाः थुकलं बिया वया, थुगु

पाप लहनेमा, जि याकनंहे वासव गामे थ्यनेमा" धका त्रिरत्नया  
 शरण वंगु जुल । थथे चिन्तामणि तीर्थे सेवा यागु पुण्यं याना  
 शार्थवाह च्यान्हु भिन्हु हे वासव गामे थ्यकःवल अनंलि थःगु छेँ  
 पाखे स्वया वंवले तच्चतंहे बांलाक दय्का तःगु सतः छगु खन ।  
 शार्थवाहँ "थुगु धर्मशाला हापा मदु सुनां दय्का तःगुथेँ धका उगु  
 धर्मशालाया न्ह्योने थ्यंक वना तीजक शिलापत्र व्वना स्वतः- शिलापत्रे  
 थथे च्वया तलः-

"जि काये रत्नाकर वंह्य कोटिकर्ण शार्थवाह रत्नाकरेतुं निधन  
 जुया वंगुलिं (सीगुलिं) उह्य कोटिकर्ण शार्थवाह जिकायेया नामं ध्व  
 धर्मशाला सतः दय्का । थुगु पुण्यं याना दिवंगत कोटिकर्ण सुगती  
 वास लायेमा ।" थथे धका शिलापत्र च्वयातःगु खना मिखाँ ख्वबि  
 पिकया नुगः मल्लिका थःगु छेँया पिखालुखि न्ह्योने च्वनाः मांयात  
 सःता च्वन । मामं ताया पिने स्वःववले थः काये कोटिकर्ण खनेवं  
 मामं ख्वया ख्वयाः धालः- यो पुता ! छ मन्त धाःह्य गथे वया  
 बाह्यँनं स्वःवल । कायेह्येसियाँ ख्वया ख्वयाः- जि सीगु मखुनि  
 यःमां जि मांयात थुकलं बियाः मांनँ धाःगु खँ मन्यँसेँ व्वःबिया  
 वनागु पापं म्वाः म्वाकंहे जि कर्मभूमि चाःहिला वया । आः जि  
 छेँ द्वाहाँ वय् मज्जुह्य जुल धका मां अबुया पालि भपुया सम्पूर्ण  
 माया त्याग यानाः वहे वासव गामे औत्तत्रिक धयाह्य ला मीह्येसिया  
 छेँ वना वया कायेपिंत कनः- छिमि बा कर्मभूमी महाकष्ट नयाः  
 कर्मभोग याना च्वंगु दु अथेया कारणे छिमिसँ करपिंत स्यानाः ला  
 मीगु ज्या त्वःति । वयागु खँ न्यना इमिसँ न्यन छिं गथे सिल  
 जिमि बा सी धुकल धका ?

कोटिकर्ण हानं कन-- छिमि वा नरक भूमी चान्हे जुलकि  
अपशरापिं वया नका त्वंका रसरंग चाकाते ह्मिने जुलकि खिचात  
वया लापाँय् लिकाना हि वाः खंकाबि । छिमि वानं धयाहःगु दुकि  
ला त्यायेगु पालेगु त्वाकःया नःले शुवर्णया घले रत्न दुथना तयागु  
दुहँ । व घः लिकया रत्न आदि दुःखी गरीवपित दान--प्रदान याना  
पिण्ड दान यानाव्यु धका जितः धयाहल । थुलि याना बिल धाःसा  
छिमि बौ नरकं मुक्त जुइ अले भिंगु गती बास लाइ । थुकथं  
शार्थवाहं नरकया खँ दक्वहे कन । थथे साहुया खँ न्यना ला  
पालेगु त्वाकः पुयेका गाःह्युया स्वःबले धार्थे रत्न जायेक दुगु लुँया  
घः लुया बल । उगु घः लिकया बौनं धयाहःथे धका पिण्ड दान  
बिया दुःखि गरीवपित दान--प्रदान याना धर्मकर्म यानाः पुण्य दान  
याःगु जुल । थुगु धर्मया प्रभावं नरक गति भोग याना च्वंह्य आतत्रिक  
उच्चार जुया वंगु जुल ।

अनंलि हानं शार्थवाह ब्राह्मण्या छे वना वया जहान, कायेपिं  
सःता कन-- हे ब्राह्मणपि छलपोलया बुवां चान्हे चान्हे परस्त्री गमन  
याः जूगुलिं चान्हे चान्हे ताहा, कीतसें न्याका कर्मभोग याना  
च्वन । अमिसँ न्यन-- हे शार्थवाह ! छिं थ्व खँ गथे सिल ?  
सिनावंगु भिनिदँ दय्धुंकल । साहुं धाल-- हे ब्राह्मणपि ! छःपिनि  
बायात परलोके वना फुक्क स्वया वय्धुन छःपिनि बुवा नरक गती ह्मिने  
चाहिं अपशरापिं नाप महारस यानाः सुखभोग याना च्वन चान्हे  
जुलकि परस्त्री गमन याना वंगु पापं आपालं ताहा, कीतसें न्याका  
महाकष्ट नया च्वन । आःछिपिं पत्या मजूसा छःपिनि बुवां धया

हःगु अग्नि कुन्दलया तःले रत्नं पूर्णगु सुवर्णया घः तैतयागु दु हँ  
 व घः लिकया दुःखी गरीवपित दान-प्रदान याना व्यु हँ पिण्डपात्र  
 आदिनं दान याना व्यु धका धयाहल धैगु सम्पूर्ण नरक गतिया  
 खँ कंगु जुल । थये कोटिकर्णया खँ न्यना अग्निमथ स्यंका  
 गाःह्युया स्वःगु बखते अनं धया हःथें शुवर्णया रत्नं पूर्णगु घः  
 लुया वल । अनंलि उह्य ब्राह्मणं घः कया पिण्ड थया, दान धर्म  
 याना, चैत्य दय्का बिल । उगु धर्मया पुण्य प्रभावं कर्म बिपाकं  
 दुःख भोग याना च्वंह्य ब्राह्मणया सर्व पापं मुक्त जुया देवयोर्ना  
 जन्म काःवन ।

थुगु कथं उपदेश बिया परउपकार याना, उह्य शार्थवाह  
 आः जि गन वनाः च्वंवने धका मत्तिइ तया अननं श्रावस्ती जेतबने  
 अनाथपिण्डदाश्रमे वनाः श्री सम्यक्सम्बुद्ध शाक्यमुनिया शरणे वना  
 प्रवर्ज्या सम्बर कया प्रवर्जित जुया श्री भगवान बुद्धया सर्व संघया  
 बिनये पालन यानाः तथागतया शासने च्वना च्वंगु जुल । थये  
 चिन्तामणि तीर्थे मांथात द्रोहि याह्य कोटिकर्ण शार्थवाह उद्धार  
 जुया वंगु जुल ।

( इति श्री स्वयम्भू महापुराणे चिन्तामणि तीर्थ महात्म्य समाप्त )

॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण

### प्रमोद तीर्थया महात्म्य



ह्यापाः- ह्यापा छगु इलये पातालया अधिपति जुया च्वंहा दानासुर धयाह्य दैत्यं पाताले राज्य याना च्वन । थनंलि छन्दुया दिने उह्य दानासुर दैत्य पातालं थाहाँ वया मर्त्यमण्डले नेपाले (पुण्य क्षेत्रे) रत्नावती व बाग्मती संगम जुया च्वंगु प्रमोद तीर्थ स्नान याना त्रिभुवनया जुजु जुयेगु इच्छां उगु तीर्थे तपस्या याःगु जुल । वं गज्यागु यानाः तपस्या यातधासां सुनानं वयागु व ज्याये स्थंक वःसां मफय्क भिगू दिशायेसं ताडण किरण तथा तपस्या च्वंगु खतः । थुकथं दानासुर दैत्यं तपस्या यागुलिं स्वर्ग-भुवने देवराज इन्द्रया वैजयन्ति सिंहाशन कम्प जुल, सिंहाशन दगदगे जुल । थथे सिंहाशन सँसेलि इन्द्र ग्यानाः जियासिनं धर्म बल्लाह्य अवश्यं दत्त तर सुदतथे धका मत्तिइ तथाः देवशभा याना स्वःबले मर्त्यमण्डले प्रमोद तीर्थे दानासुर दैत्यं महातपस्या याना च्वंगुलिं इन्द्रया सिंहाशन संगु खः धेगु निर्णय जुया देवशभा बिसर्जन जुल ।

तर देवराज इन्द्रं सापमिक धन्दा कयाः मने खँ लहाका चवन “आः जि देवराज (देवेन्द्र) पदं च्युत जुइगु जुल” धका धन्दा कया चवंगु खः उर्वशी, मेनका, रम्भा व तिलोत्तमा धयापि अपशरा पिसँ स्वया इन्द्रयात थुगु कथं बिन्ति यात-- भो देवेन्द्र ! छपित छु जुल ? छाये दुःख तायाः बिज्याना चवना ? थथे अपशरापिसँ बिन्ति याःगु खँ न्यना इन्द्रं आज्ञा जुल-- हे अपशरापि ! जित दुःख जुगु छु धासाँ मर्त्यमण्डले नेपाले प्रमोद तीर्थे दानासुर दैत्यं वैजयन्ती जिगु सिंहाशने चवना त्रिभुवन एकछत्रं राज्य यायेगु बिचारं तपस्या याना चवन । आः दानासुरया तपस्यां जिगु सिंहाशन संगु सनं तिनि । अवश्यनं उगु तप पूर्ण यानाः तीर्थस बरदान कया जित क्वत कया उह्य दैत्यराज इन्द्र जूवैन । अये जुया जि तच्चतं धन्दा जुयाः दुःख ताया चवनागु खः । इन्द्रया थजाःगु भयं बिलि-बिलि जाःगु खँ न्यना अपशरापिसँ बिन्ति यात-- हे देवेन्द्र ! थुलिया कारणे छःपिसँ धन्दा कया बिज्याये म्वा । थजाःपि न्ह्यार्थे जाःह्य तपश्चित्तयत्नं जिमिगु नृत्य, संगीतं इमिगु तप भङ्ग याना वया चवना । श्वयातनं वं याना चवंगु तप बिध्वंस थनेत जिमिसँ कुतःयाये । छःपिसँ धन्दा कया बिज्याये म्वा । हे देवेन्द्र ! जिपिं थर्थे अनवना वयात तप भङ्ग याना वय्, जिमिगु बसय् याना वय् धका अपि मेनका, उर्वशी, तिरोत्तमा, रम्भा व मेमेपि अपशरापि सहित याना त्रायत्रिस भवनं नेपाल मण्डले प्रमोद तीर्थे क्वहाँ बल ।

थुबले तीर्थया न्ह्योने थ्यँसेलि दानासुर दैत्यराजं तपस्या याना चवंगु थासे स्वःबले ताडण किरण तथा सुं द्वाहाँ वनेमजीक थः जक



दुने चवना तप यानाः चवंगु खना इमि सःल यात- आः गथे यानाः  
 ध्व दानासुर यात तपस्या भङ्ग याये ? भिगू दिशासं अनेगु किरण  
 ताडण याना तल । न्ह्यागुहे जुइमा थ्वइगु तप भङ्ग याहे याये धका  
 तापाकहे चवना रम्भा, तिरोत्तमा, उर्वशी, मेनका व मेमेपिं अपश-  
 रापिं सकलें मिलय् जुया अनेगु राग-रागिनी कया मेहालाः तुति पाः  
 कया पचिंकुज्याना अनेगु ताःलं ल्हाः मिखां संकेत याना प्याखँ  
 हुला नृत्य यानां चवन । अथेनं व दानासुरं वास्ताहे मया  
 ख्वानं मस्वसे मिखा तिलिना एकचित्त याना योग तपस्था  
 याना चवन ।

अपशरापिं गवायेत तक म्ये हाला प्याखँ ल्हुया चवननं वास्ता  
 मयासेलि अजूचाया हानं सःलः यात- आः गथे यायेमाल ? ध्व दानासुर  
 दैत्यं मिखानँ मकं वास्ताहे मया । आः अथेमखु थ्वइगु छें वनाः  
 ध्वया धन सम्पति सारा सर्वस्व खुयाहया ध्वया न्ह्योनेहे तीर्थये  
 चुइका बी नु ! धका सकल अपशरापिनि सःलः याना चवन, थथे  
 थ्वइगु सम्पति खनेव अबश्यनं दनावै उगु इलय् भीसं वयात वसय्  
 काये धका अपशरापिं पाताले दानासुरया भवने वना, वया जहानपित  
 मोह याना दैत्यया सारा सम्पति दक्व खुया हल । अले दानासुर  
 तप याना चवंगु प्रमोद तीर्थे वना दानासुरं खँक हे दक्व धन  
 सम्पति चुइका बिल ।

थुकथं सारा सम्पति खुसी चुइका बिलनं वास्ता मयासे  
 तपस्याहे याना चवन । तप भङ्ग यायेतवपिं अपशरात वयागु तप  
 भङ्ग याये मफया कायेल जुया ल्याहाँ वन । दानासुरं भिनिदँ तक

तप याना तप पूर्णहे यात । त्रैलोके एकछत्रं राज्य यायेगु वर प्रशाद  
 दानासुरं प्राप्तहे यात । अले व प्रमोद तीर्थया योगाश्रमं दना वना  
 हापां मर्त्यमण्डले दक्कभनं राज्य त्याका एकछत्रं राज्य यात ।  
 थुकथं दानासुर दैत्यं संग्राम याये स्वायेकं मर्त्यमण्डले गुलितक राज्य  
 दु उलि फुक्कं देशया जुजुपिन ख्याना राज्य त्याका सिंहाशने  
 चवन । सागर द्वीप फुक्क मर्त्यमण्डल त्याके धुंका त्रायत्रिस भवने  
 एकछत्रं राज्य यायेगु मत्तिइ तथा आपालं दैत्यगण सहित याना  
 सर्गते थाहाँ वन । सुधर्मा नाम देव सभास ध्यंकः इन । दानासुर वःगु  
 खनेवंहे देवराज इन्द्र तच्चतं ग्याना याकनहे देवशैन्य मुंका दैत्य-  
 तयूनाप ल्वाःवन । तर देवशस्त्रं दैत्यतयूत छुं याये मफु । दैत्यतयू  
 शैन्यतयूसँ धमाधम देव भवन क्वत्यलाः त्याकाहल ।

थुकथं दानासुर दैत्यया वीर्यपराक्रम खना युद्ध यायेगु साहस  
 मदया इन्द्रया वैजयन्ति सिंहाशन तोता वैकुण्ठे विष्णु नारायणया  
 शरण वना इन्द्रं नारायण यात विन्ति यात- हे नारायणजु दैत्यराज  
 दानासुरं अमरावति भवने वया जिलिसे संग्राम यानाः जिगु राज्य  
 त्याका काल धका कनाः इन्द्र वैकुण्ठेसँतुं च्वंच्वँन । दानासुरं  
 अमरावति त्याका हानं वैकुण्ठे वना संग्राम यावन थवले विष्णु व  
 इन्द्र जाना दैत्यलिसे संग्राम यागु जुल । थुगु युद्धेनं दानासुरंहे त्याकल  
 अले निह्यं विस्युवना ब्रह्मलोके वन अननं दानासुरं युद्ध यावगु  
 जुल । उगु ब्रह्मलोकं ब्रह्मा, विष्णु व इन्द्र स्वह्यं विस्युवना कपिलाशे  
 महादेवता महेश्वरया शरण वंगु जुल । अननं दानासुर दैत्य शैन्य  
 सहितं संग्राम यावगु जुल । थवले ब्रह्मा, विष्णु, महेश्वर, इन्द्र व

मेमेपि सकल देवतापिं छप्पं जुया इपिलिसे त्वात । तच्चतंहे हताजं  
जुल तर थुकेनं दानासुरं प्यह्ययसितं विस्सुं वनेमाःगु अवस्था याना  
विल । विस्सुंवन तर वंवं थायेहे दत्तं लिच्छु ल्यु जुल । उकथं  
वंवं थायेतक दानासुरं लिच्छु लिनाहःगुलिं सुलां सुलेथाये मदया श्री  
गुह्येश्वरी देवीया थासे वना श्री गुह्येश्वरी देवीयात पूजाभाव याना  
ब्रह्मा, विष्णु, महेश्वर व इन्द्र प्यह्यसियां भट्टारक यात स्तोत्र याना  
थुकथं विन्ति यात- हे जगत जननी श्री गुह्येश्वरी देवी ! जिपिं  
सकलं छलपोलया शरणे वया । मेता कारणं मखु दानासुरदैत्य प्रमोद  
तीर्थे तपस्या यात, तीर्थराज प्रशन्न यानाः त्रैलोक्या अधिपति जुयेगु  
वरदान कयाः थुगु तपं पूर्ण याना मर्त्यलोक दक्ख, सागर द्वीप पर्यन्तं  
त्याका सर्गते वया अमरावति त्याका वेकुराठ, ब्रह्मभवन, कपिलाश  
आदि त्याका जिमित दानासुरं लिनाहया च्वन । हे जननी ! थथि-  
जाःह्य दैत्यया वसय् लासेलि थ्व लोक गथे जुइ ? अथे जूगुलिं थुह्य  
दैत्य यात दमन याना विज्याये माल ।

थथे देवता पिनिगु विन्ति न्यना गुह्येश्वरी प्रदन्न जुयाः आज्ञा  
जुल- हे देवगणपिं ! छलपोलपिं ज्ञाना विज्याये म्वा । थुह्य दत्त  
यात दमन यायेगु खःसा छलपोलपिं सकलं श्रावस्ती जेतवने अना-  
थपिण्डदाश्रमे विज्याना च्वंह्य श्री शाक्यमुनीन्द्रया शरणे विज्याहुं ।  
वसपोलं थुह्य दैत्ययात दमन याना विज्याइ धका गुह्येश्वरी देवीं  
आज्ञा जुया विज्यायेव ब्रह्मा, विष्णु, महेश्वर, इन्द्र व मेमेपिं  
देवतापिंनं श्रावस्ती जेतवने अनाथपिण्डदाश्रमे वना श्री शाक्यमुनिया  
चरण कमले भ्रपुया विन्तियात- हे जितेन्द्रिय, श्री घन ! थ्व त्रिभुवन

आः दत्तया लहाति लात जिपिं च्वनेथायेहे मदय्क वंवांथाये च्वं च्वं  
थाये जिमित लित्तू लिनाहया च्वन । जिपिं शरण वनेथाये गनं  
मन्त, जिमित शरण कया बिज्याहुं धका बुद्धया पालि भपुया  
शरण वंगु जुल ।

थथे ब्रह्मा, इन्द्र, नारायण, महेश्वरया विन्ति न्यना श्री शाक्य  
मुनि बुद्ध आज्ञा जुया विज्यात- हे देवतापिं ! छलपोलपिं गुह्ये-  
श्वरीहे विज्याना श्री नेरात्मा देवीया थासे च्वना श्री खगानना  
देवीया मन्त्र जपयानाच्वं धका बुद्ध आज्ञा दयेका बिज्याःगु जुल ।  
थनंलि श्री शाक्य मुनीन्द्रया आज्ञार्थे देवतापिं सकलें विज्याना श्री  
खगानना देवीया अग्रे च्वना एकचित्त याना मन्त्र योग याना च्वंगु  
जुल । थबले उह्म दैत्यराज दानासुरयात दमन यायेगुया कारणे श्री  
शाक्यसिंह बुद्ध थःगु वीर्य पराक्रमं दानासुर च्वना च्वंगु थासे  
विज्यानाः, प्रमोद तीर्थराज रुपं दर्शन बिया थथे आज्ञा जुया  
विज्यात- हे दानासुर दैत्यराज ! थनंनं च्वयेयागु ऐश्वर्य यःसा  
आबस्ति नगरे जेतारामे अनाथपिण्डदाश्रमे वना श्री शाक्यमुनि  
बुद्धया शरण हुं । थुलि आज्ञा जुयाः अनं अन्तरधान जुयाः अनाथ-  
पिण्डदाश्रमेतुं विज्यागु जुल ।

अनंलि दैत्यराज दानासुरनं अभ्म च्वेयागु ऐश्वर्य काय्गु आसं  
आबस्ती वना अनाथपिण्डदाश्रमे द्राहाँ वन । वनेवंहे अन आकाशर्थे निर्मल  
जुया च्वंहा रत्नकुतर्थे तःधिकह्म भ्वीनिगु लक्षणं पूर्णह्म च्वेगु व्यञ्जनं  
संयुक्तह्म, विद्याचरणं सम्पन्न जुया देव मनुष्यया शास्ता जुया विज्याह्म श्री  
भगवान् बुद्धयात दानासुर दैत्यं खनेवंहे क्वछुना वन्दना याःगु जुल । थबले

भगवान बुद्धं थःगु उणाकोपं (ह्रातिकां) पञ्चरस्मि पिकया खय्का  
बिज्याःगु जुल । भगवान बुद्धया रश्मि खय्मात्रं दैत्यया क्रोध शान्त  
जुया चित्त शुद्धि जुया सकल लोकयाके करुणा उत्पत्ति जुया संसार  
अनित्य अनात्म धयागु विचाः याना थह्यं देवतापित दुःख बिज्यागु  
चित्त लुया वया दानासुर थःथमंतुं पश्चाताप चाया श्री मुनीन्द्रया  
चरणे भवपुया विन्तियात- भो सम्यक्सम्बुद्ध ! जिगु दक्क अपराध  
क्षमा याना विज्याहुं । जलपोल्यात दर्शन जक यायेमात्रं जि पश्चाताप  
जुल, जिं याक्वसितहे दुःख वियेधुन ।

थुलि दैत्याया चित्त शुद्ध जुसेलि भगवान बुद्धं आज्ञा जुय  
बिज्यात- हे दानासुर ! छं मन तथाः न्यं धका चतुरार्य सत्या व  
षटपारमिताया खं सम्पूर्ण आज्ञा दय्का बिज्यागु जुल । थथे  
तथागतया उपदेश न्यना दानासुरया चित्त शुद्ध जुया मैत्री, करुणा,  
मुदिता, उपेक्षा थ्व चतुरव्रह्म विहार चित्तोत्पत्ति जुया, आः जिं ब्रह्मा,  
विष्णु, महेश्वर, इन्द्र आदि मेमेपित त्याके धुंसां दुःख बिये  
मखुत । आवंलि जिं हापा हापा तथागतपिसं चल्य् याना वं कथं  
दानपारमितां पूर्ण याना अनुत्तर सम्यक्सम्बुद्ध बोधिज्ञान लानाः तथागत  
जुये अले सर्वसत्त्वपिन्त उद्धार याना महानिर्वाण पद लाये धका  
थुलि प्रतिज्ञा यानाः श्री शाक्यमुनि याके क्षमा फवनाः थ्व संसार  
त्रिलोकया राज्य त्याग याना भगवानया चरणे भवपुया बिराकया  
उह्य दानासुर दैत्य हापा तपस्या यानागु रत्नावती व बाग्मती संगम  
जुया च्वंगु प्रमोद तीर्थस वनाः थ्व मर्त्यमण्डले लोकपित पञ्चकषायनं  
युक्त जुयाः दुःख सिया च्वंणीगु इलय् सकल लोकपित जिं उद्धार  
याये फय्मा धका प्रतिज्ञा याना तपस्या याना च्वंगु जुल ।



धुलि जुये धुँसेलि श्री गुह्येश्वरी देवीं प्रशन्न जुया ब्रह्मा,  
 विष्णु, महेश्वर, इन्द्र व देवता प्रमुखपित थथे आज्ञा जुया बिज्यात-  
 हे देवतापिं छलपोलपित जिं अभय बिये धुन धनीनिसें दैत्याया भय  
 मन्त आः दैत्या राजा प्रमोद तीर्थेवना हानं तपस्या यावने धुंकल ।  
 आः छलपोलपिं थथःगु भवनेसँ बिज्याहुँ । थथे गुह्येश्वरीया आज्ञा  
 न्याना ब्रह्मा, विष्णु, महेश्वर, इन्द्र सकलें थथःगु भवनेतुं सुख पूर्वकं  
 आनन्दं च्वं बिज्यागु जुल ।

थथे प्रमोद तीर्थे दानासुर दैत्या उद्धार जुया वंगु खँ  
 क्वचाल ।

( इति श्री स्वयम्भू महापुराणे प्रमोद तीर्थ महात्म्य समाप्त )





॥ नमो वृद्धाय ॥ नमो घमाय ॥ नमो सषाय ॥

## स्वयम्भू पुराण सुलक्षण तीर्थया महात्म्य



हापाः-- हापा गौड धका नां जुया च्वंगु देश लगु दया च्वन ।  
व देशया जुजु व महारानी पाखें छह्य काये मचा जन्म जुल ।  
महारानीया मचा बूगु घडी, वहे लग्ने मन्त्रीया कलाःयानं काये  
बुल । हानं वहे लग्ने वहे इलये छह्य गृहपति महाजनया कलाया  
पाखेंनं कायेहे जन्म जुल । हानं व स्वह्यं हगूहे अंश जुया तच्चतंहे  
अलक्षण जुयाः बूपिं जुल । इमिगु रुप गथेच्वं धाःसाँ मिखा गुलि  
गुलि चिना म्येयार्थें ह्याउँसे च्वंपिं, हायेपं छुँयार्थें च्वंपिं, म्हुतु तःप्वा  
प्वार्थेंनिसें वा दुपिं तुयुगु ह्युतुसि, मिखाफुसि स्वापिं, चिकिपु जुया  
ताहाकः जुया च्वंगु ककु, तःग्वगु प्वा, ताहागु तेपु, धुँयार्थें च्वंगु पुलि  
उँठयार्थेंजाःगु प्यँपा, खवँ उला च्वंगु चिमिसँ, भाजंथें हाकुगु वर्ण  
क्वळूगु पालि, पालि तःले हः दु लुसिनं हाकु, पचिनँ ततःपु, तफा  
जुया फ्याफःगु हाये, सँ छेँ छेँ च्वं बेक्वगु तुति पालि तःले छुं  
चिं मद्दु, थर्थेंजापिं कुलक्षणं संयुक्तपिं अलक्षणापिं मस्त स्वह्य  
जन्म जुल ।

थजापिं अलक्षणापिं मस्त बुइव जुजुया भगडारे हीहिं सम्पति  
पाः जुया वन । देशेनं दुर्भिच्छ जुया वन, हानं जुजु धकानं माने  
यामन्त, गुह्य गुह्येस्याँला देशहे तोताहल । थुखे मन्त्रीयानं याना  
यानागु ज्या स्यनाः सम्पति दक्क नास जुया वन । हानं महाजनयानं  
कायेमचायागुहे दोषं याना-यानागु व्यपार सफल मजुया आपालं  
ऐश्वर्य नाश जुया वन । अनंलि महाजनया अलक्षणाह्य कायेयात  
जातकर्म आदि सिधय्का निभाले तय्हल । थबले लोकपिसँ खनाः  
त्वाः त्वाले व मचाया बिषये थीथि मुना खँ जुल- भीगु देशये  
तच्चतं अजुचायापुगु खँ जुल । थथेला गबले न्यनेहे मलंलि । थ्व  
मचां यानाः जुजु, मन्त्री व महाजनया सम्पति हीहिंहे पाः जुया  
वन । देशे सकल लोकपिं धमाधम तना वना व्वन ।

स्वह्येस्यां मस्त भिच्छदँति जक दय्वला देशे भनहे उपद्रव  
आदि जुया नय्मखना हाहाकार जुया वन । जुजुं अनेकथं शान्ति  
याके बिलनं शान्ति मजु । अथे जूगुलिं लोकपिं वया जुजुयात थथे  
बिन्तियात- हे महाराजा ! भीगु थ्व गौड देश दुर्भिच्छ हाहाकार  
जूगु मूखँ महाजनया जन्म जूह्य काये भिच्यागु कुलक्षणाह्य । अलक्षण  
जूगुलिं थ्व देशे दुर्भिच्छ जूगु खः । अथेया कारणे महाजनया काये  
यात भीगु देशं पितना व्छय्माल, थ्वयात देशं पितना मव्छय्कं  
भीगु देशे शान्ति स्वस्ति जुइ मखु । प्रजालोकपिनिगु थजाःगु खँ  
न्यना जुजु व मन्त्रीया खँ ल्हाना थः अलक्षणापिं कायेपित सुचका  
दुतपिं व्छया महाजनया कायेयात कायेके व्छत । महाजननी, महा-  
जनपिं ख्वय्क- ख्वय्कहे दुतपिसं मचा लाकाः ज्वनाहल । जुजुं वयात

वायेयंकेगु उजं विल । जुजुया उजंकथँ द्रुततसें मचायात हेका थःगु देशँ पिने दुर्नान्तर बने यंका न्ह्यो वय्का च्वंगु इलय् गुईं वाना थकल । द्रुतपिं जक थःगु देशेतुं ल्याहाँ वल ।

गुईं वाना थकूह्य मचाया न्ह्यलं चायेका स्वःबले थःत व्वना हःपिं ब्रह्मनं मखना तच्चतँ ग्याना उखे थुखे माजुल । मामां मामां गनहे लुइके मफया नुगः मझिका ततःसकँ ख्वया माजुल अथेनं थःत व्वनाहःपिं लुइके मफया “आः जि गन वने” धका अनवने थनवने मसिया गन गन लँ दत अन अनं वन । ववं-ववं वया भाग्यं धायेमाल याकनहे नेपाःमण्डले थ्यन । अननं उखे थुखे फ्वना नया जुजुं छन्हु सुलक्षण तीर्थे थ्यन । अले तीर्थे वना स्नान थाना व तीर्थे मोल्हुवैपिके भिक्षा फ्वनानयाः अनहे च्वंच्वन । अन च्वंच्वंहे तःधिकःनं जुया वल । लिपा अन भिखाचा छेँ दय्काः व छेँ च्वनाः फ्वनानयाः तीर्थ सेवा याना च्वन । अन च्वंच्वंहे लिपा फिया चैत्य दय्का पूजाभाव याना त्रिरत्नया सरणनं वनेसःह्य जुल ।

थुकथं व अलक्षणह्य मचाँ नित्य स्नान याना फिया चैत्य दय्का त्रिरत्नया शरण वनाः फ्वनानयाः व तीर्थे च्वंच्वं तीर्थ सेवाया पुण्य प्रभावं उह्य गौड देशयाह्य महाजनया कायेया अलक्षणा फुकं शान्त जुया सुलक्षण जुया वल । थुकथं सुचित्तं तीर्थ सेवा यायां उकिया पुण्य प्रभावं अलक्षण फुकक नास जुयाः सुलक्षण जुया वयाः भिनिदँ दसेंलि दिव्य देह जूगु जुल । थःगु शरीर सुलक्षण जुसेंलि थःगु देशे वने धका मत्तिइ तया तीर्थयाके बिरा कया उह्य शार्थवाह गौड देश पाखे स्वयाः ल्याहाँ वंगु जुल ।

गौड देशे ध्वंका महाजनया काये थःगु छे वन । धबेले  
महाजन महाजननीनं ह्यसीके मफया- छ सु ? धका न्यंबले सुलक्षण  
पुरुषं धाल- जि छलपोलपिनि काये खः । नेपाले सुलक्षण तीर्थे सेवा  
यानागु पुण्यया प्रभावं अलक्षण नास जुया सुलक्षण जूगु खः । जि  
छलपोलपिनिहे काये खः । वा माँपिं पत्या मजुया- छ छु ? जिमिन  
बा माँ नाला जिमिगु अंस ताके यावह्य खः । धका राज पुरुषपिं  
सःता ज्वँकाः जुजुया न्यायालये यंकूगु जुल । जुजुयाथाये ध्यनेव  
महाजनं जुजुयात बिन्तियात- महाराज ध्वं जिमिगु धन सम्पती  
लोभ तथा जिमित माँ अबु नाःवया चवन । ध्व जिमि काये खहे  
मखु । जि कायेला भिन्ध्यागु अलक्षणह्य खः छलपोलनं सिहेस्यु ।

जुजुं आज्ञा जुल- हे सुन्दर पुरुष छ सु ? उह्य महाजनया  
कायेला अलक्षणाह्य खः । जिहे गुईं वाके व्ह्ययागु खः छं छाये  
थथे मखुगु खँ लहानागु ? जुजुया खँ न्यना महाजनया कायेनं  
बिन्तियात- हे महाराज ! जि महाजनया काये खः । छलपोलं वाके  
व्ह्यहनं जिहे खः । तर नेपाले सुलक्षण तीर्थे सेवा यानागु पुण्यं  
जि सुलक्षण जुया दिव्य देह जूगु खः । जि ह्येकागु मखु । थथे  
उह्य पुरुषया खँ न्यना जुजुं बिश्वास याना “थःह्य कायेनं अलक्षणह्य  
खः अकें ध्व लिसे व्ह्यया थः काये राजकुमारयातनं तीर्थ सेवा  
याके व्ह्य माल” धका मत्तिइ तथा थथे आज्ञा जुल- हे बाबु !  
छ सुलक्षण तीर्थे सेवा यानागु प्रभावं अलक्षण नास जुयाः सुलक्षण  
जुया वःगु खःसा जिमि कायेपिनं अलक्षणापिं खः । अकें छ उद्धार  
जूगु तीर्थे यंका राजकुमारयातनं तीर्थ सेवा याकाहिं धका थः काये

यात सःता न्होने तया बिल । एव स्वया मन्त्रीनं थः काये सःताइया  
जि कायेयातनं तीर्थ सेवा याकाहिं धका लःल्हाना बिल ।

अनं जुजुया काये वन्त्रीया काये व्वनाः हानं गौड देशं नेपाल  
देश स्वयाः वंगु जुल । अपिं कुमारपिं स्वह्मं नेपाले सुलक्षण तीर्थे  
थ्यंका भिंच्यागु अलक्षणं युक्तपिं निह्मसितं व तीर्थे मोल्हुका त्रिरत्नया  
शरण व्वया फिया चैत्य दय्के बिया चैत्यपूजा याके बिया तःगु  
जुल । उकथंहे तीर्थ सेवा यायाँ जुजुया काये व मन्त्रीया काये  
निह्मेसियाँ अलक्षण शान्त जुया सुलक्षण जुया दिव्य देह जुया  
वल । अनंलि महाजनया कायेनं निह्मं व्वना थःगु देशे थ्यंकः  
वया राजकुलस वना जुजु, मन्त्रीया न्होने स्वह्मं च्वना महाजनया  
कायेनं विन्तियात- हे महाराजा, मन्त्रीजु ! छलपोलपिनि कायेपिं  
कया बिज्याहुँ धका अलक्षण शान्त जुयाः दिव्य देह जूपिं राजकुमार  
जुजुयात लःल्हाना बिल मन्त्रीया काये मन्त्रीयात लःल्हाना बिल ।

थबले जुजु मन्त्री लोकपिं सकलें अजुगति चाया महाजनया  
कायेयात धन्यावाद ब्यूगु जुल । अनंलि महाजनया काये थःगु छेँ  
वन । अलेतिनि माँ बापिं खुशि जुया कायेयात धन्यावाद बिया  
सुख पूर्वकं च्वना च्वंगु जुल ।

थथे गौड देशया जुजुया काये, मन्त्रीया काये व महाजनया  
काये स्वह्मं सुलक्षण तीर्थे उद्धार जुया वंगु खँ व्वचाल ।





॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण जय तीर्थया महात्म्य



हापा-हापा दानासुर दैत्यया कला; भातं न्हाबले त्वापु जक  
यावइगुलिं मन बितराग जुया उह्य दैत्यनी थःगु देशं प्याहाँ वना  
नेपाले बाग्मतीया सिथे च्वना उपोषध व्रत धारणा याना च्वंगु जुल ।  
छन्दुया दिने फुल्लच्व पर्वते बिज्याना च्वंह्य श्री वसुन्धरा देवी  
प्रशन्न प्रभावती खुसी उत्तर वाहिनी जुया वया दैत्यनीनं व्रत याना  
च्वंगु तीर्थे संगम जूवल । थबले श्री वसुन्धरा देवी प्रत्यक्ष जुया  
दैत्यनीयात आज्ञा जुल छं व्रत यागु पुण्यं याना छं पूर्वजन्मया  
पुत्री प्रभावती छं थ्व तीर्थे उपोषध व्रत च्वंगु पुण्यं याना उद्धार  
जुल । हे दैत्यनी ! हापा छकःनं थ्व तीर्थे बल नांह्य दैत्य छह्य-  
सियाँ तीर्थ सेवा यानाः जय मङ्गल जुया, त्रैलोक्या मालिक जुया  
वन । अथेया कारणं थ्व तीर्थयात जय तीर्थ धका धाःगु खः ।

थ्व तीर्थे आनन्दादि लोकेश्वरया स्नान प्रभाह यायीगु इलय्  
सु बुद्धिमानि मनूतसें स्नान याइ उह्य मानबयात मुक्ति प्राप्त जुइ ।  
गुगु इलय् लोकनाथ थुगु प्रभावती छिकी उगु इलय् सुं मानवर्षि

स्नानयात धाःसा उह्य मनूया शरीर निर्मल जुया अन्तकाले सुखावती  
वास लाइ । गुह्य मनुष्यं जय तीर्थे जप होमादि ब्रत याइ उह्ये-  
सिया फुक्क दुःख नास जुया लिपा भिंगु कुले जन्म जुया अनुत्तर  
ज्ञान प्राप्त जुइ । थुलि आज्ञा जुया श्री वसुन्धरा देवी अनसं  
अन्तर धान जुया बिज्यात ।

दैत्यनीनं व तीर्थे स्नान आदि उपोषध ब्रत यानाः जीवनं  
मुक्त जुया वंगु जय तीर्थया खँ ववचाल ।

( इति श्री स्वयम्भू महापुराणे जय तीर्थ महात्म्य समाप्त )



॥ नमो वृद्धाय ॥ नमो धर्माय ॥ नमो संघाय ॥

## स्वयम्भू पुराण चतुर यूगादि तीर्थ सेवा

थनंलि हाकनं गोपुच्छ पर्वते च्वनाः श्री शाक्यमुनि भगवानं  
मैत्री बोधिसत्वयात आज्ञा दय्का विज्यात- थ्व नेपाले आदि तीर्थ  
उत्तम जुया च्वंगु हापां पुस्य तीर्थ धालसां १. शोधन तीर्थ २. शान्त  
तीर्थ ३. शंकर तीर्थ ४. राज तीर्थ ५. मनोरथ तीर्थ ६. निर्मल  
तीर्थ ७. निधान तीर्थ ८. ज्ञान तीर्थ ९. चिन्तामणि तीर्थ १०.  
प्रमोद तीर्थ ११. सुलक्षण तीर्थ १२. जय तीर्थ । थुलि द्वादश  
तीर्थ सेवा यानाः उच्चार जूगु खँ जुल । आः हानं मेगु उप-तीर्थया  
खँ न्यं ।

हापां बाग्मती मूलया समीपे सहस्र सुन्दरी नागनीनं बास  
याना च्वंगु सहस्र सुन्दरी तीर्थे श्रावण, कृष्ण त्रयोदशी महाप्रवकाले  
गुह्यसिनं स्नान याना तीर्थ व्रतयाइ उह्यसित भिंकथं कामना फल  
प्राप्त जुइ ॥१॥ हानं निगूगु बाग्मतीसँतुं, अगस्त्य ऋषिं कलश  
स्थापना यानाः तीर्थ सेवा वंगु अगस्त्य तीर्थे कार्तिक शुक्लपक्षे  
युगादि नवमि खुन्हु । उगु तीर्थे गुह्यसिनं तीर्थ सेवा याइ, स्नान याइ

उह्यसित मनोरथ पूर्ण जुइ ॥२॥ हानं बाग्मतीसँतुं, आपालं नागतसें  
बास याना च्वंगु अनन्तहृद तीर्थे माघ शुक्ल पुहीखुन्हु गुह्यसिनं  
स्नान याना तीर्थ सेवा याइ उह्यसित अक्षय धनया धुकू जुइ ॥३॥  
हानं बाग्मतीसँतुं ताराहृद तीर्थे बैशाख शुक्ल तृतीय खुन्हु गुह्यसिनं  
स्नान, तीर्थ व्रत याइ उह्यसित सर्व भय शान्त जुइ ॥४॥

वाग्मती तीर्थ दक्के प्रधान- तधना च्वंगु तीर्थ खः । थ्व  
तीर्थे छकः जक स्नान याःसां आपालं फल प्राप्त जुयाः बचन, मन,  
शरीर शुद्ध जुया चतुर्ब्रह्म विहार धारणा याये फया, पूण्य सम्भारं  
पूर्ण जुया अनुत्तर संम्यक्सम्बुद्ध जुइगु तक्कं फल प्राप्त जुई । दश  
भुमीश्वर जुया श्रावक, प्रत्येक, महायानया ज्ञाननं लाभ जुइ । हानं  
गुह्य पुण्यात्मापिं शंख पर्वते थाहाँ वना गुह्य मनुष्यं उपोषधे च्वना  
ध्यान भावना याइ, योग याइ उह्य मनुष्ययात सकल सिद्ध फल  
प्राप्त जुया समस्त पापं मुक्त जुइ । थुगु जन्मे सकल ऐश्वर्य पूर्ण  
जुया अन्त काले उकें सुगती प्राप्त जुइ । थथे नेपाले आपालं मूल  
तीर्थ उप-तीर्थ दया च्वन ।

मूल बाग्मती, केशावती, मणिरोहिणी आदि मेमेगु खुसिनं  
गन गन संगम जुल अन अन महातीर्थ, उपतीर्थ धयातल । पुखु, दहँ,  
बुंगा, खुसी अने-अनेगु थासे तीर्थ धका धयातल । थथे तीर्थ  
पत्ति यथाविधिथे स्नान दान व्रत याना वइ उगु पुण्यं याना उह्य  
मनुष्यपित थःगु इच्छा थे फल लाभ जुया अन्ते मोक्षगति प्राप्त  
जुया वनी । थथेया कारणे मनुष्यपिसँ तीर्थ सेवा- स्नान, फिया  
चैत्य दय्का, पूजाभाव, त्रिरत्नया शरण, उपोषधे च्वना धर्म याई

उगु पुण्यं याना चित्त शुद्ध जुया सकल कर्म शिद्ध जुया थुगु जन्मे सुख सम्पति प्राप्त जुया अन्ते मोक्ष प्राप्त जुइ । कल्याण सदगुणं सम्पति लायेगु इच्छा याइपिसँ थुगु महान् उत्तमगु द्वादश अष्टवैतराग उपतीर्थे वना स्नान दानादि कर्म याना त्रिरत्नया शरण वना उपोषधे च्वने माः ।

थथे श्री स्वयम्भूया प्रभावं द्वादश तीर्थ आदि नाना तीर्थ दया वसेलि ब्रह्मा, विष्णु, महेश्वर, इन्द्रादि देवतापि सकलें थथः परिवार आदि वना छत्र ध्वज पताकार आदि ज्वना अनेक बाद्य थाना हर्ष पूर्वकं नेपालया तीर्थ सेवा याना श्री स्वयम्भू दर्शन पूजा याना वंगु जुल । भगवान बुद्ध आज्ञा जुया विज्यात- जिनं हापा- हापाया जन्मे थ्व नेपाल महामण्डले अनेक दया च्वंगु तीर्थे स्नान दान याना त्रिरत्नया शरण, उपोषध व्रत साधना याना वयागु धर्म थुगु जन्मे त्रिमण्डलशुद्ध जुया निर्मल आत्मा जुया चतुर ब्रह्म बिहार धारणा याना सदगुणया स्थान जुया सकल बोधिसम्भारं पूर्ण जुया मारगणपित त्याका राग, द्वेष, मोह त्याग याना बोधि ज्ञान लाना तथागत जुया संसार उद्धार यायेगु चित्तोत्पति जूगु खः ।

हे मैत्री बोधिसत्व ! छिमिसँनं थथे धका सीका बोधि ज्ञान लायेया कारणे सकल तीर्थ पत्ति स्नान या, त्रिरत्नया शरण उपोषध व्रते च्वँ, श्री स्वयम्भू ज्योतिरुपयात भावना याना बोधि व्रत चले या । थुगु पुण्यया फलं छिपिं गबलेसँ दूर्गती जन्म जुये म्वाला सदां सदगती जक जन्म काये दै । त्रिरत्नया सेवा यानाः त्रिरत्नया सेवा

यानागु फलं, तीर्थ सेवाया फलं कायवाक्चित्त शुद्ध जुया संसारे  
 दक्वसितं उद्धार याये फइ । अनंलि निर्मल आत्मा जुया चतुर  
 ब्रह्म बिहार धारणा याये फुह्म बोधिज्ञान लाना अन्ते मोक्ष पद  
 लाइ । थथे सकल सभा मण्डल स्वया श्री शाक्यमुनिं आज्ञा दय्का  
 बिज्यागु जुल ।

( इति श्री स्वयम्भू महापुराणे अष्ट वैतराग, द्वादश तीर्थादि महात्म्य वर्णनोनाम पञ्चमोऽध्याय समप्त )





॥ नमो बुद्धाय ॥ नमो धर्माय ॥ नमो सत्ताय ॥

## स्वयम्भू पुराण षष्ठोऽध्याय प्रारम्भ



द्वादश तीर्थया खँ न्यने धुंका मैत्री बोधिसत्त्वं मन प्रशन्न  
याना लाहात हाजोपा श्री शाक्यमुनीन्द्रया चरणे भवपुया हानं थथे  
बिन्तियात- हे शास्ता ! छलपोलया अनुग्रहनं तीर्थया फुक्क खँत  
न्यने धुन, आः हाकनं थुगु आदिबुद्धया निर्माणकाय श्री स्वयम्भू  
यात छुया कारणे श्री धर्मधातु बागिश्चर धका धाःगु खः थुगु खँ  
कृपातया आज्ञा दय्का विज्याहुँ । थथे मैत्री बोधिसत्त्वया बिन्ति  
न्यना श्री घन, तथागतं आज्ञा दय्का विज्यात- हे मैत्री बोधिसत्त्व !  
मन तथा न्यँ, श्री स्वयम्भूयात धर्मधातु बागीश्चर धका लाये धाल  
धइगु खँ जिं कने ।

हापा- हापा मनूतय् आयु स्वीदोदँ परमानं दया च्वंबले  
शोभावती नगरे श्री कनक मुनि नां जुया च्वंछ तथागत जुया  
बिज्यात । वसपोल संम्यक्सम्बुद्ध जुया सकलसियाँ गुरू जुयाः दक्क  
धर्मया जुजु जुया मुनि मध्ये मुनीन्द्र सर्वज्ञ जुयाः, देव मनुष्य

पिनि शास्ता जुया विज्याना च्वन । उगु इलये जि सद्धर्म राज  
नांह्य बोधिसत्त्व जुयाः कनकमुनि तथागतया संघ जुया च्वना ।

हे मैत्री बोधिसत्त्व ! उगुहे इलये बाराणसी धयागु काशी  
शहरे विक्रमशील महाविहारे धर्म श्री मित्र धयाह्य ब्रह्म महापरिणत  
भिक्षुं प्यंगु बर्णया ब्राह्मण, चेत्री, वैश्य व शूद्र आदि सारा  
भिक्षुसंघपिं सहित आपालं लोकपिं सुंका नाम संगीतिया अर्थ व्याख्या  
यानाः धर्मकथा कना च्वंगु जुल । थयिगु महा उत्तम जुया च्वंगु  
नाम संगीतिया धर्मकथा न्यना सभालोक सकलें सर्व धर्म सम्बुद्धया  
महात्मा धका प्रशंसा याना चित्त बोध यानाः लोकपिसँ धर्म श्री  
मित्र, महापरिणतयात सुभाय् बिया च्वंगु जुल । थुकथं ह्रीहिं  
विक्रमशील महाविहारे नाम संगीतिया खँ कना च्वँच्वं छन्हु द्वादशाक्षर  
अआ ईई उऊ एऐ ओऔ अंअः ऋनिगः आखःया अर्थ ब्रयाये  
मफया धर्म श्री मित्रया अथे याये थथे याये मदया उखुन्हु बाखँ  
कनेगुहे दीमाल । बाखँ दित, सकलें “थौं याकनंहे बाखँ दित”  
धाधौं थथःगु छेँ ल्याहाँ वन ।

धर्म श्री मित्र परिणतया मने “आः गथे याये ! सकसिनं  
उलिहे द्वादशाक्षरया खँ कने मफुह्य धाइ” धका धन्दा कया च्वन ।  
वं बाराणशी क्षेत्रे मेपिं सःस्युपिके वना द्वादशाक्षरया अर्थ न्यनेगु  
बिचाः मया । वयात मसःह्य धाइ धका । वं “महाचीने पञ्चशीर्ष  
पर्वतस विज्याना च्वंह्य महामञ्जुश्री गुरुया निर्माण काय मञ्जुदेवा-  
चार्य, वसपोल महाभिक्षु सकल विद्याया अधिपति, वचनया मालिक

सर्वसत्त्वया गुरु जुया विज्याह्य । थथिह्य मञ्जुदेवाचार्याथाये वना  
नामसंगीतिस वया च्वंगु द्वादशाक्षरया अर्थ व ब्याख्या न्यनाः सीका  
वय्" धका मत्तिइ तया धर्म श्री मित्र उखुन्दुया चान्हेहे दना  
विक्रमशील महाबिहारं सुनाहे मसीक प्याहाँ वया महाचीन वने धका  
प्रस्थान जुल ।

अबले महाचीन वनेत नेपालेहे जुकाः वने मागु जूगुया निम्ति  
धर्म श्री मित्र ववं-ववं नेपाल मण्डले थ्यंक वल । थबले श्री  
साम्ब्यांगु पर्वते विज्याना च्वंह्य परचित्त ज्ञान सिया विज्याह्य श्री  
मञ्जुदेवाचार्य गुरु धर्म श्री मित्र वःगु पञ्चाभिज्ञया प्रभावं सीका  
"धर्म श्री मित्रं जितः नापलाये धका महाचीने वनेत थन थ्यंकः  
वल, थ्वयात जिं परिश्रम याकेमखु । जिगु ऋद्धि दलं न्ह्योने थ्यंक  
वना दर्शन बिये" धका बिचाः याना गोपुच्छ पर्वतं क्वहाँ विज्याना  
थः हल वाइह्य सा जवा जुया ज्याथ (बुरा) यागु रुप धारणा  
याना ज्यापु जुया मिह शार्दुर निह्य हले घाना हल ज्वते  
याना च्वन ।

थुगु इलय् महाचीन वने धका वःह्य महापरिणत चीन वनेगु  
लँ मसिया गनवने गनवने जुया च्वन । निभायो लुकुबिया ह्याउँ  
निभा जुया च्वन । भंगःतनं च्यारचिर हाहाँ सर्गते ब्वब्वं थथःगु स्वः  
माः जुया च्वन । उखेनं बुँ उखेनं बुँ, बुँया फाँते धर्म श्री मित्र  
यामं यामँ वना च्वन । चीन वनेगु लँ मसिया सुयाके न्यने सुयाके  
न्यने जुयाः उखे थुखेँ मिखा ब्वब्वं वना च्वंबले तापाकँनिसें हल  
ज्वते याना च्वंह्य छह्य बुराह्य ज्यापु खनाः "वयाकेहे चीन वनेगु लँ

न्यने मालि" धका मत्तिइ तया धर्म श्री मित्रं तापाकंहे ज्यापुयात  
सःतल- हे आवा ! हे ॐ आवा !!

ज्यापु- छाय् ॐ भाजु ?

परिडत- हे आवा ! चीन वनेगु लँ गुखे पाखे खः हाँ ?

ज्यापु- चीन वनेगु लँ यक्वहे तापानि भाजु ।

परिडत- हे आवा चीन वनेगु लँ जक कनाब्जुरे !

ज्यापु- अथे मखु भाजु चीन वनेगुला यक्वहे तापानि । आः  
द्योनं बी धुंकल, अकें थौं जिगु छेनिं बासँ च्वना बिज्याहुँ बरू  
कन्हे जिं लँ केना बिइका मज्यूला ?

थथे खँ ल्हाल्हाँ धर्म श्री मित्र न्हावना च्वच्चँ व बुराह्म  
ज्यापुं सिंह शादुरत निह्म घानाः हल जोते याना च्वंगु खनाः  
परिडत भसंग वन, ग्यात । ज्यापुं सःतल- थन वारे ! धर्म श्री  
मित्र धाःसा भन ग्याः पहलं ल्याहाँ वनी । ज्यापुं हल तोता धर्म  
श्री मित्रयाथाये वयाः- स्व भाजु महाचीन वनेगुला यक्वहे तापानि  
थौं चच्छि जिगु छे च्वनाः कन्हे ह्वापां दनाहुँ जिं कनाब्ज्यु । द्यो  
ख्युँख्युं धाल ज्यापुं व धर्म श्री मित्र नाप खँ ल्हाल्हाँ छे ब्वनायेन ।  
द्यो ख्युँसेहे च्वन ।

मञ्जुदेवाचार्य सिंह शादुर तया हल जोते यागु थाये थौंया  
अद्यापि मञ्जुश्री भूमि धालसां सावा भूमि धका दहेदनि । भेषधारी  
ज्यापुं धर्म श्री मित्रयात पिरीसंतुं बाये व्यूगु जुल । बहनीसिया  
नय्नी सिधय्व द्यने त्यसेलि धर्म श्री मित्र पिने पिरी ग्वतुल ।  
न्हाः मवःनि ज्यापुंनँ घाराङ्ग खापा तिनाहल खवनं ख्वाराक्क तल ।

धर्म श्री मित्र द्यनेत सन न्ह्यः मव । व बुराह्म ज्यापुयाला त्यासेपिं  
 कला निह्य दुगु जुया च्वन खनी, क्वारा-क्वाराँ कला भात खँ हाना  
 च्वन । पिने च्वंह्य धर्म श्री मित्रया द्यने मफया थथे धका मत्तिइ  
 तल “गजाथाये वासँ च्वंवय्लात, थजाह्य बुराह्म ज्यापुया निह्य निह्य  
 त्यासेपिं कला ! द्यनेनं स्वाःला ! छुया खँ थ्व क्वारा क्वारा” धका  
 धर्म श्री मित्र तीजक दनाः कलाभात खँ लहाना च्वंथाये क्वँय्प्वाः  
 हते हायेपं दिका खँ न्यना च्वन । दुने थथे धका खँ लहाना च्वन-  
 वरदा, मोक्षदा धालसाँ केशनी, उपकेशनीपिसँ थः भातयात थथे  
 विन्ति याना च्वन- हे मञ्जुदेवाचार्य ! हे नाथ ! छःपिसँ व्वना  
 हयाह्य सु थ्व ? गनं वःह्य ? पण्डित भिन्नुथें च्वं, सु थ्व ? थथे  
 कलापिनिगु खँ न्यना मञ्जुदेवं आज्ञा जुल- हे केशनी, उपकेशनी !  
 थ्व वारानसी देशं वःह्य महापण्डित धर्म श्री मित्र खः । थ्व छाये  
 थन वल धाःसाँ विक्रमशील महाबिहारे सकल सभालोकपित नामसंगीति  
 व्याख्या यानाः कना च्वन । छन्हुया दिने द्वादशाक्षर थ्यँसेलि उगु  
 किंनिगः आखःया खँ कने मफया तच्चतं मछालाः भीगु देश  
 महाचीने वनाः जिके द्वादशाक्षरया अर्थ न्यने धकाः वःह्य खः । आः  
 भी थन च्वँच्वनागुलिं थ्वइत महाचीन थ्यंक वळये मखु धका  
 जिं ऋद्धि बलं थ्वयात थन व्वना हयागु खः तर थ्वं जितः  
 ह्यसीके मफत ।

थुकथं मञ्जुदेवाचार्य देवीपित कना च्वंगु खँ क्वँय्प्वाः हते  
 हायेपं प्वाः दिका न्यना च्वंह्य धर्म श्री मित्र फुक्क खँ न्यना  
 “अहो ! जिं गथे गुरूयात ह्यसीके मफत” धका लुखा खलुसँ भवसुनाः न्ह्यो



वयेका च्वन । थुखुन्हुया चा फपुलाः सुथ जुसेलि देवीपिं पिहाँ  
 बिज्यायेत खापा खंत्रले लुखा खलुस भवसुना च्वंहा धर्म श्री मित्र  
 खनाः थव स्वामि मञ्जुदेवाचार्ययाथाये वना बिन्तियात- हे नाथ !  
 ह्मिगःयाह्म पण्डित भित्तु भीगु लुखा खलुइसं भवसुना च्वन । थथे  
 वरदा देवीया खँ न्यनाः श्री मञ्जुदेवाचार्य गुरू वनाः धर्म श्री मित्रया  
 लहाः ज्वना आज्ञा जुल- हे धर्म श्री मित्र ! दँ दँ । थथे गुरू  
 मञ्जुदेवं थनेवं धर्म श्री मित्र भसंग न्ह्यलं चायेकाः गुरूया पालि भवपुया  
 बिन्तियात- हे गुरू ! जिं छलपोलयात ह्मसीके मफुत चमा  
 याना बिज्याहुँ ।

हे मञ्जुदेवाचार्य गुरू ! छलपोलयात कोटि कोटि नमस्कार ।  
 हे गुरू ! जि थन वयागु छलपोलं सिहेस्यु, हे गुरू ! जितन ।मसंगीतिस  
 च्वंगु द्वादशाक्षरया अर्थ कना बिज्याहुँ । थथे धर्म श्री मित्रया  
 बिन्ति न्यना मञ्जुदेवाचार्य आज्ञा दयेका बिज्यात- हे धर्म श्री  
 मित्र ! बिना अभिषेक मलाःह्मयात गथे कने ? अथेया कारणे यथा  
 बिधियेँ छं अभिषेकनिं का । बिना अभिषेकनं द्वादशाक्षरया अर्थ  
 कनेमज्यु धका आज्ञा दयेका बिज्याःगु खँ न्यना धर्म श्री मित्रं हात  
 हाजोपा मञ्जुदेव गुरूया चरणे भवपुया थथे धका बिन्तियात- हे  
 गुरू ! छलपोलं अभिषेकनिं का धका धया बिज्यात । अभिषेक कायेत  
 जिं गुरू दक्षिणा बीत जिके छुं धन सम्पति मदु । छु दक्षिणा  
 बिये ? दक्षिणा मबियेकं जितः छु फल लाइ, छु सिद्धि दइ ? बिना  
 दक्षणां ज्ञानि जनं सिद्धिं गुरू याके विद्या आदि गथे अभिषेक  
 काये ? धका बिन्तियात । थुलि धर्म श्री मित्रया खँ न्यना गुरूं आज्ञा



जुया बिज्यात- हे धर्म श्री मित्र छंगु भाव दसेंलि, श्रद्धा भक्ति दसेंलि धन सम्पति छुयायेत माःगु ? श्रद्धा भाव मदुहोसिया धन दयानं छुयाये ?

गुरू धयाहोसित श्रद्धा भाव दुह्य शिष्य दत धाःसा गाः थुकिंहे संतुस्त जुइ । धनं सिद्धि दैमखु, सम्पतिं सिद्धि लाइ मखु श्रद्धा भाव भक्ति मदुह्य, चित्त सुद्ध मजूह्य, क्लेशावर्ण मुक्त मजूह्य, तृष्णाक्षय मजूह्य, गुरू स्वया जि सः धका जुइह्य, गुरूयात दोष तयाः खँ लहाइह्य थजाःह्य गुरू द्रोहिं मन्त्र कयाः न्यासय् च्वंसाँ भावना याःसाँ थथेजाःह्य द्रोहियात छुं सिद्धि फल दैमखु । गुरू धयाहोसित श्रद्धा दुह्य शिष्य दयेवं सन्तोष जुइ धनं सन्तोष जुइ मखु । थथे छंके श्रद्धा भाव गुरू सेवा छंके दसेंलि धन मदु धका सन्देह कायेम्वा धका मञ्जुदेवं आज्ञा दय्का बिज्यात ।

थथे गुरूया आज्ञा न्यना धर्म श्री मित्रं मन आनन्दयाना हर्षपूर्वकं गुरूया चरणे प्रणाम याना बिन्तियात- हे गुरू ! छलपोल श्रद्धा, भक्तिभाव मात्रं सन्तुस्त जुसेंलि जिं छलपोलया सेवा दयेगु निश्चय जुल । हे गुरू ! जित कृपा दृष्टि स्वया बिज्यानाः यथा बिधित्थे दिक्षा बियाः द्वादशाक्षरया अर्थ जित कना बिज्याहुँ धका बिन्तियात । थथे बिन्तियाःगु न्यना गुरूं आज्ञा दयेका बिज्यात- हे वत्स ! हे बाबु ! छं श्रद्धा भाव दसेंलि जिं अभिषेक बिये । छं चित्त प्रशन्न याना भिनकं धारणा या धका आज्ञा दयेका बिज्यानाः श्री स्वयम्भू ज्योतिरूपया न्होने हिरा, नील, पुष्पराम, माणिक व पन्ना थथे न्याता रत्न चूर्ण याना प्वताये दयेका श्री मञ्जुदेवाचार्य बिधित्थे

श्री धर्मधातु वागीश्वरया मण्डल चवया उगु मण्डल भिनकं आराधना  
 याना बिधिपूर्वकं पूजाभाव याना थह्मनं प्रशन्न चित्त यानाः धर्म श्री  
 मित्रयात मण्डल दर्शन विया पञ्चाभिषेकादि चतुर्दशाभिषेकादि विया  
 द्वादशाक्षरया गुह्यार्थ बाह्यार्थादि कना विज्यानाः लिपा गुरूं हानं  
 थुबिनं आज्ञा जुया विज्यात- हे शिष्य ! थ्व गुह्यार्थ व बाह्यार्थ  
 पात्र विचाः यानाः जक कने दु । श्रद्धा भाव भक्ति मटुपिन्त कने  
 मटु । थ्व न्यनेत ह्येकी, धन बी, लोभ क्यनी, ऐश्वर्य बी अथेनं विचाःमयासें  
 कने मटु । हक्काः, रुयानाः न्यनेत सनी तर विचाःमयासें कने मटु ।  
 गुह्येसिया श्रद्धा दु वयात जक कने । भावभक्ति दुह्येसित जक । हे  
 शिष्य ! आः छं गुरू दक्षिणा छुं मटुसाँ छं श्रद्धा भक्तिभाव दसेलि  
 उकेहे जि सन्तुस्त । गन उत्तमह्य शिष्य दत अन धन सम्पत्ति  
 स्वयाःनं तःधं । अथे जूगुलिं गुरूयात शिष्यजोह्य उत्तम ऐश्वर्य मेगु  
 मटु । शिष्ययातनं गुरूजोह्य उत्तम मेगु छुं मटु । आः थनीनिसें  
 छ जिह्य परम शिष्य जुल काये समानह्य जुल, धका श्री धर्मधातु  
 वागीश्वरया अभिषेक वियाः व मण्डले च्वंप्पिं देव देवी कथःथे  
 क्यना श्री द्वादशाक्षरया गुह्यार्थ कथं यानाः धर्म श्री मित्रयात  
 दिक्षा व्यूगु जुल ।

थबले धर्म श्री मित्रं मञ्जुदेवाचार्य पासें उगु अभिषेकथा अर्थ  
 ज्ञाभ यानाः द्वादश भूमिया गुह्य ज्ञान प्राप्त याःह्य जुल । थनंलि  
 धर्म श्री मित्रं मञ्जुदेवाचार्य गुरूयात थःगु शरीरया रत्न मण्डल  
 दय्का आत्मा सहितं गुरू दक्षिणा दोहलपा चरण कमले अष्टाङ्ग  
 प्रणाम यानाः थुकथं विन्तियात- हे गुरू ! छलपोलया कृपानं छल-  
 पोलया दयां जिगु मनोवांछा पूर्ण जुल । श्री सतगुण अर्थ धारणा

यानाह्म जि जुल, जि सदाकालं छलपोलया शरणे च्वनाः गये धन  
 छलपोलं आज्ञा जुल अथेहे जि चले यायेगु जुल । हे गुरु ! उकें  
 छलपोलं संबोधिज्ञान साधना यायेगु जितः आज्ञा दयेका विज्याहुँ  
 धका विन्ति यासेलि गुरु मञ्जुदेवं शिष्यया शुद्ध चित्त खना सम्बोधि  
 चर्याया क्रम आज्ञा दयेका विज्यात- हे साधु जुया च्वंह्य ! सदाकालं  
 ध्व संसारे बोधिज्ञान साधना यानाः संसार हित यायेया निमित्तं  
 बोधिचर्या व्रत चले या । बोधिव्रत चले यासेलि थुगु धर्मया प्रभावं  
 पुण्य शरीर जुयाः मन वचन शरीर शुद्ध जुयाः बोधिसत्त्व जुइ । हानं  
 महाभिज्ञ पद लाना सद्गुण सम्पत्तिया खानि जुया बोधि सामग्रिं सम्पूर्ण  
 जुया राग, द्वेष, माया, मोहादि मारचर्या नास जुया श्री सम्यक्सम्बुद्ध  
 पद प्राप्त जुइ ।

हे धर्म श्री मित्र ! थुलि जिगु खँ न्यनाः मन समाधान  
 याना वारम्बार लुमंकाः बुद्ध धर्म संघया शरणे च्वना ध्यान याना संसार  
 हित यायेत चलेया । थनंलि संसार हित याना सम्बोधि चित्तस  
 निश्चय याः मया स्वयाः श्रावक, प्रत्येक, महायान ध्वते स्वंगु यानया  
 धर्म उपदेश त्रियाः बोधिचर्यास ति । थुकथं चले यानागु धर्मया  
 प्रभावं याकनं सुद्धात्मा जुया सम्बुद्धया पद लाना जगतस धर्म न्यंकागु  
 फलं निर्वाण पद प्राप्त जुइ । हे वत्स, धर्म श्री मित्र ! थुलि ज्ञान  
 छं मनस दृढ याना थःगु बिक्रमशील महाबिहारे वना हापायार्थे  
 नामसंगीतिया व्याख्या यानाः पात्रत बिचाः याना द्वादशाक्षरया अर्थ  
 नं प्रकाश यानाः कहुँ । छं धर्म व्याख्या याःगु जिनं छगुबार न्यो  
 वय् मज्जूला ? धका मञ्जुदेवाचार्य आज्ञा जुयाः धर्म श्री मित्रयात  
 बिरा बिल ।

थथे गुरुया आज्ञा न्यनाः धर्म श्री मित्रं कृत्तंजलि याना  
 गुरुयात स्वयाः विन्तियात-- हे गुरु ! थुलिमछि ऋद्धि क्यना बिज्याःसां  
 जिं छलपोलयात ह्यसीके मफु । थथिह्य छलपोल जिथाये धर्म देशना  
 न्यों बिज्याइबले जि मुखं छलपोलयात ह्यसीके फइला ? छःपिं  
 धाःसा महर्द्धिह्य बिश्वरूप कया बिज्याये फुह्य छलपोलयात जिं गथे  
 याना ह्यसीका कायेगु, छःपिं छु रुपं बिज्यायेगु ? थुलि बिन्ति न्यना  
 गुरुं आज्ञा जुया बिज्यात-- हे वत्स ! जि न्ह्यागु रुपं वःसाँ उफोस्वां  
 ज्वना वःह्य जि धका छं ह्यसीका का । थुलि गुरुया आज्ञा न्यना  
 हानं धर्म श्री मित्रं विन्तियात - हे गुरु ! जि खना छलपोल सदा  
 कालं प्रशन्न जुया बिज्यायेमाः । थौं जिं गुरु दक्षणा छुं चधेयाये  
 मफु थजाःगु जिगु सहस्र अपराध क्षमायाये माः । हे गुरु ! छलपोलया  
 आज्ञार्थे संसार उद्धार यायेया कारणे नाम संगीतिया अर्थ व्याख्या  
 यायेत जि वने धका धर्म श्री मित्रं चित्त प्रशन्न यानाः श्री मञ्जुदेव  
 गुरुया चरणे भवपुया हानं गुरुमां पिं वरदा व मोक्षदा निहोसिगु  
 चरणेनं भवपुया विरा कया धर्म श्री मित्र थःगु देश विक्रम शील  
 महाबिहारे वने धका गुरुया थासँ कासी शहर स्वयाः ल्याहाँ  
 वंगु जुल ।

धर्म श्री मित्र कासी शहर थ्यन । अन थ्यना कह्य् खुन्हुं  
 हे भक्तजनपिं आपालं मुंका विक्रमशील महाबिहारे सभामण्डल दयेकाः  
 नामसंगीतिया व्याख्या यानाः पात्रत ह्यसीका द्वादशाक्षरया गुह्यार्थ  
 बाह्यार्थ प्रकाश यानाः धर्मकथा कना च्वंगु जुल । थजाःगु इलय्  
 श्री मञ्जुदेवाचार्य गुरुं थः शिष्य धर्म श्री मित्रया मन स्वय् धका

थुगु नेपाल मण्डल तोता कासी देशया विक्रमशील महाविहारया  
समीपे थ्यंकः विज्यात । अन थःगु रुप तोता, महाकुष्ठ रुप जुया,  
हाकुसे जीर्ण जुया च्वंगु वसतं पुनाः हि स्वाल्याहाँ, लाः प्याल्याहाँ  
थ्यकाः ह्यछह्य' ध्वगी नवयेका भुजितयेसँ ह्यायायाँ भुंका उत्पल  
पुष्प धयागु उफो स्वां छफो ज्वना तुतामं चुया बिहारे  
इहाँ वल ।

बाखँ न्यना च्वंपिसँ नवयेक स्वयेहे घचायापुसे च्वंह्य द्राहाँ  
वःगु खनाः सकलेँ कालाकुलु हाल । धर्म श्री मित्रं तानाः छाये हाःगुथें  
धका मिखा व्वय्का स्वःबले उफोस्वां खना वःह्य स्वयेहे घचायापुसे  
च्वंगु रुपं वःह्य खनेवं उफोस्वांया चिनं गुरु धका ह्यसीका मखंछु  
याना मेथाये स्वया बाखँ कन । व महारोगि बुरा उखे पाखेहे स्वया  
वल, धर्म श्री मित्रं हानं मेथाये स्वया बाखँ कन उखेहे तीजक  
खने दयेकः वल । धर्म श्री मित्रं उफोस्वांया चिनं गुरु धका ह्यसीका  
थथे मत्तिइ तथा च्वन “अहो आश्चर्य ! गुरु मञ्जुदेवं गुजोगु कुष्ठरुप  
धारणा यानाः हाकुगु वसतं पुनाः गपायेच्वतं घचायापुसे च्वंगु रुपं  
विज्यागु ! आः जिं गथेयाये ? थथे जिं गुरु धका दनावना नमस्कार  
याना भागि याः वनेला धाःसाँ थ्व लोकपिसँ जित फ्वर्गिया शिष्य  
धाइ, हानं गुरु मखु धाये धाःसाँ साक्षात् मञ्जुदेव गुरुहे खः । जिं  
गथेयाये माल ?” धका मनं खँ ल्हानाः धर्म श्री मित्रं गुरुयात खंसँ  
मखंछु यानाः बाखँ कना च्वन । गुरु धाःसा गुखे गुखे स्वयाः कन उखे  
उखेहे स्वयाः दं वना च्वन ।



धर्म श्री मित्रं गुरु नाले मळाला याकनंहे बाखं कनेगु दित ।  
 न्यंवया च्वंपिं सकलें “धौं बाखं याकनंहे सिधल का” हाहाँ थथःगु  
 छें वन । गुरुनं बिमुख जुया प्याहाँ वने त्यन । थबले लोकपिं  
 सुंमदय् धुसैलि धर्म श्री मित्र आशनं दनावनाः “नकतिनि खनाथें  
 च्वंक गुरुयात पालि भूपुइ” धका भव्य-भव्यकंक व्वाय् वनाः मञ्जुदेव  
 आचार्ययात नकतिनि खंह्यथें यानाः गुरुयात बिन्तियात- हे गुरु !  
 छलपोल नकतिनि बिज्यानाला ? छलपोल बिज्याःगु जिं मखना । लिपा  
 तिनि उफोस्वांया च्विनं छलपोल थन बिज्यात धका सीका धका  
 मखुगु खँ ल्हाना गुरुया चरणे भूपुल । थबले खनाःनं मखना धका  
 मखुगु खँ ल्हगु, गुरुयात खंसाँ मखंछु याःगु पापया फलं धर्म श्री  
 मित्रया मिखा निगलं गुरुया पाली कुतुंवन ।

धर्म श्री मित्रं मिखां मखन, कां जुल । अले धर्म श्री मित्रया  
 गुरुद्रोहि यानागु पापं कां जुयेका पश्चाताप चाया गुरुयात थथे धका  
 बिन्तियात- हे गुरु ! जि अज्ञानिया अपराध क्षमा याना बिज्याहुँ ।  
 जिं गुरुयात नाले मळाला खंसाँ मखंछु यानाः गुरुद्रोहि जुया, मखुगु  
 खँ ल्हाना । हे गुरु ! जिगु थ्व अपराध क्षमा यानाः जितः मिखां खंका  
 बिज्याहुँ धका नुगः मळिका थुकथं हालाः बिलाप याना च्वन ।  
 धर्म श्री मित्रं थुकथं बिलाप यानाः बिन्ति याःगु कृपाया समुद्र जुया  
 बिज्याःह्य श्री मञ्जुदेवाचार्य स्वयाः अति करुणा तथा थुकथं आज्ञा  
 दयेका बिज्यात- हे धर्म श्री मित्र ! आः छुयाये ? गुगु थह्यं लज्जा  
 चाया जितः गुरु धका नाले मळाला खनाःनं मखना धका मखुगु  
 खँ ल्हःगु फलं आः छँ भोगयाये माल ।



छंगु मिखा जिं कयागुनं मखु लिकाये फुगुनं मखु । संसारे  
 शुभाशुभ कर्मफल अवश्यनं भोग याये माःगु जुया च्वन । थह्यं  
 पुसा पिनागु फल थह्यं भोग याये माःगु जुया च्वन । थह्यं यानागु  
 मभिगु फल जितः मयः भायेमज्यु, मेपिसँ काये ज्यूगुनं मखु । आम  
 थह्यं याःगु कर्म थह्यं भोग यायेमाल । जिं याये ज्यूगु मखु, अवश्य  
 छं गुरुद्रोहि याःगुया कर्म आः छं भोग यायेमाल । अथेनं हे धर्म  
 श्री मित्र ! छं मिखां मखंसाँ नुगलं ज्ञानदृष्टिं, गथे मिखां खनीगु खः  
 वथे'तुं नुगलं खनेमा । ज्ञानदृष्टिं खँसेलि छंगु नां ज्ञान श्री मित्र  
 धका प्रख्यात जुइ । आः छं ज्ञानदृष्टिं बिचार यानाः हापायार्थे  
 सधर्म उपदेश बियाः बोधिचर्या चले याना च्वँ धका धर्म श्री  
 मित्रयात ज्ञान चक्षु धालसाँ भंसंमिखा, नुगः मिखां खंकाः श्री  
 मञ्जुदेव गुरु उगु थासँ नेपाल मण्डले गोपुच्छ पर्वतय्तुं ल्याहाँ बिज्याःगु  
 जुल । अनंलि वरदा व मोक्षदा देवीपिसं पादार्घ याका थःगु आश्रमे  
 बिज्यात । थबले वरदा व मोक्षदापिसँ बिन्तियात- हे स्वामि !  
 छलोपोलया पाली मिखा निगःया चिं गथेदत धका न्यँसेलि श्री  
 मञ्जुदेवं धर्म श्री मित्रयागु खँ फुक्कं कना बिज्यात ।

धर्म श्री मित्र उखुन्हुया दिनंनिसें ज्ञान श्री मित्र धका नां  
 जुइका ज्ञानदृष्टिं सकल पदार्थ खंका हापायार्थे सद्धर्म ब्याख्या  
 यानाः संसार हित यायेगु मत्तिइ तयाः च्वंच्वन ।

भगवान बुद्ध आज्ञा जुया बिज्यात-- हे मैत्री बोधिसत्व ! गुखुन्हु  
 धर्म श्री मित्रयात धर्मधातु मण्डल निर्माण यानाः दिक्षाभिषेक बिल  
 उखुन्हु निसें श्री स्वयम्भू ज्योतिरुपयात श्री धर्म धातु बागीश्वर धका

प्रख्यान्त जुल । धातु धयागु धुक्क धर्मया खानि, सकल वच-  
नया मालिक । वसपोलयात दर्शन याना अभिषेक लायेवंहे सकल  
गुह्यार्थ सियाः सकल पापं मुक्त जुया मोक्षपद लाइ । धुकिया निम्ति  
गुह्येस्यां थथे सीका स्वयम्भूक्षत्रे च्वना श्रद्धा, भक्ति पूर्वकं उगु धर्म  
धातु मण्डल दयेका माघ शुक्ल पञ्चमि खुन्हु श्री बागीश्वर गुरूयात  
लुमंका पूजा याइ, भाव याइ, ध्यान याइ, बोधिचित्तोत्पत्ति याना  
मन्त्र धारणी पाठ याइ उह्येसित सकल विद्यां पारंगत जुया निर्वृत्ति  
मार्ग प्राप्त जुइ ।

अथे जृगुलिं गुह्येसियाँ धर्म श्री मित्रयात धर्मधातुया दिक्षा  
व्यूगु माघ शुक्ल श्री पञ्चमि खुन्हु सकल तथागतपिनि छेँ जुया  
च्वंगु धर्मधातु मण्डल दयेका श्रद्धाभावं पूजा याइ, उह्य मनुष्यया  
शास्त्रादि सकल विद्यां पारंगत जुइ । काय वाक् चित्त शुद्ध  
जुया सकल ऋद्धि सिद्धि प्राप्त जुइ । महाभिन्न पद लाना सद्धर्म  
चले याइह्य जुइ । थनंलि कथःथे बोधि सामग्रीं पूर्ण जुया  
स्वंगुभेदं बोधिज्ञान लाना सम्बोधि ज्ञानया आश्रय जुइ । संसार हित  
यायेत बोधिचर्या व्रत च्वना बोधिसत्त्व महासत्त्व जुइ । चतुर्ब्रह्म  
विहार लाना सदानं मङ्गल जुया श्री संम्याक्सम्बोधि ज्ञान लाना  
निर्वाण पद लाइह्य जुइ धका श्री शाक्यसिंह भगवानं आज्ञा दयेका  
विज्यात । श्री शाक्यमुनिया आज्ञा न्याना सकल सभालोकपिं बोध  
जुया महा आनन्दं च्वंच्वन ।

॥ नमो बुद्धाय ॥ नमो धर्माय ॥ नमो सघाय ॥

## स्वयम्भू पुराण सप्तमोऽध्याय प्रारम्भ



पुनर्वार मैत्री बोधिसत्त्वं श्री भगवानयात वन्दना याना थुकथं  
बिन्तियात- हे सर्वज्ञ, भगवान बुद्ध ! छलपोलया दयां श्री स्वयम्भू  
ज्योतिरुप धर्मधातु वागीश्वर धका नां सिद्ध जृगु खँ न्यने धुन ।  
हे शास्ता ! श्री स्वयम्भू ज्योतिरुपयात गवले, सुनां लोहँ फाँतं त्वपुया  
चैत्य स्थापना यात थुगु सम्पूर्ण खँ जिमित करुणा तया आज्ञा  
दयेका बिज्याहुँ । थुलि मैत्री बोधिसत्त्वया बिन्ति न्यना श्री शाक्य  
मुनि भगवानं आज्ञा जुया बिज्यात- हे मैत्री बोधिसत्त्व ! छं मन  
तया न्यँ । श्री स्वयम्भूयात गुप्त यानाः थुगु चैत्य स्थापना याःगु खँ  
जिं कने धका सकल सभा मण्डलं ताये दयेक थुगु खँ आज्ञा  
जुया बिज्यात-

श्री कनकमुनि बुद्ध निर्वाण जुया बिज्याये धुँकुसँलि, मनुष्य  
तय् आयु ५०,००० न्येदोल दँ जुया वसँलि छुं कालान्तर लिपा कासी  
देशे काश्यप नाम संम्यक्सम्बुद्ध सकलसियाँ गुरू जुया उत्पन्न जुया  
बिज्यात । शाक्यमुनीन्द्रं आज्ञा जुया बिज्यात- जि उगु इलय्

ज्योतिराज नांहा बोधिसत्त्व जुया श्री काश्यप बुद्धया सर्वसंघ जुयाः  
वसपोलया चर्या चलये याना च्वना ।

छन्हुया दिने स्वर्ग, मर्त्य, पातालया अधिपति जुया बिज्याःह  
श्री काश्यप संम्यक्सम्बुद्धं धर्म उपदेश बिया बिज्यायेत संघपिं  
सहितयाना सभामण्डलस बिज्याःगु जुल । थुगु ईलय् श्री काश्यप  
बुद्धं आज्ञा दयेका बिज्याइगु सद्धर्म बाखँ न्यने धका ब्रह्मा, इन्द्र,  
सकल देव गण नागसिद्धा गण, गन्धर्व गण, किन्नर गण, साध्य,  
महोरग, दैत्य, राक्षसादि सकल लोकपिं बुद्ध बिज्याना च्वंगु थासे वया  
सकलें थथःगु थासे फेतुना च्वन । हे मैत्री बोधिसत्त्व ! अबले श्री  
काश्यप संम्यक्सम्बुद्धं सकलसियाँ तायेदयेक आदि, मध्य, अन्त कल्याण  
जुइगु धर्म कथा आज्ञा जुया बिज्यात थजाःगु सद्धर्म कथा न्यना  
सभालोक सकलें बोध जुया बोधिब्रत चलये याःगु जुल ।

थुगु ईलय् श्री मञ्जुदेवाचार्य पुच्छाग्रस थव स्त्रीपिं सहित योग  
द्वारा समाधितेजं स्वह्मसियां शरीर च्याका अन्तरधान जुया बिज्याःगु  
जुल । उगु ईलय्हे वसपोलपिनिगु अस्तिधातु पट्टन जुया वःगुयात गर्म  
तया चैत्य दयेका तःगुलिं उगु चैत्ययात मञ्जुपट्टन चैत्य (मञ्जुश्री  
चैत्य) धाःगु खः । थुगु चैत्ये गुह्येसियाँ पूजाभाव याना ध्यान याइ,  
स्तोत्र याइ व सकल विद्यां पूर्ण जुया विद्वान जुया बोधिसम्भारं  
पूर्ण जुइ ।

थनं लिपा गौड देशे श्री वज्रसत्त्वया निर्माण काय जुया  
बिज्याःह प्रचण्ड देव नांहा जुजु जुया बिज्याना च्वन । वसपोलया

चरण सेविका शक्तिदेवी महारानी जुया च्वन । वसपोलपिं राजा रानी थःगु देशवासी प्रजालोकपिंत धर्म नितिं राज्य यानाः सकल लोकपिंत शुभकर्म चलेयाका च्वन । थुकथं उगु गौड देशे जुजुया धर्मया प्रभावं दुःखि, छुँ-लुच्चा, उपद्रव छुं मदया मङ्गल जुया महा सुभिच्छ जुया च्वन ।

उगु देशया शहर स्वंगु योजन दयाः एक द्वार. ऋगूहे जक लुखा जुया च्वन । हानं अन छत्राःवेरहे ब्रह्मायणी, महेश्वरी, कौमारी, वैष्णवी, बाराही, इन्द्रायणी, चामुण्डा, महालक्ष्मी, भैरव, काली, गणपति, कुमार, छत्रपाद्य आदि मातृकापिसँ चाहुला च्वंगु वीरमती नांगु पीठ दया च्वन । थथे पीठे सकल लोकपिसँ पूजाभाव याना च्वन । थथिगु सकल मङ्गल पूर्ण जुया च्वंगु गौड राष्ट्र प्रचण्डदेव जुजुं गथे वज्रसत्त्व गुरूं अकनिष्ठा भूवने उद्धार याना बिज्याना च्वन अथेहे सकल लोकपिंत थथःगु कूल अनुसारं धर्म चले याकाः चतुर्वर्ह्य बिहारे तथा थीथि मिले याका तल ।

थुकथं राज्य याना च्वंह्यं जुजुया छन्दु बीतराग चितोत्पत्ति जुया सकल मन्त्री कर्मचारी प्रजालोक सकलें मुंका जुजुं उगु सभा मण्डल स्वया थथे आज्ञा जुया बिज्यात- हे जिगु प्रजालोकपिं ! छिमिसँ सद्धर्मे वाञ्छा याना त्रिरत्नया शरण वना पारमिता चले यानाः बोधि सम्बर चलये या । थुगु पुण्यं याना छिमि सकलसियाँ पुण्य देह जुया कायवाक्चित्त शुद्ध जुया बोधिसत्त्वया पद लाना बोधिसम्भारं पूर्ण जुया राग, द्वेष, माया, मोहयात त्याकाःलि बुद्ध पद लायेदइ । हे लोकपिं ! उकिं आः जिं ध्व कल्पना जाल जुया



च्वंगु, दुःखया मूल जुया च्वंगु थ्व राज्य त्वःता काये शक्तिदेव  
 कुमारयात राज्याभिषेक बिया जि पूर्व सेवा वने त्यना । छिमिसँ जिह्य  
 काये शक्तिदेवयात जितःथेंतुँ मानये यानाः जुजु धका सत्कार याना  
 ति धका सकलसितं सुचं बिया भिगुदिने भिगु इलय् थः कायेयात  
 गौड देशया राज्य सिंहाशने फयतुका जुजु यानाः थः कला शक्तिदेवी  
 नापं प्रचण्डदेव जुजु राज भवनं प्याहाँ बिज्यात । विरमती पीठ आदि  
 मातृका स्थान पत्ति पञ्चामृत पञ्चप्रदीप सहितं पूजा जप योग याना व वं  
 दं दँ तक चाःहिह्युं महा उत्तम जुया च्वंगु आर्यावर्त भूमि प्रसिद्ध,  
 हिमाल प्रसिद्ध थुकिसनं नेपाः प्रसिद्ध थुकिसनं अज्ज श्री स्वयम्भू  
 ज्योतिरुप प्रसिद्ध धैगु सीका श्री प्रचण्ड देव जुजु पीठ पीठ पत्ति  
 सेवा या यां नेपाल मण्डल स्वयाः वःगु जुल । नेपाः थ्यंका श्री  
 ज्योतिरुप स्वयम्भू दर्शन याना श्रद्धा कथं बिधिथें पूजा याना अनेक  
 स्तोत्र याना थुकथं सेवा याःगु जुल ।

प्रचण्ड देव जुजुं उपछन्दोह पीठ श्री खगानना देवी गुह्येश्वरीनं  
 दर्शन याना, पूजा याना, तीर्थ सेवा वना स्नान यानाः अष्ट वैतराग  
 पत्ति स्नानादि याना, पीठ पत्ति चाःहिला, भुक्ति मुक्ति पूजा याना  
 जाप जोग याना, हानं गोशृङ्ग पर्वते श्री स्वयम्भूया थासे शक्तिदेवी  
 सहित वःव यानाः हिया हियं थः स्वयम्भूयात पूजा याना भक्ति  
 भावं च्वंगु जुल । छन्हु प्रचण्ड देवया थथे मत्तिइ वल “थ्व स्वयम्भू  
 ज्योतिरुप कलिकाले मनूतय् रागं युक्त जुलकि अबस्य खुयायंके फु  
 वा स्यंकाबी” धका ज्योतिरुपयात गुप्त यायेगु बिचाः यानाः चैत्य  
 दयेके धयागु मत्तिइ तथा मञ्जुदेवाचार्यया प्रधान शिष्य गुणावर



वज्राचार्ययाथाये वनाः न्यं वंगु जुल- हे गुणाकर आचार्य ! थ्व ज्योति  
रुपयात जिं चैत्य दयेका गुप्त यायेगु इच्छा जुल ज्यू मज्यु आज्ञा  
दयेका विज्याहुँ । थथे प्रचण्ड देवं विन्ति याःगु न्यना गुणाकरं आज्ञा  
जुल- हे महाराजा ! चैत्य दयेका ज्योतिरुपयात गुप्त याये ज्यू तर  
छलपोल भिक्षु जुया भिक्षुचर्या पुनरावृत्ति जुया वज्राचार्याभिषेक  
कया दक्व आचार्य जुया विज्यात धालसा छलपोलं थ्व ज्या याना  
विज्याये ज्यु ।

गुणाकर वज्राचार्यया खँ न्यना प्रवर्ज्या सम्बर कया भिक्षु  
जुइगुहे इच्छायात । गुणाकरं जुजुयात भिक्षु छुयेत गोपुच्छ पर्वतया  
पुच्छाप्रस विज्यानाः चैत्य दयेकाः उगु चैत्यया न्ह्यःने जुजुयात  
प्रवर्ज्या सम्बर बियाः भिक्षु छुना शान्त श्री धयागु नां छुत ।  
भिक्षु जुया याकनंहे भिक्षु चर्या पुनरावृत्ति प्राप्त यानाः हानं  
वसपोल पाखें वज्राचार्याभिषेक कयाः शान्ति श्री या शान्तिकराचार्य  
जुल । तन्त्र मन्त्र जन्त्रादि कर्म त्रिसमाधि ज्ञानं युक्तह्य जुल ।  
योगाचार वना योगाचार्य आदि प्राप्तयात । परचित्त ज्ञान, जाति  
स्मरण ज्ञान थ्वते पञ्चभिक्षु पद लात । अनं श्री खगानना देवीयात  
पञ्चामृत पञ्चप्रदीप आदि पूजाभाव याना जाप योग ध्यान यानाः  
लिपा मध्य लख आदि थ्व उप छन्दोह त्रिचक्र पीठ पत्ति भुक्ति  
मुक्ति पूर्व सेवा विज्याना परम सिद्धि प्राप्त याःगु खत । थुलि  
धुनेव गोशृङ्ग पर्वते विज्यानाः निह्यतेपुलिं ध्यान भावना यानाः स्वयम्भू  
ज्योतिरुपयात गुप्त यायेगु इच्छा मत्तिइ तथा च्वंगु जुल ।

छन्दु शान्तिकराचार्यया इच्छायात पूर्ण यायेगु कारणे सकल  
 इन्द्रादि देवतापिं बिज्याना शान्तिकराचार्ययात आज्ञा जुल- हे शान्ति-  
 कराचाये ! छं इच्छा याना च्वंगु ज्योतिरुप गुप्त यायेगु ज्या जिमिसं  
 याना बी । थुगु खँ न्यानाः शान्तिकराचार्य बिन्तियात- ज्योति-  
 रुपयात रत्नशीलां त्वपुया पात्राकार लक्षणं युक्त यानाः महा चैत्या  
 दयेकेगु इच्छा जुया च्वन धुलिया कारणे छलपोलपिसँ जिगु उपरे  
 करुणा तथाः थुगु कार्य सिद्ध याना बिज्याये माल । देवतापिसँ-  
 ज्यू । धका श्री स्वयम्भू ज्योतिरुप उत्पत्ति जुया च्वंगु पलेस्वांयात  
 छचाखेरं लखं पूर्णगु पुखु दयेकाः रत्नशीलां त्वपुल ।

देवतापिं सकलें मुना ज्वलंत माक्व तयार याना विश्वकर्मादि  
 देवपुत्रपिसँ रत्नशीला (त्वहँ) या द्योने सूत्र पादन यानाः पाद-  
 स्थापना याना जग स्वन । चैत्याया पात्राकार दयेकाः वया द्योने  
 ब्रह्मादि देवतापिसं यलसिँ स्वानाः प्याकुं लाक गल दयेकाः प्याखेरं  
 मिखा च्वत । च्वये चतुर महाराजां हलं पौ तथाबिल । हानं वया  
 द्योने त्रायात्रिसया द्योपिसं शुवर्णया चक्राबलि (चकु) तथाबिल । हानं  
 थ्वयां द्योने यामा भुवनया इन्द्र यामागणपिं सहित जानाः निगूगु  
 चक्राबलि तथाबिल । थुकथंहे तुषिता भुवनया तुषित देवपुत्रपिसँ  
 स्वंगूगु चक्राबलि । निर्माणरति देवलोकपिसँ प्यँगूगु चक्राबलि ।  
 वशवर्ति देवपुत्रपिसं न्यागूगु चक्राबलि । ब्रह्मपार्षद्य भुवनया देवपुत्रपिसँ  
 खुगूगु चक्राबलि । ब्रह्म कायिकाया ब्रह्मागणपिसँ न्हेगूगु चक्राबलि ।  
 ब्रह्म पुरोहितया देवपुत्रपिसँ च्यागूगु चक्राबलि । ब्रह्म भुवनया महा-  
 ब्रह्मां गुंभूगु चक्राबलि । थ्वयां द्योने परिताभा भुवनया देवगणपिसं

भिगूगु चक्रावलि । अप्रमाण देवपुत्रपिसँ भिङ्गूगु चक्रावलि । हानं  
ध्वयां द्योने आभाश्वर भुवनया देवपुत्रपिसँ भिनिगूगु चक्रावलि ।  
ध्वयानं द्योने सुदर्शन भुवनया देवपुत्रपिसँ भिस्वंगूगु चक्रावलि  
(चकु) तथाबिल ।

थुगु कथं त्रयोदश भुवनया इन्द्रादि देवपुत्रादि देवतापिं मुनाः  
तच्चतं स्वभा दयेका त्रयोदश चक्रावलि तथा गजृया नाप-नापं  
मामाःगु सकतां तथाः ध्वज द्वादि ब्वयेकाः अकनिष्ठा भुवन पाखें  
प्यरुयरं तोरण प्यनाः भुवनया चिं तल । धर्मधातु चैत्य लक्षणं  
सम्पूर्णं जुयेक सकल देवतापिसं दयेका सिद्ध यात । अहोरात्र होमादि  
कर्म याना यथाविधिथें- शान्तिकराचार्य गुरू दशकर्मादि प्रतिष्ठा  
याःगु जुल ।

थुलि धुनेव श्री बसुन्धरा देवीयात आराधना याना बसुन्धरा  
पुर (वसपुर) प्रसिद्धयात । वायुदेवता आराधना यानाःनं वायुपुर  
प्रसिद्ध यात । अग्निदेवता आराधना याना अग्निपुर प्रसिद्ध यात ।  
नागदेवता आराधना याना नागपुर प्रसिद्ध यात । थनंलि शान्तिपुर  
धका सप्तविंशति काष्ठ तथा स्वतजाः याना दयेकाः बीरबीरेश्वरपिं  
आराधना यात । तःह्ममल्लि दिग विदिगे देवदेवीपिं स्थापना यात ।  
पञ्चपुर दयेका शान्तिकराचार्य जुलसां शान्तिपुरस बिज्याना सुख  
विवरण धयागु कोष्ठ समाधि योगे च्वना बिज्याःगु जुल ।

थथिंह धर्मधातु स्वयम्भू चत्य दया च्वंगु पर्वतस कार्तिक  
शुक्ल पुढि खुन्हुया दिने पञ्चविहि होला नाना बाद्य थाना धारणि

स्तोत्र वचनाः सुनां श्री स्वयम्भू चेत्य प्रदक्षिणा यानाः पूजा यानाः  
 भजन याइ इपिं सकलें निर्मल शरीर जुया बोधिसत्व महासत्व  
 धायेका महाभिज्ञ पद लानाः बोधिचर्या ब्रत धरलपा कथःथें बोधि  
 सामग्निं पूर्ण जुया दशपारमितां पूर्ण जुया दश भूमीश्वरया स्वामि  
 जुया तथागतया चर्या याये फइ । सर्व मार गण त्याके फुल्ल जुया  
 अर्हत पद लानाः निर्मल अनुत्तर ज्ञान लाइ । सूर्यथें तेज प्रकाश  
 याना श्री संम्यक्सम्बुद्धया पद लानाः सर्वसत्व उद्धार यानाः निर्वाण  
 जुया वने दइ ।

हे मैत्री बोधिसत्व ! थथे धका छिमिसंनं सीका श्री स्वयम्भू  
 ज्योतिरुपयात नाना प्रकारया पुष्प, धूप, दीप, गन्ध, नैवद्य, छत्र  
 ध्वज, प्रताप व च्चामलादि सहित यानाः यथा बिधिथें पूजा याइ,  
 सेवा याई, शुगु धर्म द्वारा सकल सत्वपिं हित जुइ । काय वाक्  
 चित्त शुद्ध जुया श्रावक प्रत्येक महायानया ज्ञान लानाः अनुत्तर  
 सम्बोधि ज्ञान लाना तथागतया पदवि लाइ । शुजोगु गुणमय श्री  
 स्वयम्भू ज्योतिरुप धर्मधातु बागीश्वरयात ३०,०० स्वीस कोटी देव  
 लोकपिसँ, मर्त्यलोकपिसँ, पाताललोकपिसँ व भिगु दिशाया सकल  
 लोकपिं वया पुष्प, धूप, दीप, गन्ध, नैवद्य, छत्र, ध्वज, प्रताप  
 घण्ट व च्चामल आदि अने-अनेगु बिधानं पूजा याना दिग्माला  
 प्यना प्रति दिने, प्रति मासे महा उत्सव याना सदाकालं भजन  
 याना च्वन ।

थयेतुं गुह्येसियाँ तथागतया पद लायेगु इच्छा यात उह्यसिनं  
 श्री स्वयम्भू ज्योतिरुप जिनालयेयात भावना ध्यान यानाः पूजायाये  
 माल धका श्री शाक्यसिंह बुद्धं आज्ञा दयेका बिज्यात । ध्व खँ  
 न्यनाः सभालोकपिं सकलें आनन्दनं चवना चवन ।

( इति श्री स्वयम्भू महापुराणे ज्योतिरुप धर्मघातु बागीश्वर गुप्तिकृत प्रबतंतो नामसप्तमोऽध्याय समाप्त )









॥ नमो बुद्धाय ॥ नमो ज्योतिषाय ॥ नमो मंत्राय ॥

## स्वयम्भू पुराण

### अष्टम अध्याय प्रारम्भ



श्री शाक्यमुनि बुद्धं हाकनं आज्ञा दयेका विज्यात- हे मैत्री बोधिसत्व ! थर्थिगु महासिद्ध जुया च्वंगु उपल्लन्दोह पीठ, हिमालय नेपाल मण्डले श्री ज्योतिरुप स्वयम्भू जिनालय थःथह्वंतुं प्रत्यक्ष जुयाः उत्पत्ति जुया विज्याःगु निमित्तिनं सदाकालं मङ्गल जुयाः उपद्रव फुक्क मदया वन । महा सुभिच्छ जुयाः भद्र कल्याण जुयाः सकल लोकपिसँ दशांकुशल षाप त्वःता त्रिरत्नया शरण वन । चतुर ब्रह्म बिहार धरलपा बोधिचर्या ब्रत च्वनाः ऋद्धि सिद्धि गुण वल सम्पत्ति पूर्ण जुया आनन्दंहे च्वना च्वन । हानं देश-देशान्तरया ज्ञानि, पण्डित, जोगि, मुनि, ऋषि, तपस्वी ब्रह्मचारि, जुजु, भिक्षु आदि देव मनुष्यपिं थुगु नेपाल मण्डले वयाः ज्योतिरुप स्वयम्भू धर्मधातु वागीश्वर जिनालय दर्शण, पूजा, ध्यान भावना याः वया च्वन ।

अनंलि भगवान बुद्धं हाकनं नेपालय् लिपा जुइगु खँ आज्ञा जुया विज्यात । कालान्तर लिपा नेपाले गुणकामदेव जुजु जुइ । उगु इलय् लोकपिं दुरासय, मिसा-मिजं स्यंकाः कामरसय् भुले जुइ ।

लोभादि षडे जुया अदत्तादान, पर प्राण कया प्राणाति पात, मखुगु  
(फता) खँ लहाना: असत्यवादि जुया: मत्य:गु बस्तु सेवन याइ ।  
दुर्जनं धर्म नितिया न्याय त्व:ती, दशांकुशल पापकर्म याना: अधर्मि  
जुया जुइ । थुकथं कलि प्रवेश जुया सद्धर्म दुर्लभ जुइ, गुर्के याना:  
नेपालय् नाना बिघ्नोत्पाद जुया ह्येदँ तक जलवृष्टि जुइमखु । थथिगु  
हा हा कालया दोषं नेपा:या लोकपिं तच्चतं लोक तृष्णा ग्रष्ट जुइ,  
धूत कर्म जुया थ: नये थ: त्वने धयागु अहंकार, ममकारं याना:  
महा अघोर पाप याना जुइ । दुर्भिन्न, शोक-संताप, रोग व्याधि  
कयेका: अन्धकारया महासागरे दुना चवनी । अम्ह ज्ञानीजनपिं लिसे  
बिग्रह याना: दु:ख भोग याना चवनी ।

थुगु कथं थ्व नेपाल मण्डलय् अनावृष्टि दुर्भिन्न जुया: वाम-  
वया: महाकष्ट जुया च्वंगु ह्येदँ पूर्ण जुल । छन्हु गुणकामदेव जुजुं  
प्रजागणपिनि नये त्वने मखना: अम्ह रोगशोकं कयेका च्वंगु, थजा:गु  
सहयानां सहायाये मफुगु दु:ख कष्ट नया: देशे हाहाकाल जुया च्वंगु  
खना: मनय् तच्चतं दु:ख तायेका च्वन । थजा:गु इलये श्री स्वयम्भूया  
अनुभावं जुजु गुणकामदेवया करुणा चित्तोत्पति जुया: थजा:गु मत्तिइ  
लुइका च्वन- “हे भगवान ! प्रजालोकपिनि गजा:गु दु:खं जित:  
क्यन ? आ: जिं गथे याये ? स्व स्व ! नेपा:लय् गुजोगु दु:ख उत्पाद  
जुया च्वंगु, हा हा दैव ! थुगु नेपालय् वामवै च्वंगुयात गथेयाना:  
वयेकेगु ? थुगु उपद्रव, अनिकालया दु:ख शान्ति जुइगु लँ सुनां  
कनीर्थे ? गथे जुया: थुगुभनं उपद्रव जिगुहे पर्यास जुल खै ! निति  
शास्त्रे क्यना त:गु दुकि, गुह्य जुजुं प्रजालोकपिनि दु:ख कष्ट मस्वसें

थः जक सुख भोगे दुना चवनी, उजोहोसित गथे जुजु धाये ?  
प्रजालोकपिनिगु दुःख-सुख बिचाः यानाः प्रजापिनिगु दुःखयात शान्ति  
बीहयात जक धार्थेयाह्य जुजु, महाराजा धका धाये फै ।”

थजाःगु खँत बिचाः यानाः “श्री स्वयम्भुइ बिज्याना च्वंह्य श्री  
वज्राचार्य शान्तिकर गुरुयाथाय् वनाः थुगु खँ कनेमाली, वसपोलं  
करुणा तथा निश्चयेनं वावेका बिज्याइ जुइ” धैगु मत्तिइ तथाः याकनंहे  
छगु सभा दयेकल । गुरु, मन्त्री, कर्मचारी, शैन्य व प्रजालोकपिं  
सकलें मुना च्वंगु उगु सभाये श्री गुणकामदेवं आज्ञा जुल- हे  
सभालोकपिं ! भीगु थ्व नेपाले ह्येदँ तक वा मवयाः महा दुर्भिक्षं  
सकल प्रजालोकपिंत दुःख जुया चवन । थथे छिमित दुःख कष्ट  
जुयेका जि जक जुजु जुयाः ऐश्वर्य भोग यानां छु प्रयोजन ?  
धिककार बरु जिगु जन्म । छु पापं, छु दोषं जिगु पर्यास थुजोगु  
उत्पात जुल ? जिथेंजाःह्य पापी थ्व संसारे सु दै ? उकिं थुगु  
अनावृष्टि शान्त यायेत गोश्रृङ्ग पर्वते वनाः श्री धर्मधातु जिनालय पूजा  
वन्दना यानाः शान्तिकर सिद्धाचार्ययात भीसँ विन्तियाये । उकें  
याकनंहे पूजाया सामग्री ज्वनाः भीपिं स्वयम्भू गोश्रृङ्ग पर्वते वनेनु ।  
धायेवंहे लोकपिं सकसियाँ थः थः दुथे-फुफे पूजा ज्वलंत ज्वनाः  
स्वयम्भू वनेत जुजुया लायकुलिइ थ्यंकः वल । जुजु गुणकामदेवं व  
खनेवहे तच्चतं लय्ताया गुरु, पुरोहित, मन्त्री आदि सकल लोकपिं  
नापं थःगु पूजा ज्वलंत ज्वंकाः याकनंहे गोश्रृङ्ग पर्वत स्वयाः बिज्यात ।

गोश्रृङ्ग पर्वत थ्यँसेलि यथाविधिथें श्री स्वयम्भू धर्मधातु  
बागीश्वरयात वन्दना, पूजा यानाः अनेक स्तोत्र, पाठ, जप, प्रदक्षिणा

यात । थुलि धुनेव शान्तिपूरे वना श्री वज्राचार्य शान्तिकर गुरुया  
पालि भवपुयाः जुजु गुणकामदेवं लहाः निपां हाज्वलपा बिन्तियात-  
हे गुरू ! जिपिं थौं छलपोलया शरण वया । जि पापी, दुःखिह्य  
जुजुयात छलपोलं कृपा तथा बिज्याहुँ । छलपोलं भूत, भविष्य व  
वर्तमानया खँ सकतां स्यू । उकिं सकल नेपाल वासिया निमित्त  
कृपातयाः ह्येदँ तक्कवृष्टि मजुया च्वंगुयात शान्त यानाः सुवृष्टि जुयेकाः  
उद्धार याना बिज्याये माल । छःपिंथें जाःह्य गुरू दयेक-दयेकं देशे  
अनावृष्टि जुयेकाः गुलि च्वने ! अथे जूगुलिं छलपोलं स्वयाः गुकथं  
जी उकथं यानाः सर्व बिघ्न शान्ति यानाः नेपालय् वा वयेका  
बिज्याये माल ।

जुजुया बिन्ति न्यनाः शान्तिकराचार्य आज्ञा जुल- हे गुण-  
कामदेव ! थ्व देशे बिघ्न जूगुहे लोकपिसँ धर्मनिति, गुरू शिच्चा,  
कुलधर्म त्वःताः तृष्णाये जूगु, दशांकुशल पापकर्म याःगुलिं महा  
तःधना च्वंगु नेपाल मण्डले अनावृष्टि जूगुया मू खँ खः । अथे  
जूगुलिं जुजुनिं थःगु दरवारया सुख भोग फुक्क त्याग यानाः प्रजालोक  
पित बिचाः याये माल । मखुगु ज्या त्वःता सुख-दुःख धयागु सक-  
सियाँ उथें खः भाःपा त्रिरत्नया शरण वनेमाल । चतुर्ब्रह्म बिहारे  
च्वनाः सधर्मवांछा यानाः प्रजालोकपित करुणा दृष्टिं स्वयाः राज्य  
यायेमाल । अलेतिनि प्रजालोकपितनं सधर्म चले याकाः मखुगु ज्या  
त्वतके बीमा । थथे जुजु प्रजाया धर्म यानाः गुगुनं देशे दुर्भिक्ष  
उत्पात धयागु गबल्लें जुइ मखु ।

“कर्म धयागु सुकर्म जूसाँ कुकर्म जूसाँ गुबलेंहे चय जुइ मखु । अवश्यनं थह्यं थह्यं यानागु कर्मया फल भोग मयासें मगा भोग यायेहे माः ।” आः थुगु नेपाल देशय् अनावृष्टि, बिधन शान्ति यायेत नाग साधना यानाः बिधान अनुसारं पूजा मयासें जलवृष्टि जुइ मखु । थुगु ज्याय् छःपिंहे उत्तर साधक जुया जिं गथे धाल अथे यायेमाः । हे महाराजा ! हापा सिद्धाचार्यपिसँ गथे नाग साधन कार्ययात अथेतुं जिनं याये छलपोलं धन्दा कया बिज्याये मते । गुरुपिसँ जितः गथे आज्ञा दयेका थकल उकथं नाग साधन यायेत कुंभ, सादुदु, नागछत्र, तुयु हामो, दुर्वा, कुण्ड आदि भुक्ति मुक्ति सकतां जोरे यानाः जितः बिया बिज्याहुँ । नेपाःदे आदि सकल सत्व उद्धार यायेया कारणे थुगु ज्या जिं याना बी ।

थथे गुरुया आज्ञा न्यना थःगु राजकुलसं ल्याहाँ बिज्याना पूजा ज्वलं सकतां ज्वरे यानाः मन्त्री प्रमुख प्रजागणपिं सकलें हानं गोश्रृङ्ग पर्वते थयंकः बिज्यात । हापां श्री स्वयम्भू धर्मधातुयात पूजा दर्शन यात । अनंलि शान्तिपुरे वना श्री शान्तिकराचार्य गुरुया चरण कमले प्रणाम यानाः लहात हाजोपा बिन्तियात— हे गुरु ! छलपोलं आज्ञा जुया बिज्याःकथं नाग साधन यायेगु सामाग्रि सकतां तयार याना हये धुन । हे गुरु ! याकनं सकल प्रजा गणपिनि उपरे करुणा तया थुगु ज्या याना बिज्याहुँ धकाः बिन्तियात ।

थथे बिन्ति याःगु खँ न्यानाः गुह्य श्री वज्रसत्त्वया निर्माण काय वज्राचार्य शान्तिकराचार्य गुरुं आज्ञा दयेका बिज्यात— हे महाराजा ! जिं धाःथे पिनेयागु ज्या फुक्कं छलपोलं याना बिज्याये



माल । थुलि धयाः थः याकःचा शान्तिपुरे दुहाँ विज्याना तन्त्रोक्त  
बिधिथें नाग मण्डल दयेकाः थाये थासे ध्वज छत्र पताकार प्याना  
धण्ठ पुष्प माला आदि मनोहर जुयेक तल । थुगु नेपाल मण्डल्य  
उत्पात शान्तिया निति कायवाक्चित्त एकाग्र याना नवनाग राजापि  
साधना याना बिज्यात ।

श्री सिद्धाचार्य शान्तिकरया मन्त्रया प्रभावं वरुण नागराजा  
आदि अनन्त नागराजा, पद्म नागराजा, तक्षक नागराजा, बालसुकि  
नागराजा, शंखपाल नागराजा, कुलिक नागराजा, महापद्म नागराजा  
यानाः अष्टकुल नागराजापि थः थः परिवार सहित यानाः गोशृङ्ग पर्वते  
वल । परिवारपि जक शान्तिपुरया बाह्यकोष्ठे तथाः नागराजापि जक  
शान्तिकराचार्य दयेका तःगु मण्डले सकलें थः थःगु थासे प्रश्न  
जुया बिज्यात ।

थथे नागराजापि बिज्यायेव श्री शान्तिकराचार्य तच्चतं लय्ताया  
बिचाः याना स्वःबले नव नागपि मध्ये इशानकोणे च्वनीह्य कर्कोटक  
नागराजा छह्य बिमज्याःगु खन । बिनाः कर्कोटक मदयेकं जलवृष्टि  
याये मजिल छाये बिमज्याःगु जुइ धैगु मनय् संदेह जुया हानं योगे  
च्वना ध्यान दृष्टिं स्वया बिज्यात । थबले कर्कोटक नागराजा कुष्ठ  
रोगं कया घोरी जुयाः बिरुप जुया च्वंगुलिं मछाला च्वन धका सीका  
तःधंगु पराक्रमं संयुक्त जुया च्वह्य श्री शान्तिकराचार्य पिहाँ बिज्याना  
थह्य उत्तर साधक याना तथाह्य महावीर गुणकामदेव जुजुयात सःता  
थथे आज्ञा जुया बिज्यात- हे महाराज ! जिं धयागु खँ न्यना  
बिज्याहुँ । थौं थन अष्ट नागराजापि सकलें वया थः थः थासे प्रश्न



जुया च्वने धुंकल कर्कोटक नागराजा ल्हजक बिमज्याःनि विनाः  
कर्कोटक नाग मदेकं वा वयेके फैमखु । अथे जूगुलिं छलपोलं थ्व  
नेपाःया दक्षिण दिशास दँहने बिज्याना याकनं उह्य नागयात सःताः  
व्वना हया बिज्याये माल । छलपोलं विन्तिभाव यानानं मवल धाःसा  
जिं धया कथं बलात्कारं सात्तूसाला हजि । थथे गुरूया आज्ञा न्यना  
गुणकामदेव जुजुं विन्तियात-- हे गुरू ! अथेभनं थाः गाः मदेक  
लखं पूर्ण जुया च्वंगु दँहने क्वहाँ वना नागराजारथे जाःह्यायात जिं  
गथे ज्वना हये ? अपायेजाःगु दँहने जि गथे क्वहाँ वने ? हानं  
स्वँज, गोँज, हितिमङ्ग आदि विषधरत गुलि दै गुलि । थथे जुजुया  
विन्ति न्यना गुरूं आज्ञा दय्कल-- हे गुणकामदेव ! छलपोलं छुं  
धन्दा कया बिज्याये स्वाः । भी राजभवने दुह्य वाउँह्य सल गयाः  
बिज्याहुँ । थ्व जिं साधना याना तयागु सितु तियाः द्वाफोस्वां  
बिया व्वये । अन वनाः थ्यनेवं तःदँहने त्वःता व्व । अबले उगु  
स्वाँ चाः चाः हुला गुथासँ क्वहाँ वनी अनं नाग भवन वनेगु लँ  
खने दयावै अले उगु लं छलपोल बिज्यानाः नाग मण्डले थ्यंका  
कर्कोटक नागराजायात थुकथं विन्ति याना बिज्याहुँ-- हे कर्कोटक !  
जि छःपिंथाये वयागुला स्यू ज्वी ? जि श्री शान्तिकर गुरूया शिष्य  
गुणकामदेव खः । गोश्रृङ्ग पर्वतया शान्तिपुरे च्वना नेपालय् जलवृष्टि  
यायेत नवनाग राजापिं साधना याना बिज्याःगुइलि सकलें बिज्याना  
च्वन छलपोल छह्य जक बिमज्याःगुलिं जितः सःतके हःगु खः नु  
धका छवार, निवार, स्ववार तकं ध्यानं खँ मन्यन धाःसा  
बलात्कारं व्वना हजि ।

थुलि खँ न्यनाः गुरूं ब्यूगु स्वां ज्वना गुरूया चरणे भवपुया  
 वाउँह्य सल गया धनाहद (तदँह) स्वया वंगु जुल । तदँह पुखूया  
 सिथे थ्यँसेलि थह्यं ज्वना वयागु द्वाफो स्वां दँहने त्वःता विल ।  
 द्वाफो स्वां पुखुइलि लायेव अतिवेगं चाहुला नागपुरे क्वाहाँवन । व  
 खनेव जुजुं वाउँह्य सल गया द्वाफो स्वां क्वाहाँ वंथासँ क्वाहाँ  
 वन । नागपुरनं थ्यन । गनं शुवर्णमये, गनं रुपमये थुकथं थाये  
 थासे रत्न थुना तःगुलिं याना तच्चतं जाज्वलेमानं थिना च्वंगुः  
 किंकिनि जाल, छत्र, ध्वज, प्रताप ब्वयेका तःगुलिं याना तच्चतँह  
 न्ह्यइपुगु थाये जुया च्वन । थुजोगु थायेत मध्येनं बाँलाना च्वंगु थासे  
 दिव्य मणिरत्नया सिंहाशने कर्कोटक नागराजा, बिज्याना च्वन ।  
 नाग कन्यापिं, नाग परिवारपिं सहितयानाः महाआनन्दं बिज्याना च्वंह्य  
 नागराजाया न्ह्योने वन्दना याना ब्रखेलिक च्वनाः विन्तियात- हे  
 कर्कोटक नागराजा ! जि मेगु खँय् वयागु मखु थ्व नेपालय् अना-  
 वृष्टि जुया च्वंगु आपालं दथे धुंकल । उकिं थुगु हा हा काल  
 जुया च्वंगु शान्त यायेत सर्वसत्त्वया दुःख नाश यायेत गोश्रृङ्ग पर्वते  
 बिज्याना च्वंह्य शान्तिकराचार्य गुरूं शान्तिपुरे नागमण्डल दयेकाः  
 यथा विधिथे नागराजापिं साधना याना बिज्यात तर उगु मण्डले  
 सकल नागराजापिं बिज्यानाःनं छलपोल विमज्यागुलिं गुरूं जितः वज्रया  
 हल । हे नागेन्द्र ! छःपिं याकनं बिज्याये माल ।

गुणकामदेवया खँ न्यनाःनं उकिया लिसः मव्युसें सुंक च्वना  
 च्वन । जुजुं हाकनं विन्तियात- हे नागराजा ! छाये सुंक च्वना  
 बिज्याना थ्व जिगु जक निम्ति मखु सकल नेपाल वासिया निम्ति

स्वः याकनं विज्याहूँ । अथेनं नागराजां नमवासे थथे मत्तिइ तथा  
 चवन- “अपायेचवतं वां वांलापिं नागराजापिनि ग्होने जि घोरी बिरुप  
 जुया च्वंहा गथे वने ! अथे धयां व शान्तिकराचार्य थः मवसे जुजु  
 वया शिष्य जक व्हया हल । छु नागत मध्ये जि श्रेष्ठ मखुला ?”  
 थजाःगु मत्तिइ ततंहे कर्कोटकया तंपिहाँ वल मिखा ह्याउँक कना  
 हल । जि मदयेकं व नाग साधन मिद्ध जुइ मखु न स्वः ! व  
 गौड देशया जुजुसा जि कालि दँह निसें नागवास दँह तक्रया  
 नागतय् जुजु स्वः । स्वना जिगु बिष दयाः महापराक्रमि जुया च्वनाह्य  
 जि, थ्वं सःतः वयेवं वनेमाः धयागु छु दु ? जिगु थासे जिहे तःधं  
 धैगु घमण्ड यात । थथे अभिमान यानाः सुंक स्वजक स्वया चवन ।

थ्व स्वनाः जुजुं गुरु शान्तिकराचार्यया आज्ञार्थे नागपाशं  
 चिनाः सात्तू साला तःदँहनं थत हये मलाःनि कर्कोटकया सकल  
 नागपरिवारपिसँ बिष ल्होया हल । तर गुरुया मन्त्र द्वारा व बिषं  
 छुलगे मजुल । नागयात लुयाः तःदँहनं थत हया सल गया नाग  
 यात लुया यंकल । गुगु लं कर्कोटकयात नागपाशं चिनाः लुत्तू लुया  
 हःगु स्वः व लँयात थौतकं मनूतय्सं वशिलाचल धका धया तल ।  
 थुकथं गुणकामदेव जुजुं कर्कोटक नागराजायात नागपाशं चिनाः बँय्  
 लुयाः सल गया व्वाके हहँ कथथें गोश्रृङ्ग पर्वतया ववय् ध्यन ।  
 अनं च्वय् यंकेत स्वल तर यंके मफयाः ल्वँहफिं स्वानाः नागयात  
 अनहे चिना तल ।

थवले कर्कोटक नागराजां गुणकामदेवया वल पराक्रम स्वनाः  
 हानं थःत वेदना कष्ट जूगु स्वया छुयाये-छुयाये जुया जुजुयात चिन्तियात-

हे महाराजा गुणकामदेव ! आः जित सास्ति याना बिज्याये मते । जिगु अपराध चेमा याना बिज्याहुँ । छलपोलया आज्ञार्थे जि वये । जितः तसकं स्यात, हे महाराजा ! विरुप जुया च्वंगुलिं जि मछालाः जक छलपोलया खँ मन्यनागु खः, आः जि छलपोलं धाःथे जुल ।

कर्कोटक नागया विन्ति न्यना गुणकामदेव जुजुं विन्तियात- भो नागेन्द्र ! जिह्म गुरु शान्तिकराचार्य आज्ञा जूथे जलवृष्टि यायेया कारणे जिं छलपोलयात सःत वयागु खः तर छलपोलं खँ न्यना बिमज्यागुलिं यानाः थुलि यायेमाःगु खः । आ थुगु अपराध चेमा यानाः जिं धयार्थे बिज्याये माल । कर्कोटकनं-ज्यु धका आज्ञा जुल । जुजुनं नागयात ल्यु ल्यु तथा व वं बातने थ्यँसेलि नागराजां मछा पहलं विन्तियात- जि थनं दुने वयेमखु । जुजुनं नागराजायात अनहे त्वःना शान्तिपुरस वना शान्तिकराचार्यया पालि भवपुया अन जूगु खँ फुक्कं कनाः कर्कोटक विरुप जुयाः नाग सभाय् वये मछागु खँनं कन । अले नागयात बातने तथा तैगु खँनं कना- आः छलपोलं छु याना बिज्याये माःगु खः व याकनं याना बिज्याहुँ धका विन्तियात ।

थथे गुणकामदेव जुजुं कर्कोटक हःगु खँ न्यना शान्तिकराचार्य नागयात सभाय् त्रिमज्याकुसें बातनेतुं तथा बिधि पूर्वकं पूजाभाव याना मेपिं च्याह्य नागतयूतनं उकथंहे पूजाभाव याना थुकथं विन्ति

यात- हे नागराजापिं ! नेपालय् वा मवगु ह्यद्दं दयेधुंकल लोकपिनि नये मखना तच्चतंहे हाहाकार जुयाः दुःख जूगुलिं वा वयेकेत छलपोलपिंत सःतागु खः । आः छलपोलपिसँ जलवृष्टि याना बिज्याये माल । मेगु छता खँ, हानं कलिकाले थुकथं याये म्वायेक जलवृष्टि यायेया कारणे छलपोलपिंत जिं छगु बिन्तियाये छलपोलपिसँ कृपातया बिज्याये माली । छलपोलपिसँ थः थःगु हि भचा भचा दान याना बिज्याहुँ धका बिन्ति याना बिज्यात ।

शान्तिकराचार्यया बिन्ति न्यना नागपिसँ- ज्यू जिमिगु हि कया बिज्याहुँ धका लोकपिनि उपरे करुणा तथा आज्ञा जुया बिज्याःगु जुल । नागपिसँ आज्ञा जुया बिज्यासँलि शान्तिकराचार्य दुमिके च्वंगु नुगःया हि लिकाना बिज्याःगु जुल । नागत्यगु नुगःया हि भचा भचा लिकाना गुरू व हिं नागमण्डल च्वयाः दश कर्मादि प्रतिष्ठा याना नागपुरे तथा विधि अनुसारं पूजा यानाः नागपिंत त्वःता बिज्यात ।

थुगु विधि बिधान कथं पूजाभावया प्रभावं ह्यद्दं तक वा मवया च्वंगु नेपालय् छक्कलंहे सर्ग छगुलिंहे सुपाचं त्वपूवल छक्कलंहे बाफय् वल । थुकथं शान्तिकराचार्य गुरू नवनाग साधना याना जलवृष्टि यायेगु ज्या फुकं सिधय्के धुंका नवनागया हिं च्वयागु मण्डल सहित ज्वना शान्तिपुरसतुं द्वाहाँ बिज्याःगु जुल । उखुन्हु निसँ नेपालय् वा वया दुर्भिन्न शान्त जुया सुभिन्न सामा बाली बधये जुया सकल नेपाःवासितय् सुख वृद्धि जूगु जुल ।

थुलि जुसेलि सकल प्रजालोकपिसं तच्चतं हर्षमान याना श्री  
स्वयम्भू जिनालये पूजा याना द्वादशतीर्थ, अष्ट वैतराग आदि तीर्थे  
स्नान याना त्रिरत्नया शरण बना सद्धर्म चलेयात । थुकथं सकल  
प्रजालोकपिं पूण्यकर्म चित्तोत्पति याना च्वंगु जुल ।

( थुगु खं सकता (अष्टमोध्यायायगागु जक) बुद्धकाल लिपायागु छः )

( इति श्री स्वयम्भू महापुराणे श्री नाग साधना जलवृष्टि चारणे नाम अष्टमोध्याय ॥ )





॥ नमो बुद्धाय ॥ नमो धर्माय ॥ नमो संघाय ॥

## स्वयम्भू पुराण

### नवमोध्याय प्रारम्भ



पुनर्वार श्री भगवान् बुद्धं मैत्री बोधिसत्त्वयात् आज्ञा दयेका बिज्यात्— श्री शान्तिकराचार्य गौड देशं वीरमती पीठ सेवा यानाः नेपाल मण्डले उप छन्दोह पीठे पूर्व सेवा बिज्याना गुणाकर वज्राचार्यया पाखें प्रवर्ज्या सम्बर कया शान्ति श्री भिक्षु धका भिक्षु चर्या पुनरावृत्ति जुया वज्राचार्याभिषेक कया शान्तिकराचार्य श्री स्वयम्भू ज्योतिरूप गुप्त यात् । स्वयम्भू चैत्य दयेके धुसेलि दश-कर्मादि प्रतिस्था याना पञ्चपूर, नागपूर, वसपूर, अग्निपूर व वायुपूर स्थापना या नापं शान्तिपूर स्थापना याना शान्तिपूरे श्री सुख विवरण धयागु कोष्ठे चिन्तामणि वृत्तं कुयेका जवे चिन्तामणि घट तथा देपाये पाखे चिन्तामणि रत्नया सिंहाशने वज्रासनं फेतुना पूर्व मुख याना आस्फाणक समाधि योग्य च्वना बिज्याना च्वन ।

कलि काले कामरुकामाक्ष देशे शशी धयाह्य यक्षराजाया माया धयाह्य यक्षनीया कुले श्री आर्यावलोकितेश्वर लोकनाथ धका जन्म कावनीगु इलय् नेपालय नरेन्द्रदेव जुजुया पर्याप्त भिनिदँ तक

वा मवथा हाहाकार जुइगु इलय् शान्तिकराचार्यया शिष्य वन्धुदत्त  
 वज्राचार्य, नरेन्द्रदेव जुजु व ललित ज्यापु स्वह्मं कामरुकामाक्ष देशे  
 वना श्री वन्धुदत्तं श्री लोकनाथ करुणामय नेपालय् बिज्याका जल  
 वृष्टि याना वाया दुने जाकि दयेका श्री लोकनाथया रथ यात्रा  
 दयेका बिज्याइ ।

युलि लोकनाथ आगमण जुल ।



॥ नमो बुद्धाय ॥ नमो घर्माय ॥ नमो संजाय ॥

स्वयम्भू पुराण

उ प ती र्थ



बागदुवा

बागमती तीर्थे श्री क्रकुछन्द तथागतं अभयानन्द गुणध्वज  
आदि प्यंगु कुलया लोकपित प्रवर्ज्या सम्बर बिया प्रवर्जित भिक्षुयाःगु  
थाये मेला चैत्र कृष्ण अमावशी मेष संक्रान्ति सोमवार स्नान द्वाफो  
स्वाँ दान पिण्डपात्र ॥१॥

तारातीर्थ

तारातीर्थ बागदुवालसंतुं, श्व तारातीर्थे हिमवति शहरयाह्य  
गुणाकर ब्राह्मण्या पुत्र अय्ला श्व त्वना बेश्या गमन याना जूह्य  
धनाकर ब्राह्मण उद्धार जुया वंगु श्व तीर्थे मेला चैत्र शुक्ल पञ्चमी  
बुधवार स्नान उफोस्वाँ, दान ताराशत नाम ॥२॥

सुन्दरीजल

सुन्दरीजल सहस्रधारा तीर्थ, श्व तीर्थे स्वर्गया गरूड व पातालया  
नाग उद्धार जुया वंगु थाये । मेला जेष्ठ शुक्ल दशमी स्नान  
केतुकि स्वाँ, दान मत ॥३॥

## कागेश्वर

कागेश्वर व्यम तीर्थ, थन महादेवया कला पार्वती उद्धार जुया वंगु, थ्व तीर्थे मेला भाद्र शुक्ल अष्टमी स्थान धतुर स्वां, दान त्रिशुल ॥४॥  
तःदँह

तःदँह धनाहद थ्व तीर्थे वारानसीयाह्य हरिदास ब्राह्मण उद्धार जुया वंगु, थ्व तीर्थे मेला पौष शुक्ल दशमी स्नान सितु तियातःगु द्वाफो स्वां, दान पिण्डपात्र ॥५॥

## कुरूवा

कुरूवा काँपोतल तीर्थ, थ्व तीर्थे हिरण्यवासी देशयाह्य धनुधर व्याधा उद्धार जुया वंगु, थ्व तीर्थया मेला माघ पुहि मकसंक्रान्ति स्नान उफो स्वां, दान भूमी दान ॥६॥

## मातातीर्थ

मातातीर्थ मातृतीर्थ, थ्व तीर्थे मां लिसे छुते जुया च्वंहा काये मचा सुमेधं मांयात अगतित्वं उद्धार याःगु थ्व तीर्थे मेला चैत्रकृष्ण पक्षे औंसि स्नान नस्वा, दान निसला ॥७॥

## सरश्वती कुण्ड, ज्ञान कुण्ड

सरश्वती कुण्ड, ज्ञान कुण्ड तीर्थ, थ्व तीर्थे नेपाःवासि मूढत्व मनुर्नाम ब्राह्मण विद्वान जुयाः उद्धार जुया वंगु मेला माघ शुक्ल श्रीपञ्चमी स्नान सरश्वती स्वां, दान सफू ॥८॥

## मच्छेनारायण

मच्छेगां मीन तीर्थ, थ्व तीर्थे स्वर्गया इन्द्रादि दशदिग

लोकपाल देवतापिनिगु गँप्याखँ हूगु, ज्ञान मुक्ति उद्धार जुया वंगु  
तीर्थया मेला अनला लळिहे स्नान उफो स्वां दान कँय् दय्माये  
चाकुमधि तया दान ॥६॥

गोडावरी

गोडावरी कुराड, थ्व तीर्थे केशनी उपकेशनी धिलाच्व माजु फुच्व  
माजु गोमाता धालसाँ सायात उद्धार याःगु मेला श्रावण महिना  
लळि स्नान पञ्चगव्य, दान पिण्डपात्र ॥१०॥

नाला

नाला पुण्य माता तीर्थ, थ्व तीर्थे नागरी देश धालसाँ नाला  
देशयाह्य दिर्घरथ महाराजा प्रभृति सकललोकपिं उपोषध अष्टमी  
व्रत दना उद्धार जूगु श्री नाला करुणामय स्थापनायाःगु थ्व तीर्थे  
मेला कार्तिक शुक्ल मूखः अष्टमी स्नान द्वाफो स्वां दान चन्द्रमा ॥११॥

चण्डेश्वरी

भोत चण्डेश्वरी उग्र तीर्थ, थ्व तीर्थे वीर चण्डी दैत्य उद्धार  
जुया वंगु थ्व तीर्थया मेला वैशाख शुक्ल पक्ष पुहि स्नान हामो  
दान तुयुहामो, लुँ वहया आत्माविम्ब ॥१२॥

पनौती

पनौती सची तीर्थ, थ्व तीर्थे विरुपाक्ष उद्धार जुया वंगु तीर्थया  
मेला माघ लळि स्नान पञ्चपल्लव, दान पिण्डपात्र ॥१३॥

शंखुचा

नमोदा धर्मरती तीर्थ, थ्व तीर्थया च्वय् च्वंगु गन्धमाद पर्वते  
पनौती देशयाह्य जुजुया काये महासत्र कुमारं थःगु ला थह्यं ध्यना

मां धुँयात ला नकःवंह्य उह्य महासत्वया अस्ति धातु दुथनाः दयेका  
तःगु चैत्र स्थापना जृगु मेला कार्तिक पूर्णिमा सकिमिला पुहि स्नान  
पञ्च सुगन्ध दान वस्त्र ॥१४॥

दोलाघाट

देवरती तीर्थ, श्व तीर्थे स्वर्गया अपशरापिसं श्री करुणामयया  
अष्टमी व्रत दना उद्धार जुया वंगु श्व तीर्थया मेला मकरसंक्रान्ति  
स्नान पञ्च पल्लव दान सिरा ॥१५॥

सांगु देवी घाट

धर्मवती तीर्थ, श्व तीर्थ नुवाकोतया जुजुपि उद्धार जुया वंगु  
मेला चैत्र पूर्णिमा स्नान पञ्चसुगन्ध, दान सिसावुसा ॥१६॥

लहुती तीर्थ

लहुती तीर्थ तर नीनिधा हिति मखु श्व फुक्व हितियां चव्य  
लः लुया वया च्वंगु थासे धाराधर तीर्थ श्व तीर्थे वालसुकि  
नागया काये मूचलिण्ड नाग उद्धार जुया वंगु मेला चैत्र शुक्ल  
पुहि व मेषसंक्रान्ति चूलातकि श्व तीर्थया मेला जुइ श्व तीर्थे  
स्नान पञ्चसुगन्ध, दान जल घट ॥१७॥

तोखा

सपन तीर्थ स्वपना तीर्थ, श्व तीर्थे महारोगि चखुंचा  
उद्धार जुया वंगु मेला मेषसंक्रान्ति स्नान जी स्वां, दान हामो  
घ्यो चाकु ॥१८॥



### सक्व तारा तीर्थ

तारा तीर्थं त्व तीर्थं कुलिदपूरयाह्य कुलिकमति सांस देशयाह्य  
सांस महाजन उद्धार जुया वंगु श्री वजूजोगिनी धालसां खङ्गजोगिनी  
स्थापना जूगु शंखदेव जुजु वंगलसिमां जन्म जूगु ॥१६॥

### यंकिदँह

इन्द्रकिल कुण्ड, त्व तीर्थं स्वर्गया इन्द्र उद्धार जुया वंगु  
मेला भाद्र शुक्ल पदा पुहि स्नान हामो, दान मत ॥२०॥

### पशुपती आर्यघाट

वारूवह तीर्थ, त्व तीर्थं नेपाः वासिजन उद्धार जुया वंगु  
मेला कार्तिक शुक्ल मूखः अष्टमी स्नान पले स्वां, दान शय्या ॥२१॥

( इति श्री स्वयम्भू ह.पुनाणे म.शिपन उपनीयं वर्णनोनाम नवमोऽध्याय )





॥ नमो बुद्धाय ॥ नमो धर्माय ॥ नमो सद्भाय ॥

## स्वयम्भू पुराण दशम अध्याय प्रारम्भ



पुनर्वार थनंलि गोपुच्छ पर्वतस वास याना च्वंहा चूडा भिच्छुणी  
सुशील धारणा याना प्रवर्ज्या व्रत कथाः श्री धर्मधातु स्वयम्भू चैत्य  
यात उफो स्वां दोहलपा नवाक्षर मन्त्रं जप याना नयेगु सिसावुसा  
जक नया, धर्मकथा कना बिज्याना च्वंहा श्री शाक्यमुनियातनं  
पञ्चोपचार पूजा याना धर्म श्रवण याना च्वँच्वंगु जुल ।

थबले श्री भगवानं आज्ञा दयेका बिज्यात- हे चूडा ! छं  
न्यँ, थ्व स्वयम्भू पर्वते गुह्य मनुष्यं किंचित् जक दशांकुशलादि पाप  
यात धासां मेमेगु थासे कोति पाप यानागुथें आपालं दोष लाना  
रौरब आदि अनेक नरक दुःख भोग कल्पं-कल्प तक याये माली ।  
अथेहे हानं थुगु पर्वते किंचित् जक धर्म यातसां कोटि पुण्य  
यानागुथा फल प्राप्त जुया आपालं मङ्गल जुया अनेक ऐश्वर्य प्राप्त  
जुइ । थुलिया कारणे थुगु पर्वते किंचित् जक पाप व धर्म यातसां  
आपालं फल प्राप्त जुइ ।

हे चूडा ! थथेया कारणे छनं सीका सकल पापकर्म त्वःता  
त्रिकालेसं थुह्य श्री स्वयम्भू धर्मधातु बागीश्वरयात पूजा याना मन्त्र  
धारणी पाठ यानाः सेवा याना च्वँ । थुगु पुण्यया प्रभावं भिनिदँ  
दयेव छन्त पञ्चभिज्ञ पद निश्चयेनं प्राप्त जुइ धका आज्ञा दयेका  
विज्यात । श्री शाक्यमुनिया थुजोगु आज्ञा न्यना चूडा भिच्छुनी  
तच्चतं लयूताया बुद्ध भगवानयात वन्दना यानाः उगु स्वयम्भू पर्वतसँ वास  
याना च्वंगु जुल ।

श्री स्वयम्भू पर्वतया पश्चिम भागे गोपुच्छ पर्वते च्वनाः गथे  
श्री शाक्यमुनि बुद्धं आज्ञा जुया विज्याःगु खः अथेहे श्री स्वयम्भू  
पुराण सधर्म कथा ज्ञानि परिडतजनपिसं यथार्थ प्रमाणथे व्याख्या  
यानाः कने माल । हानं परिडत धर्म भानकपिसँ प्रकास यानाः कनेगु  
महाउत्तमनं खः विहार, पुण्यक्षत्र, तीर्थ थुजोगु थासे जक सभा दयेका  
व्याख्यान यानाः कनेगु उत्तम जुइ । सन्ध्याकाले अशुद्ध थासे मकने  
अशुद्धगु थाये शुद्ध यानाः तिनि कने । सुनँ मनुष्यं थुगु सधर्म  
कथा स्वयम्भू पुराण कना च्वंगु अप्रतित जुया अश्रद्धा कथं निन्द्रा  
यानाः न्यन धालसा व मनुष्यं नरक भोक यायेमाली । अथे जूगुलिं  
श्रोतादि (धर्मकथा न्यनीपिं) व धर्म भाणक (कनीह्य परिडत) निह्य-  
सियां एकाग्र चित्तं शुद्धात्मां कनेमाल, न्यनेमाल ।

थुकथं गुह्य परिडतं नियमं कना च्वनी, गुह्यसियाँ थुगु धर्म  
धातु ज्योतिरुप स्वयम्भू उत्पति जुया विज्याःगु स्वयम्भू पुराणया  
सद्धर्म कथा न्यना च्वनी थजाःपिं पुणयात्मा जुया च्वंपिं मनुष्यपिं  
उगु पुण्यया प्रभावं सर्व पापं मुक्त जुया सर्व क्लेशावर्णं मुक्त जुया

दश कुशल पाप कर्म धीहे मफया राग, द्वेष, मोह, माया आदि नाश जुयाः महा बुद्धिमानि अत्यन्त तेजस्वी जुगा वड । हानं सद्धर्म गुणरूपि सम्पनि पूर्ण जुया सकलसत्त्व हित यायेगु चित्त जुया महा त्यागिवन्त जुया, दान धर्मे ग्यंहा जुड । थुकथं धर्मचित्त जुया, कायवाक्चित्त शुद्ध जुया, दुर्गतिस गुवलें जन्म जुइ स्वाःला, शतगती जन्म जुया दशपारमिता पूर्ण ज्वंहा जुया दशज्ञान लाना दशभूमि इश्वर जुया सकल सामाग्रिनं पूर्ण जुया सर्व मारगण त्याका बोधिसम्भारं पूर्ण जुया श्री संम्यक्सम्बुद्ध पद तक लाना महामोक्ष वनीहा जुइ ।

श्री स्वयम्भू ज्योतिरूप उत्पति जूगु स्वयम्भू पुराण सद्धर्म कथाया सफू दयेकाः थःगु छें तथा सद्धर्म कनाः न्यंकाः बोधिव्रत चले या, याकि । थुगु पुण्यद्वारा सदानं मङ्गल जुया देशेन सुभिन्न जुइ । महा ऐश्वर्य सुखभोग लाना अन्तस मोक्षगति प्राप्त जुइ । थथे सद्धर्म स्वयम्भू पुराण कथा गुह्यसें न्यनी, गुह्यसें कनी, गुह्यसें सफू दयेकी उह्य पुण्यात्मापिन्त कृपा दृष्टिं स्वया सदाकालं मङ्गल याना रक्षा याइ । हानं प्रज्ञा पारमितादि दशपारमिता देवीपिसँ सदां मङ्गल याना बोधि सामाग्रिनं पूर्ण जुइका बिइ । श्री आर्यावलोकितेश्वर करुणामय आदि सकल बोधिसत्त्वपिसँ सदां कल्याण याना रक्षा याना उद्धार याइ ।

हानं ब्रह्मा, विष्णु, महेश्वर, इन्द्रादि सकल लोकपाल गणपिसँ सुदृष्टिनं स्वयाः रक्षा याइ । हानं गन्धर्व, किन्नर, यक्ष, राक्षस, नाग, गरूड, कुम्भाण्ड गण थ्वते सकलसियां श्री स्वयम्भू पुराण

कंह्य, न्यंह्य, च्वह्य, सफू दयेका तःह्य थथेंजापित सुट्टिं स्वया सदां रक्षा याइ । हानं विद्याधर, सिद्धागण साध्यगण थुपिं सकसियांनं श्री स्वयम्भू पुराण कंह्य, न्यंह्य, सफू च्वःह्य, दयेकूह्य थथेंजापित सदां मङ्गल याना उद्धार याइ । हानं भूत, प्रेत, पिशाच आदिं दुष्टचित्त जुयावंपिं मारगणपिसँ थ्व सफू दुगु थासे पलातये फइमखु, थिइ फइमखु । हानं गुह्य मनुष्यं श्री स्वयम्भू पुराण सद्धर्म कथा सफू च्वइ, च्वकातइ, च्वकाः प्रकास याइ, सफू दान याइ, थुगु महायान सूत्र श्री ज्योतिरुप स्वयम्भू उत्पति, सद्धर्म कथा, स्वयम्भू पुराण च्वयागु सफू दान यानागु फलं याकनं क्लेशावर्ण मुक्त जुया बोधिचित्त उत्पति जुया पुण्यसम्भारं पूर्ण जुया अनुत्तर संम्यक्सम्बोधि प्राप्त जुइ । थुगु स्वयम्भू पुराण सफू च्वकूह्येसित, महायान सफू च्वकूगु फल प्राप्त जुइ । हानं गुह्येसियां थ्व स्वयम्भू पुराण सफू थःगु छें तथा सद्धर्म कनी पूजा याइ उह्य मनुष्ययात थुगु पुण्यं सुखावति भुवनय् वास लाइ ।

गुह्येसियां थ्व ज्योतिरुप स्वयम्भू उत्पति कथा स्वयम्भू पुराण च्वया दशकर्मादि प्रतिष्ठा याना तइ उह्येसिया छें सर्वदुःख नास जुया ऐश्वर्य स्थिर जुइ । बुद्धिमानिपिसँ श्री ज्योतिरुपया सत्कथा च्वया, च्वका थह्यं धारणा याना मेपित कनी, कंकी सदां लुमंका च्वनी उह्य अन्तकारे जिनपुत्रपिसँ बोधिसत्वपिसँ रक्षा याकाः सुखावति भुवनय् अमिताम्भ तथागतया थाये जन्म कावने दइ । थ्व स्वयम्भू पुराण सद्धर्म कथा न्यंका, न्यना च्वंपित पूजा याना थह्यं फक्व भोजन याकी उह्य दानपतियात सकल बुद्धपिसँ, प्रत्येक बुद्धपिसँ,



बोधिसत्त्वपिसँ, भिच्छुपिसँ, जोगिपिसँ, आचार्यपित भोजन याकागु फल प्राप्त जुइ । थुलिया कारणे स्वयम्भू पुराण च्वेपित, कनीपित, न्यनीपित पूजा याये माने याये योग्य जू ।

हानं थुगु स्वयम्भू पुराण सद्धर्म कथा च्वथा, कंका, कना न्यंकागु पुण्य फल बुद्ध बोधिसत्त्वपित भोजन याकागुति फल प्राप्त जुइ । भिच्छुपित भोजन याकागु फल प्राप्त जुइ । हानं गुरू वज्राचार्य व बुद्धाचार्यपितनं भोजन याकागु फल प्राप्त जुइ । थथे थुगु स्वयम्भू पुराण सफू च्वका सद्धर्म प्रचार याकृह्यायात सकन बुद्ध बोधिसत्त्वपिसँ सदां रक्षा याइ । हानं इन्द्रादि लोकपालपिसँ सुदृष्टि स्वया सर्व बिघ्न निवारण याना सर्वत्र संरक्षा याइ । थुगु पुण्यं शत्रु धयापि मदया सकल मित्रभाव जुई, दुष्ट जनपिं सकले हित चित्त जुइ । वन जन्तुया भयनं गुवल्ले दैमखु । राज भये, चौर भये, जल भये, सर्पया भये, अभिचार भये, कुष्ठरोगादि भये, वात पित्त श्लेष्म त्रिधातुक आदि थथिगु भये गुवल्लेहे दइ मखु । न्ह्यागु थासे वंसाँ उपद्रवादि धैगुहे दैमखु सदाकालं मङ्गल जुया च्वनी ।

अथे जूगुलि थ्व संसारया सकल लोकपिसँ श्री स्वयम्भूया उत्पत्ति कथा स्वयम्भू पुराणे सद्धर्म कथा न्यना सदां श्री स्वयम्भूया शरण वना सेवा याये माल ।

श्री शाक्यमुनीन्द्रं आज्ञा जुया बिज्यात- हे मैत्री बोधिसत्त्व, हे सर्वसंघपिं ! गुह्यसियां गुगुथासे श्री स्वयम्भू पुराण कना च्वनी उगु थाये महाउत्तम पुण्य क्षेत्र धका सीकि । गथे श्री ज्योतिरूप

स्वयम्भू विराजमान जुया विज्याःगु पर्वत उत्तम जुया चवन, अथेहे  
थुगु धर्म व्याख्यान जूगु थाये महाउत्तम धका सीकि । थुगु श्री  
स्वयम्भू पुराण सधर्म कथा व्याख्यान जुया च्वंगु थासे सकल  
तथागतपिसँ प्रत्येक बुद्धपिसँ बोधिसत्त्वपिसँ सुदृष्टिं स्वथा सदां रक्षा  
याइ । हानं थर्थेजागु धर्मकथा प्रकाश जुया च्वंगु देशे सदाकालं  
इले व्यले जलवृष्टि जुया सुभिन्ने जुइ । गुकें याना वा, व्छ आदि  
सामा बधये जुइ ।

थर्थेजागु श्री स्वयम्भू पुराण व्याख्यान जुया च्वंगु राज्ये जुजुं  
धर्मया न्यायं सकल प्रजालोकपितं प्रतिपाल याये फै । थुलित महा  
उत्तम जुया च्वंगु श्री ज्योतिरुप स्वयम्भू उत्पति स्वयम्भू पुराण  
सद्धर्म कथा सकल लोकं सफू च्वया, कना, न्यंका प्रचार याना  
सकल देवलोकया आश्रये जुया विज्याह्य श्री स्वयम्भूयात स्मरण  
याना च्वनेमाल धका श्री शाक्य मुनीन्द्र भगवान बुद्धं मैत्री बोधि-  
सत्त्वयात आज्ञा दयेका विज्याःगु खँ कुट्कुटाराम महाविहारे उपगुप्त  
भिक्षुं सम्राट अशोक महाराजायात आज्ञा दयेका विज्याःगु स्वयम्भू  
महापुराण कवचाल ।

( इति श्री स्वयम्भू पुराण पुनर्लेखनं प्रणयितुं दत्तव्यं समाप्त )

ये धर्मा हेतु प्रभवा हेतुतेषां तथागतः ।  
ह्यवदत्तेषांच यो निरोध एवंवादि महाश्रवण ॥





लेखक—बद्रीरत्न बज्राचार्य सबल बाहा यें